




Bibliotheca S. J.
Les Fontaines
CHANTILLY

E

689/101



E. 689/101

A. 20.2



IEROSOLYMITANA


PEREGRINATIO

ILLVSTRISSIMI PRINCIPIS
NICOLAI CHRISTOPHORI
RADZIVILI

DVCIS OLICÆ ET NIESVISII
PALATINI VILNENSIS
MILITIS IEROSOLYMITANI, ETC.

Primum à THOMA TRETERO
Custode Varmienſi
ex Polonico ſermone in Latinum translata:

*Nunc varie aucta, et correctius
in lucem edita.*



THE
HISTORY
OF THE
CITY OF
NEW-YORK
FROM
THE
FIRST
SETTLEMENT
TO
THE
PRESENT
TIME
BY
JOHN
ROBERTSON
ESQ.
OF
NEW-YORK
IN
THE
YEAR
1790

NEW-YORK:
PRINTED BY
J. ROBERTSON
AT THE
PRESS OF
J. ROBERTSON
IN THE
YEAR
1790

THOMAS TRETERVS

CVSTOS VARMIENSIS

CHRISTIANO LECTORI

S. D.



A est, Christiane Lector, eminentioris virtutis dignitas & pulchritudo, vt cultores suos non solum in hac mortali vita verè beatos & felices reddat; sed apud homines etià, qui aliquo rationis acumine præditi, de rebus magis incorruptè iudicant, nominis perpetuitate, ac optimæ famæ immortalitate donet, eamque ad omnem posteritatem maxima cum gloria transmittat. Vnde comparatum est, vt non modò illustrium virorum dicta & facta posteris in admiratione sint; sed vt ipsa quoque loca, in quibus olim inter homines constituti versabantur, è præclaris eorum actionibus venerationē quamdam & maiestatem induta & consecuta videantur. Insignis ille morum & disciplinæ ciuilis magister L. Annæus Seneca, ad villā Scipionis Africani prope Linternum ex industria se conferens, adoratis Manibus eius & ara, quam sepulchrum tanti viri fuisse suspicabatur, mores illius, ex ædificiorum, cisternæ, ac balneoli structura contemplatus, magnam se voluptatem inde percepisse, memoriæ prodidit; indèq. multa, quæ ad deprauatos æui sui mores in melius reformandos pertinerent, documenta deprompsit. Quòd si vir ille. Christianæ Philosophiæ institutis necdum imbutus, ex visitatione monumentorum clarissimi
Epist. 86.
illius

illius Imperatoris, vitæ præcepta capiebat: quid fecisse censendum est maiores nostros sacrosanctæ fidei mysterijs eruditos, in obeundis sacris Palæstinæ locis; in quibus verus Deus & homo CHRISTVS IESVS salutem nostram operatus, spiritualē & æternam ciuitatem Ierusalem supra fundamenta Apostolorum & Prophetarum è viuis lapidibus ædificauit: turrin viuificæ Crucis ad custodiam vineæ suæ contra malignorum spirituum incursiones erexit: cisternas aquę viuæ doctrina celesti exundantes, plurimas effodit: balneum sacratissimi lateris sui, copiosa sanguinis & aquæ effusione, ad abluendas peccatorum totius mundi maculas, copiosissimè aperuit: gloriosum denique resurrectionis suæ Sepulchrum, futurę immortalitatis nostrę pignus reliquit? M. Tullius eloquentiæ Latinæ parens, Athenis cū esset, non tam operibus magnificis, exquisitisq. antiquorum artibus delectabatur; quàm recordatione summorum virorum, vbi quisque habitare, vbi sedere, vbi disputare sit solitus: studiosq. eorum etiam sepulchra contemplantur. Quid, cū nostris in Palæstina ductor loca sacra ostendens, Hic, inquit, æterni Patris Verbum, Christus Dominus, de Virgine carnem assumens, natus est; hic in præsepio reclinatus; hic à Magis adoratus; hic baptizatus; hic miracula patrauit; hic docuit: hic captus, hic illusus, hic flagellatus, hic crucifixus, hic sepultus: hinc tertia die de uicta morte surrexit, hinc in cælum ascendit: quanta internæ delectationis suauitate replentur? quos gemitus, quę suspiria, quas lacrymas acceptę salutis memores, Saluatori suo non reddunt? Fecit hoc Paula nobilissima Romana matrona, D. Hieronymo attestante: quæ loca sacra tanto ardore ac studio circumuiuit, vt nisi ad reliqua festinaret, à primis abduci non posset, prostratæque ante Crucem, quasi pendentem Dominum cerneret, adorabat. Fecerunt idem, & adhuc

*De legib.
lib. 2.*

*Hieron. in
Epitaph.
Paulæ ad
Eustochiū
Epist. 2.
Tom. 1.*

huc faciunt, plurimi veræ deuotioni vacantes peregrini: qui inter cetera nostræ salutis monumenta, rupem in Domini morte scissam, eiúsque pretioso sanguine purpuratam, accedentes, & in eius scissuram caput inferentes, in contemplatione redemptionis humanæ defixi, & in admirationem vestigij tam insignis Dominicæ mortis rapti, diuinum aliquid sæpius patiuntur; & se in terris positos obliti, mente cælestia conscendentes, pro lapideis cordibus, quæ peccatorum profunda cogitatio mouere non poterat, in hoc loco carnea statim consequuntur, & amore sui Redemptoris ita emolliuntur ac liquefcunt, vt admirabili Christi morientis spectaculo præsentibus adesse videantur. Proditum est memoriæ, quemdam ex his, cum in montem Oliueti ad adoranda Christi in cælum ascendentis vestigia accessisset, tanto spiritus feruore correptum fuisse, vt humi prostratus, inter oscula, singultus, & lacrymas vberius profusas, exspiraret. Felix planè & beatus, cui tantum beneficium diuinitus obtigit, vt ascendentis Christi memoriam, felicissimo vitæ perennis introitu, subsequi meruerit. Hic deploranda venit hæreticorum nostri temporis cæcitas & amentia: qui cum ad obliteranda Christi Saluatoris beneficia, & Sanctorum qui Deo placuerunt eleuanda merita, omnes ingenij neruos intendere soleant; peregrinationibus quæ ad sancta loca suscipiuntur, perpetuum indicare bellum, hoc maximè consilio, non dubitarunt, vt sola fide, quam plenis buccis concrepant, inflati, bonis operibus, spiritualibus animæ exercitationibus, & mortificationi membrorum nuntium remittentes, tãto securius in domo propriij sensus residere, & super ollas carniū, plusquam in Ægyptiaca satarum seruitute sedendo, panem impietatis & mendacij comedere illis liceat: ita de salute æterna securi, vt absq; ocreis & penula, se in cælum euolatu-

*P. Dublin.
lus in Ho-
dæp. Ierof.
lib. 1.*

*Præf. 4. &
10.*

dant. Sed arctiorem ad sempiternā gloriam, quā isti
miseri arbitrantur, esse viam, Catholica mater Eccle-
sia, & sanctissimorū virorum exempla nos edocent:
qui inter ceteras carnis in obsequiū spiritus redigen-
dę rationes, peregrinationi quoque nō postremum
locum esse voluerunt; ex qua cū multiplicia bona
ad animę lucrum prouenire soleant, tria tamē maxi-
mē vtilia eliciuntur. Peregrinationes namq. eiusmo-
di, quę recto fine instituuntur, in honorem Dei &
Sanctorum eius non mediocrem cedunt; quando-
quidem hinc vel manifestē apparet, eos à nobis ma-
gnifieri, cū ad eorum memorias accedendo, peri-
cula & itinerum labores subire pro nihilo ducimus.
Deinde verò volūtaria illa incommodorum & mo-
lestiarum corporalium, quę peregrinantibus obuia
sunt, perpeßio, pœnitentię, & pro admissis culpis
non postremę satisfactionis, vim habent maximam:
quando membra quę quondam seruibant iniqui-
tati & iniustitię, ad pietatis opera & mortificatio-
nem sensuum, ardore spiritus adiguntur. Postremò
deuotionem in animis piorum (quod superiùs an-
nuimus) in ipsa sanctorum locorum veneratione,
mirificē excitant: quorum attactu horrorem & re-
uerentiam incutiunt, charitatem augent, vitę melio-
ris ad Sanctorum exempla conformandę propo-
situm stabiliunt & confirmant. Hęc & alia multa, cū
Sanctorum locorum visitatio peregrinis conferat;
illa tamen quę Ierosolymam suscipitur, Christi Re-
demptoris intuitu, qui salutis nostrę vestigia, sanctis-
simi sui corporis impressione, hīc plurima reliquit,
longē maiores quā aliunde, fructus acquirere con-
suevit. Nam in hac à Deo, ad salutē nostram procu-
randam, pręlecta terra, in qua steterunt pedes eius,
Christus Dominus magis efficaciter honoratur: pœ-
nitentia, propter infidelīū barbarorum persecutio-
nes, cum maiori merito & Indulgentiarū lucro pera-
gitur:

gitur: deuotio spiritus, cælestiū desiderium, & terrenarum rerū contemptus facilius acquiritur: quarum virtutum viui effectus, quidquid tandē dicant hæretici, in ijs elucent, qui inde ad patriam reuersi, nō minùs in refrænandis animi passionibus, Christo confixos cruci, quàm cum eodē à mortuis se esse resuscitados, in nouitate vitæ ambulando, manifestè comprobant. Horum exemplo diuersarum gentium & conditionum homines, etiam his corruptis temporibus nostris adducti, maxima cum alacritate immensos peregrinationis ad sacra Palæstinæ loca labores suscipere non grauantur: apud quos non tanti fit nouatorum obtrectatio, quāti in spiritualibus bonis proficiendi desiderium: vnde tamquam ad Christianarum virtutum & perfectionis interioris nundinas, cum temporaliū bonorum, & valetudinis quandoque iactura, longos terrarum & maris tractus emetiendo, proficisci pro nihilo ducunt. Rem ita se habere; et si multis exterorum nobilissimorum virorum exemplis comprobare difficile non est, sufficiat tamen tibi, Christiane Lector, hoc vnum domesticum recens nostrum, Ill^{mi} Domini Nicolai Christophori Radziuili, Olicæ & Niesuisij Ducis, Principis & antiquissimæ familiæ splendore & bonorum temporalium affluentia longè clarissimi: qui præter alias ad se propriè pertinentes, etiam ijs rationibus, quibus plurimos moueri suprà meminimus, incitatus, voto piè suscepto, sacram hanc Peregrinationem ita absoluit, vt tales ex ea diuinæ benedictionis & gratiæ fructus reportauerit, quales in omnibus eius actionibus, quæ semper ad gloriam Dei, Catholicæ fidei propagationē, & plurimorum salutē Christo lucrifaciendam referuntur, meridiano Sole clariùs elucēt. Videas in isto laudatissimo Heroë, cum multas magno in Rep. viro dignas dotes, quas pro salute patriæ repræsentanda adhibet, tum præcipuè arden-

*Galat. 2.
Rom. 6.*

tem in Christum Dominū amorem, ceterasq; Christianas virtutes, fixum sibi domicilium constituisse: vnde bonorū operum vberissimi fontes tam copiosè scaturiunt, vt quilibet non obscure iudicare possit, cum talē Christianæ perfectionis scopū attigisse, qui pias peregrinationes obeuntibus propositus esse solet. Nā ad propria feliciter reuersus, & nihilominus in terra peregrinum se esse cōsiderans, in ipso dignitatis fastigio, singularem humilitatem; in bonorum temporariorum copia, temperantiam; in rebus aduersis, tolerantiam; in iuuandis proximis, liberalitatem; in diuino cultu propagando, zelum & munificentiam; in familia gubernanda, paternam sollicitudinem & vigilantiam perpetuò retinet. Et ne in enumerandis eius laudibus prolixior esse, & auribus aliquid dedisse videar; ex vngue leonem, ex operibus magnificis, quæ in oculos hominum incurrunt, Christiana charitate pectus imbutum, benigne Lector, considera: templa, collegia, monasteria, xenodochia, ab ipso excitata, rebúsque omnibus & ad necessitatem, & ad conuenientem splendorem instructa dinumera: videbis proculdubio Ducem hunc optimum, in via mundanæ istius peregrinationis, momentanea & caduca spargere & seminare, vt metere & suo tempore colligere caelestia & æterna possit. Sed ad eius peregrinationis institutum reuertamur. Fuerunt multi nostra, immò & Patrum nostrorum memoria, præstantes pietate & doctrina viri, qui locorum Terræ sanctæ descriptionem methodo & exacta quadam ratione tradiderunt: vix tamen aliquem videre licuit, qui faciliore cōpendio, & maiore rerum varietate, quæ in Palæstina notatu dignæ occurrunt, oculis quodammodò subiecerit, atq; hic ipse noster Ill^{mus} Dominus Radziuilus: qui etiamsi ex professo narrationem hanc, vt in lucem prodiret (quod multi nominis sui celebrandi causa facere solent)

lent) non instituerit; quatuor tamen epistolis ex ipso
itinere, ad familiarissimū suum, quem vti fratrem ama-
bat, familiari itidem stilo, lingua Polonica cōscriptis,
totam peregrinationis suæ historiam, rerumq. nota-
bilitatem memoriam ita feliciter complexus est, vt nihil
desiderari possit, quod ad plenam locorum illorum
notitiam pertinere videatur. Has igitur cū mecum
communicasset pius & doctus Soc. Iesu Sacerdos,
R. Pater Fabianus Quadrantinus (mihi & studiorum
ratione, ante triginta & aliquot annos, in prima Col-
legij Brunsbergensis apertione, & familiaritatis con-
suetudine in aula magni illius Hosij Cardinalis Ro-
mæ coniunctissimus) incredibilem ex earum lectio-
ne percepi voluptatem. Nam non solum locorum
sacrorum, veluti graphicam quādam in tabula ex-
plicatam delineationem, magna cū delectatione ani-
mo ingerebant; verum etiam gentium diuersarū va-
rios mores & habitus, fortunæ in casibus humanis,
vicissitudines, vrbium ac prouinciarum aliquot insi-
gnium accuratam descriptionem, Ægypti præfer-
tim & miraculorū Memphiticorum viuum quod-
dā simulachrum, ita ob oculos ponebāt, vt coram
illa eadem omnia intueri, & absque impensis cor-
poris que fatigatione, pulcherrimarum rerum aspe-
ctu perfrui, visus mihi fuerim. Gratulabar ergo tem-
poribus hisce nostris, quod quæ nostrates ab exter-
nis scriptoribus, anteaetis sæculis, de Palæstinæ &
sanctorum locorum situ petere coacti fuerunt, hæc
à Principe nostræ gentis viro, magnis ipsius impen-
sis & laboribus parta, & eleganti scripto compre-
hensa, præ manibus habere possent. Quamuis autem
hæc, ex Auctoris intentione, vt aiebat ille apud Ci-
ceronem, Tarentinis, & Consentinis, & Siculis, hoc
est, suæ nationis hominibus tantum, scripta videri po-
terāt: vbi tamen animaduerti, lectionis huius fructū
ad Catholicorum omnium profectū & consolatio-
nem

*De finib.
lib. 1.*

nem posse redundare, in eam cogitationem veni, facturum me rem pijs omnibus gratam, si liber hic à Catholicæ fidei assertore conscriptus, Catholica etiam, hoc est, Latina & Romana lingua loqueretur: quod etiam ex idiomate Polonico versione hac mea pro virili præstare conatus sum. Quàm feliciter autem id perfectum sit, equidem nescio: illud tamen affirmare possum, me ab Ill^{mi} Auctoris mente ne latum quidem vnguem, in re ipsa exprimenda, deflexisse; licet verba verbis interdum exactè reddi, vt sensus lingue Latine dilucidior esset, minimè potuerint. Laborem verò hunc eò libentiùs etiam suscepi, quòd exemplaribus vulgaribus, clàm hinc inde sparsis, periculum imminere videbam, nisi meum hoc in lucem prodiret, vt ea partim incuria describentium, partim etiam maleuolorum, & Christianæ fidei ac pijs operibus aduersantium machinationibus, multis in locis immutarentur & corrumperentur. Quamobrem cum vnum exemplar magis sincerum, & ex ipso originali Ill^{mi} Ducis desumptum, præ manibus haberem, illud in Latinam linguam iam traductum, maturiùs euulgandum curavi, vt ad eius fidem & certam quasi regulam, quæuis vulgaria, per nostrates examinari & reduci possent. Tu beneuole Lector operam hanc qualemcumque nostram boni consule, quæ tibi gratior vel hoc nomine debebit esse, quòd præ multis qui Polonica lingua peregrinationis huius descriptionem nondum degustarunt, tu ea legenda te iam delectare potes: ex qua si spiritualem profectum aliquem referre datum tibi fuerit; totum id Deo ter Maximo acceptum referes, qui mihi vt scriberem, tibi vt legeres mentem inspirauit. Vale. Apud Ecclesiam Varmiensensem, ex Museo nostro, VIII. Kal. April. in ipsa Annuntiationis Dominicæ incarnationis solennitate, Anno reparatæ Salutis M. D. CI.

PROS-

PROSPHONEMA RELIGIONIS
A D
ILLVSTRISSIMVM
DVCEM
N. CH. RADZIVILVM.

Dvx atavis opibusq; potens RADIVILE, tuorum
Didita iam terris Fama nouúmque decus;
Qua te caussa Via tot adegit adire labores,
Summa subire solo, summa pericla salo?
An super Herculeas ut isse sciare columnas?
An, quod Aristonides, ut memoranda scias?
Non popularis ad hoc iter impulit aura, nec aurum;
At vehemens ardor Numinis, atque mei.
Rarus ab egelidâ Dux, quod molitus es, Arcto
Ad sacra Soteris busta capeſſit iter.
O inbar Europa, Boreatidis unio terra,
Cetera par atavis, at pietate prais.
PRINCIPIS Imperij noménque decúsque tulerunt.
Illi à Caesaribus strenuitate sua.
Tu pietate tua decora amplificabis auita:
Sis pars Militia, laus ea quanta! sacra.
Sis SOLIMÆVSEQVES, CHRISTI & Crucis hostibus obsta,
Quintupla Crux animum stemma tuúmque notet.
Bis geniti memor esto Ducis, qui sedibus Ultrò
His moriens pro te vulnere quina tulit.
Quod fore te spondent lacryma, quibus enthea supplex
Busta rigas, faculas in cor agísque pias.
Quas modo califluas pie concipis aduena flammæ,
Accendent patrios in pia quaque lares.

*Te duce cerno meos per templa scholâsque triumphos,
 Surgere pauperibus, surgere tecta pîjs.
 Me duce, Dux, tua laus nec humi nec in axe fîleſcet;
 Quin iter hoc faxo poſtera ſacula legant.*

I N R. D.

THOMAM TRETERVM C. V.

Q V I

H O D O E P O R I C O N H O C

A S E T R A N S L A T V M E D I D I T.

A Nte peregrinum R A D I V I L V M Fama canebat,
 Fama ſed obſcuris emodulata modis:
 Sarmaticè paucis, calamo ſluit ante, prochiri
 Ad Solymæ Ducis buſta canebat iter:
 Qua Dux bis genitus Cruce cuncta piauerat inſons
 Crimina ſontis Adæ, quâque ſepultus humo.
 Nunc iter hoc lituis reſonat Latialibus orbi,
 Reddat ut attonitos Teutonas atque Gothos.
 Hoc in Hodæporico peregrina cupido ſciendi,
 Cali & ſacra famæ, unde leuentur habent.
 THOMÆ TRETERO quantum Dea Nuntia debes?
 Ære Ducem Latio quod canis, auctor hic eſt.

Anag. Auſt.

V E N I S L A B O R E V I R T V S.

I E R O.

IEROSOLYMITANA^I
PEREGRINATIO
ILLVSTRISSIMI PRINCIPIS
NICOLAI CHRISTOPHORI
RADZIVILL
QVATVOR EPISTOLIS DESCRIPTA.
EPISTOLA PRIMA.

ARGVMENTVM.

QVATVOR Epistolis Auctor totam peregrinationem suam describit. In prima rationem suscepti itineris amico reddit, & quæ impedimenta voti exequendi superauerit, quàmve facultatem peregrinandi ad Terram sanctam habuerit, exponit. Deinde dispositis rebus domesticis, & condito vltima voluntatis testamento, scribit se Venetijs soluisse: habitumque peregrini in monasterio S. Marie della Gratia apud Fratres Hieronymianos induisse. Postea in nauigatione, quas ciuitates, arces, insulas, portus, sepulchra antiquorum viderit, præcipuè autem Thefei Labyrinthum in Creta, Gortynæ ciuitatis ruinas, & Salinas Cypri accuratè describit. Notabit Lector, ex omnibus Epistolis, quàm cautè & religiosè peregrinationes obeunda.



OSTVLAS à me tibi perscribi, non solum itineris huius mei, quod in DEI nomine sum ingressus, modum ac rationem; sed etiam causam, quæ me ad suscipiendam tam longinquam, & prout multis videtur etiam periculosam (quamquam ego diuersæ fui semper & sum sententiæ; cum ipsa prouidentia & prædestinatio diuina, sicut nonnullis qui peregrè versantur, vias expeditas & faciles, ita alijs qui in
A patrio

patrio solo domesticam vitam ducunt, easdem perplexas & difficiles reddere soleat) peregrinationem impulerit: idque debili cum primis & attrita, quod multis, maximè verò tibi obscurum non est, valetudine præpeditus.

Quamobrem ut voluntati tuæ morem geram, quantum memoria repetere possum, mitto tibi principium itineris huius mei, illud admonitum te cupiens, ut hæc tantum soli tibi (cui pro mutuæ consuetudinis & familiaritatis nostræ iure, vel minima quæque rerum mearum, nota esse percipio) scripta esse noueris. Historici partes hîc mihi non assumo, nec is peregrinationis meæ scopus, sed longè diuersus, prout inferiùs videbis: cumque & occupationes, & vitæ meæ professio tibi non sit ignota, faciliè iudicare pòtes, non eo consilio regiones has me peragrarè, ut situs Prouinciarum, mores nationum, & alia, quod Historici facere solent, scripto comprehendam; quarum rerum si me curiositas abriperet, possem non ita magno negotio, domi residens, à mortuis magistris (ita Alphonsus Aragoniæ Rex libros appellabat) easdem ediscere. Accipies itaque & leges animi causa, qualescumque epistolas meas, quas, ubi occasio & scribendi voluntas accesserit, ad te quandoque daturus sum. Nam fatigato & malè affecto corpori, quies potiùs quàm scriptio conuenit: quod ex illo ipso tempore, quo vix in Cretam appuli, in me satis superque experior.

Auctor Historici partes sibi non assumit.

Non dubito quin meas illas acceperis, quas ad te Grodnâ scripsi, à Rege Stephano digressus: qui me clementer & humaniter habitum dimisit, cum quadam etiam compassionè, quòd me tam longo itineri committere voluerim. Perscripsi & illud, auctorem mihi Regem fuisse, ut ad euitandas nauigationis molestias, & naufragij vel piratarum pericula, Constantinopolim, & inde Aleppum me conferrem, acceptis Czaussio & Ianissaris, à Turcarum porta, qui maioris auctoritatis essent, quàm ceteri omnes, qui ministris

Stephani Pol. Regis, de Auctoris peregrinatione consilium.

stris Imperatoris adhærent. Inter alias, etiam hanc optimus Princeps consilij sui rationem adferebat, quod latere, quo minus quis sim agnosceret, nulla ratione possem: unde mihi non leue periculum immineret. Longè tutius esse, id scitu Cæsaris Turcarum fieri, & iter cum patentibus eius literis prosequi. Se daturum ad eundem literas, diligentissimè scriptas; simul aliquem ex aula sua Internuntium eò missurum, qui ex industria negotium hoc meum apud Turcam promoueret. Ego vicissim rationes meas attuli Regiæ Maiestati, quibus peregrinationem hanc, via solita instituendam, tutius existimabam; maximè, quod nihil explorati haberem, qua ratione Constantino- poli iter hoc terra perfici posset: contrà verò, me à multis edoctum esse, mari id compendiosè, securè, & breuiori temporis spatio absolui solere: eaque de causâ, potiore hanc consilij mei ad effectum deducendi rationem, me iudicare. Ceterùm quænam potissima fuerit protectionis huius meæ in Palæstinam causâ, iam breuibus accipe.

Non ignoras proculdubiò, cum sis Catholicus, omnipotentem Deum diuersis medijs vti solere, quibus homines ab æternæ damnationis statu abductos, in viam salutis reducat: idque eum non propter se agere, cum nihil illi accedat, si rectè; nihil decedat, si turpiter & pessimè viuamus. Sed cum nobis sanctè pollicitus sit, se nolle mortem peccatoris, sed vt magis conuertatur & viuat, id nobis pro sua clementia & bonitate, subinde præstare dignatur. Præcipuus itaq; modus, quo homines à peccati turpitudine auocat, ad infinitam gratiæ & beneficiorum demonstrationem quam humano generi copiosè exhibet, referri debet. Nam cum summè bonus, immò ipsum summum bonum sit, non potest ab eo nisi bonitas immensa proficisci: quam cum in hominem plena manu effuderit, illiq; ad voluntatè omnia contulerit; vbi ille, quam gratitudinis loco rependere de-

*Deus diuer-
sis medijs
homines sal-
uat.*

Ezech. 33.

*Peccatoris
mortem
Deus non
vult.*

beret, emendationem vitę differt, & beneficiorum immemor, tamquam equus effrænis, malitia excæcatus, in omne scelus ruit præceps, licet illum in peccati sordibus iacentem, iustè reijcere & in æternum damnare possit, cùm id illi sit liberum, nec cuiquam facti sui rationem reddere teneatur: infinita tamen illa bonitas ipsius, rigorem iustitię cohibet, ne miserum in finem abiciat & derelinquat: & paterna quadam sollicitudine admonito, temporarias afflictiones & castigationes immittit; vt quem bonitas ipsius à peccato non potuit abducere, saltem doloris acerbitas, humano sensui cõtraria, eundem in officio contineat. Hinc est, quòd varijs calamitatibus, præcipuè verò corporis etiam infirmitatibus interdum homines affligi permittit; vt vel hac ratione mortalis faciliùs recogitet, ad quem finem corporeus hic asinus, quem tam delicatè nutrit & amat, deuenire tandem debeat: & quàm meritò temporalia hæc bona vmbre comparentur, quę exiguo momento transit & euanescit. Sit igitur sanctissimum nomen Domini Dei nostri benedictum, qui leuib; hisce admonitionibus & flagellis citò transituris nos coërcet, ne in illum ignem inextinguibilem, & vermem qui numquam moritur, incidamus. Atque ita planè mecum actū est: in quem cùm diuina bonitas, innumera gratiæ suę dona & beneficia contulisset, non solùm me illi gratum aliqua vitę solutionis emendatione, non exhibui; sed etiam donis illius abusus, in iuuenili etate mea, vanitatis illecebris abductus, peccata peccatis accumulauī: & quod ceteris, qui in delictis & excessibus volutantur, accidit, licet aduersam valetudinem non à natura trahant, luxu tamen eam sibi accersunt vltro, præfixumquę vitę terminum abbreviant, (iuxta illud Sapientis dictum: Non accepimus breuem vitam, sed fecimus; non inopes eius, sed prodigi facti sumus) item & mihi vsu euenit. Nam in grauem infirmitatem, ingentibus capitis doloribus, & diuersis accidentibus autam,

*Infirmitates
corporis cui
Deus per-
mittat.*

*Temporalia
bona vmbre
assimilata.*

*Vitam bre-
uem non
accepimus,
sed ipsi faci-
mus.*

etiam, incidi anno 1575. mense Augusto, cum secunda eiusdem die vigesimum sextum ætatis meæ annum complevissem. Et quoniam, vitio corruptæ naturæ cum in aduersam valetudinem inciderit homo, frustra de medicina corporali, si de animæ salute non cogitat, sollicitus est: ubi me tam graui morbo, permissu diuino, prægrauatum sensi, in quo curando omnis Medicorum industria frustra consumeretur, ad Deum ipsum pro vtriusque hominis curatione per sacram Confessionem & diuinissimi Sacramenti susceptionem supplex confugi, ab eoq; humillimè petui, vt dimissis adolescentiæ meæ delictis, id cordi meo inspiraret, quod cum maiestatis suæ gloria, & peccatricis animæ meæ salute, coniunctum esset. Cumque orationi huiusmodi sæpius feruenter insisterem, quodam tempore mense Septembri, cum præsens sacrosancto Missæ sacrificio adessem, votum feci (quod Confessario meo postea reuelauit) si diuina bonitas pristinam mihi sanitatem restitueret, me sacrosanctum Domini sepulchrum visitaturum, tempore ad hoc peragendum non definito. Interea, pro morbi ratione, opportuna remedia adhibere non intermisi, quæ magis ac magis producebantur.

Auctoris ad Deum conuersio.

Votum visendi S. sepulchrum.

Anno Domini 1576. vsus sum thermis Iauorouienfibus in Polonia. Anno sequenti 1577. semper itidem cum Medicis mihi res fuit. Interea incidit expeditio nostra Lithuanica in Liuoniam, cui cum alijs & ipse interfui, cum Dux Moscouiæ prouinciam hanc depopularetur, & Rex Stephanus apud Gedanum in castris esset. Anno 1578. significauit Gregorio XIII. Pont. Max. me in Germaniam ad experienda nonnulla remedia, & thermas, proficisci: quæ ubi me vegetiorem reddiderint, vouisse me Deo, & omnino constituisse visitare sacrum Domini Ierosolymitanum sepulchrum. quid ad hæc Pontifex responderit, ex adiuncto Breui apparet.

Lithuanorum in Liuoniam expeditio.

Bellum Gedanense.

DILECTO FILIO NOBILI VIRO

NICOLAO CHRISTOPHORO RADZIVILO

OLICÆ DVCI

GREGORIVS PP. XIII.

DILECTE fili, nobilis vir, salutem & Apostolicam benedictionem. Pie sapienterque facit nobilitas tua, cum in valetudine curanda ita utitur humanis remedijs, ut omnem spem repositam habeat in Dei benignitate. Laudamus igitur propositum tuum, balneorum adhibendorum, & votum visendi Sepulchrum illud sacrosanctum Domini nostri IESU CHRISTI. Speramus ab eius bonitate valetudinem tibi restitutum iri. Nostram verò atque Apostolicam benedictionem, quam postulas, & his literis impertimus, & tum sanitatis recuperationem, tum leta & felicia omnia, tibi ab ipsius Domini nostri benignitate precamur. Datum Roma apud S. Petrum, sub annulo Piscatoris, die ultima April. M. D. LXXVIII. Pontificatus nostri anno septimo.

Ant. Buccapadulius.

Ceterum valetudo, cum licet non adeò, meliore tamen loco esse cœpisset, in patriam redire cōstitui, quòd in Germania nullum habebam, cum quo de itinere hoc ineundo conferre possem, quod multorum, & meo quoq; iudicio cumprimis arduum & periculosum videbatur. Autumno itaque insequente, reuersus in patriam, constitui æstate proxima in Italiam, inde in Palæstinam proficisci: cumque eadem hieme Stephanus Rex primò in Magnum Lithuanix Ducatum adueniens, expeditionem bellicam aduersus Moscouix Ducem, æstate anni 1579. suscipere decreuisset, conuenire videbatur militari professioni meæ, ut & ipse Regi meo, aduersus communem patriæ hostem, operam meam impenderem. Hunc itaque annum vnà cum

Steph. Regis
in Moscouia
expeditio.

cum alijs Lithuanis, in Polocensi bello consumpsi : cùmque ibidem ictu bombardæ in capite læsus, ex vulnere, Deo iuuante, conualuisssem; ad votum illud meum adimplendum, recenti diuino beneficio, non mediocriter me permotum & incitatum sensi.

Anno Domini 1580. profectus sum in Italiam, eo consilio, vt remedijs & thermis, quod feci, adhibitis, destinatū iter prosequerer; cumque ex Medicorum præscripto, has & illas obeundo, nonnisi mense Augusto vltimas thermas absoluissem, æstas integra sic est exacta : & cùm sub ipsam hiemem Venetijs soluere constituisssem, naues è partibus illis reuersæ, nuntiarunt hoc ipso anno 1580. pestem in Græcia, Syria, Palæstina & Ægypto grassari; quæ in tertium vsque annū, licet sensim decrescendo prorogari consuevit. *Pestis in Ægypto & Palæstina.* Primo etenim anno sæuit atrocissimè, secundo non item, tertio minùs: quæ quidem in re singularem Dei benignitatem licet admirari, quæ hac in parte, pro immensa sua misericordia minùs Christianos, quàm paganos affligi permittit. Hoc nūtio accepto, dehortabantur omnes, ne me in apertum periculum conijcerem : sed & naues, quæ futura æstate vela in oras illas facere debebant, remissione studio adornabantur. Interea allatum est quoque, Regem Stephanum in sequentem annum, denuò contra Moscum exercitum ducere. Quamobrem, licet non adeò firma valetudine, anno 1581. hieme peracta in patriam sum profectus, & æstatem integram cum Rege in castris ad Plescouiam trāségi. *Plescouien- sis obsidio.* Domum inde hieme reuersus, cùm propositum itineris in Palæstinam suscipiendi omnibus, me non celante, innotuisset, illique me ab eo vehementer auocarent; cœpi & ego nonnihil vacillare, & votum illud meum ita interpretari, quòd nō nisi pristinæ valetudini restitutus, ad illud implendum adstrictus essem; nunc verò me experiri, quòd cum ætate languor itidem cresceret. Cogitationes eiusmodi cùm in animo sæpiùs obuersarētur; & ego,

ego, more solito, in exiguis orationibus rei successum Deo commendarem, visum est, per Confessionem, & sacrosanctæ Eucharistiæ perceptionem, diuinum auxilium implorare: vnde statim in mentem venit; etsi non satis firma valetudo, talis tamen esset, per quam incedere, negotia tractare, in militiam proficisci, longiora quoque itinera peragere, mihi liceret. Quamobrem, cùm hæc in gratiam terreni Regis, vel familiarium, aut necessitatis alicuius caussa facere nõ detrectem, cur eos itineris labores suscipere non possem, quos me subiturum ipsi Deo sanctè promisi; qui solus REX regum est omnium maximus; à quo bona nobis omnia proueniunt; à cuius manu, non aliunde, quæ necessaria sunt, ad nos deriuantur? Totum itaque me diuinę ipsius prouidentię permittens, firmissimè constitui, quacumque tandem valetudine præditus essem, sacrum hoc iter ingredi, firma spe fultus, me illud, Deo auxiliante, absoluturum: etiamsi mori contingerit isthic, me non grauius laturum, vbi sacra redemptionis nostræ loca oculis corporeis intueri, & voti compotem fieri, diuinitus mihi concessum fuerit.

Quamobrem anno Domini 1582. rebus domesticis dispositis, & vltimæ voluntatis meæ testamento condito, cùm me in patriam numquam ampliùs rediturum existimarem, mense Augusto Grodnam ad Regem Stephanum profectus sum, vt consilium profectiõis Ierosolymitanæ patefacerem, illiq; valedicerem. Dehortabatur quidẽ ille varijs modis me à proposito suscepto, quoniam tamen vota Domino reddenda essent, quorum commutatio à Sede tantùm Apostolica peti deberet, persuadere modis omnibus mihi conabatur, vt Romam potiùs me conferrem, quàm adedò affecta valetudine, tam periculoso itineri me committerem. Ceterùm cùm respondiissem, me omnino constituisse, iter hoc aggredi; à quo si desisterem, & iræ diuinæ offensam, & hominum vocus, & nonnullam estimatio-

stimationis iacturam pertimescerem; quàm maximè potuit hortabatur, vt, quod superiùs attigi, Constantinopolim proficiscerer; diligenter se curaturum, vt minore difficultate & periculo, metam tantopere desideratam attingerem. Obtentà à Rege discedendi venia, Nesuisium redij: cumq; omnia in procinctu haberem, Sacramentis Ecclesiasticis munitus, in Dei nomine, die 16. Septembris, anno Domini 1582. iter sum ingressus: & cùm in hunc ipsum annum correctio Calendarij Gregoriani incidisset, Annus Calendarij Gregoriani. mense Nouembri Italiæ fines attigi: ac, vbi in quibusdam Lombardiæ locis, pro mea tenuitate, deuotioni aliquantisper vacassem, die octaua Decembris, ipso die Conceptionis beatissimæ Virginis, cùm diebus aliquot antè familiam meam Veronam præmissem, Venetias perueni, statimq; Ducem Nicolaum de Ponte cum literis Regijs adij, à quo Rex diligèter postulabat, vt me Præfectis, quos Nicolaus de Ponte Dux Veneziæ. in Græcia & locis maritimis habent Veneti, diligenter commendaret: quod eò minore negotio obtentum, quia satis iam antea, & ego & familia mea Venetijs erat nota. Egi itidem cum Procuratore Terræ sanctæ, qui semper in monasterio sancti Francisci *della Vigna* residet, & erat tum in hoc ipso officio Frater Ioannes de Candia. Contuli & cum F. Ieremia de Bressa loci Guardiano, qui bis fratrû sui ordinis in Terra sancta prælatus, duodecim annis Ierosolymis mansit. Ab his quemadmodum me gerere deberem edoctus, dedi operam, vt prima naui, quæ statim post Epiphaniam, & maris pro recepto Ecclesiæ ritu benedictionem, soluit, vela facere possem; eaq; de causâ maximè discedere adproperabam, vt sacrum Pascha Ierosolymis peragere mihi liceret. Ex quorundam itaque consilio, oblata mihi fuit nauis (Galeonem Tornelli vocabant, à Tornello mercatore, cuius erat, denominatam) non adeò quidem magna, nempe sexcentorum tantùm doliorum capax; nec noui operis, nam ante tredecim annos erat fa-

Benedictio
maris, mense
Ianuario
apud Vene-
tos.

bricata; sed celeritate tamen, & boni euentus nomine valdè commendata, quæ nauclerum peritum haberet Augustinum de Giacomo: cum quo, quandoquidem post Epiphaniam discedere debebat, tractationem de profectioe iniui. Atque hac etiam in re singularem in me Dei benignitatem & clementiam agnoui, quòd spe celerioris discessus, ceteris nauibus omiſſis, huic potiùs adhæſi. Nam cùm ingens oneraria nauis, Ruggina dicta, sub finem Ianuarij anni 1583. soluisset (quæ res mihi cum primis moleſta fuit) vix dum portu egreſſa, tempeſtate apud Foſſam Claudiam iactata, vix periculum, eiectis omnibus anchoris & malo abſciſſo, euasi: ita vt ægrè admodù, ad Iſtriam aliquot Italicis milliaribus Venetijs diſtantiem, adpelleret; vbi integra hieme ſubſtitit: quam qui conſcenderant, Venetias redire ſunt coacti. Hæc eadem nauis, antequam nos Cyprum adnauigaremus, vna tantùm die Tripolim verſus vela fecerat. Circa medium Februarij menſis, ſoluerunt aliæ duæ minores naues Alexandriam verſus. Quamobrem lōgioris morē pertēſus, licet per Ægyptum via remotior Ieroſolymam eſſet, vnam ex illis conſcendere deliberaueram: ſed cùm non adeò magnæ eſſent; & gubernatores, qui Patroni vulgò dicuntur, parum expertos haberent; ne tale quid facerem, aliqui diſſuaſerunt. Et hîc benignè mecum egit immenſa Dei miſericordia. Nam vna ex illis non longè à Ragufa periit, altera prope Corſicam inſulam vi tempeſtatis concuſſa, ita diſſoluta eſt, vt inde vnus tantùm vix incolumis euaserit. Scripſi deinde ad Pontificem, ſignificans illi, quòd literis eius prioribus acceptis, diuerſis cauſis impeditus, iter ſacræ peregrinationis hætenus ingredi non potuerim: nunc quandoquidem in procinctu eſſem, facultatem adeundi ſacrum Sepulchrum denuò mihi concedere dignaretur. Moris enim eſt, vt quicumque ſacram hanc peregrinationem ſuſcipit, is facultatem in ſcriptis à Pontifice, aut ab ijs qui ſunt

Ieroſolymitana peregrinatio abſque Pontificis Romani ſaculitate ſuſcipi rite non poteſt.

sunt ad eam rem delegati, habere debeat: alioquin Catholici vitant eius consortium, & se apud Religiosos illius loci suspectum reddit, quòd non sit germanus Ecclesiæ Catholicæ filius. Communiter etiam accidit, quòd ij qui videndi tantum (quibus rarò id feliciter cedit, quandoquidem vel in mortem inopinatam, vel in casus miserales incidunt) & non deuotionis causâ eò veniunt, multum negotij Catholicis facessunt, propter insolentiam & in-compositos mores: vnde non solum damnum, sed etiam periculum Catholicis accersunt. Nam vbi quid indignum perpetraverint, Catholici pœnam culpæ sustinere, & in pecuniæ defectu, ne in seruitutem Turcicam deueniant, pauperes Religiosi eos redimere coguntur. Quamuis autem pro ea familiaritate, quæ mihi à plurimis annis cum clarissimis quibusque in Italia viris intercesserat, etiam absque eiusmodi literis me itineri committere potuissem; nec à religiosis viris, mihi iam aliqua ex parte antea notis, aliquid difficultatis pertimescendum erat: volui tamen, cautionis causâ, de ijs omnibus mihi providere, quæ laudabilis Ecclesiæ consuetudo postulat; maximè verò peregrini munus obeundo, peregrinorum quoque iuribus vti, & summi Pontificis benedictionem obtinere, cum primis necessarium esse iudicabam. Pontifex literis meis acceptis, quas illi Georgius Ticinius Scholasticus Vlnensis, Regis Poloniæ in Vrbe Agens reddiderat, quæsiuit ex illo, num iam omnino iter hoc tam longum, non confirmata valetudine, & eo tempore quo piratæ plerumque mare infestum redderent, Ingredi constituissem: nec obscure ferebat, si Romam venissem, quòd libenter voto in alia pietatis opera commutato, super eiusmodi protectione mecum dispensaturus erat. Quoniam tamen à tam sancto instituto dehortari minimè licitum videbatur, cum iam de constanti mea voti explendi voluntate illi constaret, & literas patentes, quas hîc subiunxi, mihi

12 IEROSOLYMITANA PEREGRINATIO
humanissimè concessit, & calculos oratorios, cum maxi-
mis adiunctis Indulgentijs seu gratijs spiritualibus misit,
conditione adiecta, vt singulis diebus in meis orationibus
ipsius memoriam numquam intermitterem ; quando-
quidem ipse quoque in orationibus suis, profectionis hu-
ius meæ exitum felicem, assiduè Deo repræsentare non
cessaret.

DILECTO FILIO NOBILI VIRO
NICOLAO RADZIVIL
DUCI OLICÆ ET NESVISIL-
magni Ducatus Lithuaniae supremo Marschalco
GREGORIUS PP. XIII.

DILECTE fili, nobilis vir, salutem & Apostolicam benedi-
ctionem. Exponi nobis nuper fecisti, quòd tu deuotionis ze-
lo & feruore ductus, cupis sepulchrum Dominicum Ierosoly-
mitanum, ac forsàn alia ultra maria Terra sancta pia
loca visitare, si tibi ad id nostra & Apostolica Sedis licentia
suffragetur & facultas. Quare nobis humiliter supplicari fe-
cisti, vt tuo pio desiderio huiusmodi in pramissis annuere, de be-
nignitate Apostolica dignaremur. Nos igitur te specialibus fa-
uoribus & gratijs prosequi volentes, huiusmodi supplicationi-
bus inclinati, tibi, vt sepulchrum Dominicum, & alia ultra
maria Terra sancta loca prædicta personaliter visitare libere
& licite valeas, dummodo prohibita ad partes infidelium non
deferas, plenam & liberam licentiam & facultatem, auctori-
tate Apostolica, tenore præsentium concedimus. Datum Ro-
ma, apud S. Petrum, sub annulo Piscatoris die XXII. Ianua-
rij, M. D. LXXXIII. Pontificatus nostri anno undecimo.

Cæs. Glorierius.

GRE-

GREGORIUS PP. XIII.

VNIVERSIS & singulis, Regibus, Principibus, Ducibus, Marchionibus, Comitibus, Baronibus, Dominijs, eorūque Magistratibus, necnon Capitaneis classium & navium, ceterisque Dominis temporalibus, & nostris ac sancta Romana Ecclesia mediātē vel immediātē subiectis, salutem & Apostolicam benedictionem. Cum nobilis vir, Nicolaus Christophorus Dux Oliva & Nesuis, Magni Ducatus Lithuania supremus Marschalcus, sicut nobis nuper exponi fecit, deuotionis seruiore accensus, sepulchrum Dominicum Ierosolymitanum, propediem concedente Domino visitare cupiat: nos pro singulari nostra erga dictum Ducem charitate, ei tutum & securum iter ubique esse exoptamus; vos omnes nobis non subditos plurimum hortamur, & requirimus, subditis vero nostris arctē precipimus ac mandamus, ut si Ducem praedictum ad loca uestra & nostra peruenire contigerit, ipsum unā cum eius comitibus ac familiaribus, benigne & liberaliter recipere, completi ac tractare, cum pro eius dignitate, tum etiam nostro intuitu uelitis: & illi si opus fuerit, & vos duxerit requirendos, de idoneo praesidio & saluo conductu, promptē providere curetis. Sicque efficiatis, ut vos de propenso erga dictum Ducem animo, meritō commendare, & in occasionibus parem uobis gratiam referre valeamus. Datum Roma apud S. Petrum, sub annulo Piscatoris, die XXII. Januarij. M. D. LXXXIII. Pontificatus nostri anno undecimo.

Cæs. Glorierius.

Interea dum iter apparamus, & in horas abitum expectantes res etiam in nauem inferri curamus, diuina quadam ordinatione fiebat, ne soluere per aliquas moras possemus: & apparuit postea, præclare actum fuisse, quod nauis hæc nostra, tardiùs quàm constituerat, mari sese commiserit. Quamobrem totam Quadragesimam, & Pa-

schalia festa Venetijs egimus, deuotioni, quantum diuina gratia largiebatur, insistentes. Tandem Sabbato ante Dominicam in Albis, anno Domini 1583. die 16. April. hora circiter vigesima secunda, scapha conscensa, Venetijs ad Monasteriũ S. Mariæ *della Gratin* Fratrum S. Hieronymi in Insula peruenimus, (quo in loco manè iam habitu peregrini indutus, sanctissimo Sacramento percepto, diuinæ Maiestati orationibus meis exilibus profectionem hanc meam, vt eam benedicere dignaretur, supplex commendaueram) inde in portu Malamoci, naue post occasum Solis conscensa, tertia noctis hora soluimus anchoras: & in aurora insequentis diei, quæ fuit 17. Aprilis, portu egressi, hac ipsa die & nocte luceque subsequenti, leui vento flante, sinum Tergestinum prætergressi sumus: cumque ventus flare penitus desisset, substitit naus prope Parentium vetus Istrię oppidum, quod nõ adeò magnũ sed loco peramæno situm, antiquitatis cuiusdam speciem refert. Nonnulli volunt illud post raptam Helenam à Paride conditum, & ab eius nomine Paridinum antea appellatũ. Naues onerariæ huc adpellere non possunt: vnde & nostra quarta miliaris parte ab eo littore abfuit. Ego scapha conscensa, cùm ad Ecclesiam Fratrum Conuentualium sancti Francisci, vbi Missam audiui, descendissem, oppido perlustrato, ad nauem postea redij. Circa vesperam, leni vento spirante, dicto loco mouimus: & in aurora, ad portum desolatum in Dalmatia, Torreta vulgò dictum, peruenimus: vbi propter contrarium ventum, qui inter Orientalem & Meridionalem medius, Sirocco ab Italis vocatur, triduum hæere fuimus coacti. Et quoniam inde ciuitas Zara quinque miliaribus abest, iactis anchoris, scapha peruenimus ad insulam Sala, pedestrique itinere, ad eiusdem nominis villam, medium miliare progressi, circa Meridiem ad hospitium diuertimus: in quo rusticos potationi vacantes reperimus: qui cùm

nos

Istria.

Parentium
oppidum à
Paride con-
ditum.

Dalmatia.

nos habitu peregrinorum indutos, & lingua Polonica vti (quam & illi intelligebant, cùm Sclavi essent) animaduertissent, & ignorarent nauem nostram ad Insulam appulisse, credebant nos exploratores esse, cùm præsertim nonnullæ Turcarum arces in propinquo essent, quarum vna Bokal dicta, breui maris interiectu, vno tantùm & medio milliari ab illis distaret. Constituerant itaque nos comprehendere, & iam pro funibus, quibus nos vincirent, socios quosdam præmiserant. Quamuis autem haberem literas Venetorum patentes, quibus subditis præcipiebant, vt in ditionibus eorum omne mihi officiorum & humanitatis genus exhiberent, eas tamen illis ostendere nolui, ne vt erant ebrij, vi abreptas discerperent vel deperderent. Quamobrem vt nos ad Superiorem quem habebant, deducerent, petiui: quod etiam fecerunt: cumq; vnà pergeremus, habuerunt quosdam è suis obuios, qui illis nuntiarunt plures è nostris apud Ecclesiam adesse. Venerat autem eò Albertus Episcopus Sidoniæ, cum duobus Societatis Iesu Sacerdotibus, Leonardo Siculo & Ignatio Hispano, quos Gregorius XIII. Pontifex, Catholicæ religionis propagandæ causa, in Syriam mittebat: qui eadem nobiscum naui Tripolim Syriæ peruenerunt. Vbi igitur plures ex nostris viderunt, & Notarium nauis Hieronymum Varuani, antea sibi notum, conspexerunt, nihil nobis ampliùs exhibebant negotij: immò cùm apud Parochum pranderemus, apud me culpam deprecati sunt, quòd subuerebantur, ne apud Zaræ Magistratum eos deferrem. Sumpto prandio, scapha conducta, Zaram ciuitatem Venetorum in Dalmatia egregiè munitam, post horam vigesimam primam perueni: vbi cùm ad portum Venetorum Prætor Vincentius Mörösinus deambulare, scire volebat, an ex locis infectis veniremus. Egressus scapha Notarius nostræ nauis, literas patentes, quas habebam, illi ostendit: quibus lectis, in terram nos descendere iussit;

Zara ciuitas Dalmatiae.

iussit; & post salutationem, in ciuitatem introduxit, munitiones ostendit, & hospitio in palatio honorificè excep-
S. Marci fe- pit. Postridie, quòd festum sancti Marci esset, in Ecclesiam
stum per di- iuimus; Processioni, quæ per ditiones Venetorum magna
ctiones Vene- cæremonia vbique peragitur, interfuimus; Ecclesias ali-
torum cele- quot visitauimus; præcipuè sancti Simeonis illius Euan-
bre. gelici senis, qui Christum puerum in vlnis gestauit: cuius
S. Simeonis sacrum corpus sub altari maiori ibidem planè integrum,
senis Euan- nec putrefactum, religiosè asseruatur: quod vidimus ac-
gelici corpus curatè, & attrectauimus. Prandio peractò, ex palatio ad
incorruptu. portum descendimus, & inde nauicula post solis occasum
 ad nauem nostram reuersi sumus. Cùm essemus Zaræ,
 fuit deposita contra milites querela, qui centum viginti
 in eadem nostra naui, in Cretam à Venetis mittebantur.
 Prætor misit statim, vt quidquid alicui illatum esset dam-
 ni, subitò refunderetur.

Soluimus manè ex eo portu, & die nocteque insequen-
 ti, vento Aquilonari, qui inter Septemtrionem & Orien-
Balonam Tur- tem est, prope Balonam Turcarum ciuitatem vehemen-
carum ciui- tissimè iactati sumus.
tati.

M A I V S.

Ex mari Adriaticò in Mediterraneum delati sumus.
Corcyra. Præteruecti sumus Corcyram insulam sub vesperam: 3.
Cephalonia. nocte verò ipsa Cephaloniam. 4.

Zacynthus. Appulimus hora decima octaua Zacynthum. Accessi 5.
 statim ad monasterium Fratrum minorum de obseruan-
 tia B. Mariæ: cuius loci erat tum Guardianus Frater Bo-
 nifacius de Bergamo. In hoc monasterio visitur lapis ve-
Ciceronis tustus sepulchri Ciceronis, cum inscriptione literis Græ-
sepulchrum. cis exarata: ibidem in vrna itidem lapidea dicuntur eiuf-
 dem cineres esse repositi. Insequētī die, Marcus Antonius
 Venereus, Prætor Venetus, inuitatum lautè me tractauit
 in arce quæ in alto monte posita, antiquo opere, forma
 rotun-

rotunda est constructa. Altera die Missam audiui in monasterio S. Eliæ, Fratrum Conuentualium sancti Francisci: quod in amœnissimo colle positum ciuitati imminet. Hortum habet non adeò magnum, sed cum primis elegantem. Nullibi maiora poma citrina, mala aurea, & limoniorum, in tota Græcia (ipsorum Græcorum testimonio) proueniunt, quàm hîc & in hac tota Insula: vnde vuæ passæ minoris, vasorum ducenta millia annuatim, vini verò rubri & albi circiter triginta millia doliorum extrahuntur: quod & Marcus Securius Venetus, qui telonium tunc temporis ibi conduxerat, & ceteri mercatores pro certo affirmabant. Sumpto prandio, profectus sum ad Ecclesiam Græcorum sanctæ Mariæ de Piscopo dictam, quæ magno milliari ab ipsa ciuitate, in monte altissimo, vnde Arcadia conspicitur, est posita. Habentur in ea Venetorum excubiæ contra Turcas. Insula hæc frequentes habet terræmotus: quam etiam ob causam depressiora hîc construuntur ædificia: immò me ipso præsentem, noctu terra itidem concutiebatur, breuiter tamen & leuiter.

*vna passæ
Zacynthi-
na.*

*Terræmo-
tum.*

Hora vigesimatertia Zacyntho soluentes, præteruecti sumus ad læuam arcem Turcicam Tornese in Peloponneso, quæ vno & dimidio milliari à Zacyntho mari interluitur.

9. Præterijmus Strophadas insulas, in quarum vna est monasterium Græcum S. Basilij, quod monachi, Calloieri vulgò dicti, inhabitant.

*Strophades
insula.*

10. Præterijmus insulam Sapientiæ.

11. Transijmus promontorium Matapan.

12. 13. 14. Iactati sumus vento validissimo.

15. Hora vigesima prima, inter insulam Cytheream & promontorium Manlium, ingressi sumus mare Ægæum, valido, secundo tamen, vento Cauro, qui inter Occidentem & Septentrionem medius est, delati.

16. Circiter meridiem ad promontoriū Cretæ Fraschiam, Creta.

C

olim

olim Paleo castro, anchoras iecimus: & scapha conscensa circiter horam vigesimam secundam venimus Candiam, olim Candax: cumque portum propter ventorum violentiam attingere non possemus, descendimus ad littus, ubi aliquamdiu expectauimus, dum literæ nostræ patentes examinarentur, è quibus constaret, nos è locis pestilentia non infectis venire. Ingressus ciuitatem, ad monasterium S. Francisci diuerti. Postero die Dux Candiæ, Nicolaus Donatus, in palatio me prandio excepit. Profectus sum terrestri itinere, circa radices Idæ montis, ad Labyrinthum Thesei, qui hodie quoque idem nomen retinet. Ego cum ijs sentio, qui locum hunc non labyrinthum sed lapidicinam esse volunt: cuius rei argumentum esse potest, vel ingens vis lapidum, qui passim vbique iacent, tum vestigia curruum, quibus eiusmodi lapides extrahebantur. Multa habentur hinc subterranea diuerticula, quæ nisi accensa face adiri non possunt. Tanta autem est ibi vespertilionum multitudo, ut diligens adhiberi cautio debeat, dum obuolant, ne lumen extinguant, & perpetuis tenebris homines inuoluant. Illud etiam cum primis admiratione dignum est, dum à Septemtrione ad Meridiem itur, per montes, tam repentinam cæli & aëris mutationem in ea Insula reperiri; ut dum circa Gortynam, ante dies octo messis absoluta fuerit, circa Candiam adhuc omnia in campis conspiciantur: illic fructus iam planè maturi habeantur, hinc ad Septemtrionem à maturitate longius absint. Porro cum tardior hora reditum Candiam impediuisset, noctem duxi in exiguo quodam cœnobio S. Francisci de Obseruantia, in quo tres tantum erant monachi: qui mihi narrarunt, tribus circiter ante meum aduentum hebdomadis, accidisse, quod cum nonnulli videndi gratia, labyrinthum hunc ingressi essent, vnus ex dicti monasterij fratribus, eisdem comitatus, per errorem ab iisdem derelictus, in cauerna, quarum infinita est hinc multitudo, tenebris

*Labyrin-
thum Thesei
in Creta.*

*Aëris muta-
tio intra
breue spa-
rium loco-
rum.*

nebris obrutus remansit, monachis loci existimantibus, eum cum comitatu, Candiam fuisse profectum. Tertia demum die, bona fors tulit, quod exteri quidam dictos Labyrinthi anfractus ingressi, in eundem monachum inciderunt: qui fame confectus, extra se positus ac sensibus ferè destitutus, sedens mortem opperiebatur. Hunc agnitum in monasterium reduxerunt, qui diu grauitè infirmatus, ac in maniam prolapsus, diligenti cura adhibita, vix sanitati tandem fuit restitutus.

19. Lustraui ingentes ruinas ciuitatis Gortynæ; quam Taurus Rex, rapta Europa Agenoris filia, de nomine suæ matris appellatam, quondam condiderat. Fuit ciuitas hæc sub ipso Labyrintho, in parte inferiori sita: vnde apparet, eam ex lapidibus his constructam fuisse, qui de medio montis excisi, demittebantur. Ampla & elegans vrbs hæc erat, prout colligitur è multitudine pulcherrimarum columnarum, quæ densitate sua, à longè siluæ alicuius speciem repræsentant. Visuntur hîc etiam vestigia dirutæ Ecclesiæ, quam elegantem & magnis sumptibus fuisse constructam apparet. Sed præcipuè admirationi habetur pons integer, fluuiolo ex ingentibus quadratis lapidibus impositus, qui nec plumbo nec cæmento compacti, securum transitum etiam hodie vicinis incolis præbent. Hac eadem die vesperi Candiam redijmus.

*Gortyna
ciuitatis
ruina.*

*Taurus Rex
raptor Euro-
pæ.*

*Pons lapi-
deus.*

Dux Candiæ prædictus, Franciscus Barbarigus militum Præfectus, Victorinus Buon & Ioannes Marcus Molin Consiliarij, me assumpto, Missam in Ecclesia audiuerunt: vbi ex alia parte altaris, quod in templi medio erectum est, Græcuni itidem Sacrum celebrabatur. Nam veterum Pontificum indulto cautum est, vt eius Insulæ Magistratus, nonnullis diebus solennioribus, Græcorum Sacris interesse debeant: quod ipsum & alijs Catholicis, absque scrupulo conscientiæ facere licet, & Græcas Ecclesias frequentare, vbi Catholici ritus templa non habentur,

S. Titi ca-
put.

quorum in pagis magna est raritas. Inde itum est, cum Processione ad summum templum S. Titi, cuius venerandum caput integrum, magna cæremonia, spectandum populo proponebatur. Sumpto prandio salutavi Archiepiscopum; qui, permissu Pontificum, birreto & habitu Cardinalitio in Candia utitur, eoque modo indutus in Ecclesiam venit, & nobis Diuorum reliquias, quæ plurimæ ibi asseruantur, videndas exhibuit.

Prandio apud Barbarigum Capitaneum sumpto, ad na-^{21.} uem profecti sumus. Interea ventus validissimus est exortus, ut proiecto ex naui fune, non absque labore, nos ad illam attrahi fuerit necesse. Quamobrem in alterum usque diem naus hîc necessariò hære debuit: cumque rupto fune, anchora fundum petiuisset, duas alias iacere fuit opus; & nisi vêtus cessasset, vix naus effugisset periculum.

Hora secunda noctis, inter Standiam insulam, vento^{23.} prospero nauigauimus.

Præterijmus Turcicas insulas Carpathon & Rhodum:^{24.} quas, cum nox esset, à longè videre non potuimus.

Ingressi sumus mare Lycium, nocte verò Pamphiliū.^{25.}

Cyprus.

Paphus.

Hora decimanona vidimus insulam Cyprum: sub ve-^{26.} speram autem præternauigauimus Paphum.

Summo manè ad nauigauimus Lemissum, cum pridie^{27.} quàm eò venissemus, quatuor Ducis Florentiæ triremes ex improviso irruentes, oppidum hoc vastassent, Turcis aliquot captis, & ad triginta interfectis. In littore stat turris, cuius bona pars ante annos aliquot terræ motu collapsa, nonnullos è Turcis oppressit: Cum situm loci consideraturus, è naui egressus essem, occurrit nobis fanaticus quidam, (genus hoc hominum Maslokos appellant) in manu cultrum latiore, nouaculæ instar, habens: qui cum nos peregrinos esse animaduertisset (eramus autem quatuor) ad nos accedens, percunctatus est, inquiring; Quidnam mihi dare vultis, ut me pro salute Cæsaris domini mei ferro

ferro incidam? Postulabat autem hoc nomine, nummum, quem Turcæ Maydin vocant, sibi dari. Nos ne pecuniam faciliè profundere videremur, finximus nos Maydinis non abundare: accipientes tamen, quasi cum difficultate, vnum mutuò ab Italo quodam mercatore, qui ibidem in Cyprio manebat, & nobis præsens aderat, obtulimus illi eundem, ut nos pauperes esse intelligeret; significauimusque illi per interpretem, nos non cupere, ut carnes incidat. Ille, accepto Maydino, in pectore duo vulnera satis profunda tractim sibi inflixit. Erat cumprimis horridum, sanguinem copiosè manantem videre. Apparebat hominem fuisse non adèd mentis compotem, quales ferè solent esse omnes, qui Maslokum in pulueres redactum hauriunt. Medentur autem aqua fontis, cum quibusdam herbis adhibita, huiusmodi vulneribus: quæ non ita multo tempore obducuntur, prout in hoc insano videre licuit, qui pellem satis benè concisam habebat. Hinc apparet, quàm turpes, & hominibus Christianis abominabiles sint barbarorum istorum mores. Nolebamus nos initio aliquid huic belluæ conferre, incisionem eius nihil morantes: sed mercator prædictus admonuit, dandum illi omnino nummum eiusmodi; ne, si illi negatus fuisset, aliquem cultro vulneraret: quod eiusmodi nebulones plerumque Christianis facere solent, amentiam simulantes.

28. Oppidum perlustraui, quod & valdè conquassatum.

29. Dominica Pentecostes, Episcopus Sidoniæ præfatus, Missam priuatam in Ecclesia Græcorum celebrauit; ex cuius manibus, omnes ferè qui eadem naui vehebamur, sacrosanctum Eucharistiæ Sacramentum percepimus.

30. Nocte, loco prædicto mouimus.

31. Delati sumus ad Salinas: vbi sicut intensum frigus glaciem, ita sol vi sua salem astringit, ut supra liceat ambulare, licet subtus aqua remaneat, quæ dulcis & boni saporis est. Primo Autumno, humiditate superueniente, sal hoc

Sal in modum glaciis congelatum.

22 IEROSOLYMITANA PEREGRINATIO
statim liquefcit: qua de recùm plerique fcripferint, ego
plura commemorare nolo. Non procul inde eft oppidum
Larnica, quod ferè mille domos habet: fed proximo
bello Turcico valdè nunc eft deuaftatum. Quoniam au-
tem caprandæ quietis cauffa, hîc aliquantùm fubftitimus,
vifum fuit, principium hoc nauigationis meæ tibi perfcri-
bere, plura deinceps de rebus noſtris ſcripturus, vbi feſe
obtulerit occaſio. Vale. Datum apud Salinas Cypri, die
vltima Maij, anno Domini M. D. LXXXIII.

EPISTOLA SECVNDA.

ARGVMENTVM.

ITER Cypro Ierofolymam, Ierofolyma Tripolim, inde in Ægyptum proſequitur.
Terram ſanctam, Ciuitatem Ierofolymitanam, aliaque loca ſacra deſcribit.
Quomodo peregrini Ierofolymam, quomodo, & quoties in Baſilicam S. Sepulchri
intromittantur. Situm S. Sepulchri, Regum & Prophetarum Iudææ, Regum
item Chriſtianorum monumenta; militiam S. Sepulchri, & quomodo cum fami-
liaribus ea inſignitus; montes Ierofolymitanos, agri Haceldemach naturam; Baſi-
licam S. Præſepij, loca Natiuitatis & Circumciſionis Domini, ſpecum in quo In-
nocentes ſepulſi, alium in quo B. Virgo latuit, patriam S. Ioannis Bapti-
ſtæ, ciuitatem Ierichuntinam, Eliſei fontem, Cænaculum Domini, quod Chri-
ſtiani ingredi neſas, & quomodo ipſe illuc ingreſſus, pompam apoſtaticam Tur-
ciſmi, ciuitatis Tripolitana admiranda, multaque alia planè incunda, recenſet.

I V N I V S.

DE ratione nauigationis meæ, qualiter Cy-
prum peruenerim, inde tibi perſcripſi. Poſt
datas ad te literas inſequenti die, videlicet
Kalendis Iunij, conduxì nauem non adedò
magnam, quam in partibus iſtis Caramuſa-
num vocant, cuius nauclerus erat Arabs Chriſtianus.
Quod cùm Turcicus loci Præfectus, quem Cadium appel-
lant, didiciſſet, Græco quodam auctore (qui antè annos ali-
quot

quot Mahomeranam perfidiam fuit amplexus, cùm esset loco cum primis honesto in Cypro natus, & qui in oppugnatione Nicosiæ fortiter & præclare se gesserat, multòsque Turcas manu sua confecerat) vela & nauticos funes nobis statim abstulit, ne nauigare possemus, antequam illi aliquid largiremur. Plerumque enim Turcæ in partibus his, rapinis & calumnijs in Christianos confectis, victitare solent. Græcus itaque hic perfidus, cùm ad nauem nostram venisset, comiter illum accepimus, illique non nihil donauimus: qui obtinuit à dicto Cadio, vt quæ nobis fuerant ablata, restitui mandaret.

1. Hora noctis secunda, conscensa nostra Caramusano, versus Terram sanctam vela fecimus. Erat in eadem naui Arabs Maronita (sic Arabes Christiani appellantur) quia apud Lemissum vnà cum Caramusano captus erat, cùm oppidum à Florentini Ducis classe diriperetur. Hic nobis copiosè narrabat, quàm egregiè cum Turcis dimicauerint Christiani. Cùm vidissent Itali eum esse Christianum, liberè è triremibus dimiserunt: debuit tamen ad milliare Italicum, per mare natando, ad quamdam Insulam desertam peruenire, inde verò pedestri itinere, aliud etiam milliare conficere, quandoquidem triremes prope Tripolim appellere volebant.

Turri, quæ portui ad Ioppen imminet, conspecta, Africa, qui est inter Meridiem & Occidentem, ventus flare cœpit vehementissimè: qui littus attingere non permisit, velum lacerauit, funes concerpsit. Cumque nauclerus inops consilij, Cyprum redire, & ad Caramaniam appellere cogitaret, vnde difficilis & periculosa futura esset nauigatio, quæsiuit à nobis quid fieri vellemus: Tripolim quidem tali vento nos tutò peruenire posse, si nauli pretium augere non grauaremur. Cùm itaque nauarchum perplexum viderem, auxi pretium, ad centum vsque florenos. Pactum autem hoc nouum ideò fecit, quòd Caramusanum

num hanc ab Arabe quodam conduxerat, & vbi nos in Ioppe exposuisset, alium quemdam isthic debebat opperiri: compensari itaque sibi volebat, quòd Tripolim versus nauigandum esset. Tensis igitur velis, pleno vento ferebamur: & præternauigauimus Alepdanam, Casaturam (olim Cæsaream) Atarturam, Atelic; post promontotium verò Carmeli, à quo non procul abest Ptolemais, sed tota diruta, Sareptam Sidoniorum, de qua 3. Reg. 17. Luc. 14. quæ ciuitas posita est ad radices montis Carmeli, in cuius summitate monstratur locus, in quo Elias altare construxerat, de quo habetur 3. Reg. 10. Tyrum itidem & Sidonem: quæ ciuitates in eleganti planitie quatuor milliaribus nostris ab inuicem distant. His in monte supereminere dicitur Cæsarea Cappadociæ, in qua S. Dorothea coronam martyrij est adepta. Sequuntur deinde decem tantum miliaribus à Tripoli, Berytum & Anefa ciuitates, vbi mons Libanus assurgit. Hæ vrbes sitæ sunt in Syria Phœnices, quas plerumque inhabitant Christiani quos Drusianos appellant, quibus liberum est more Turcarum album capitis integumentum gestare. Sunt autem ex reliquijs Gallorum, qui Terram sanctam Saracenis eripuerant: sed adeò dissolutam, & vel ipsis etiam paganis turpiorem vitam ducunt, vt plura de illis disserere, ne piæ aures offendantur, minùs necessarium videatur.

Mons Carmeli.

Tyru & Sidon.

Cæsarea Cappadocia.

Berytum.

Drusiani, Christianorum Gallorum reliquia.

Cùm sexaginta milliaria, intra spatium decem octo horarum confecissemus, vento vehementi & procelloso turbine, in portum Tripolis hora vigesima secunda delati sumus: vbi proiectis anchoris, vix tamen subsistere potuissemus, nisi Turcæ de naui Alexandrina maiori celoce adnauigantes, nobis opem attulissent: In littus egressi, ad medium milliare pergentes, deuenimus in ciuitatem, & diuertimus ad Fontecum, Caruaseram, seu mansionem Veneretorum. Situm vrbis huius multi describunt, ego præmitto. Est loco amœno, dimidia parte ad montem porrecta,

pulcherrimis hortis circumdata, fontibus irrigua; aëre tamen parum salubri, ætate præsertim. Illud subijciam, quod nescio an aliquis attigerit. In maritimo ciuitatis ingressu, prope portam ad læuam, ad lapidis iactum, est palatium triangulare, de quo narratur, quod patrum nostrorum memoria sub Solimanno Turcarum Cæsare contigit. Ariolus quidam per artem magicam didicit thesaurum alicubi in hoc loco defossum esse: quem ut sensim, ^{thesaurus Tripoli defossus.} idque quàm secretissimè (nam quidquid auri istic reperitur, ad Cæsarem pertinet) peruestigaret, emptam arcem illam, domum construxit, quam muro præalto vndique cinxit: cumque abditissimas terræ partes vbique perscrutaretur, nihil reperit. Re peruulgata, Sangiacus, (nomen id Administratoris Prouinciæ, quem locum apud nos obtinent Palatini) qui tunc temporis regioni præerat (nam non ita pridem, ab aliquot annis dumtaxat, Bassa Tripoli residere cœpit) ariolo prædicto ad se aduocato, diligenter ab eo de rei euentu percontabatur, cumque rem celare non posset, fassus est, se vehementer deceptum, nullum, quem quærebat, thesaurum reperire in hoc loco potuisse. Sangiacus auri cupidus, conuocauit & alios Necromantas, illisque iniunxit, ut quantum in arte quisque polleteret, eam thesauro reperiendo adhiberet. Conuenit æqualiter omnibus, thesaurum ingentem, vel hoc ipso in loco, vel non procul inde, esse defossum. Cum igitur Sangiacus terram diligentius circumcirca fodi præcepisset, spatio viginti cubitorum, à prædictis ædibus, sub exiguo quodam colle, cuius etiamnum medietas apparet, terra vnius vlnæ altitudine effossa, fuit arca quædam reperta, in qua auri in massas conflati, ad triginta ducatorum millia erant reposita; quæ omnia Sangiacus Constantinopolim misit.

Perlustrauius ciuitatem, & quæ in ea visu digna occurrebant. Manè fuimus apud Lemir, qui cum telonio
 10. præsideat, subiectam tamen etiam militum partem habet.

Venerat tum is Ierosolymâ, vbi quoque telonium habebat, à Turcarum Cæsare Tripolim euocatus, vt Prouinciam in absentia Bassæ administraret; qui ad Persicam expeditionem ablegatus fuerat. Hic itaque Lemir cum stipatores suos Ianissaros Ierosolymam remitteret per Damascum, vbi fratrem Boluch habebat, transëgimus cum illo, vt securitatis causa, Ianissarorum præsidium, quod magis opere fuit necessarium, nobis adiungeret: quod, accepto honorario, non grauatim fecit. Sub vesperam itaque duobus equitibus & peditibus totidem comitati, confecto vno & dimidio milliari, in campo sub monte Libano noctem transëgimus.

Mons Libanus.

Ante meridiem substitimus in Ehda, Arabum Maronitarum villa: deinde milliari pedibus confecto, venimus ad monasterium B. Mariæ de Canobim, in monte Libano positum; vbi Patriarcha Ecclesiæ Romanæ obedientiam agnoscit: conferebat tum Ordines infra Missarum solennia (erat autem dies Dominicus) cuidam religioso. Habitus Patriarchæ, quo ad altare utebatur, nihil differebat ab eo, quo nostrates Archiepiscopi vti consueuerunt. Habebat Pallium, Infulam, Casulam, Tunicellas, & Sandalia. Hostiæ eadem forma, quæ apud Catholicos. Missa Patriarchali ritu Maronitarum finita, Leonardus Pacificus Societatis Iesu Sacerdos, quem Præpositi Generalis permissu mecum habebam, petita benedictione à Patriarcha, more Romano Sacrum priuatum ibidem celebrauit, Casula & Alba Patriarchæ indutus. Patriarcha sacris vestibus exutus, solitum habitum nigrum, cum violaceo capitis integumento accepit; tali namque loci illius religiosi vtuntur. Prandio nos excepit, apposis ovis, butyro, & oliuarum fructibus. Carnes enim illi numquam comedunt. Vesperis peractis, ad villam Ehdam redijmus.

Patriarcha sub obedientia Romani Pontificis.

Manè discedentes Ehdâ, non procul à via vidimus arborea cedrinis viginti quatuor, quæ non succiduntur, cum

cùm in partibus illis non ampliùs reperiantur. Est arbor elegans, satis procera, diductis ramis, ad eius similitudinem, quam Modrzewv Poloni vocant. Cacumine montis Libani, vbi niues numquam liquefcunt, licet calores sint ibi longè vehementiores quàm in Italia, venimus in ciuitatem Balbech, quo in loco quondam Salomon Rex magnificentissimum construxerat palatium, cùm filiam Pharaonis duceret in vxorem, de quo habetur 3. Reg. 7. Neoterici scriptores diuerfas habent de his ædibus opiniones. Frater Bonifacius Stephanus Ragusinus, Prædicator Apostolicus, & Stagni Episcopus, qui pluribus annis S. D. N. mandato in Terra sancta mansit, in eo libro, quem de Terræ sanctæ contemplatione scripsit, affirmat, Salomonem domum saltus Libani in Balbech construxisse. Christianus verò Adrichomius Delphus, in sua Ierosolyma, probat illam Ierosolymis fuisse. Vtrius verior sit sententia, definire non ausing, cùm præsertim Adrichomius & Scripturæ sacræ & Iosephi Antiquitatum Iudaicarum in libro 8. cap. 2. testimonio nitatur: illud tamen haud dubiè possum affirmare, quod accuratè & diligenter obseruauimus, ita planè in Regum libris hoc palatium describi, quemadmodum in hanc vsque diem in Balbech visitur, id èd faciliùs animaduertere licet, quòd non à fundamentis dirutum, sed verustate consumptum sensim collabitur. In descensu montis, transiuimus per frutera collis, quem Antilibanum vocant, vbi Syria Caua vel Cœle-Syria principium habet. Ex pagis circumuicinis Ianissari & Turcæ, quorum iumentis Ierosolymam vehebamur, nostra pecunia conduxerunt ad quadraginta Arabes Maronitas, cum bombardis & arcubus, qui nos securitatis causâ deducerent: quandoquidem loca illa excursionibus Arabum & Saracenorum sunt obnoxia: qui vna antequam èd perueniremus die, mercatores Turcas adorti, quindecim ex illis interfecerunt. Sciendum autem est, octo hîc

Cedri montis Libani.

Balbech ciuitas, & palatium Salomonis.

Extat typus Ierosolymæ qualis fuit tempore Christi: in quo posita est domus saltus Libani, eo loco in quo mons Moriath terminatur: cui murus templi Salomonis impositus, præcipitium spectat: vnde liquet, domum saltus Libani hîc subliter non potuisse.

Syria Caua, vel Cœle-Syria.

Arabum inter se dissidentium octo vexilla.

esse Arabum vexilla, duo rubea Christianorum, sex verò alba Saracenorum, quibus omnibus malè inter se conuenit, & sæpiùs inter se configunt: duobus hisce vexillis Christianorum dumtaxat exceptis, qui certis quibusdam cæremonijs à nobis dissident; quandoquidem, vt superiùs dictum est, Maronitæ Pontificis obedientiam agnoscunt: ceteri habent separatim superstitiones quasdam suas, ab alijs sectis diuisas, quorum in Syria magnus est numerus: quem tamen longo interuallo Maronitæ superant.

Arabes Christiani in Syria.

Arabes, qui alba vexilla pro signo gerût, omnes plerumque latrocinij & prædatione viuunt, in sua Arabia, Terra sancta, & Ægypto. Sunt tamen in Galilæa nonnulli, qui multos ouium & camelorum greges alunt, & in Tabernaculis agunt, pascua bona & salubres aquas conquirendo. Deficientibus vno in loco pascuis, vxoribus & liberis supra camelos impositis, ouium greges ad loca magis comoda propellunt: quorum in Galilæa duas turmas apud montem Thabor obuias habuimus. Porro Arabes Christiani in pagis degunt, agros & hortos colunt, tam in monte Libano, quàm in Syria, præcipuè apud Damascum: in Terra quoque sancta, licet non multis adeò in locis.

Petri Bellonij de Cæsarea Philippi error.

Petrus Bellonius Cenomannus, ciuitatem hanc Balbech, vult esse Cæsaream Philippi: neque tamen id rationibus probat. Certum est, aliam esse ad mare Cæsaream, quæ tale etiam nunc nomen retinet: cuius fit in Sacris literis mentio, quòd ad mare sit posita, vnde S. Paulus Romam nauigauit: Act. cap. 28.

Ex Balbech egressi, vbi nulla habentur diuersoria, non absque grauioris alicuius periculi metu, cui tamen Ianissarorum nostrorum industria maturè obuiam itum est. Nam cùm ij à longè Turcam quemdam, viginti & aliquot personis comitatum, ad bellum Persicum proficiscentem, tentoria fixisse in non adeò lata planicie, (in qua nobis etiam sub-

stendum

stendum erat) animaduertissent, iusserunt, vt intra vicinos colles nos abderemus. Ipsi interea ad Turcam illum profecti, dixerunt se peregrinos quosdam pauperes è longinquo aduentantes, securitatis causa, deducere: petiueruntque vt bona cum illius venia, in eadem illa planicie pernoctare illis liceret. Et quoniam Turcæ moralem misericordiam plerumque obseruant, annuit non grauatim. Itaque non procul ab illo, impetrata licentia, constitimus, & quieui-
 mus: alioquin, si inopinatè superuenissemus, barbarus se contemni ratus, non parum molestiæ nobis inferre potuisset: quandoquidem etiam antea, vt quisque Turcarum nobis erat obuius, illicò nos spoliare volebat: prout factum est, cum in cuiusdam Sangiaci milites ab Ægypto venientes incidissemus: qui quemdam ex meis mulo deiecerunt; & vnà cū rebus, quas gerebat, vi acceperunt: cumq; Æthiops Muchier, à quo iumenta conduxeramus, mulum arripuisset, illum claua percutientes pessimè tractarunt, donec Ianissari nostri superuenientes eum eripuerunt, mulum recuperarunt, & donatis illis duobus taleris, ne nos infestarent, obtinuerunt. Ibi tum, sicut nobis retulit interpres, sanctè more suo iurarunt, quòd quem primum obuium haberent, sibi deinceps temperare nollèt, quòd minùs eum quibus adlubesceret, spoliarent, adferentes causam, quòd viam longam prosequerentur. Nam eadem, qua Czaussij libertate gaudent, quoties in expeditionem à Cæsare mittuntur, vt equos quicumque adliverint, impunè cuius tollere possint. Nocte postera venimus ad Tykycijum hospitale Turcicum; quod non adeò magnificè constructum, sed copiosè à quodam Bassa, qui Damasco erat, dotatum est. Hic obuiam habuimus Carauanam Damasco Tripolim versus euntem, quæ ducentos circiter equites habebat. In hoc hospitali vidimus, cum Turca quidam singularim virides auiculas quinque viuas liberè dimitteret, subinde aliquid submurmurando; cumq; eius rei causam

*Turcarum
milium li-
centia.*

Turca Purgatorium credi, aui- culas pro defunctorum animabus liberantes.

sam per interpretem ab eo percontatus essem, respondit, se id pro animabus suorum propinquorum defunctorum facere, quòd crederet, merito huius boni operis, illas non-nihil subleuari. Atque ita naturæ quodam ductu, de pœ-nis Purgatorij aliquid etiam sentire videntur.

Abel sepul- tura.

Cùm discessissemus manè, ad dexteram itineris, veni-
mus sub montem, in quo Caim fratrem suum Abelem di-
citur occidisse. In eius summitate duo colles eminent: in
quibus Domino holocausta sua obtulisse feruntur; ad radi-
ces vnus horum, locus ostenditur cædis & sepulture dicti
Abel. Dixerunt nobis Turcæ (nam iter accelerantes mon-
tem non conscendimus, qui altissimus est) quòd hoc in lo-
co subterraneus quidam fremitus auditur in fratricidij
illius testimonium, & memoriam innocentis Abel, ob id-
que plurimùm locum venerantur, & pro certo affirma-
runt, si quis graui aliqua infirmitate correptus, nudo cor-
pore in eo iacuerit, quòd statim sanitati pristinae restitui-
tur. Non ita multò post cùm Damascum appropinquare-
mus, habuimus obuios Mamalucos, quorum isthuc ingens
est multitudo. Genus est hominum ex Æthiopibus &
Arabibus permistum. Sunt fortes, mirum in modum agi-
les, & terribiles equorum sessores. Habitu vtuntur ex te-
la alba, tam latè fluente & diducto, vt totum equum coo-
periant, excepto capite, quod fimbrijs & nolis exornant.
Tegmen capitis spiris linteis contortum circumferunt,
acinace accincti, clypeum & telum acuminatum lon-
gum ex arundine crassiore gerunt. In superiori veste,
quam Albornos vocant, à tergo pellem alicuius animalis
appendunt; interiorem verò cum latissimis manicis ha-
bent, quàm Marlotta appellant. Equos habent optimos,
fræna bullata, fellas cum stapedis latiores Adzainticas.
Maior inter eos Maurorum numerus. Ascendimus post-
hac in montem altissimum, qui nunc etiam Chrizoroa
vocatur: habet in summitate facellum ad læuam, quod

Mons Chri- zoroa.

Maro-

Maronitæ septem Fratrum dormientium esse affirmant. Ex eo monte Damascus optimè se spectandam præbet; nam ad eius radices ciuitas hæc ad longum protenditur, in eleganti, amœna, & omnis generis frugum feracissima planicie. Vnde multi volunt, Adamum generis humani parentem hîc creatum, propter terram flauam, qualis tantum apud Damascum habetur: & quod Adam explicatur Flauus. Ex hoc monte duo fluuij oriuntur, qui Damascum irrigant, Abana & Pharphar. Sunt rapidi, non nauigabiles tamen, sed valdè piscosi. Ciuitatem hanc exactè describere, magni esset laboris: quod cum non pauci iam præstiterint, ego supersedeo. Cum ad Portum ciuitatis peruenissemus, ex equis descendimus: neque enim Christianis in maioribus Turcarum ciuitatibus equitare licitum, præsertim Damasci, quod pauci admodum Christiani ex Europa confluunt. Nos tantum duos Italos hîc reperiimus, qui mercatorum Apamææ seu in Aleppo manentium negotia gerebant: apud quos etiam hospitium habuimus. Quamuis autem Damascus sit valdè populosa, ampla, utpote quæ ad vnum & medium milliare patet, & elegans ciuitas; quoniam tamen longius à mari distat, mercatores Europæi rarò illam frequentant, & vulgus Christianis est valdè infensum. Quamobrem Ianissari equitantes, nos medios, à lateribus clausos, in ciuitatem deducebant. Vbi tamen à populo conspecti sumus, inconditis clamoribus & sibilis, maximè pueri, nos exceperunt, ex omnibus plateis ad nos concursus fiebat: cumque ad locum, vbi merces venales exponuntur, deuenissemus; tum verò lapidibus & sputis impetebamur, & nisi nos Ianissari defendissent, furentis populi impetu, discerpti proculdubio fuissetmus. Cum Tripoli discessissemus, prima nocte adiunxerunt se nobis itineris comites, duo Turcæ; quorum vnus senex, alter iuuenis adhuc erat: qui Damascum vsque nobiscum peruenerunt. Veniebant hi ex bello Persico, cum

trigin-

triginta equis, & sanctè affirmabant se primos esse qui ab exercitu redirent: quòd datis duobus Cecchinorum millibus à Bassà impetrassent dimissionem, cùm ardua quædam negotia Damasci haberent. Multa nobis de bello hoc per interpretem narrabant: qualiter non minùs gladio, quàm fame plurimi Turcæ indies absumantur, cùm superato Euphrate, per plures dies inter arenas perpetuas, & surdas cautes, aquam deferendo, ad exercitum sit perueniendum: peste etiam multos absumi. Narrabant pro certo, à suscepti belli initio, vsque ad eorum abitum, ad trecenta Turcarum millia perijsse: se ampliùs eò non redituros, etiam si illis moriendum esset; neque felicem belli exitum ominabantur. Cæsarem Turcarum intereà domi delitijs vacare; neque fidem ijs adhibere, quæ istic agantur, & quàm miserè multi pereant. Eorum famuli, quòd nostri comites itineris essent, cùm nos per plateas Damasci obuios haberent, aliqua etiam erga nos humanitate ducebantur, huc illuc deducendo. Et quamuis nos Ianissari comitarentur, difficilè tamen caueri potuit, in tanta populi frequentia, ne à pueris lapidum ictu salutareremur.

*Turcarum
in Persia
elides.*

Tribus mensibus antequam Damascum peruenissemus, priusquam Bassà ad bellum Persicum proficisceretur (erat hic filius Mahometis Bassæ illius, qui fuit Visir, & est à Turca miserè trucidatus: Bassa autem istè Damascenus, ducebat secum duo millia equitum, & octingentos pedites) venerat huc quædam femina Tartarica, quam Reginam Asiæ appellabant, habens secum quatuor millia Tartarorum. Hæc primùm Bethlehem, deinde Mecham, sepulchro Mahometis infamem, deuotionis causa fuit profecta, quòd veller illa loca visere, in quorum vno magnus Propheta ex virgine natus, in altero alius Propheta itidem magnus sepultus esset. Hanc Bassa per octo dies continuos, cum toto comitatu, mandato Cæsaris, lautissimè

*Tartarorum
Asiaticorum
Regina Me-
cham pere-
grinatur.*

tissimè & magnificè tractavit; & Sangiacum pro duce itineris, cum aliquot militum centenis, illi adiunxit.

Visitauimus domum Iudæ. Hic erat fons, in quo sanctus Paulus est baptizatus, qui nunc publicæ plateæ est expositus: cuius etiam porticus interior apparet. Extra

S. Pauli baptizati fons.

ciuitatem progressi, vidimus locum, in quem D. Paulus demissus est in sporta: & est fenestella turri adiuncta.

*Eiusdem loci demissio-
nis in sporta.*

Non procul inde spelunca subterranea visitur, in qua Apostolus idem, muro demissus, delituit; quæ persecutorum tempore multis itidem Sanctis latibulum præbuit. Inde ad sagittæ iactum monstratur lapis prope sacellum Maronitarum, è quo D. Georgius equum ascendisse memoratur, draconem interfectorum Beryti: qui portus omnium Damasco magis est vicinus.

17. Lustrauius Xenodochium, quod magno sumptu Solimannus Turcarum Imperator à fundamentis crexit, in quo peregrini Mecham euntes & redeuntes, gratis tri-duo sustentantur.

18. Visitauimus ea loca omnia de quibus habetur Actor. Domus A-
19. cap. 9. Domum itidem Ananiæ, in quam per gradus ali-
quot descenditur: & domum S. Ioannis Euangelistæ, in

nanie.

qua cum natum Maronitæ (nescio quo fundamento) affirmant. Fuimus in Ecclesia dictorum Maronitarum, quæ admodum parua est. Pensitant annuatim duo milia Cecchinorum Bassæ, vt deuotionem suam tutò peragere illis liceat. Habent paramenta Ecclesiastica à Gregorio XIII. Pont. Max. missa, quæ attulit P. Ioannes Baptista Elianus, Societatis Iesu Sacerdos. Vidimus à longè Ecclesiam, olim à Christianis D. Ioanni Baptistæ dicatam. Apparet eam fuisse elegantem, & magnis impensis exstructam. Est satis magna, ad instar templorum Ægypti, in medio tholum habet vbique apertum. Non patet ad eam Christianis aditus, prout & in arcem, quæ more antiquo, ex lapide quadrato constructa, turres itidè quadrangulares

E

gulares

*Santones
Turcici nudi.*

gulares per circuitum habet. Reperiuntur hîc nonnulli, deuotionem præ se ferentes, qui planè toto corpore nudi, absque vlllo tegumento incedunt tam æstate quàm hieme, capite & barba rafa; in quorum vnum cùm Damasci incidissem, credebam aliquem insanum ex ergastulo erupisse. Quærenti quis esset, dictum fuit, hominem esse sanctum, & vitæ innocentissimæ; qui mundo renuntiaisset, & cura temporalium omnium abiecta, Angelicam in terris vitam duceret.

*Æthiopes
faciem lapidibus ornât.*

Vidi eodem tempore duos Æthiopes ex India Orientali, mercatores: quorum facies mirum in modum splendebant. Cùm propiùs accedens perquirerem quinam essent; responsum est, mercatores esse qui lapides pretiosos venderent: in cuius rei signum, rubros quosdam lapillos, magnitudine nucis auellanae, valdè coruscantes, fronti & vtrisque genis insertos habebant, ita vt personati incedere viderentur. Mirum qua ratione lapides eiusmodi in pellem faciei includantur, vt fortiter hæreant. Vidi etiam tunc primùm quemdam, qui viride capitis integumentum contortum gerebat, cùm ceteri Turcæ albo vtantur. Dictum fuit, eum ex profapia Mahometis descendere, & eum tali colore signari, qui proprius Mahometis erat, nec à quouis alio præterquàm à propinquis Mahometis, idque in capite geri posset. Vtuntur tamen eo quoque Santones aliqui, Turcarum veluti sacerdotes. Vestes virides cuius gestare licet; tiaram solis tantùm qui genus à Mahomete deducunt: quos frequenter postea conspexi: sed & ibidem Damasci, vnum valdè lacerum, in publica culina, cibos diuendentem & coquentem: vnde apparet, non omnes Mahometis propinquos diuitijs abundare. A prandio conduximus Bolucum, ad quem à Lemiro eius fratre Tripoli literas habuimus, qui nobiscum Ierosolymam proficisceretur. Adiunxit se itaque nobis cum quinque Ianissaris equitibus, totidemque peditibus. De agri Damasceni

*Mahometis
propinqui,
viridi colore
distinguntur.*

masculini fertilitate, fructuumque diuersorum abundan-
 tia, cum multi multa prodiderint, fusius hinc differere, mi-
 nus necessarium iudicaui; illud tantum inferendum arbi-
 tratus, quod ab alijs prætermisum demiror: nempe in Sy-
 ria, videlicet Tripoli, in Balbech, & hinc Damasci præsertim,
 reperiri bonitate cum primis commendatum fructuum
 genus, quod multis nationibus vsitato vocabulo, *Mauza* Mauza Da-
masena.
 vocatur: videtur id nostris cucumeribus non absimile, nisi
 quod forma longiore, crassiore, & ad curuationem modi-
 ce inflexa, ab illis differt. In fruticibus, in quibus species
 hæc prouenit, ad instar nucis auellanæ, in vno globo, quan-
 doque quinquaginta cucumeres eiusmodi condensantur,
 adeo ut propter pondus, melonum ad instar, per terram
 diffuant, vbi si diutius hæreant, putrescunt. Quamobrem
 antequam ad maturitatem planè perueniant, colliguntur;
 atque ita in cubiculis repositi minore negotio mature-
 scunt; sapore & odore genus pyrorum non recentium,
 qualia apud nostros *Vryantovvki* vocantur, referunt.
 Satietalem faciliè inducunt, adeo ut duo saltem cum pane
 vel caseo comesti, stomachum repleant. Est communis
 Christianorum opinio, qui in partibus hisce versantur,
 Adamum & Euam in Paradiso fructum hunc comedisse:
 quod etiam certis rationibus comprobare nituntur: qua-
 rum prima, quod poma hinc non habeantur; quodque di-
 uus Hieronymus, in translatione Bibliorum, cum vocabu-
 lum *Mauza* Latine reddere non posset, fructum ligni tan-
 tum simpliciter posuerit: sit fides penes illos. nec enim
 verisimile est, diuum Hieronymum, qui instinctu diuino
 sacrę legis volumina feliciter interpretatus est, qui que ex-
 actam linguarum cognitionem habuit, id exprimere non
 potuisse. Secunda, quod *Mauzæ* fructu in orbiculos scisso,
 vena quædam appareat, quæ literam T, formam videlicet
 crucis, repræsentat; vnde inferunt, præuaricationem pro-
 toplastorum Christi crucifixi morte fuisse diluendam.

sed etiam in cucumeribus nostris simile quid intueri licet. Tertia ratio, quòd fructus hic, non in arbore, sed in frutice quodam crescit, cuius caulis vnus propemodum pugni crassitiem imitatur, qui tamen fructum pendentem, præ pondere sustinere non potest, sed is in terra, vt iam dictum est, iacet; vt facilè à primis parentibus decerpi potuerit. Quarta, quòd Mauza hæc, folia ad vnus cubiti latitudinem, duorum verò longitudinem, protensa habeat: è quibus post agnitum peccatum, perizomata confici facilè poterant: sed cùm ex folijs ficus ea confuta tradat Scriptura, qualiter hæc subsistere possint, ipsi viderint. Adferunt & alias non adeò magni momenti rationes. Fructus hi Mauze Constantinopolim per mare deferuntur, qui tamen minus durabiles sunt. Itaque nondum maturi colliguntur; sed arena obruti conseruantur; ad solem autem expositi, ibidem Constantinopoli statim maturescunt. Hæc pauca de ijs, occasione Damasci, annotasse sufficiat.

*Locus con-
uersionis
S. Pauli.*

Circa meridiem discedentes Damasco, & vno millia-^{10.} ri longiore confecto, deuenimus ad locum Conuersionis D. Pauli Apostoli; vnde elegantissimus Damascenæ vrbis patet prospectus. Non longè abhinc est ingens lapis, apud quem Apostolus equo delapsus (vt communior opinio habet) in terram prostratus iacebat. S. Helena sacellum hîc exædificarat, cuius vestigia vix apparent. Inde ad dimidium milliare cùm essemus progressi, in gregem ouium Arabum Maronitarum incidimus: ex ijs cùm vnani Bolucus accepisset, Maronitæ qui ibidem in campis erant, concurrere cœperunt, vt eam recuperarent. Turcæ qui bombardas aliquot habebant, substitērunt: in quos cùm fundas & lapides Maronitæ expedire cœpissent, bombardis repositis, profugerunt Turcæ, rapta nihilominus oue; quos consequi pedibus frustra tentabant Maronitæ. Pro nocte deuenimus ad Caruesariam Safa, quæ quinque miliaribus à Damasco distat, & fluuiolo limpidò & præcipiti alluitur.

alluitur. Cùm frequens hîc Arabum mentio fiat, & necessariò sit adhuc faciêda: mirabitur aliquis, quî fiat, quòd cum itinera reddant infesta, à Turcis nihilominùs tolerantur. Sciendum est itaque, quòd sex albi coloris Ara-

Arabes viarum depredatores cur à Turcis exterminari non possint.

bum vexilla, quamuis in Turcarum ditionibus versantur, fixas tamen nullibi sedes habent, sed in vias publicas excurrentes, non magis Turcas, quàm omnis generis viatores deprædantur: qui si inter se concordessent, intollerabiles ipsis Turcis euaderent. Feruntur enim eorum esse ad ducenta millia, qui magnis inter se certant odijs, naturali quodam modo, diuina permissione, insitis. Quodlibet vexillum seu phalanx, suum habet Ducem cui paret: quos tamen omnes longè superabat potentia, quidam Aborys famosissimus in oris illis prædator, qui quadraginta millibus Arabum præerat, & quo tempore ego de Terra sancta Tripolim redibam, Syriam vniuersam populabatur; adeò, vt per illum, Apamæam siue Aleppum, quod magnopere cupiebam, visere tutò non potuerim. Sub illud ipsum tempus, quo Tripoli manebam, Carauanam Turcicam, quæ Aleppo Tripolim veniebat, adortus, triginta Turcis interfectis, camelos cum mercibus omnibus abstulit: Christianis tamen non nocuit, quorum merces se liberè dimissurum pollicitus, à mercatorum Agentibus, qui Tripoli resident, vinum & commeatus sibi mitti postulabat. Quòd autem oras illas adeò infestabat, hæc causa fuit. Bassa Damascenus paulò antè quàm nos eò peruenissemus, vltimo supplicio affecit nepotem ipsius, qui per loca itidem vicina prædas agebat. Finxerat Bassa quasi cum illo pacem inire vellet. Ad quam stabiliendam in quodam loco, quingenti Arabes cum iuniore Aborys, & totidem Turcæ cum Capitaneo Bassæ, conuenerant. Quamdiu Arabes equis incedebant, nihil attentare Turcæ audebant, quamuis in insidijs aliquot equitum centena haberent collocata: ceterùm vbi Aborys & maior Ara-

Aborys Arabis famosus prædator.

bum pars ex equis defiliit, vt munera, quæ illis à Bassa mittebantur, acciperent; illicò Turcæ impetu in illos factò, accurrentibus præsidijs clam dispositis, Ducem hunc eorum viuum ceperunt, & omnes reliquos trucidarunt. Patruus itaque Aborys hic, nepotis iniuriam & cædem vindicaturus, hæc notabilia damna Turcis inferebat. Cùm adhuc essem Tripoli, ferebatur Cæsar, cum muneribus & quibusdam conditionibus, Czaussium ad Aboryssum hunc misisse, vt eum aliqua ratione mitigaret; quòd verabatur, ne Lemier Mahometi, qui potens admodum in Syria Phœnices Regulus erat, coniunctus, magis etiam Turcis esset terrori, Persico præsertim durante bello. Quid postea fuerit actû, scire non potui: quandoquidem Arabes, vt famelici latrones, muneribus non difficulter placantur. Aboryssus hic tres adultos habebat filios: vnum Mahometem ex priore, duos verò Hametum & Sephetum ex altera vxore (duas enim tantùm habebat, cùm plures introducere apud Arabes sit licitum) susceptos: qui tunc cum copijs suis omnibus patri adhærebant, cùm alioquin pro se quisque diuersis in locis prædari soleat: quibus resistere Turcæ non possunt, etiam exercitu conscripto, quos per loca inaccessa, & rupes hinc inde dispersos, irritò conatu persequerentur. Arabes enim & equi eorum, famis & laborum sunt tolerantissimi: & adeò Turcis formidabiles, vt vbi decem, iaculis oblongis armati, & indusijs tantùm tecti (idque ad meridiem dumtaxat, nam à meridie propter ingentem calorem, indusio caput vnà cum tiara obuoluentes, planè nudi equis insident) comparuerint; eos triginta Turcæ, armis & oblongis bombardis muniti, vix aggredi audeant, cùm Arabes valdè agiles sint & animosi. Non pauci nobis Ierosolymis pro certo narrabant, quòd Sangiacus Ierosolymitanus, paulò antequam in bellum Persicum proficisceretur, recreationis causa cum quinquaginta equitibus ad oppidum Bethlehem excurrere vole-

*Arabes Tur-
cis fortiores.*

volebat; cumque in itinere octo tantum equites Arabes obuios habuisset, tantum illi negotij exhibuerunt, ut regredi Ierosolimam necessariò debuerit: habent etenim equos ea pernicitate & audacia præditos, ut in obuios impetum facere, & ubi necessitas postulat, celeritate periculo se subducere nullo negotio possint. Turcis autem adeò sunt terrori, ut circa mare sulphureum, vel lacum Asphalitem, atque adeò in tota Terra sancta, ex villis Turcarum, annuatim illis tributa, redimendæ vexationis causa pendantur: qui tamen vel ea quoque ratione, à rapinis non abstinent. Immò quoties Carauanæ, Damasco, Aleppo, & ^{Carauana} ^{Mecham} Cairo Mecham versus progrediuntur, quod annis singulis ^{euntes.} mense Octobri fieri consuevit, Bassæ trium harum ciuitatum, per nuntios suos munera illis mittunt, ne mercatores despolient: quamuis quælibet Carauana, suum Sanguiacum habeat, cum trecentis equitibus hastatis, totidemque Ianissaris, qui bombardas gerunt, immò & tormenta minora bellica circumducunt. Et Arabes quidem, donatiuis acceptis, seruant quod promittunt: nihilominus cum sit eorum infinita multitudo, ubi occasio adiuuat, cadunt, spoliant Turcas, & merces eorum diripiunt, ac postea in latibula sua fugiunt; quis deinde illos vestigabit & persequetur? Carauanæ prædictarum ciuitatum, quælibet separatim tamquam acies ordinata progreditur: donec omnes apud mare rubrum ad ciuitatem Thur conueniant in districtu Sinai (non enim mons tantum, sed tota regio illa hoc nomine appellatur) ubi coniunctim Mecham proficiscuntur, & transactis ibi in nundinis illis viginti diebus, modo prædicto reuertuntur. Solis autem Mahometanis eò proficisci licitum: Christiani & Iudæi non admittuntur.

Cum essem Damasci, diligenter sum percontatus è Turcis, qui è Mecha veniebant, verumne esset quod vulgò de ^{Mahometi} ^{sepulchrum} sepulchro Mahometis fertur, illud è ferro compactum, vi lapidis Magnetis adtractum veluti in aëre pendere. Negarunt

runt hoc isthic esse : sed sepulchri Mausoleum altiùs eleuatum , columnis non adeò crassis sustentari : cumque conclaue illud angustum & obscurum sit , nec aliud lumen , quàm lampadum , admittat ; ijs qui à longè prospiciant , pensilis tumba videtur ; sed qui propiùs accesserit , facilitè animaduertet illam columnis impositam.

Circa meridiem peruenimus ad castellum Tanaitera,¹¹ ubi notarium Campi Turcici reperimus , qui cum triginta equitibus Damascum reuertebatur , milite ad bellum Persicum per Palestinam & Ægyptum conscripto. Vix dum ex equis descenderamus , ecce superuenit Czauissius , pharetra præcinctus , tribus famulis comitatus , qui ad Sangiacum Gazæ & alios in Ægypto mittebatur , vt , quamuis à bello dimissionem obtinuissent , in Persiam nihilominus reuerterentur . Abstulit nobis duos equos ex melioribus , dicens se à Cæsare mitti , sibi que liberum esse , non solum à nobis , (quos canes appellabat) sed à quouis Turcarum magnate equum accipere , etiam si pedibus illi esset incedendum. Est autem in ditionibus Turcarum planè lex huiusmodi passim promulgata. Ceterum cum Mukyerus locator noster , illi sex taleros obtulisset , & Ianissari itidem apud illum partes suas interponerent , restituit quidem nobis equos , sed alios tamen duos Turcis mercatoribus ademuit.

Accidit & alius , sed lepidus , in hoc loco nobis casus. Vnus ex meis comitibus , decoris causa , vt fit , mystaces sibi torquendo erigebat : hoc aduertit quidam apostata probè Turcismo imbutus , & subito contra nos linguam stringit , verbera minatur , non secùs ac si grandem à nobis iniuriam accepisset . Miramur vnde homini tantus tam repentè contra nos furor : sermone Italico modestè eum compellamus : audire non vult , sed oculis atque ore fulminat. Accito interprete , quærimus causam tantæ iracundiæ : interpretes re intellecta respondet , turbari hominem quòd

quòd vnus ex vobis mystaces sibi torqueat atque erigat, quod maximam indicat arrogantiam. Noster hoc audito, statim mystaces digitis iterum iterumque depressit: & sic barbaricus confedit furor.

21. Manè peruenimus ad pontem, quem ipsimet Turcæ Iacob Patriarchæ vocant. Est satis latus, & solidè constructus, ac Iordani superimpositus: qui fluuius ad dexteram duos habet alueos, quorum vnus Ior, alter Dan appellatur: simul supra pontem, satis tamen longo interuallo coniuncti, velut vnum efficiunt amnem, ita nomen vnum retinēt, & vocatur Iordanis, qui non procul inde ex montibus oritur. Ad læuam, prope fluminis ripam, conspicitur domuncula, quam idem Iacob inhabitabat: parietes adhuc habet integros: apparet valdè fuisse humilem. Non procul inde conspicitur lacus Tiberiadis siue Genezareth; cuius longitudo, meo iudicio, ad nostra decem milliaria protenditur; latitudo, non vbique æqualis, vix duo tantum complectitur. Ultra lacum apparent montium cacumina, & vastæ solitudines deserti: in quo Christus septem pauperibus & pisciculis, saturauit quatuor hominum millia: Marc. cap. 8. Ponte superato, ad dexteram ostenditur locus, in planicie modica, sub rupe, ad ripam fluminis, vbi Iacob cum Angelo luctabatur, de quo Genes. 32. Ad sinistram supra lacum prædictum, ad duos sagittæ iactus erat ciuitas Corozaim, cuius frequens est in Euangelio mentio: nunc planè desolata, vix quinquaginta domunculas habet. Ab hoc ponte iam Galilæa incipit. Terra hinc initio saxosa, & rupibus, vt Syria caua, abundans: sed duobus milliaribus peractis, tanta est in hac regione situs amœnitatis, vt difficulter describi & verbis explicari possit. Soli fertilitas insignis hinc apparet, quòd licet propter incursiones Arabum, agri non excoluntur, optimarum tamen herbarum vim maximam producit, rosmarini præsertim, cuius fruteta vbique latè condensata virent. Inhabitur

Iacobi Patriarchæ
pons.

Iordanis
bifariam diuisus.

Genezareth
lacus.

Lucæ Iacob.

Corozaim.

GALILÆA
confinia &
fertilitas.

pluribus in locis ab Arabibus, qui propter pascua in quibus ouium & camelorum greges alunt, ad aquarum fluentia, tuguriola figunt; & pro ratione pascuorum de loco in locum migrant, prout superius est enarratum. Rosmarini itidem herba, propter amaritudinem quam habet, grata est ouibus, & gregem à morbis plurimum præseruat. Arabes nullam terræ œconomiam exercent: lacticinij tantum pecorum victitant. Multa de Galilææ fertilitate varijsque regionis huius commoditatibus essent scribenda: & ex frequentibus ciuitatum oppidorumque ruinis, apparet eam fuisse populosissimam. Quamobrem non grauatim subscribo Iosepho, qui libro 3. cap. 2. de bello Iudaico, Galilæam describens, affirmat, eam non modò frugum, sed vrbium & vicorum adeò fuisse abundantem, vt vel minimus quisque pagus, ad quindecim colonorum millia habuerit, præcipuè circa montem Thabor: sub quo vallis amplissima & amœnissima interiacet, in qua nonnulli volunt Melchisedechum Abrahamo à cæde Regum reuerenti occurrissè, & benedicendo ei, panem & vinum Deo in gratiarum actionem pro victoria obtulissè, de quo Genes. 14. Alij in monte Caluariæ id factum affirmant, vbi Christus Dominus est crucifixus: quod Theologis disputandum relinquo. Circa meridiem peruenimus ad Caruaseriam, ad quam est cisterna vetus, in quam à fratribus missus fuit Ioseph, Genes. 37. Hanc Turcæ, puteum Iosephi nominant, Arabes Elbir Ioseph: nunc tamen habet aquam. Habent hîc Turcæ suam Moschæam: ante cuius portam puteus hic positus est, ex quo Christianis etiam haurire licet. Habet aquam valdè bonam & frigidam.

Bethsaida. Pronocte venimus Bethsaidam, diui Petri patriam: vbi domus ipsius erat: exstant ingentes ruinæ templi, quod S. Helena magnificentissimum exstruxerat. Nunc est vicus, quindecim casas habens, quas Turcæ inhabitant: & est in ipso littore lacus Tiberiadis, qui in Euangelio, mare Gali-

Puteus Ioseph seu cisterna.

Galilææ dicitur . Habet aquam dulcem , quam bibimus , in eademque lauimus . Pisces valdè bonos producit , eiusdem ferè speciei , qui Prasini , vulgò Lesseze apud nos vocantur , nisi quòd minores sunt .

Manè deuenimus ad radices montis Thabor , quem Iosephus Antiquitatum lib. 5. cap. 1. & lib. 4. cap. 2. de bello Iudaico , Itabirium vel Itabiricum appellat . Est mons altissimus , mira elegancia in rotundam formam concentratus , vt ab arte magis , quàm à natura factus videatur . Nam per gyrum , in parte inferiori , rupium cinericij coloris circumferentia cingitur : quam deinde viridum frutetorum ordo ita interfecat , vt ab imo vsque ad summum , rupes rotunda , virenti frondium corona , artificiosè circumdata videatur . In eius summitate est Ecclesia non adèò magna , inter duo sacella à diua Helena eo loco fabricata , in quo Christus Dominus transfiguratus est . Relicto monte Thabor , vidimus à longè ad dexteram ciuitatem Sephet , ^{Ciuitas Sephet.} (Tob. cap. 1.) in altissimo monte positam , in qua Regina Hester est nata . Inhabitarur à Iudæis , quorum infinita isthic esse multitudo fertur . Progrediendo paululùm vltra , videtur in alio monte dirutum castrum Macherontum , ^{Macherontum castrum.} Græci Sebasten vocant , in quo S. Ioannes Baptista est decollatus : sub monte ciuitas erat satis ampla , quæ tota est desolata . Ostenditur à tergo castri parua quædam porta , per quam D. Ioannes ad martyrium eductus dicitur . Inde venimus pernoctaturi ad castellum Zynin satis amplum , quod proprium habet Sangiacum , qui profectio- nem in bellum Persicum apparabat . Non procul à castello est campus , in quo decem viri leprosi Christo ex Galilææ Ierosolyman eunti occurrerunt , salutem ab eo contenta voce postulâtes : *Iesu præceptor miserere nostri* , Luc. 17. Leprosi enim extra oppida habitabant , nec ad conuersationem hominum admittebantur , lege diuina prohibente , Num. 5. Sub ipso Castello est oppidum quod inhabi-
tant

*Turca vino
se ingurgi-
tant.*

tant Iudæi. Quamvis Turcis religio præscribat, ne vinum bibant, tam diu scilicet hanc legem obseruant, quàm diu ipsis occasio potus istius non offertur: quod in hoc ipso Castello manifestè sumus experti, cùm ad nos quidam, non postremus Sangiaci familiaris, cui cum nostris Ianissaris notitia intercesserat, venisset. Diuerteramus, prout moris est, ad stabulum quoddam valdè sœtidum: quamobrem de alio loco eramus solliciti, qui nobis, Turca prædicto procurante, concessus est. Itaque pro labore, vinum Creticum (cuius vnum & alterum barile, pro vsu Ianissarorum nostrorû in promptu semper habebam) egregiè potabat, manibus complicatis, oculis in cælum erectis, vt magis deuotè orare numquam potuerit: cùmque totus iam esset ebrius, admonuerunt nos Ianissari ne illum egredi stabulo permitteremus, ne ebrietas eius innotesceret. Nam cùm eiusmodi potus isthic venalis non reperiatur, facilè vestigari poterat, vbi sese ingurgitârat. Vnde nobis pecunia & carcere, culpa illius repræsentanda veniebat. Quamobrem licet poteramus in aliam domum seu supra tabulatum illius (ædificia enim regionis huius tecto carent, & hospitibus locus tantùm is conceditur) commigrare, quatuor tamen horis expectandum nobis erat, dum ille crapulam edormiret: quem etiam pannis nostris texeramus, ne à Turcis prætereuntibus ebrietas illius agnosceretur. Experrectus tandem surrexit, & Muscatellæ ardorem lympa extinguebat, capite, vt apparebat, satis graui.

SAMARIA.

Manè circa ortum Solis, apud Sichar obuium habuimus Sangiacum in ipsis Samariæ finibus, qui cum trecentis equitibus in Persiam proficiscebatur. Insidebat equo fusco, serico rubro Damasceno indutus, in capitis tegumento pennam struthionis grisei coloris gerebat, in libro quodam legebat. Habebat etiam centum equites Mauros Mamalucos, viros militares & bellicosos. Nos peregrinorum

norum more, ab equis descendentes, prætereuntem illum, capite profundè inclinato, salutauimus. Ipsimet Turcæ nobiscum præclarè actum dicebant, quòd eum in Sichar non offendimus, cùm vir sit in peregrinos valdè rigorosus, qui non ita pridem peregrinos aliquot, plures hebdomadas in carcere detinuit, donec à mercatoribus Apamæ & Tripolitanis trecentorum Cecchinorum pretio eliberarentur. Vix nos præterierat, misit illicò, vt ei vectigal perfolueremus. Singuli binos Cecchinos illi numerauimus, Ianissaris opera sua nos egregiè iuuantibus, ne plura soluere fuerit necesse. Vectigal huiusmodi in Campo exigebant à nobis duo Samaritani, qui tñris rubeis vtuntur, & licet circumcidantur, diuersam tamen à Iudæis habent religionem.

Sichar est primaria Samariæ ciuitas, de qua Ioan. cap. 4. *Sichar.* inter Garizim & Hebal montes posita: à Turcis Neapols vocatur, protenditur in longum sub monte, & est satis populosa: fructibus plurimis abundat. Nullus illic Iudæorum habitat, nec subsistere in transitu potest; adeò illis inter se non conuenit.

15. Manè medio milliari confecto, descedentes ad læuam ab itinere, ad iactum sagitte, vidimus puteum; apud quem Christus cum muliere Samaritana colloquebatur. Puteus *Puteus Samaritana.* hic est obrutus lapidibus, apparet tamen notabiliter: & ipsi Turcis est venerationi, quòd Magnus Propheta (vt illi Christum nominant) ex illo aquam hauserit. Christiani, vt moris est, recitata vna oratione Dominica, in genua procumbentes terram exosculantur. Ab hoc puteo descendentes, profecti sumus per conuallem cum primis elegantem & fertilem, quam Iacob, ultra sortem, Iosepho filio dederat, Genes. cap. 48. Ad dexteram posita est villa salis frequens, quæ nunc etiam Iosephi vocatur. Tribus miliaribus decursis, circa meridiem ad Caruaferiam quamdam diuertimus, vbi iam Iudæa incipit.

IUDAEA.

Et si in omnibus diuinis promissionibus firma & stabilis certitudo, cui nulla dubitatio subesse potest, manifestè appareat; id tamen euidentius in hac terra videre licuit, quam omni fertilitate & bonorum copia abundantem, populo Israëlítico se daturum Deus promiserat. Galilæa frumentorum & omnium fructuum ferax est, & elegantem planiciem habet, quam tamen montes intersecant. Samaria rupes, quamuis non adeò altas, habet; hortis tamen confitis abundat, & conualles valdè frugiferas continet: vineis præterea frequentioribus, quæ à bonitate commendantur, humum lætificat: cumque tria hæc simul iuncta possideat, ideò maiorem incolarum frequentiam habet, qui pagos propter fructuum copiam inhabitant, quibus tantum laboris, quantum in arando & serendo infumi consuevit, impendere necesse non est. Ceterum Iudæa non adeò quidem frumentis abundat, cum sit petrosa, & rupibus immensæ magnitudinis scateat, sed olei, fructuum, vini præsertim, ingentem copiam præbet. Nam à primis Iudææ confinijs inchoando, vsque dum Ierosolymam veniatur, quod spatium septem milliaribus comprehenditur, ab ipsis radicibus vsque ad summitatem montium muri, quibus vineæ cingebantur, ita substructi conspiciuntur, vt graduum theatri speciem quamdam repræsentent, vnde facilè apparet, incredibilem illic vinearum multitudinem, & vini copiam fuisse. Circa Ierichuntem itidem, omnis annonæ, fructuum (dactylorum præsertim & similium; medicinalium quoque rerum, quibus calida cæli temperies amica est) & vini maxima vberitas proueniebat. Non immeritò itaque Deus ipse terram hanc, lacte & melle manantem, appellare consuevit. Tribus ab ingressu finium Iudææ milliaribus confectis, vidimus aquæ viuæ fontem, ad quam Beatissima Virgo, Ierosolymis reuersa, confidens, animaduertit puerum IESVM in comitatu non fuisse, Luc. 2. Supra montem apparent

ruinæ

Fons Beatissimæ Virginis.

ruinæ templi & monasterij Virginum, quod olim D. Helena construxerat.

Hinc ad duo milliaria progressi, post horam vigesimam primam, ciuitatem sanctam Ierusalem à longè conspeximus, Deoque gratias egimus, quòd nobis gratiam fecerit vrbis huius videndę. Recitauit quilibet orationem Dominicam, & salutationem Angelicam, animo consequendę Indulgentiæ plenariæ, quam Pontifices, ciuitatem primò aspicientibus concesserunt. Vno milliari à ciuitate ad læuam, non procul à via publica, est castrum Saulis Gabaa, ^{Gabaa Sauli.} de quo 1. Reg. 10. totum planè dirutū & desolatum, cuius vna tantum turris ferè integra superest. Dimidio milliari confecto, habuimus obuios equites viginti quinque prædones Arabes: quibus visis, vnus è nostris Ianissaris itidem eques, propiùs accedens eos est allocutus: cumque ab inuicem discederent, per interpretem nobis nuntiarent, vt gratias illi Ianissaro ageremus, ad cuius petitionem vita nos donassent. Idem & ipsemet Ianissarus paulò post affirmauit, quòd illos optimè nouerat, & longo tempore prædatoriam cum illis exercuerat. Narrabat homines esse prædatorum omnium ferocissimos. Animaduertimus tum in Boluco nostro non dubia signa trepidationis, quæ pallor in vultu & tremor ita prodebat, vt ne loqui quidem posset. Arabes enim, vt antè dictum est, nec ipsis Turcis parcunt; & faciliùs quandoque Christianos, quàm ipsos, illæsos dimittunt.

Vna & dimidia ante occasum Solis hora, tandem Ierusalem. IERUSA-
solum peruenimus, & iuxta receptum morem ad portam Piscium substitimus. Interea quidam ex nostris hastatis per portam Damasci ingressi, significarunt peregrinos aduenisse. Nos quoque peditem Ianissarum præmisimus, aduentum nostrum indicantes: quòd vt Fratres Ordinis S. Francisci de Obseruantia intellexerunt, venerunt ad illam, apud quam exspectabamus, ciuitatis portam, Frater Christo-

Christophorus de Tridento Vicarius (nam Pater loci Guardianus Frater Angelus Stella, negotiorum monasterij caussa Constantinopolim profectus, in reditu diem extremum clauserat in Armenia) & Frater Ioannes de Florentia : qui cum nos consalutassent , expectarunt dum Turcæ venientes, sarcinulas nostras excuterent, & perlustrarent num aliquid mercium apud nos esset : vbi nobis arma sunt adempta (ea namque in itinere deferre licitum est, & ipsi Turcæ libenter hoc patiuntur propter Arabes) deduxerunt nos ijdem Turcæ vsque ad monasterium S. Saluatoris, & portam eius. Ingressi Ecclesiam, in genua procumbentes, vnà cum religiosis decantauimus canticum Te Deum laudamus, Deo gratias agentes pro tam singulari beneficio, quod nos ad hæc loca sacratissima, in quibus steterunt pedes eius, operando salutem nostram, perducere incolumes dignatus fuerit. Assignata nobis sunt deinde cubicula, vbi peregrinis diuertere mos est: deinde cœna est apposita.

*Peregrini
in ingressu
Ecclesie sacri
Sepulchri
tributum
pendunt.*

Manè Missam in monasterio audiuiamus: à prandio pro-^{16.} ut moris est, adiuiumus domum Cadij, vbi nomina nostra & Patris, excipiente Notario, professi sumus. Deinde Fratres Religiosi suprâ memorati, numerarunt ibidem à quolibet nostrum vndecim Cecchinos, qui constituunt flores nos viginti duos. Duo Cecchini in capita singula, penduntur pro ingressu Ciuitatis, nouem verò pro facultate adeundi sacrum Sepulchrum. Aurei ducati ad pondus ibidem examinabantur: simplex autem moneta, quam Sayn appellant, ab ijs qui aurum non habebant, absque pondere, quod notabilis sit, accipiebatur. Cocus meus pro monacho habitus, quinque tantum Cecchinos persoluit. Sacerdotes religiosi nihil pendunt: sed qui laici sunt, quinque Cecchinos numerant. Quamobrem cum is pro laico religioso ratione habitus iudicaretur, volebant Turcæ vt iuraret, quod religiosus esset, ille cum iuramento,

mento, id quod non erat, affirmare non posset, sublata in cælum manu, dixit se non esse religiosum. Turcæ autem existimantes eum bona fide iurasse, abire permiserunt. Hac arte Turcas elusit, reliquum pecuniæ quæ illis pendenda erat, sibi referuans. Interpretes habebam duos, vnum Iacobum senem, quem mecum Cypro acceperam, ex Salinis, Famaugusta accersitum; alterum iuuenem Gorgi Syrum Tripolitanum. Vterque absq; tributis solutione, iuxta receptam consuetudinem, ingredi permissus. Redeuntes à domo Cadij, cùm prope Ecclesiam transiremus, ante portam eius adorauimus: deinde monasterium ingressi, acceptis ijs quæ pro nocte necessaria erant, intrauimus in Ecclesiam ad audiendas Vesperas. In ipso introitu, denuò ijs qui nobis templum aperiebant, decem & aliquot Maydinos, quorum singuli grosso nostro computantur, persolvere coacti sumus. Statim ab ingressu Ecclesiæ, in Capellam sacri Sepulchri intrauimus, & recitata *Ingressus ad S. Sepulchrum.* Oratione Dominica, Salutatione Angelica cum Collecta, loco hoc sacro exosculato, iuimus ad Sacellum, in quo Fratres officia diuina peragunt; quod Apparitionis vocatur, quòd in eo loco, Christus Dominus post gloriosam Resurrectionem suam, Virgini Matri Mariæ primùm apparuerit. *Capella Apparitionis.* Hic inchoatis à Fratribus, qui nobiscum vnà sunt ingressi (erant autem sex Sacerdotes, & alij octo) Vesperis & absolutis, Processio cum vexillis est instituta, quam nos Peregrini accensis cereis bini & bini sequebamur. *Processio peregrinorum in Ecclesia Saluatoris.* Ventum est primò ad altare minus ad dexteram portæ: in quo posita est pars columnæ, ad quam Christus fuit flagellatus. Est autem ex lapide rubeo Porphyrite, prout ex particula apparet, quam inde ad Ecclesiam Nesuesiensem mecum attuli. Hic prima supplicatio est habita: initio decantatur sacer Hymnus eius loci proprius, cum Antiphona & Oratione. Religiosus deinde facit exhortationem ad Peregrinos, mysteria quæ in eo loco facta sunt

enarrans, & ad præstandam pro diuino hoc beneficio gratitudinem, & animi deuoti feruorem, incitans. Hic ordo apud cetera omnia sanctuaria seruatur. Frater Ioannes de Florentia, vir eloquens & doctus, has tum exhortationes faciebat. Dum eiusmodi orationes peraguntur à Sacerdote, peregrini in genua prouoluti recitant Orationē Dominicam cum Salutatione Angelica, & terram deuotè exosculantur. Et quoniam quælibet natio in hac Basilica suas habet Capellas seu Oratoria, prout inferiùs dicitur: hæc capella Apparitionis ad Catholicos pertinet, & habet Indulgentiam plenariam, prout & eius altare, in quo columna illa Christi flagellati est posita. Inde proceditur ad Capellam carceris, in quo Christus Dominus, dum Crux pararetur, positus fuit. Locus est paruus, angustus, & tenebricosus, nullibi lumen admittens, in rupe excisus. Apparet certè fuisse vel carcerem, quandoquidem in hoc ipso Caluariæ loco malefactores supplicio afficiebantur; vel custodis horti receptaculum, qui non procul inde aberat, ad Iosephum de Arimathia pertinens, vt in Euangelio habetur. Oratorium hoc carceris, est nationis Græcorum, & habet septem annos Indulgentiarum, cum totidem quadragenis: quæ quadragenæ pro septies quadraginta diebus numerantur. Sequitur deinde altare S. Longini, qui lancea Christi latus perforauit: sed hîc Processio non subsistit, nulli enim nationi est assignatum. Itur hinc ad altare eo loco positum, in quo milites supra vestem Christi miserunt sortes: & quoniam inter sanctuaria numeratur, Orationes solitæ peragebantur. Est Armenorum: habet septem annos & totidem quadragenas de Indulgentijs. Proceditur deinde ad Capellam loci, in quo S. Helena Crucem sanctam inuenit. Descenditur eò per plures quàm triginta gradus, in quorum medio ad manum sinistram relinquitur ipsius sanctæ Helenæ Oratorium. In Capella Inventionis, altare maius est Catholicorum, habens Indulgentiam

*Capella
carceris.*

*S. Longi-
nus.*

*Crucis in-
uenta locum.*

gentiam plenariam, ad cuius dexteram est aliud paruum, quod ad Græcos pertinet. In reditu ad dexteram deflectitur ad S. Helenæ Oratorium: quam illa Ecclesia propter insignia pietatis & religionis merita, eo prosequitur honore, ut in hoc eius Sacello & supplicationes fiant, & Indulgentia plenaria sit attributa. Et certè quicumque Terræ sanctæ loca perlustrauit, fatebitur sanctam hanc Regiam omni veneratione dignam: quandoquidem in ipsa Palæstina ferè trecentas Ecclesias, quarum nunc partim ingentes ruinae supersunt, partim adhuc integræ conspiciuntur, magnis sumptibus erexit, & liberalissimè dotauit. Cumque sancta Cruce reperta & sublata, in reditu loca maritima attingeret, nec à ciuitate in ciuitatem littori adiacentem aspectus pateret, in locis editioribus & prominentijs turres altas ex muro solido ædificari curabat, in quibus ignes in lætitiæ signum vbique accenderentur, quarum in Syria Phœnices per montes frequens est numerus. Tanta animi iucunditate hæc sancta femina perfundebatur, ob inuentionem tam pretiosi thesauri, quo à tetrīs inferni carceribus, Christi benignitate, redempti & liberati sumus. Oratorium hoc sanctæ Helenæ, possident Armeni. Ascendendo deinde vbi peruentum est in Ecclesiam, substitit Processio ad altare, sub quo sita est Columna improperij: quæ est è marmore griseo, crassa & depressa; in qua Saluator noster in Prætorio Pilati collocatus, spinis coronatus, & illusus fuit. Eam huc inde S. Helena transtulit. Habet Indulgentiam septem annorum, totidemque quadragenarum. Eam Capellam habent Abyssini, seu Æthiopes, qui Ioanni Presbytero subsunt: quibus hîc datur eleemosyna, propter extremam eorum paupertatem. Induti tela simplici incedunt: corpus mirum in modum affligunt: semper in genua prouoluti, & orant, & sacram Scripturam, ob maiorem venerationem, legunt. Carnes numquam comedunt; pisces rarò, quòd

*S. Helena
300. Eccle-
siarum in
Palæstina
fundatrix:
aliquingen-
tas eam con-
struxisse vo-
lunt.*

*Turres
S. Helena.*

*Columna
improperij.*

*Abyssinorum
deuotio.*

hîc non habeantur; cùm verò habentur, illis die Domini-
ca, feria tertia & quinta vtuntur, idque si ieiunium non
sit. Absque pileo naturali consuetudine incedunt: capitis
comam crispatam vsque in humeros defluentem gestant:
statura sunt procera & gracili, capita habent instar pue-
rorum exigua. Faciei physiognomia eos esse bonos &
sinceros indicat.

Inde per decem & aliquot gradus ad ipsum Caluariæ
montem ascendendo, præteritur locus, vbi Christi Crux
steterat, & peruenitur primò ad eum locum, in quo Chri-
stus redemptor noster Cruci affigebatur. Habet altaria
duo, maius, & ad læuam minus, vtraque sunt Catholico-
rum. Inter hæc est tabula marmorea diuersicolor, quæ ip-
sum affixionis locum indicat. Habetur hîc Indulgentia
plenaria. Passibus aliquot interiectis, reditur ad locum, in
quo Saluator eleuatus, & Crux in rupem immissa fuit.
Locus hic altitudine vnus cum semisse cubiti eminent: in
cuius summitate, in petra excisum est foramen, habens in
profunditate per diametrum palmum vnum cum dimi-
dio. Margines foraminis per circuitum obducti sunt ærea
lamina, cui literæ quædam Græcæ sunt insculptæ, quæ præ
vetustate legi commodè non possunt. Ab vtroque latere
foraminis Dominicæ Crucis exstant alia duo, in quibus
cruces latronum stabant: quas minores, & minùs altas
fuisse verisimile est, cùm foramina itidem minùs profun-
da sint: quibus nunc ligna simplicia sunt imposita. Cruces
latronum, interstitio quatuor cubitorum distabant à Cru-
ce Christi, nisi quòd illa, quæ ad læuam, nunc fermè cubi-
to longiùs, quàm dextera, dimouetur: idque propterea
euenit, quòd cùm petra scissa esset, vt habetur in Euange-
lio, crux quoque remotior facta est. Profunditas fissuræ
in illa petra vestigari non potest; latitudo tres cubiti qua-
drantes comprehendit. Sanctuarium hoc est Georgia-
norum, qui sedes ad mare Nigrum habent. Nonnulli eos

Pyczy-

Pyeczyhorienſes eſſe affirmant: quod cùm ex hiſtoricis non conſtet, omitto. Indulgentia hîc plenaria. In pariete pendet aulæum antiqui operis ex lana, cui Crucifixi imago eſt intexta. Poſt cruceſ, paries Eccleſiæ conſurgit, in cuius tergo eſt alia Capella Abyſſinorû: quo loco Abraham Iſaacum filium immolaſſe memoratur. ^{Locus immolationis Iſaac.} Locus genuflexionis Iſaaci, marmore diuerſi coloris eſt conſtratus, vnôque & dimidio cubito in longum & latum protenditur. inter ſanctuaria tamen non connumeratur. Habent hîc fixam manſionem ſuam Abyſſini, quandoquidem triennio elapſo decedentibus, ſucceſſores ad S. Sepulchrum alij ſubmittuntur: quod tum fit, quando nullum illis cum Turcis eſt bellum, quod rarò tamen euenit. Eſt hîc Indulgentia annorum ſeptem, & quadragenarum totidem. Ad illam Capellam extra Eccleſiam Proceſſio non fit: quam nos poſt triduum viſitauimus.

Ex monte Caluarię descendendo, itur ad Lapidem Vnctionis, qui è regione Portæ maioris, qua ingreſſus ad Eccleſiam patet, eſt poſitus. ^{Locus Vnctionis.} In eo Chriſtus Dominus, è Cruce depoſitus, à Iosepho & Nicodemo, conditus aromatibus eſſe perhibetur. Eſt quatuor cubitos longus, latus vnum cum ſemiſſe. Catholicorum eſt hic locus, & habet Indulgentiam plenariam.

Hinc tandem peruenitur ad Capellam ſacri Sepulchri: quam Proceſſio ter circumit, & vbi ante oſtium deuenitur, omnes in genua procumbunt: cumque propter loci anguſtiam omnes ſimul ingredi non poſſint, præcedit Sacerdos religioſus qui facit exhortationem: quem peregrini per ordinem ſinguli ſequuntur, in ſacratiffimum Domini Sepulchrum introeuntes per humile & depreſſum oſtiolum, ad cuius partem dexteram intrinſecus, ^{Sacri Sepulchri affignatio.} altitudine vnus cubiti cum dimidio, eſt locus in planum extenſus, adinſtar ſcamni: in quo ſanctiſſimum Chriſti corpus poſitum fuit. Sepulchrum hoc ſanctum, eſt Ca-

tholicorum, habetque plenariam Indulgentiam. In eius anteriori parte est Capella rotunda, vbi est lapis depressior, in quo sedebat Angelus, nuntians mulieribus gloriosam Christi resurrectionem. Retro Sepulchrum Domini, est paruum Sacellum Cophtorum siue Chaldæorum, absque sanctuario. Oratione in sacro Sepulchro finita, & sanctissimo loco humiliter exosculato, Processio versus Capellam Apparitionis continuatur: in transitu duo sunt rotundi lapides, vnam cum dimidia latitudinis in circumferentia habentes, sex cubitorum spatio ab inuicem distantes: in quorum vno, qui Sepulchro proximus, stabat Christus; in altero Maria Magdalena cum Christo, quem hortulanum putabat, colloquens. Non procul inde est altare dedicatum eidem Sanctæ ad Catholicos pertinens, Indulgentiam septem annorum & totidem quadragenarum habens. Hinc iam Processio completa, ad Capellam Apparitionis redit: vbi à Fratribus Completorium decantatur: peregrini autem deuotioni vacant, per sacram Confessionem, ad crastinam diuinissimi Sacramenti perceptionem sese præparantes.

*Locum, Noli
me tangere.*

*Affiduitas
diuinorum
officiorum
in Basilica
Ierosolymita-
na.*

Noctem insequentem peregrini in deuotione particulari transigunt, prout diuina bonitas cuilibet eam inspirauerit. Si quis tamen somno prægrauatur, potest in aliquo sanctuario, vel ad Sepulchrum Dominicum, vel in monte Caluariæ, vel alibi modicum quiescere: quod in longum produci nõ potest, quandoquidem ante mediam noctem, quælibet natio ritu suo, in deputatis Oratorijs, diuina celebrat officia, Catholici verò in Capella Apparitionis matutinas preces decantant: quibus finitis Sacerdotes sua priuata sacra peragunt. Matura Missa plerumque ad Sepulchrum Dominicum, à peregrinis, quod & nos faciebamus, frequentatur: deinde concedit quisque, vbi magis adlibuerit. Et quoniam in sacris his locis, etiam oratio fit pro defunctis parentibus & propinquis, nonnulli impetrant à

*Pro defun-
ctu suffra-
gia.*

Sacer-

Sacerdotibus, vt Sacra in præſentia illorum in monte Caluarie pro defunctis celebrent, vel quocumque alio in loco, vt id fiat, Dominus alicui inſpirauerit. Cùm tempus inchoandi ſummi Sacri aduenerit, quod Pater Vicarius tunc peragebat, Sacerdotes, vt in celebri feſto, ſolenniter induti, ad Sepulchrum Dominicum procedunt. Celebrans accedit ad altare ſolus, ceteri verò Sacerdotes, qui ſacrum decantant, in Eccleſia extra Capellam remanent: nam exterior hæc S. Sepulchri Capella minùs capax eſt, & peregrini tantùm, ibidem genu flectentes, per oſtiolum inferiùs introſpiciunt in ſacrum Sepulchrum, & apud Miſſæ ſacrificium deuotionem ſuam peragunt: quemadmodum & nos fecimus, ibidemq; ſacroſanctam Euchariftiam ſuſcepimus. Sacerdos propriè in hoc ipſo loco, in quo Saluatoris Corpus iacuit, (qui quaſi ſcamno in rupe exciſo aſſimilatur) commodè ſtans diuina tractat myſteria: quandoquidem locus hic à terra, vltra ſeſquicubitum eſt eleuatus, latitudo verò quæ Corpus Chriſti admittebat, vnus itidem eſt cubiti. Ad parietem, eſt antiquiſſima tabula; in qua Chriſti reſurgentis imago, inter duos Angelos genu flexos, eſt depicta. Finito Sacro, Fratres religioſi, Horas Canonicas in Apparitionis Capella perficiebant, nos quoque Orationes noſtras continuabamus. Deinde exſpectantes dum Turcæ Eccleſiam reſerarent, perlustra-

baſimus alia loca, vtpote ſepulchra familiæ Iosephi ab Ari-
mathia: qui locus eſt Syriarum vel Iacobitarum, ſed
non numeratur inter ſanctuaria. Sepulchra hæc ſunt re-
tro ſacrum Sepulchrum ſub Eccleſiæ porticu ſuperiore,
cuius parieti cùm ſint contigua, amplum ſpatium pera-
gendæ Proceſſioni præbent. Vidimus etiã ſepulchra
Balduini Regis & Godefridi Bullonij fratris eius, qui
Terram ſanctam è manibus infidelium recuperarunt, &
ipſam ciuitatem Ieroſolymitanam trigefimo nono obſi-
dionis die, anno 1098. (ali j tamen 1099. die quintadeci-
ma

*Iosephi ab
Arimathia
familiæ ſe-
pulchra.*

*Baldu. &
Godefridi
Regum ſe-
pulchra.*

ma Iulij id factum volunt) in potestatem suam redegerunt. Sunt etiam & alia quinque vel sex sepulchra vno eodemque modo & forma constituta, quorum inscriptiones ob vetustatem difficulter leguntur. Apparet Græcæ gentis hominum ea fuisse. Non habentur pro sanctuarijs. Quoniam verò Capella (vbi tria tantum sunt monumenta, cum alia non procul tamen ab illa sint in Ecclesia posita) est sub ipso Caluarie monte constructa, fissura illa quæ inter Crucem Christi & læuilatronis facta erat, optimè inferiùs in rupe apparet quàm latè diducta fuerit. Græci lampadè in ea accendunt, quæ tamen perpetuò non ardet.

Epitaphium vnum commodè legi potest, quod Christianus Adrichom. in libro suo posuit, & ego ex sepultura ipsa descripsi:

*Rex Balduinus, Iudas alter Machabeus,
Spes patria, vigor Ecclesia, virtus utriusque,
Quem formidabant, quicumque tributa ferebant,
Cedar, Ægyptus, Dan, ac homicida Damascus,
Proh dolor in modico clauditur hoc tumulo.*

Epitaphium aliud, non omnes dictiones habet quæ legi possint.

HIC IACET INCLYTUS DVX GODOFRIDVS
DE BVLLON, QVI TOTAM ISTAM TERRAM
ACQVISIVIT, CVI . . . TV . . . CHRISTIANO
. . . CUIVS ANIMA REGNET CVM CHRISTO,
A M E N.

Sepulturas alias, P. Stephanus Ragusinus scribit esse Regum coniugum & liberorum: Adrichomius autem sex Regum, qui Terræ sanctæ dominabantur, quod verisimilius videtur. Nec enim probabile est Reges illos, per itinera tam longinqua & periculosa, vxores & liberos circumduxisse. Ego quamuis diligenter inscriptiones eiusmodi contemplatus fuisssem, præter superiùs posita, plura describere non potui. Nam character est antiquus, abra-

sus;

fus; & sepulchra ipsa rupta & mutilata. Circa meridiem
 Turcæ aduenientes reſerarunt Eccleſiam. Quamobrem
 quemadmodum intraueramus, ita inde egreſſi ſumus,
 cum religioſis, & nonnullis alijs. Hi autem fuerunt diuer-
 ſarum nationum, Chriſtiani Ieroſolymis reſidentes, qui,
 quoties adueniunt peregrini, facultatem cum illis Eccle-
 ſiam ingrediendi, aliqua ratione impetrant. Nec enim
 aliàs intromitti ſolent, niſi in maioribus ſolemnitatibus in
 eorum gratiam Baſilica aperta. Ingrediuntur autem, cum
 peregrini adſunt, abſque aliqua vectigalis ſolutione. Quo
 nomine magnas peregrinis agunt gratias, prout & nobis
 egerunt, quòd propter eorum aduentum, ſacra loca viſe-
 re conſeſſum illis fuerit. Admittuntur tamen etiam illi
 Ieroſolymitani incolæ, qui res ad deuotionem pertinen-
 tes diuendunt: vt ſunt calculi precatorii, ex arbore oliua-
 rum & terra conſecti, ex qua primus parens Adamus di-
 citur plasmatus, quæ Damasco aduehitur: lapides itidem
 varij in formam calculorum ſimilium concinnati: cruces
 cum reliquijs locorum Terræ ſanctæ: menſuræ itidem
 Sepulchri Dominici, cum alijs nonnullis rebus cuiusmodi.
 Sumus igitur egreſſi omnes, nullo intus relicto. Nam
 egredientes ſingulos Turcæ numerant, vt conſtet tot
 egreſſos, quot fuerunt in Templum admiſſi. Erat tunc
 temporis ibidem femina quædam Polona, Dorothea Sie-
 kierzecka, quæ ab annis aliquot Ieroſolymis morabatur,
 annum agens ætatis circiter quinquageſimum. Hanc non-
 nulli mente captam arbitrabantur: Deo tamen id ſolì no-
 tum. Nam magna & admirabili deuotione prædita vide-
 batur, nullamque occaſionem Baſilicam Saluatoris ingre-
 diendi prætermittebat. Hæc cum eſſet Catholica, locum
 non habebat Ieroſolymis ubi caput reclinaret. Nec enim
 in Conuentu Fratrum habitare licitum illi erat, quòd non
 niſi conſeſſionis cauſſa accedebat. Itaque cum hinc inde
 per ciuitatem vagaretur, ſæpiùs fiebat, quòd à Turcis mi-

*Mulieribus
Ierosolymi-
tana pere-
grinatio pro-
hibita.*

serè vexabatur, & quandoque etiam verberibus adè ex-
cipiebatur, vt mirum fuerit, quomodo viuere potuerit.
Nam costas serè omnes, in tenero corpusculo, verberibus
confractas habebat; dumq; tertia vice Dominicum Sepul-
chrum ingrederemur, vix eam à rabie Turcicorum puero-
rum defendere & eripere potuimus. Quamobrè propter
scandala, quæ sacris illis in locis eius occasione committe-
bantur, Gregorius XII Pont. Max. sub excommunica-
tionis pœna interdixit, ne mulieres ampliùs Ierosolymam
proficiscerentur. Procuraui itaque apud Cadium, vt, quod
absque eius permissu fieri nō poterat, cū illa spontè nol-
let, per vim isthinc abduceretur. Dixi eam popularem
meam fuisse, & è capite laborare. Concessit ille non gra-
uatim. Relicta igitur illi pecunia qua Tripolim adnaviga-
re posset, prior è sancta ciuitate discessi.

*Iacobi Ma-
ioris decolla-
tionis locus.*

Templo egressi, venimus ad nostrum monasterium,
vbi in communi Frat. Refectorio prandio ab illis excepti
humanissimè fuimus; cū antea in peregrinorum diuer-
sorio cibum capere soliti essemus. Postea ad visenda quo-
que alia sacra loca deducti fuimus. Inprimis vidimus ma-
gnam Armenorum Ecclesiam, eo in loco fabricatam, in
quo Herodes decollari iussit S. Iacobum maiorē, Act. 12.
In ingressu templi ad læuam, circa medium ipsius, prope
murm est altare martyrij huius gloriosi Christi discipuli.
Habet septem annos de Indulgentijs & totidem quadra-

*Anna Pont.
domus.*

genas. Vidimus & domum Annæ Pontificis, ad quam
primò Christus ductus fuerat: vbi nunc est parua Ec-
clesia eorumdem Armenorum. Habet & ipsa septem an-
nos Indulgentiarum cum totidem quadragenis. Postea
sumus egressi per portam, quæ nunc etiam vocatur Porta
Dauid, vel Porta Sion. Nam extra illam inchoatur mons
Sion, qui nunc muro ciuitatis non comprehenditur. Non

*Caipha do-
mus.*

procul ab ea domus est Caiphæ, Ecclesia satis ampla Ar-
menorum: in qua ad dextram altaris maioris, est carcer, in
quo

quo Christus Dominus noctem egit, multa ignominiosa à Iudæis perpeffus, vt in Euangelio legitur. Locus est tenebricosus: protenditur ad longum circiter ad vlnas octo, in latitudine angustior. In altari maiori iacet lapis, qui positus erat ad ostium Sepulchri Dominici, magnus valdè, habens in longum ferè quatuor, in latum duos ferè cubitos, crassitiem verò dimidij & paulò plus cubiti: vt mulieres meritò loqui inter se debuerint; Quis reuoluet nobis lapidem? considerato eius pondere, cui subleuando, vix decem homines sufficerent. Eodem in loco, ante conspectum Caiphæ, ab eiusdem scelerato ministro data est alapa IESV. Est hîc Indulgentia plenaria. Ante Ecclesiam in medio aræ plantata est oleæ Arbor: quo in loco, vt creditur, ad ignem accensum D. Petrus Christum negauit: ad cuius latus est malus aurea arbor, cui insidens gallus cantauit. Inde ad iactum lapidis est sacrum Cœnaculum, in quo Christus Cœnam vltimam cum discipulis peregit. Huc ingredi Christianis & Iudæis non permittitur, cum Turcæ Moschæam suam intus habeant. Quamobrem peregrini ad locum hunc conuersi, vnum Pater noster & Ave Maria genu flexi recitant; & Indulgentiam plenariam, ac si ingressi essent, assequuntur. Ego tamen, vt inferiùs dicetur, cum duobus alijs, sacrum hoc Cœnaculum postea sum ingressus: quod cum me posse ingredi diffiderem, tunc cum alijs deuotionẽ, vt licuit, hoc loco absolui. Hæc tria loca, vt iam dictum est, ad Armenos pertinent, vbi habent sua monasteria, ibique habitant. Inde paululum ad læuam vltra montem progressi, paruam specum intrauimus, in qua Petrus negationem suam defleuit amarè. Locus nulli nationi deputatus. Habet septem annorum & totidem quadragenarum Indulgentiam.

*Carcet
Christi.*

*Lapis Do-
minici Se-
pulchri.*

*Petri nega-
tionis locum.*

*Cœnaculum
Dominicũ.*

Ad dextram domus Caiphæ, est Cœmeterium Catholicorum, locus sepulturæ illorum ab antiquo deputatus. Nullus enim in ciuitate sepeliri potest; immò & ipsi Tur-

cæ in suburbio humantur, nisi sint aliqui ex nobilioribus, qui Moschæas ad eum vsum sibi construunt. Reuersi deinde sumus per eandem illam portam in ciuitatem, & ad læuam per aliam plateam versus monasterium procedendo, fuimus apud portam Ferream, per quam Petrus ex carcere eductus est ab Angelo, Act. 12. Fores hîc nullæ, & locus planè desolatus.

Porta Ferrea.

Ioachimi domus.

Manè ex monasterio egressi, per ciuitatem euntes, prope portam ad læuam, defleximus ad domum Ioachimi: in cuius parte inferiori sunt habitationes aliquot, in quibus ostenditur conclaue beatissimæ Virginis, & locus Natiuitatis eius: cùm nonnulli velint eam ibidem Ierosolymis natam. Indulgentia hîc annorum & quadragenarum septem.

Porta S. Stephani.

Lapidationis locus.

In monte est Ecclesia S. Annæ dicata, cum monasterio Virginum, à S. Helena constructo. Turcarum ea domus & Templum, quod tamen Christianis adire licet: cùm minùs frequenter Turcæ cæremonias suas in eo peragant. Deinde exiimus è ciuitate per portam S. Stephani, sic nominatam, quòd per eam diuus hic Protomartyr eductus ad lapidandum fuerat. Descendendo, in medio montis, est diuerticulum in rupe plana; & hic lapidationis locus, vbi antiquitus erat Oratorium, cuius nunc non exstat vestigium. Paulò inferiùs, hortum versus, in quo Christus captus est, ostenditur locus, in quo beata Virgo Maria stabat, orans pro Stephano, cùm à Iudæis lapidaretur; quæ rupis planities hinc optimè conspicitur. Habetur hîc Indulgentia septem annorum cum totidem quadragenis.

Vallus Iosaphat.

B. Maria Depara monumentum.

Descendimus deinde in vallem Iosaphat: in cuius imo, rupes excisa, & muro per gyrum cincta, quadraginta gradus habet: per quos descenditur ad paruam Capellam, in qua erat monumentum beatissimæ Virginis Mariæ. Est ibi altare, in quo nobis præsentibus Missam celebrauit Frater

Ioan-

Ioannes de Florentia. Catholicorum hic locus, habet Indulgentiam plenariam. Lampades hinc duodecim pendēt, quæ non accenduntur, nisi cū Sacrum fit. Ad latera Capellæ, sunt alia duo altaria; & in medio scalarum, ab vtraque parte Sacella, in quibus erant sepulturæ familiæ Ioa-
chimicæ: nunc ea loca diuersæ nationes obtinent. Ascen-
dendo inde ad dexteram est Capella S. Ioseph sponsi bea-
tissimæ Virginis; è regione ad læuam, parentum ipsius,
S. Ioachimi & Annæ. Vtrobique Indulgentiæ septem an-
norum & totidem quadragenarum sunt attributæ. Inde
versus montem Oliueti procedendo, ad dextram relin-
quitur in loco valdè depresso villa Gethsemani, cuius rui-
næ non exstant: planities tamen superest, in qua quercus
aliquot, rusticorum fortasse olim, residuæ conspiciuntur.
Linquitur & hortus ibidem statim ad dextram, vbi Chri-
stus fuit captus; & rectà deuenitur ad lapidem, qui Apo-
stolorum nominatur, vbi Apostoli somno grauati, ad vi-
gilantiam Christi verbis admonebantur. Ad iactum la-
pidis, locus Orationis Christi reperitur. Est antrum sub-
terraneum, ingressum habens angustum, & foramen
in parte superiori, loco fenestræ: per quod lapides isthic ex-
cisi commodè extrahebantur. Locus est quietus, & planè
deuius, ad quem nulla semita ducit. In eius ingressu est al-
tare, vbi Christus in oratione prostratus iacuit; à quo cu-
bitorum quatuor distantia, est columna in rupe excisa, cui
superior antri pars innititur, in qua Angelus eum confor-
tans apparuit. Antrum hoc est lucidum, & non inelegans,
nullique nationi appropriatum, Indulgentiam obtinet
plenariam. In reditu ad iactum lapidis, quæ versus hor-
tum itur, per quatuor gradus descensus patet, quasi ad vi-
culum quemdam; in eum locum, vbi Iudas Christo ob-
uius, illum osculatus, signum dedit Iudæis vt comprehen-
deretur; vt habetur in Euangelio. Locus nulli nationum
adscrip-
tus, plures arbores oliuarum continet, & habet

*Gethsemani
villa.*

*Hortus ago-
niæ Christi.*

*Abſalonis
ſepulchrum.*

*Zacharia
ſepulchrum.*

*S. Iacobi
innantis lo-
cus.*

Indulgentiam plenariam. Inde ad læuam relinquitur ſepulchrum Abſalonis, 2. Reg. 18. quod è ſaxo uiuo, forma pyramidis (non columnæ, vt aliqui volunt) decem cubitorum altitudine confurgit. Aliud etiam ibidem eſt ſepulchrum Zachariæ, filij Barachiz, de quo Matth. 23. cui pyramis quoque eſt impoſita, ſed minor & depreſſior. Non longè ab ijs monumentis, ſunt foramina rupium ſeu antra, in quibus, capto Chriſto, latitabant Apoſtoli: locus itidem in rupe, in forma Capellæ S. Iacobi Apoſtoli, de quo diuus Hieronymus ſcribit, quòd panem ſumere noluerit, quoad Chriſtum à mortuis reſuſcitatum videret. Apparuit ei igitur ibidem Chriſtus panem porrigens, & dixit: Sume Iacobe: Filius enim hominis à mortuis reſurrexit. In quolibet locorum prædictorum habetur Indulgentia ſeptem annorum & totidem quadragenarum.

*Torrentis Ce-
dron.*

*Vestigia ca-
dentis Chri-
ſti in Tor-
rente Ce-
dron.*

Per vallem Ioſaphat, quæ inchoatur à monumento Beatiffimæ Virginis, labitur torrentis Cedron: qui à prædicto ſepulchro itidem originem ſumit. Creſcit autem ex aquis pluuiarum, quæ primo vere proueniunt; aut è ciuitate ipſa (quæ in monte ſita eſt, & montem Oliuarum opoſitum habet) concepto meatu deſluunt. Æſtate planè deſiccatur: propter aquas tamen ingruentes, non procul ab antris prædictis, pontem paruum ex latere cocto impoſitum habet: ad cuius dextram locus eſt, in petræ ſuperficie plana, ſatis latus; in quo ſtigia manuum, vtriuſque genu, & extremitates digitorum pedum Saluatoris noſtri ſunt expreſſa, cùm à Iudæis ponticulo deiectus, ibidem concidiſſet. Locum hunc peregrini deoſculantur, & habet ſeptem annos & totidem quadragenas de Indulgentijs. Veſtigia hæc, cùm in aperto ſint aëre, pluuias & tempeſtates excipiant, & quotidiano vſu & deoſcultatione attræſcentur; tamen integra ſemper permanent: quod proculdubio non fieret, ſi, prout hæretici volunt, arte facta & incifa lapidi eſſent: quod vel ex Mediolanenſi petra,

tra, quæ retro maius altare in Ecclesia Cathedrali muro est inserta, facile comprobatur. In qua cùm vestigij pedis Christi mensura, sit humana arte insculpta, nec pluuiæ cælo aut aëris iniurijs exposita, attrectatione tamen & osculationibus ita consumitur, vt vix iam, quidnam sit, appareat, licet non adeò sit à multo tempore ibidem posita. In Ierosolymitana autem hac rupe, sacra hæc vestigia, à mille quingentis & ampliùs annis, planè integra, & velut recenter expressa apparent. Si quis ea scalpello renouari dicat, id fieri nulla ratione potest. Nam cùm petra hæc in via publica sit, si quis Christianorum id attentaret, prohiberetur illicò; quandoquidem ne minimum quid Christianis restaurare isthic licet, nisi Sangiacus, expressum ea de re, Cæsaris sui mandatum acceperit. Præterea cùm Turcæ Ierusalem, ciuitatem Sanctam appellare consueuerint, diligentissimè cauent, vt ne quid antiquitatum depereat.

Adhæc sculptura renouata, vel ex ipsa petræ profunditate & concauitate, facile innotesceret: & cùm signa hæc, in rupe lata & plana sint impressa, vt aptè renouata vestigia apparerent, deberet & ipsa dedolari: vnde superficiei planities, frequentiori renouatione, tanto temporum interuallo, ad notabilem profunditatem deduceretur: quæ nunc ita eminet, ac si quis in argillam vdam pedibus & manibus prolapsus conspiciatur. Hæc qui diligentius considerauerit, facile videbit, rem miraculo, non manu, quod non difficulter appareret, factam. Ponte hoc superato, per triginta circiter gradus descenditur ad locum profundum, qui fons Draconis appellatur, in quo Beatissima

Turca antiquitatum Ierolymis consecrandarum studio.

Virgo aquas hausisse, & panniculos suos fertur abluisse. Nam licet clarissima stirpe edita, spiritu tamen humilis fuit, prout sacra Scriptura testatur. Ad læuam deinde inter oliueta locus ostenditur, in quo Regis Manassis iussu, Isaias Propheta, per medium ferra dissectus est. Ad

Fons Draconis B. Virginis.

latus Martyrij Isaia, sub monte, est natatoria Siloë, de

Isaia martyrium.

qua

*Natoria
Siloë à Tur-
cis frequen-
tata.*

qua Ioan. 9. vnde horti omnes, qui sunt in valle Iosaphat, abundè irrigantur. Non procul inde apparèt ruine turris, quæ tempore Christi collapsa, homines decem octo oppressit, Luc. 13. Habentur hîc septem anni & totidem quadragenæ de Indulgentia. Aquam hanc Siloë, Turcæ pro sacrata & benedicta reputant, & plurimi ad lauandum in ea, singulis ferè diebus accedunt. Quamuis enim per cuiusvis aquæ ablutionem se à peccatis mundatos existiment, de hac tamen singulari quodam modo sibi pollicentur, quod corporibus etiã curandis plurimùm conferat. Quamobrem dum eò peruenissemus, in parte superiori (nam per gradus aliquot in rupe excisos isthuc descenditur) expectare aliquamdiu necesse habuimus, dum Turcæ, qui ibidem lauabant, & vestimenta abluebant (hoc autem libenter faciunt, melioris, vt putant, ominis causâ) discederent.

Ager Hacedemach intra horas 24 cadauer absumit.

Circumeundo ciuitatem ad dextram versus montem Sion, ad partem sinistram est in rupe Ager Hacedemach, qui pretio Christi à Iuda venditi, fuit triginta argenteis emprus. Nunc est Armenorum, qui ibidem sepeliuntur. Terra loci illius talis est, vt cadauere imposito, nec cooperto, (quod vidimus) caro, infra viginti quatuor horarum spatium, tota defluat & absumatur, nec aliud quàm nuda ossa integra relinquantur. Locus hic muro est cinctus, ne Christianorum ossa à Turcis infestentur. Permittunt Armeni, & aliarum nationum hominibus in hoc agro sepulturam, aliqua oblata elemosyna. Post angulum templi Salomonis, est porta parua Sterquilinij, per quam sordes ciuitatis eijcebantur. Per eam Christus comprehensus, ad Annam ductus est à Iudæis, populi tumultum metuentibus. Venimus deinde sub montem Sion, in cuius summitate olim fuit arx David, cuius extant ruinae: & transiendo prope piscinam Bethsabæ (de qua dicitur inferius)

Porta Sterquilinij.

feriùs) per Portam piscium redijmus ad monasterium.

Peracto prandio, ingressi denuò sumus Basilicam S. Sepulchri, & Processionem, vt suprà memoratum est, absol- ^{Secundus}
uimus. Finitis Vesperis, per exomologesin ad perceptio- ^{ingressus ad}
nem sacrosanctæ Eucharistiæ nos præparabamus. Erat ^{S. SEPVL.}
tum Vigilia SS. Petri & Pauli Apostolorum. Nox ibidem ^{CHRYM.}
in deuotione, prout Deus inspirauit, transacta. Post me-
diam noctem, Matutinæ preces decantatæ: Missa matu-
ra ad S. Sepulchrum, alia itidem Summa per P. Vicarium
in monte Caluaria, ad altare Catholicorum decantata, in
eo loco, in quo Christus Dominus Cruci affigebatur. Ibi-
demque sanctissimo Sacramento suscepto, processiona-
liter ad sacrum Sepulchrum deducti sumus: vbi intus In-
signia militiæ sancti Sepulchri, pro more Christianis anti- ^{Militia}
quitus recepto, suscipiebamus. Peragitur hæc cærimonia ^{S. Sepulchri.}
à loci Guardiano pro tempore existente, ex priuilegio an-
tiquitus à summis Pontificibus concessio: qui, quandoqui-
dem, vt superiùs dictum est, Constantinopolim profectus
erat, eius loco, munus hoc idem ille P. Vicarius absoluit.
Qui ritus autem & cærimoniæ in actu hoc adhibeantur,
libello particulari copiosius explicatur: cuius exemplar ad
calcem apponitur, vt inde quilibet petere possit.

Nomina eorum qui mecum Ierosolymis fuerunt, &
sacra militiæ huius Ordinem susceperunt, sunt hæc: Abra-
hamus, Baro de Dona, Silesius; Georgius Cos, & Michael
Konarski, Prutheni; Andreas Skorulski, Lithuanus; Pe-
trus Bylina, Polonus. Aderant & alij quoque, vtpote
P. Leonardus Pacificus, Sacerdos Societatis IESU cum so-
cio Cypriota; Ioannes Scholtz chirurgus, Vratislauien-
sis; & Ieremias Giermek cocus, Lithuanus.

Dum expectaremus Turcas, qui nobis Ecclesiam ape- ^{Thesaurum}
rarent, iniecta fuit à nonnullis thesauri Basilicæ S. Sepul- ^{Basilica}
chri mentio: quem, liberalitate Christianorum Princi- ^{S. Sepulchri.}
pum, non mediocriter auctum fuisse probabile est. Sed

In eo nō re-
uelando Fra-
trum Mino-
rum con-
stantia.

Ierosolyma in potestatem infidelium redacta, nihil ex eo reliquum videtur. Selimus Primus, cum Ægyptum depopularetur, thesauro quoque manus iniicere volebat, quem Religiosi fratres in terram defoderant: cumque reperiri nullibi posset, omnes quotquot erant, in tetrum carcerem in arce Ierosolymitana (de qua inferius) coniecti, per septem & viginti menses, pane dumtaxat & aqua sustentati, miserè detinebantur. Tanta tamen eorum fuit fortitudo & constantia, ut nulla flagrorum & tormentorum vi, ut eum proderent, adigi potuerint. Multi ex illis mortui, reliquos Tyrannus, Ægypto occupata, & bello finito, dimitti iussit: Circa meridiem dimissi ex Ecclesia, venimus ad monasterium, ubi peracto prandio, diplomata sacrae Militiæ in pergamento conscripta, nobis exhibebantur. Secretarius Monasterij qui meo tempore ea scripsit, erat F. Deodatus Neapolitanus. Exemplar literarum mihi concessarum tale est.

Quamvis
F. Angelus
Stella Cō-
stantinopo-
lim, ut antè
dictū, dis-
cesserat;
sub eius ta-
mē nomi-
ne diplo-
mata scri-
bebantur.
Mors est
enim, ut
Commis-
sarius tan-
tū sub-
scribat,
(quod &
discedens
in mēbra-
nanudafe-
cit) in cu-
ius absen-
tia, Vicecommissarius literas expediat. Nam Militibus S. Sepulchri, dum Ordinem militiæ ineunt, propter crimoniam dantur literæ, in quibus notatur hoc solum, quod per illud tempus aliquis vidit Au-
ctor verò quoniam postea in multis alijs locis fuit, ideirò iam diploma in illis membranis subscriptis accepit, ubi refertur, quæ loca quis perlustrauerit. Non enim omnes peregrini, omnia loca sacra adeunt, sed tantum, quæ cui adlibuerint.

VNIVERSIS & singulis, presentes literas inspecturis, salutem in Domino sempiternam. In nomine clementissimi Domini nostri IESU CHRISTI, Amen. Notum sit, quod nuper ad sacratissima Terra sancta loca visitanda, ex sincero cordis affectu, peregrè se contulit Illustriss. Nicolaus Christophorus Radziwil, Dux Oliva & Nesuisch, Comes in Schidlowiec ac Mihr, sacri Romani Imperij Princeps, Archimarschalcus Magni Ducatus Lithuania: & sacratissimum Domini nostri IESU CHRISTI Sepulchrum, à quo die tertio gloriosus resurrexit, præmissa Confessione, ac sacra percepta Communione, cum magna deuotione visitauit, & reuerenter amplexus & deosculatus est: sanctumque Caluaria locum, in quo pro humani generis redemptione, in Cruce mortem subiit

ama-

amarissimam. Sion etiam montem, ubi cœnam illam mirificam cum discipulis fecit, eorûmque pedes humiliter lauit, eiusdemq; Spiritus super discipulos in linguis igneis descendit. Bethlehẽm quoque David ciuitatem, ubi pro nobis de Virgine Maria nasci, inter animalia reclinari, octaua die circumcidi, & deinde à Magis adorari dignatus est. Montana etiam Iudæa, ubi sancta Dei genitrix Virgo beatam uisitauit Eliſabeth, & Præcurſor Ioannes natus est, eiûsque desertum, in quo pœnitentiam egit. Bethaniam similiter, ubi Laſarus quatridentanus mortuus, à Domino est reſuſcitatus: atque Oliueti montem, in cuius pede die paſſionis ſua ter orauit, & à cohorte Pilati captus & ligatus fuit: de cuius etiam ſummitate mirabiliter propria uirtute calos aſcendit. Intemcrata quoq; Virginis Maria Mauſolœum in Joſaphat Vallis medio ſitum, à quo glorioſa in ſtellatum ſolium ab Angelis cū corpore & anima aſſumpta eſt; multaque alia pia loca, tam in Ieruſalem ciuitate ſancta, quàm extra, uicina, in quibus Dominus noſter IESVS CHRISTVS pro ſua ineffabili clementia noſtram ſalutem operari dignatus eſt, laboribus, periculis, expenſisq; plurimis, pro Chriſti amore uiriliter perpeſſis, perſonaliter uisitauit, & pio affectu ueneratus eſt. Idcirco nos Frater Angelus Stella Venetus, Ordinis Minorum Regularis Obſeruantia, Prouincia ſancti Antonij Sacri Conuentus ſancti Saluatoris Guardianus & Commiſſarius, & aliorum locorum Terra ſancta, Apoſtolica auctoritate, generalis Gubernator & Rector, ob dicti Illuſtriſſ. Nicolai Chriſtophori deuotionem, ad hac ſacraſiſſima loca, & ſingularem affectum zelûmq; in totius Chriſtiana religionis augmentum, illum militari dignitate duximus inſigniri. Idcirco auctoritate qua fungimur Apoſtolica, ſuper glorioſo Domini noſtri IESV CHRISTI Sepulchro, ipſum Illuſtriſſ. Nicolaum Chriſtophorum militari dignitate inſignimus & decoramus, ac huiusmodi ornamento, quibuſcumque præſentes literas noſtras inſpecturis, inſignitum declaramus & denũtiamus, decernentes inſuprà, eundem Illuſtriſſ. Nicolaum Chriſtopho-

rum, tamquam verum & legitimum Militem, talique dignitate non immeritum, de cetero posse deferre Sancta Crucis, sanctissimi Sepulchri, ac S. Georgij insignia, secretè aut publicè, prout sibi videbitur: & frui Valere & debere omnibus ac singulis immunitatibus, prerogativis, praecellentijs, & privilegijs, quibus ceteri Milites ipsius sanctissimi Sepulchri, uti ac frui consuevere. Item declaramus & constituimus presentem Illustriss. Nicolaum Christophorum, propter singularem eius in religione hic sancti Francisci conservanda affectum, dictorum locorum Terra sancta Procuratorem Generalem. In quorum omnium fidem, robur, & testimonium praesentes fieri curavimus, & Sigillo praefati sanctissimi Sepulchri, nostroque Chirographo communiri. Ierosolymis in praedicto nostro Conventu S. Salvatoris, anno Domini M. D. LXXXIII. die XXIX. mensis Iunij.

Frater Angelus Stella
qui suprà manu propria.

Quoniam autem ad hæc loca sacra veniens, aliquam mei peccatoris memoriam relinquere in ijs constitueram, religiosis Fratribus Dominici Sepulchri, literas vicissim eiusmodi tradidi.

IN NOMINE
SANCTISSIMÆ ET INDIVIDUÆ
TRINITATIS
PATRIS ET FILII ET SPIRITVS SANCTI.
A M E N.

NICOLAVS Christophorus Radziwil, Olica & in Nesuisch Dux, in Schidlowiec ac Mihr Comes, S. Sepulchri Eques. Non alia, quàm uberrima in interiori homine nostro diuina permoti gratia, primò quidem ex voto, à nobis ob
aduer-

aduersam valetudinem, ad presens aggrediendum iter Deo facto, tum etiam pietatis ergo, & in expiationē vniuersa vita nostra peracta cunctorum peccatorum, propositum inuisendi Domini nostri IESV CHRISTI Seruatoris nostri Sepulchrum, aliāq; pietatis Terra sancta vestigia, concepimus. Quod cum in executionem, diuino semper potius, quā proprijs meritis, fauore adiuti misissemus, peruenimus tandem voti nostri compotes facti, Virginei partus anno M. D. LXXXIII. die XXV. mensis Iunij feliciter, per Prouincias Galilaam Samariamq;, Ierosolymam: in cuius felicioris aduentus nostri, & omnium ceterorum beneficiorum (qua innumera sunt) summa cum largitate & infinita benignitate à Deo Optimo semper & ubique in nos exhibitorum, gratiarum actionem; statuimus iam & ordinamus in perpetuum (maiorē gloriam DEI semper in omnibus intuendo) & offerimus nō illo quo debemus, sed quo possumus animo prompto & hilari, donamusq; primò Sepulchro sancto Domini IESV CHRISTI calicem totum aureum cum patena aurea, in vtrisque cum nomine & insignibus nostris. Item alium calicem argenteum inauratum cum patena argentea inaurata, cum nomine & insignibus nostris in vtrisque, offerimus & donamus, corde supplici, Bethlehem loco sancto Natiuitatis Domini nostri IESV CHRISTI Seruatoris nostri. Item relinquimus & ordinamus, ut quotannis in perpetuum, Sepulchro sancto tamquam sibi iure, ex vigore huius donationis nostra, in posterum debiti, centum viginti quinque aurei (ducentos quinquaginta florenos moneta Lithuanica conficientes) deueniant ex Ducatu nostro Nesuisiensi, in perpetua tempora obligando, nos & successores nostros, secundum iura & consuetudines nostras. Quos quidem centum aureos esse volumus pro necessitatibus pro tempore existentibus, ad beneplacitum S. Saluatoris Conuentus Fratrum Minorum Observantium Ordinis S. Francisci. Viginti verò quinque alios dictos aureos, donatos & ordinatos esse volumus in quot annos pro lampade ardente perpetuò habenda in sancto

Cēsus em-
ptus est iā
Venetijs.
Patres ad
S. Franci-
scum della
Vigna te-
nētur sin-
gulis annis
persolvere
illum le-
rosolymis.

Sepulchro Domini nostri IESV CHRISTI. Prædictos autem centum viginti quinque aureos Patres Ierosolymitani, quotannis in festo dierum Petri & Pauli à Procuratore Terræ sanctæ Venetijs pro tempore existente, exquirent. Nôsq; his perpaucis animo & corpore, primò vniuerso Beatorum cœtui, vestris deinde, Patres Reuerendi, quoque orationibus, supplices, viuos & mortuos commendatos esse volumus. Datum Ierosolymis anno Deipara millesimo quingentesimo octuagesimo tertio, die sacro diuis Petro & Paulo Apostolorum Principibus, quo ibidem in Equitem Auratum creati sumus.

Et quoniam Fratres prædicti Conuentus Ierosolymitani, multa mecum de sacri loci necessitatibus contulerunt: ipsemet etiam manifestè conspexi, angustias & rerum inopiam, quam inter barbaros crudelissimos, in singulas horas, cum vitæ periculo, verberibus & assiduis vexationibus exagitati, patientissimè tolerant: nihilominus singulari diuina prouidentia, ad paganorum & hæreticorum confusionem, loca illa Sacra, quæ visibilem immensæ Dei bonitatis & misericordiæ memoriam nobis in terris repræsentant, integra conseruant; ibidemque sacrosanctum altaris Sacrificium quotidie offerentes, Deum pro vniuersis Christianæ professionis Ordinibus exorant: quæ oratio cælos penetrans id efficit, vt illis Turcæ non grauatim ea permittant omnia, quæ ad cultum diuinum peragendum, & fidei Catholicæ confirmationem pertinent, vnde Christiani meritò Deum collaudare, illique debitam gratiarum actionem persolvere debent. Sustentantur autem, vt viuere tamen possint, Regum, Principum, & piorum tam Ecclesiasticorum quàm sæcularium hominum elemosynis. Quoniam etiam optimè consideraui, sacræ Basilicæ fabricam, quibusdā in locis ruinæ obnoxiam, præcipuè tholum, qui supra Capellam sancti Sepulchri eminet (vnde quidam Turcæ cum non ita pridem, aliquot plum-

plumbei tecti laminas detraxissent, supplicio affecti fuerunt) quæ templi pars, trabibus consumptis, si corrueret, incredibili sumptu ad reparationem indigeret. Ceteræ autem nationes minùs de fabrica conseruanda sollicitæ sunt, quòd templum ipsum Catholicorum sit proprium. His itaque rationibus permotus, suscepi in me, quòd piorum hominum, in partibus nostris, opem & auxilium, ad subueniendum sacro huic loco, imploraturus essem: cuius Fratrum supplicationis testimonium, quod scripto comprehendere illis visum est, hîc inferendum existimaui.

FRATER ANGELVS STELLA *Guardianus & Commissarius Apostolicus, locorum Terra sancta Seruitor, Omnibus totius Regni Polonia, Magnique Ducatus Lithuania, Reuerendissimis in Christo Patribus, & Illustrissimis Ducibus, ac magnificis Comitibus, & nobilibus Dominis, in quorum manus hæc litera peruenerint, benedictionem nostrâ, & salutem in Domino sempiternam. Cùm necessitates nostras singulas vobis singulis scribere, perdifficile visum esset, in tantula maxime temporis periodo, & ob id quasi huic negotio supersedissemus: cognita tamen Illustrissimi Domini Nicolai Christophori Radziuil, Equitis aurati ac Procuratoris S. Sepulchri generalis, fide dignissima relatione, de haud impari ceteris nationibus hisce temporibus in Christi Sepulchrum pietate vestra, & Christiana obseruantia, singulari in Christi pauperes affectu, animoque in omnibus uerè nobili; quibus & pluribus nobis abundè à dicto Illustriss. viro, in vestram omnium laudem sincerè intellectis, excitati sumus, his literis patentibus, ob loci huius qui ruinas minatur, nostramque pergrandem hîc pauperiem & pericula, quibus in hoc totius Christianitatis nostra Sanctuario indies quasi ad succumbendum premimur, per hunc dictum Illustriss. Nicolaum Christophorum (licet tanta eius in nos humanitate immeriti) ad vestras Dominationes, & ad refugium nobis singulare hisce in partibus omni Christiana*
pieta-

pietate destitutis commorantibus, pro liberali eleemosyna animo supplici recurrere; sic pie prasumentes, ob fidelem de vobis relationem factam ab Illustrissimo dicto Nicolao Christophoro, ad quem nos per omnia remittimus. Pro his vero propter Christum IESVM in hoc Christi Sepulchrum in eiusque vigiles futuris vestris expensis, Christum ipsum optimum, ut nostis, remuneratorem vobis proponimus; & deinde, si quid nostra potuerimus oratione, non defuturos in perpetua tempora, in nobis & posteris nostris promittimus. In quorum omnium fidem has literas nostra manu subscripsimus, ac Sigillo Conuentus nostri sancti Saluatoris Ierosolymis muniri fecimus. Anno Salutis M. D. LXXXIIL die V. Iulij.

*Iuda Isca-
riot in suspen-
si locus.*

Manè exeuntes è monasterio, iuimus ad portam Sion, vnde acceptis nobiscū duobus Ianissaris equitibus, & asinis conscensis, demisimus nos in vallem Iosaphat; & ad radicem montis Oliueti, in parte dextera, prope ipsam viam locum vidimus, in quo Iudas proditor laqueo se suspendit. Extat modicus ruinosus fornix, à Iudæis constructus, vbi etiam nunc ipsi sepeliuntur.

*Bethania
Simonis le-
prosi domus.*

Confecto dimidio milliari, peruenimus Bethaniam; in ingressu ad leuam, est domus Simonis leprosi, de quo Matthæi 26. tota planè integra. Habet angustam porticum; inferius atriolum in longum & latum cubitorum octo, satis obscurum: inde per gradus ascenditur ad impluium; nam ædificia in partibus illis tecta non habent. Domus hæc nulli nationi attributa, habet septem annos & totidem quadragenas de Indulgentia. Inde ad iactum sagittæ, est integrum Lazari monumentum in petra excisum, in quod gradibus octo descenditur. Est ibidem altare paruum, cui lapis est superimpositus, quo sepulchrum erat clausum, quem Christus Lazarum suscitaturus tolli præceperat,

*Lazari re-
suscitari
monumen-
tum.*

*Lapis hic
superiori-
bus annis
in tem-
plum S. Se-
pulchri illatus est, ne à Turcis auferretur: vnde apparet, locum hunc ab illis in veneratione haberi. Cre-
dunt enim Lazarum à Christo esse resuscitatum.*

ceperat, Ioan. 11. Celebratur in eo Sacrum singulis annis. Ex hoc antro per quatuor gradus descenditur in locum, in quo Lazarus mortuus iacuit. Habet in latitudine duos, in longitudine quatuor cubitos. Pertinet ad Catholicos, septem annos totidemque quadragenas habens de Indulgentia. Prope monumentum, habent Turcæ suam Moschæam, qui credunt etiam Lazarum fuisse à Christo resuscitatum. Vicus hic Bethaniæ habet triginta circiter domos, quas Turcæ inhabitant. Visuntur ibidem duæ ædes, non procul ab inuicem dissitæ, quarum vna Mariæ ^{Magdalena & Mariæ domus.} Magdalenæ, altera Marthæ fuisse memoratur. Sunt planè dirutæ, præsertim illa Marthæ, cuius vix apparent fundamenta. In vtraque domo, habetur Indulgentia septem annorum totidemque quadragenarum. Dum itur ad domos prædictas, prope viam publicam, est magnus lapis, qui antiquitus Lapis Colloquij seu Dialogi appellatur: in quo ^{Lapis Dialogi.} Christus sedens, cum Maria de morte Lazari colloquebatur. Habetur non minùs à Turcis, quàm Catholicis in magna veneratione: quem etiam Mahometani exosculantur, & pro certo affirmant, se ex maiorum traditione accepisse, quòd licet peregrini eò accedentes, non exiguas ab illo particulas auellere soleant, quod etiam à nobis est factum, lapis nihilominùs integer est, & nulla ex parte minuitur. Nec id à vero alienum. nam cùm eius sit altitudinis, vt in eo quis commodè sedere possit, si altior fuisset, proculdubiò in eo Christus non sedisset: vnde sequitur, cùm in ea altitudine nunc, vt tempore Christi, perseueret, illum auulsionibus non minui. Aderant ibi tum præsentibus aliquot è Turcis valdè senes, qui à sexaginta annis, semper illum in eodem statu manere affirmabant, & patres itidem suos dicere solitos, etiam si mille homines inde frustra accipiant, lapidem hunc nulla ratione minui posse. Propter miraculi venerationem, concessa est hîc Indulgentia septem annorum totidemque quadragenarum.

MONS
OLIVETI.*Vestigium
Christi ascē-
dentis in ca-
los.**An. 1596.
permissū
iam fuit
intus in-
gredi Chri-
stianis:
quorum
vnus Sa-
cerdos
pius, testis
ocularis,
affirmat,
vestigium
sinistri pe-
dis, in ipso
petræ ca-
cumine,
quod acu-
minatum
nec diui-
di, nec al-
terius pe-
dis capax
esse potuit,
optimè**conspici. Probabile etiam est, ascendentem Dominum, sinistri tantum pedis vestigium pro signo in
terris reliquisse, dextro iam eleuato ad ascendendum. * Christi memorias Turcæ quas venerantur.*

Ex Bethania profecti sumus ad dextram versus mon-
tem Oliueti. Est is cum primis altus: in cuius medio appa-
rent vestigia villæ Bethphage, quam exiguam fuisse li-
quet. Relictis hîc asinis, ascendimus summitatem montis,
è quo Christus ad cælos ascendit. Erat antea hoc ipso in
loco Ecclesia per diuam Helenam fabricata, quæ planè
est diruta. Nunc habent hîc Turcæ Moschæam paruam,
rotunda forma cōstructam, in cuius medio in saxo est sa-
crum vestigium pedis Christi Saluatoris, quod in cælos
ascendens reliquit. Hoc Turcæ plurimum venerantur &
exosculantur. Aliud pedis alterius vestigium diuisa petra,
Turcæ ad templum Salomonis transtulisse dicuntur. No-
bis in porta huius Moschææ stantibus, fuit concessum sa-
crum hoc signum intueri, quod ab ipsa porta quatuor cir-
citer cubitis est remotum. Antea licebat Christianis intus
ingredi, & locum sacrum exosculari. Sed qui tum offi-
cium Cadij administrabat, cū suæ religionis obseruan-
tissimus esset, nec peregrinos in parietibus loci huius Cru-
ces depingentes tolerare posset, ante duos annos, sub pœ-
na capitis edixit, ne quis Christianorum ampliùs eò ingre-
diatur. Itaque in foribus Sacelli orantes, plenam Indul-
gentiam consequuntur. Sæpiùs idem Cadius ad locum
hunc sacrum accedebat, eumque singulari quodam mo-
do venerabatur. Habent enim Turcæ in honore loca hæc
sancta, nempe Bethlehem*; vbi Christum de Virgine
natum credunt: hunc etiam Oliueti montem, vnde eum
in cælos ascendisse fatentur. Ceterum illis, in quibus pas-
sus est, omnem detrahunt venerationem, & Christianos
ea venerantes irrident, asserentes Christum tamquam
Dei spiritum in cælos quidem ascendisse, Iudæis verò qui
illum oderant, statim phantasma quoddam corporeum
obieciisse: quod illi, Christum existimantes, comprehen-
derunt, ligarunt, & crucifixerunt: quod deinde quasi ex
mor-

mortuis surrexisse, visum fuit. Errorem autem hunc ^{Turca cur}
 suum, ridiculo cum primis comprobant argumento. Nos, ^{Christum}
 aiunt, ubi adlibuerit, Iudæum indignissimè verberibus ^{crucifixum}
 afficimus, cum gens sit nullius pretij & reputationis: Pro-
 pheta verò tantus, imò Dei spiritus, nonne potuisset ma-
 nus nihili hominum euadere? Ad dextram in eodem
 monte, extant ruinæ diruti templi, in quo nonnulli volunt,
 duos viros post Ascensionem Domini Apostolis appa-
 ruisse, & dixisse, *Viri Galilæi quid admiramini?* Actor. 1.
 Sed cum S. Lucas manifestè scribat, in eodem loco visos
 fuisse, in quo Christus mox in cælum ascensurus cum A-
 postolis loquebatur, non video, quo fundamento in alium
 magis remotum id rejci debeat. Descendendo ex mon-
 te, devenimus ad locum, in quo Christus fleuit supra ci-
 uitatem, Luc. 19. Habetur hic Indulgentia septem anno-
 rum & totidem quadragenarum. Videtur hinc optimè
 Ciuitatis situs, & habent Turcæ parvam suam Moschæam
 absque tecto: Salomonis quoque templum apparet ^{Templum}
 egregiè; quod nomen quidem eiusmodi retinet, sed fa- ^{Salomonis.}
 num potius amplum octangulare videtur (meo iudicio
 maius quàm S. Maria Rotunda seu Pantheon Romanum)
 plumbo tectum; in medio aræ, quæ magis in longum
 quàm in latum protenditur, situm: caprificis & oleastris
 frequentibus conuestitum. Fertur hoc à diua Helena fa-
 bricatum. In eiusdem aræ parte læua, ad murum est &
 alia Ecclesia non inelegans & longa, plumbo itidem tecta,
 quo loco beatissima Virgo Christum in templo obtulisse
 memoratur. Apparet hinc quoque Porta aurea, per quam ^{Porta au-}
 patebat ingressus ad arcem templi Salomonis: qua Chri- ^{rea.}
 stus a fino insidens, Ierosolymam est ingressus, Marth. 21.
 Nunc ea, occulto quodam Dei iudicio, muro est obstru-
 cta: quam Turcæ ipsimet aperire nefas iudicant, affirman-
 tes, eam vltro apertum iri magno cuipiam & potētissimo
 Regi, qui per eam in Ciuitatem sanctam ingreditur, &

erit vniuersi Orbis dominus. Interrogabamus Turcas, cur eorum Imperator per hanc portam non ingrediatur, vt minore negotio totius mundi dominium obtineat? obtinuerunt. Vrgere verò responsum non expediebat. Nam qui de domino vel de fide disputare vult, mandato Mahometis, verbera pro verbis reportare solet. In descensu montis ad læuam, locus ostenditur, in quo Christus Orationem Dominicam Apostolis dictauit, Matth. 6. Antiquitus habebat Sacellum: nunc planè dirutum; columna tantùm integra superest. Septem annorum totidemque quadragenarum Indulgentiam obtinet.

*Orationis
Dominica
locus.*

Porta Ephraim.

*Probatica
piscina.*

Inde digressi ad inferiora, visitauimus denuò loca, in quibus Christus Dominus orauit, & à Iudæis captus fuit: postea ascendendo, per locum lapidationis sancti Stephani Protomartyris, portâ eâdem seu Ephraim, ciuitatem ingressi ad læuam, vidimus Probaticam piscinam, quæ prope aream templi Salomonis fuit, & erat ampla satis & profunda. Piscina hæc dicitur fuisse facta, non propter pisces, qui numquam in eam mittebantur, sed vt pluuiæ hybernæ ex tectis templi in eam defluerent, vel potiùs vt aquæ ex ipso templo, in quibus innumeræ purificationes fiebant, per fistulas subterraneas ab ea reciperentur. Cùm autem Deus in piscina miracula facere, & vnum aliquem morbosum, qui primus in aquam ab Angelo motam descendisset, sanare cœpisset (quod aliquoties quotannis, in certis tamen temporibus faciebat) Iudæi locum muro, ne pecora accedere, & aquam sanctam profanare possent, circumdederant. Quinque etiam porticus circumcirca fecerant, in quibus ægroti sedentes, diuinum aquæ motum expectabant. Sunt ex illis nonnullæ etiam nunc integræ. In fundo piscinæ est quoddam arundinetum, vnde apparet nunc quoque locum esse humidum. Indulgentia hic septem annorum, totidemque quadragenarum, est concessa. Miracula illa piscinæ fieri cœpta, aut tempore Christi,

sti, aut non multò antè; Christo verò mortuo fieri desierunt, vt probabiliter Scriptores sentiunt.

Inde eadem platea, versùs portam S. Stephani redeunt, attigimus aliam plateam, qua ad vallem Iosaphat perrexeramus, quæ ab ipsamet porta ducit ad Pilati palatium: ^{Palatium Pilati.} quod ad manum dextram habet partem porticus seu propylæi, nunc etiam Pilati appellatam: quæ nunc ipsi plateæ supereminet, cùm antea in ipso palatio, quod per amplum fuisse liquet, comprehenderetur; vnde in impluvium & vicum antiquitus patebat prospectus. Supra porticum eminet paries integer, habens duas fenestras columella marmorea distinctas; in quarum vna Pilatus, in altera Christus Dominus spinis coronatus stabat, cùm Præses Iudæis eum ostendens dixisset; ECCE HOMO. Quo- ^{Ecce Homo.} niam autem locus hic nunc in publica & ampla platea positus est, in qua frequentes Turcæ hinc inde commeant, peregrini Christiani genua flectere non valentes, transiendo Dominicam Orationem & Angelicam Salutationem recitantes, Indulgentiam plenariam consequuntur. Scribit Adrichomius, porticum hanc ad Arcem Antoniam, à Præsidis palatio directam fuisse, è qua IESVM Iudæis spectandum Pilatus exhibuit: quod eò verisimilius videtur, quia in viam publicam inde poterat commodè prospici. Addit insuper inscriptionem ibi positam, *Tolle, tolle, Crucifige*. Sed propter vetustatem, nihil tale videre à longè potui: crediderim, si liceret propiùs accedere, characteres eiusmodi faciliùs internosci posse.

Antequam ad palatium Pilati perueniremus, cùm frequentes Turcæ, vt in media vrbe fit, vagarentur; ardente sole, vt peregrini solent, incedebamus ipsa via media, relinquentes Turcis liberum & umbratilem sub ædibus gressum: vbi viæ trium vel quatuor vlnarum latitudine, à terra aliquantulum prominentes, minùs radijs solaribus obnoxiam ambulationem præbent. Interea Michael

Konarski familiaris meus, cùm corpore aliquantulùm obesior esset, à longè nos comitabatur, & vitandi æstus causâ, semita illa altiore ædificijs proxima incedebat, cui cùm tres Turcæ obuiam facti essent, ille, in viam publicam se non demittens, vnus latus leuiter tetigit: qui statim pugno collum eius inuadens, lapides vibrare cœpit: id ipsum alij quoque Turcæ, pueri præsertim, facere adorti, magnum nobis malum præparabant: & nisi nostri Ianissari, quorum duo equites, duo itidem pedites erant, Turcas mitigassent, quorum ingens è diuersis plateis multitudo confluebat, interfecissent nos proculdubio: quemadmodum ante annos aliquot accidisse, religiosi Fratres nobis narrabât, quo tempore, simili planè de causâ, quòd via cedere Turcis nollent, aliquot peregrini statim ab illis interempti fuerunt. A palatio Pilati, de cuius fabrica dicetur inferiùs, incipit via Dolorosa, per quam Christus Crucem baiulans, ad mortem ducebatur. Exeuntibus portâ ad dextram, offert sese exiguus collis faxeus, in quo beatissima Virgo Maria stabat, anxie, quid cum dilectissimo filio ageretur, expectans: quem, cùm spinis coronatum, sanguine fœdatum, facie liuenti & planè immutata, ingentem Crucis trabem humeris deferre, & sceleratissimi latronis instar ad supplicium rapi conspexisset, vt ex antiqua maiorum traditione Doctores Catholici piè affirmant, vi doloris acerbissimi intrinsecus oppressa, in terram exanimis ferè corruit: quod etiam valdè verisimile videtur. Quomodo enim tenerrium illud Virginis matris pectus, ad tantos dilectissimi filij cruciatus, & miserabile, ac numquam antea visum illud spectaculum, non colliquesceret? Locus hic, in hodiernam vsque diem, Spasmus B. Virginis vocatur.

Via Dolorosa.

*Spasmus
B. Mariæ.*

Inde ad quinquaginta passus progressi, deuenimus in plateam longam, quæ ad portam Damascenam ducit: vbi cùm ad læuam deflectitur, fit præceps in rupem descensus.

fus. Nam ciuitas Ierosolymitana, tota est in rupibus posita, pluresque colles non exiguos habet, montibus maioribus exceptis, qui sunt nunc in ciuitate quatuor: ante excidium autem, cum vrbs in ipso flore esset, tres celeberrimos montes habuit, de quibus inferius magis copiosè tractabimus, vbi de palatio Herodis, & eleganti ac magnifica platearum ciuitatis dimensione nobis erit agendum. In memorato igitur præcipiti viæ flexu, Christus Dominus, graui pondere Crucis oppressus corruit, petraë allisus: cumque prædebilitate sub onere progredi non posset, Indæi Simonem Cyrenæum angariauerunt, vt Crucem IESV Simon Cyrenæum. tolleret. Promerentur hoc loco peregrini, septem annos & totidem quadragenas de Indulgentia. In eadem ciuitatis platea ad læuam, est domus ampla diuitis illius epulonis, qui misericordia erga Lazarum pauperem non mouebatur. In quam ingredi non potuimus, quòd eam Turca valdè Christianis infensus inhabitaret. Sed quia porta patebat, ex areæ magnitudine apparet, eam magnificam fuisse. Inde ad triginta passus deflectendo ad dexteram, fit ingressus in aliam longam plateam, quæ rectà ad montem Caluariæ ducit. Ad læuam, ferè in medietate ipsius plateæ montem ascendendo (nam tota hæc platea ascensum montis habet) sunt ædes S. Veronicæ, è quibus egressa, venerandam Christi faciem sanguine fœdatam, linteo absterfit. Non procul inde est exiguus collis, in quo mulieres stabant flentes, quas alloquebatur Christus, dicens: *Filia Ierusalem nolite flere super me*, &c. Hinc ad vnum & medium teli iactum, sunt magnæ & altæ duæ lapideæ columnæ, inter quas erat porta Iudiciaria, qua damnati rei ad supplicium in Golgotha ducebantur. In ea porta, vt piè Catholici credunt, denuò sub Cruce corruit IESVS: in cuius rei memoriam, plurimi, cum quascumque ciuitatis portas ingrediuntur, signum S. Crucis formant. Habetur hic Indulgentia septem annorum & quadragenarum.

Simon Cyrenæum.

Domus epulonis.
Luc. 16.

S. Veronica domus.

Porta Iudiciaria.

Ab

Ab hac porta Iudiciaria egressis, ad iactum lapidis & paulò ampliùs, offert sese Basilica Dominici Sepulchri, quæ montem Caluariæ complectitur. Non procul à porta, qua itur in Ecclesiam, in cœmeterio, est lapis prægrandis positus: quo in loco iam sub ipso monte, tertium Saluator noster cum Cruce in terram corruit. Est ibi Indulgentia septem annorum & totidem quadragenarum. Hinc iam in montem, pro nobis mortem subiturus, ascendit.

Prætergressi Ecclesiam, Oratione Dominica & Salutatione Angelica recitata, redijmus in Conuentum: à prandio vecturas, ituri Bethlehemi, conduximus.

I V L I V S.

Vt profectionem Bethlehemiticam tutiùs absolueret nobis liceret; duos equites, & duos Ianissaros pedites nobis adiunximus.

Porta Piscium.

Castrum Pisanum.

Manè discedentes ex Fratrum Conuentu, per Portam^{1.} Piscium è ciuitate sumus egressi, relinquentes ad læuam castrum, quod etiam nunc Pisanum appellatur. De quo cum sæpiùs hîc fiat mentio, sciendum est varias de eorum esse opiniones. Arbitrantur enim nonnulli, arcem hanc Dauidis fuisse, quam ipsemet inhabitaret. Alij hanc ipsam in summitate montis Sion ponunt; ybi ingentes ruinæ ædificiorum vetustorum apparent: idque magis esse probabile, Bethsabeæ piscina comprobatur, quæ monti Sion ita adiacet, vt commodè ex solario domus Regiæ mulier ex aduerso lauans videri potuerit: Reg. 2. cap. 11. Licet autem & Castro Pisano piscina hæc imminet, remotior tamen est, quàm vt mulier internosci facile ex illo ædificio possit. Quamobrem rectiùs colligunt alij, idque non obscuris argumentis, quod nunc Castrum Pisanum vocatur, id antiquitus à Machabæis cõstructum fuisse: de quo in Machabæorum libris, & apud Iosephum legitur. Sed cuiuscumque tandem sit, quamuis antiquas habeat

habeat substructiones, liquet illud cum primis benè munitum esse. Formam habet quadrangularem: turres itidem altas & munitas ex lapide quadrato in quadrum positas. Fossam valdè profundam, secto lapide vtrimque munitam. Christiani in illam arcem non admittuntur. Cùm è monasterio versus portam Sion progredieremur, Castrum hoc ad dextram nobis fuit, cuius quòd porta esset aperta, obliquè flectentes oculos (nam apertè introspicere periculo non caret) animaduertimus, aream non adeò intus esse magnam, vt nec arx ipsa magna est. Interra iacebant neglectim aliquot mediocria bellica tormenta, suis sedibus non imposita. Ad portæ custodiam Ianissari pauci sedebant.

Ciuitate egressi, conscensis asinis, in descensu montis habuimus ad læuam ruinas palatij Davidis, de quo paulò antè dictum est; ad dextram verò, piscinam Bethsabæ. Bethsabea piscina. hac enim ad Bethlehem iter est. Piscina in longitudinem ad centum cubitos protenditur, non vsque adeò lata, per gyrum lapide quadrato strata, habens vndique gradus, per quos, iuxta quantitatem ipsius, ad aquam descendebatur. Profunditas eius, cùm aquis implebatur, octo circiter vlnas capiebat. Supra illam non procul à porta, modicus aquæ riuus defluit, quæ ciuitatis vsibus deseruit; piscina verò ipsa caret aquis: qua relicta, modico colle conscenso, ad dextram, ad iactum sagittæ, à via publica deflektendo, est palatium ruinosum, in quo principes Sacerdotum & Seniores populi de comprehendendo & occidendo Christo consultabant; vnde etiam Domus mali Domus mali consilij. consilij appellatur. Retro hanc, paulò remotiùs ad dextrâ, est alia desolata domus, quam ex parietinis duabus altam fuisse liquet. Hæc fuit Simeonis illius senis, qui inde in templum veniens in Spiritu, puerum IESVM in vlnas suas accepit, & benedixit Deum. Inde vltteriùs progredièdo prope viam ad læuam, est arbor terebinthi satis ma-

L

gna,

Simeonis senis Ewang. domus. Luc. 2.

Terebinthus B. Virginis.

gna, sub qua beatissima Virgo quieuisse memoratur, cùm oblatura puerum IESVM in templo, è Bethlehem Ierosolymam pergeret. Est ibi Indulgentia septem annorum & totidem quadragenarum attributa. Non adeò magno interuallo, est puteus muro eleganti obductus, sed aquam

Puteus Magorum.

turbidam habet, & nullius vsus. Dicitur Magorum puteus, quòd eo in loco stella denuò Magis apparuisse dicitur, cùm Bethlehem proficiscerentur. Nam quamdiu Ierosolymis cum Herode colloquebantur, disparuerat. In medio itineris est collis non adeò eleuatus, ex quo Ierosolyma & Bethlehem conspicitur: quandoquidem vno tantùm & dimidio milliari distant abinuicem. Habentur hìc complures iuniperi arbores: & ad dextram secus viam est

Eliæ statua petra impressa.

petra, in qua Elias Propheta quieuit, 3. Reg. 19. cui statua corporis eius adeò est impressa, ac si recenti argillæ superimponeretur. Remanserunt enim capitis, lateris, manus & pedis dextri aperta vestigia sancti Prophetæ illius: quod diuino miraculo attribui meritò debet. Ad læuam est paruum monasterium Græcorum, quod S. Eliæ vocatur.

Abacuc domus.

Ad dextrum latus petræ, tergo versus Ierosolymam conuerso, est domus diruta, vnum tantùm parietem integrum habens, quæ Abacuc Prophetæ fuisse perhibetur, qui cùm è domo hac prodiens, messoribus cibum deferret, ab An-

Dan. c. 14.

gelo raptus, Danieli Prophetæ inter leones constituto, prandium diuinitus præparatum detulit. Quarta miliaris parte, à petra prædicta Eliæ, in parte dextra, est domuncula satis integra, in qua Rachel, filium Benjamin enixa dicitur: vnde non procul, in ipsa propemodum via publi-

Rachelis sepulchrum.

ca, extat eiusdem Rachelis monumentum propè integrum, forma pyramidis è viuio saxo excisum, de quo fit mentio Genes. 35. Non procul à Bethlehem ad læuam, prope viam publicam, ad sagittæ iactum, est cisterna viuæ & recentis aquæ, ad quam hauriendam non solum ex Bethlehem, sed ex circumuicinis etiam pagis

frequens

frequens fit concursus. Vocatur in hunc vsque diem *Ci-* Davidis ci-
sterna sterna. David, de qua 2.Reg.2.

Inde per extrema villæ, quæ circiter quinquaginta ca-
 sas habet, proceditur versus Bethlehem; & ad læuam fit BETHLE-
 reflexus versus Basilicam, quæ à villa ad vnicam arcus eia- HEM.
 culatione est remota. Cùm eò peruenissemus, reperimus
 ibi Bolucum cum Ianissaris aliquot, qui nos Damasco de-
 duxerant, & sedebant tum in Ecclesia, frigidioram auram
 captantes. Habebant autem ibidem & equos. Nam cùm
 Ecclesia semper sit aperta, Turcæ, cùm libuerit, etiam
 cum iumentis in eam ingrediuntur. Quanta sit autem S. Præsepj
 huius nobilissimæ Basilicæ elegantia & magnitudo, ver- Basilica.
 bis faciliè non potest explicari. Tota enim è pulcherrimo
 marmore fabricata, duplici ingentium columnarum or-
 dine distinguitur. Intus musiuo opere vbique decorata:
 rectum plumbeis laminis habet coopertum. Eam D. He-
 lena Augusta construxit: postea monachi, regulæ S. Hie-
 ronymi obtinebant. Nunc ibi religiosi S. Francisci de Ob-
 seruantia Conuentum habent, quos P. Guardianus Iero-
 solymis submittit, mutans eosdem sexto quolibet mense,
 propter persecutiones, quas à Turcis maximas patiun-
 tur. Erant ibi tum octo: quatuor sacerdotes, laici itidem
 quatuor. Ingressi igitur in Ecclesiam quæ Catholicorum
 est, ad læuam deflectentes, venimus ad Fratrum Con-
 uentum, & inde statim ad Capellam Diuæ Catharinæ, in
 qua diuina officia monachi peragunt. Capella hæc Indul-
 gentiam plenariam habet; quam Peregrini eo modo con-
 sequuntur, ac si ipsimet personaliter Ecclesiam S. Catha-
 rinæ in monte Sinai visitarent, quò non omnes propter
 loci distantiam & pericula peruenire possunt. In suprâ
 dicta igitur Capella ordinatur Processio: quam Peregrini,
 more Ierosolymis obseruato, bini & bini sequuntur, dum
 perueniatur ad locum Natiuitatis IESV Christi Saluato- Natiuitatis
 ris nostri. Postquam egressi fuerint è Capella prædicta, Dominica
locus.

84 IEROSOLYMITANA PEREGRINATIO
statim ad læuam descenditur, in locum subterraneum, &
præterniſſis tunc ceteris, de quibus inferiùs dicetur, per-
uenitur in Capellam, quæ in longitudine decemocto, in
latitudine nouem aut decem tantum cubitos habet. Ibi è
regione portæ est altare, sub quo locus, marmorea tabula
signatus ostenditur, in quo Christus est natus. In lapide
verò qui altari est superpositus, hæc inscriptio Latine in-
sculpta est; HIC DE VIRGINE MARIA IESVS
CHRISTVS NASCI DIGNATVS EST. Supra alta-
re ipsum, ad parietem est vetus Tabula, cum imagine Na-
tiuitatis Domini nostri. Audiuiſus hîc sub ipsum meri-
diem Sacrum, quod P. Ioannes de Florentia, qui tamquam
Superior nobiscum Ierosolymâ venerat, celebrauit. An-
tequam ad altare hoc perueniatur, in parte dextera, sex vl-
narum distantia, est præsepe in rupe excisum, in quo Chri-
stus natus fuit positus: quod cum sit valdè capax & va-
stus, cõstat aliud minus ligneum illi fuisse insertum, iux-
ta morem in partibus illis obseruatum. E regione illius
ad tres circiter cubitos, est aliud altare, vbi tres Magi pro-
cidentes Christum adorauerunt, muneraque illi obtule-
runt. In prædictis locis omnibus conceditur Indulgentia
plenaria. Capella hæc sacri Præsepj tota est Catholico-
rum: lampades tamen in ea à diuersarum gentium homi-
nibus accenduntur, perinde vt in Dominico Sepulchro
(qua de re postea copiosius) nisi quòd Nationes prædictæ
sua luminaria pro festo Natiuitatis Domini accendunt,
quo tempore illis tantum cum Processionibus locum hunc
sacrum ingredi licet. Capella hæc sacri Præsepj est valdè
obscura, cum sub altari maiori, de quo superius, Basilicæ
sit posita; nec aliunde lumen admittat, quàm per can-
cellos portarum collateralium, quæ gradus adiunctos ha-
bent, quibus in Ecclesiam ascēditur, & Processiones com-
meant. Ascendentibus in templum per sinistræ partis gra-
dus, offert sese statim altare, eo in loco positum, vbi ve-
nientes

*Præsepe in
rupe excisum.*

nientes ad Christum Magi, ab equis descenderunt. Qui
 verò per gradus partis dextræ Ecclesiam ingrediuntur,
 deueniunt ad altare paulò remotius, eo loco ædificatum,
 vbi parua quondam Synagoga fuit, in qua Christus octa- ^{Circumcisi-}
 uo Natiuitatis die, Circumcisionis signaculum accepit. ^{nu Domini}
 Altare hoc obtinent Catholici: sed cùm sit in Ecclesia, ^{locus.}
 quam Turcæ liberè accedunt, nullum cultum & orna-
 mentum habet. Ibidem chorum seu apsidem Græca na-
 tio possidet. Sed quia locus hic passim omnibus patet,
 quoties sacris operari volunt, à Sangiaco Ianissaros acci-
 piunt, qui à Turcis eos turbari prohibeant. Nam, vt di-
 ctum est, Ecclesia propter Turcas numquam clauditur.
 Capella tamen Natiuitatis Dominicæ, Catholicorum ope-
 ra, clausa manet; nec in illam patet aditus aliunde, quàm
 quà ex monasterio per fornicem subterraneum ad illam
 deuenitur. Sacro peracto, Antiphona & Oratione præ-
 missa, dictus Pater exhortationem breuem ad nos habuit.
 E Capella Præsepj eadem via, per quam intraueramus,
 egressis, ad dextram sex cubitorum distantia, ostensum est
 antrum in rupe excisum, habens in longitudine sex vlnas,
 non adeò latum, sed profundum, in quo Innocentes ab
 Herode occisi, fuerunt sepulti: habet Indulgentiam se- ^{SS. Innocē-}
 prem annorum & totidem quadragenarum. Ad læuam ^{tum sepul-}
 est aliud itidem antrum, in quo tria sunt monumenta: pri- ^{tura,}
 mum statim ab ingressu ad dextram, sancti Eusebij; secun- ^{S. Eusebji,}
 dum ad sinistram, sanctæ Paulæ Romanæ matronæ (cuius ^{S. Paulæ,}
 etiam monasterium in quo habitabat, quod ipsamet am-
 plum & elegans exædificarat, dimidio & ampliùs à Beth-
 lehem milliari, totum dirutum & desolatum cōspicitur;) ^{S. Hierony-}
 tertium sancti Hieronymi. Inde via subterranea, perue- ^{mi conclave.}
 nitur in cubiculum eiusdem Sancti, vbi translationem Bi-
 bliorum absoluit. Est autem valdè obscurum, vtpote sub
 Ecclesia itidem situm, ad quam per gradus, qui nunc et-
 iam extant, oraturus idem vir sanctus ascendeat per por-
 tam,

tam, quæ nunc muro est obstrueta. Lumen modicum per fenestram ex parte monasterij admittit. Sepulchrorum quodlibet habet septem annos & totidem quadragenas de Indulgentia. Inde redijmus ad monasterium, vbi prandio sumpto, Vesperas in Capella sanctæ Catharinæ decantatas audiuius: quibus finitis, è Conuentu egressi, conscensis

Turris gre-
gu.

afinis, profecti sumus ad Turrim gregis, dimidio bono milliari à Bethlehem distantem: vbi Iacob Patriarcha pascibat gregem suum. Turri collapsa, ingens acervus lapidum remansit eo loco, in quo Angelus pastoribus magnum gaudium annuntiauit de Christo Salvatore nato. Erat turris hæc in fertili & peramœna conualle posita. Inde redeuntés alia via ad sinistram, vidimus Sacellum à diua Helena Augusta exædificatum eo in loco, in quo Angelus in somnis admonuit Ioseph, vt tolleret puerum & matrem eius, secederetque in Ægyptum. Domuncula istius apparent adhuc parietinæ, cui Sacellum coniungebatur. Est ibi Indulgentia septem annorum & quadragenarum totidem. Ad dextram paulò remotiùs relinquuntur

S. Paulæ
monasteriũ.

ruinæ diruti monasterij S. Paulæ, & ad sinistram peruenitur in paruam villulam, quæ Pastorum appellatur, in qua est puteus altus aquæ frigidæ & optimæ, ad quam hauriendam beatissima Virgo sæpiùs accedere solebat. Habet Indulgentiam septem annorum & totidem qua-

Puteum villa-
pastorum.

dragenarum. Hunc puteum ipsimet Mahometani plurimùm venerantur, & sanctum appellant: quæ etiam, quod aliàs non faciunt, lapidea tabula (non enim latus est) cooperrunt, vt rectus semper maneat. Ab hac villula reditur ad Bethlehem, vbi non procul ab Ecclesia ad manum sini-

Antrum la-
tibuli B. V. p-
gini.

stram, est antrum subterraneum, aliquot vlnas latum & longum, habens ingressum haud facilè peruium, in quo beatissima Virgo cum infante IESV delituit, dum pueri Innocentes iussu Herodis in Bethlehem interficerentur: in quo diuini miraculi etiam nunc apparent indicia. Nam

terra

terra inde accepta, & in potu mulieribus, quibus lac deperit, porrecta, copiam lactis illis reducit. Septem anni & quadragenæ de Indulgentijs hîc concessæ. Sub vesperam redijmus ad monasterium: & aditu referato, in summitatem ac fastigium templi ascendentes, vidimus inde à longè ad sinistram, montem Engaddi, de quo frequens in sacris Scripturis fit mentio, & non procul à Bethlechem ab-<sup>Engaddi
mons.</sup> est. Quoniam autem Loth Sodomis fugiens, montem Engaddi pertransibat, nonnulli volunt specum isthic esse, in qua cum filiabus conuersationem habuit. Locus tamen certus non monstratur. Ad manum dextram conspiciuntur hortus; in quo, tempore Salomonis, ingentem balsami arborum fuisse numerum, nonnulli Historicorum testantur. Conspiciuntur hîc etiam montes, qui valli Hebron adjacent: quò excurrere animus erat, cùm quinque tantùm à Bethlechem miliaribus distent, vt & sepulchra Patriarcharum, & loca in quibus tres Angelos Abraham vidit, & Isaac circumciscus est, perlustrarem; sed cùm ab Arabibus periculum immineret, quorum duobus antè diebus agmina inter se concurrebant, abstinendum necessariò fuit ab hac profectioe. Qui tamen religiosi loca illa viderunt, narrarunt, Hebron exiguum esse oppidum,<sup>Hebron op-
pidum.</sup> quod à Iudæis tantùm inhabitatur. Cùm itaque ad Hebron accedere non potuissem, constitui die insequenti montana Iudææ conscendere, præcipuè quòd Ecclesia hoc die festo (festum Visitationis B. Virginis Mariæ intelligo) de illis memoriam faciat. Audito Completorio, præparabamus nos per sacram Confessionem, ad perceptionem diuini Sacramenti in crastinum: & deuotioni, prout cuique Dominus largiebatur, insistentes, noctem ibidem transegimus, in Capella sacri Præsepj modicùm quiescentes.

2. Summo manè Missam lectam audiuius Patris Ioannis de Florentia; & sanctissimo Sacramento refectioni, patribus

*Bethagil
locus castrorum
Sennacherib.*

4. Reg. 19.

*Circumcisi
in quibus-
dam Terra
sanctæ locis
vivere non
possunt.*

Fons S. Philippi.

bus valediximus, a finisq̃ue conscensis, villam Bethlehem præteruecti, post quartâ partem milliaris, ad villam aliam maiorem Maronitarum peruenimus, quę vocatur Bethagil, & est in eo loco sita, in quo Angelus Domini Regis Assyriorum Sennacherib castra percussit. Vbi in hanc vsque diem, illud cum primis admirationi habetur, quòd nullus ex circumcisis, hîc in tertiam diem superuiuere potest, sed tertia nocte proculdubiò moritur. Id ex Arabibus duo, qui nobis vecturas locauerant, se per experientiam comprobasse, sanctè affirmabant. Prima enim nocte, ingens eos capitis dolor inuasit; secunda, corpus illorum adeò totum intumuit, vt mortis instantis metu, necessariò isthinc abduci debuerint: quorum vnus post quatuor, alter post sex demum menses pristinam sanitatem recuperauit. Cumq̃ue partem villæ istius propter compendium itineris attingeremus, nullus circumcisorum nobiscum eò voluit ascendere, sed circuitu periculum declinare maluit. Tribus à Damasco passuum millibus, ad læuam in præalto monte, videramus quoque antea quiddam simile: nempe monasterium Sanctimonialium Maronitarum: in quo nullus itidem circumcisorum ad diem tertium pertingere potest. Id Deum particulari gratia beneficium loco illi concessisse, multi affirmant, vt castitas Virginum illarum, à paganorum libidine, tutior redderetur. Confectis à prædicta villa duobus circiter milliariibus, peruenimus ad paruum fontem, prope viam ad manum dextram, modicè scaturientem: in quo sanctus Philippus Eunuchum Candacis Reginae baptizauit, Actor. 8. Solent Anabaptistę suum errorem hinc confirmare, quòd Philippus & Eunuchus in aquam vterque descendisse scribitur. Sed qui locum hunc oculis subiectum habuerit, facilè animaduertet, adeò modicam scaturiginem ex angusta rupis fauce hîc prosilire, vt vtriusque pedis plantæ simul perfundi non possint. Vnde probabilior coniectura sumi

fumi potest, Philippum, Eunuchi caput dumtaxat, aqua sumpta perfudisse, illumque sic baptizasse. Est hîc annorum & quadragenarum septem attributa Indulgentia.

Inde post duo magna milliaria confecta, itinere valdè difficili peruenimus in desertum, in quo sanctus Ioannes Baptista habitabat, prout in fine 1. cap. apud Lucam habetur. Est antrum non adèdè magnum in monte à natura formatum, cui S. Helena parietem è cocto latere adiunxit. Accessus huc valdè periculosus. Nam & subitus præcipitium est aspectu formidabile; & antri semita angusta, decliuis & lubrica. Montes ipsi, vt & vallis, cum primis horridi, & surdæ cautes. Ad fores antri surgit aquæ vitæ riuiulus, digiti vnus latitudine, vnde Præcursor bibebat, nec alia ibi reperitur. Qualis cibus eius fuerit, diuersæ sunt multorum opiniones. Nonnulli volunt eum victitasse herba, quæ nunc etiam nostrate lingua Panis S. Ioannis, à Plinio verò, lib. 13. cap. 8. Ceraunia, ab alijs Ceratia, & siliquæ dulces, vocatur; cuius circa ciuitatem Iudæ, Præcursoris patriam, quæ duobus inde milliaribus abest, ingens copia proueniebat: vt nunc in insula Cypro; vnde ad varias & nostras etiam partes, submittitur. Circa antrum, nudæ tantùm sunt rupes; fruteta rarissima & exigua. Sumpsimus ad hunc fontem refectionem, allatis ex Bethlehém nobiscum necessarijs. Est autem hîc Indulgentia plenaria.

Duobus deinde magnis milliaribus confectis per asperissima montium iuga, peruenimus in ciuitatem Iuda, quæ nunc domunculas vix habet viginti, quam tamen è situ cum primis amplam fuisse apparet. In ingressu ad dextram, sunt ruinæ templi, eo loco in quo beatissima Virgo visitauit Elisabeth, & Canticum Magnificat deprompsit. Exstat & vestigium Ecclesiæ, in domo Zachariæ exadificatæ, in qua Canticum Benedictus decantauit, de quo Lucæ 1. Turcæ ijs in locis priuatas domos habent, qui vt nos

ad areas huiusmodi templorum admitterent, pecuniæ nonnihil à nobis extorserunt. Inde ad duos sagittæ iactus ad manum sinistram, est Ecclesia integra sancto Ioanni Baptistæ dicata. Vbi ad sinistrum cornu altaris maioris est Sacellum, in quo Præcurzor natus est. Nec enim in lucem editus erat eo in loco, vbi Zacharias habitabat; quandoquidem factus mutus, aliò concesserat, relicta in partu vxore domi: quæ postmodum in Ecclesiam præsentem conuersa fuit, quæ est Catholicorum: vbi etiam annuatim in S. Ioannis Natiuitate Sacrum celebratur: habetque Indulgentiam plenariam. Reperimus non procul ab Ecclesia Locum tenentem Sangiaci Ierosolymitani, qui recreationis causâ huc manè excurrerat, & fixo tentorio, dum Solis ardor declinaret, expectabat. Inde vno & medio milliari, via itidem asperriima, peruenimus ad monasterium sanctæ Crucis, in sinistra viæ parte situm: quod Græci S. Archangeli nominant: & est Georgianorum, eiusdem, prout S. Sabæ, de quo inferiùs, instituti, quorum Episcopus hîc residet. Traditio habet, eo in loco constructum, ex quo arbor oliuæ pro Cruce Christi paranda fuit deprompta, & ostenditur sub altari maiori fouea in rupe, vnde fuit eruta. Locum hunc Catholici & omnes Orientales in magna habent veneratione. septem annorum & quadragenarum habet Indulgentiam. Ad manum dextram aræ maioris, est altare paruum Catholicorum, in quo singulis annis Sacrum peragitur. Episcopus loci, oliuarum baccas, & panem siccum nobis apposuit. Carnes enim hîc non comeduntur. Inde per altissimum & asperriimum montem profecti, vno ab Ierusalem milliari, in parte sinistra montem oblongum, & non adeò altum, vidimus, qui Gion appellatur: in quo elegantes ex lapide secto ruinæ conspiciuntur palatij Salomonis, quod tredecim annorum spatio fuit ædificatum, 3. Reg. 7. Eodem etiam in monte, Dauide adhuc viuentem, idem Salomon in Regem

*Monasteriũ
S. Crucis,
seu S. Ar-
changel.*

*Mons Gion,
Palatium
Salomonis.*

Régem fuit vnctus à Sadoch Sacerdote, 3. Reg. 1. Ad dextram relicta piscina Bethsabeæ, ex iumentis defilientes, venimus ad Portam piscium, & inde vna ab occasu Solis, hora, ad monasterium: vbi P. Vicarius mihi narrauit, se, prout illi iniunxeram, apud Locumtenentem (quem in Montanis Iudææ vidimus) obtinuisse, vt nobis Arabem concederet, qui nos ad Mare mortuum & Iordanem deduceret. Id crastina die à prandio futurum.

3. Circa meridiem accessimus ad Locumtenentem Santi-
giaci, qui manebat in domo Pilati, vbi etiam exstat implu-
uium tabulis marmoreis eleganter constratum, quod in ^{-Palatium.}
Euangelio Lithostrotos dicitur. ^{Pilati.} Habet vtrinq; porticum,
in qua pro Tribunali Pilatus sedebat, porphyreticis co-
lumnis innixam: ad quarum vnâ in angulo positam
Christus Dominus fuit flagellatus; cuius pars habetur in
Capella Apparitionis, prout dictum est superius. Sub hac
porticu, quâ per fenestras prospectus ad arcam templi Sa-
lomonis patet, sedebat Locumtenens, substrato tapete,
puluilloque pretioso supposito in terra, prout Turca-
rum mos. Ad latus dextrum, assidebat quidam alius Tur-
ca: aderat & Arabs, qui securitatis causa pro nobis condu-
cebatur. Pauci enim peregrini propter expensas & Ara-
bum pericula ad Iordanem proficiscuntur: nisi cum fre- ^{Ad Iordanem}
quentiores circa festa Paschatis conueniunt: quo tempo- ^{profectio}
re collato symbolo, & Santiaco aliquo honorario dato, ^{periculosa.}
ducem ex Arabibus aliquem conducunt, qui aliqua bom-
bardariorum Turcarum manu stipatus, illos comitetur.
Ego quòd eò proficisci omnino decreueram, cum Locum-
tenente de ratione securi itineris tractabam: qui acceptis
à me centum aureis, Arabem nobis locauit, datis illi tan-
tùm quinque Cecchinis, qui decem florenos constituunt,
& lanca interula; reliquum pecuniæ ipse accepit, cum
absque eius permissu, cum Arabe de pretio pacisci mini-
mè sit licitum. Quamobrem per interpretem nobis præ-

sentibus Arabem sic allocutus est; Isti, inquit, peregrini proficisci volunt ad mare mortuum (sic enim appellatur, quòd sit innauigabile, propter sulphuris nimiam crassitiam, in qua, ne proiectus quidem homo submergi possit) ad Iordanis fluentia, & Ierichuntem: promittisne illos incolumes huc reducturum? Promitto, respondit Arabs, quòd saluos illos reducam, quandoquidem habiturus sum quindecim comites Arabes sagittarios præstantes. Arabes præterea qui in partibus illis prædantur, sunt mihi noti, & præcipua familiaritate amicitiaque coniuncti. Quòd si in phalangem incognitam incidere contigerit, primus in hostes impetum faciam, & me mactari potiùs, quàm fidem falli, patiar. Interea peregrini, sibi vt poterunt, consulant. Victum tamen mihi præbere debebunt, quem quamdiu mihi præbebunt, tamdiu illos, quocumque voluerint comitabor & deducam. Ex his dictis apparet, Arabes non semper esse saturos. Iuramentum deinde more suo præstitit, dextra manu frontem attingens, & in cælum oculos attollens. Discessimus deinde à Locumtenente, qui nobis etiam tres è Ianissaris bombardarios adiunxit. Arabs prædictus nos ad Conuentum est comitatus, vbi pro confirmatione iuramenti, panem cum sale oblatum alacriter comedebat. Arabes etenim, licet atrocinijs assueti, simplicitatem tamen hanc, ordinatione quadam diuina, paganis inspiratam retinent: vt, quando aliquod iusiurandum ratum & firmum esse volunt, panis cum sale comestione id comprobent. Quòd vbi hilariter fecerunt, tutò illis credi potest; sin fronte corrugata, & minùs auidè oblata degustent, certum est illos animo nil sinceri concipere. Id quod rei euentus in Arabe nostro comprobauit, qui nobis fidem datam, cum in magnis angustijs versaremur, seruauit, prout fusiùs inferiùs explicabitur.

Iuraturì Arabes, panẽ cum sale comedunt.

Egressi ex Conuentu extra Portam piscium, conscensis iumentis, nos in viam dedimus. Erant in comitatu sex

Fratres

Fratres religiosi. Emenſis tribus magnis milliaribus, via difficili & ſaxoſa, peruenimus paulò ante occaſum Solis ad monaſterium S. Sabæ, quod Græcorum eſt; non adeò multæ quidem ſubſtructionis, ſed per gyrum, tot in rupe manſiunculas habet exciſas, vt locus hic antiquitus quinque millium monachorum capax fuerit. Monachi humaniter nos exceperunt, cœnamque in reſectorio ſuo appoſuerunt: vbi dum cum familiaribus meis, idiomate noſtro colloquerer, Dionyſius Damascenus monachus, natione Macedo, lingua intellecta, cœpit mecum Sclauoniçè loqui, narrauitque ſe in Lithuania fuiſſe, fereque omnes è primoribus noſſe: & me de memetiſſo interrogaui, nomine proprio verè expreſſo, memoria repetens, quomodo Sigifmundo Auguſto Rege mortuo, cùm Vilnæ vnà cum ſanctæ memoriæ Epifcopo Valeriano, à Senatu, tuendæ publicæ quietis cauſſa, delegatus eſſem, literas fidei à me habuerit, cùm in Moſcouiam propter eleemoſynam conquirendam proficiſceretur. Deo rectè omnia diſponente, factum eſt, ne ab eo agnoſcerer *. Nam vt ple-

* Fuit is apud me monachus poſteà, die 19. Martij, An. 1598. in Czarna-loczyce, cū alijs ſocijs, Harmone Coryceniſi, Eraſmo Theſſalonicenſi, Ioachimo Chio, cùm ex Moſcouia in Pa-leſtinā reuerterentur. Narrauit eadē omnia,

M 3

miſe-

quæ antea in monaſterio S. Sabæ mecum loquebatur: dixitque Arabem illum, qui me ad Iordanem deducebat, in tantam potentiam exceſſiſſe, vt cum quatuor millibus equitum prædas agar. Arabes, duos iam Sangiacos Ieroſolymitanos poſt meum diſceſſum interfeciſſe. Habebant literas fidei, quod ex Monaſterio ſancti Archangeli eſſent Anachoritz, à Guardiano noſtro Terræ ſanctæ, qui Frater Acurſius Quintianus Brixienſis vocabatur.

*Mille Ana-
choritas
Sangiacus
crudeliter
enecat.*

miserabili quodam casu sunt trucidati. Nam cùm Sangiacus quidam nouus officium administrationis Ierosolymis adiret, monachi huius loci, vt eum salutarer, sibiq̃ue propitium redderent, viritim gallum gallinaceum pro xenio deferentes, illum accesserunt. Cui cùm tantum hominum numerum (erant autem mille) in vno eodemq̃ue habitu, quæ res aspectu fuit periucunda, vidisset, quæsiuit p̃r interpretē, quinam essent. Responderunt se Anachoritas S. Sabæ esse, & salutatum nouum suum Præsidem venisse, fausta illi precantes omnia: cui cùm propter paupertatem, quam profitebantur, ampla munera deferre non possent, hæc exigua vt animo grato susciperet, illisq̃ue se clementem & benignum præstaret, orabant. Respondit barbarus, se grato quidem animo munus acceptare; sed tantam Gaurorum (sic enim homines Christianos Turcæ canes appellant) multitudinem in vno cumulo congregatam, æquis oculis aspicere non posse. vereri se dicebat, ne sub eius administratione, Christiani, qui tam numerosi essent, aliquid seditionis molirentur. maturè obuiam discrimini eundum, & Gaurorum multitudinem minuendam esse. Delectis igitur ex omni numero viginti quos volebat, reliquos omnes, in oculis suis per Ianissaros in frustra concidi crudelissimè iussit: cumq̃ue de tam ingenti macello ad Selimum perscripisset, ab eo collaudatus est, quòd in officio suo diligentem & vigilantem se comprobauerit. Meo tempore in prædicto monasterio, triginta tantum circiter erant monachi. A cœna, nos ad modicam quietem composuimus; cumq̃ue circa mediam noctem, monachi ad preces Matutinas tabula signum darent (campanarum enim vsus vbique sub Turca prohibitus) è monasterio egressi, viam montosam, inter horridas rupes, & saxosos anfractus habuimus: quam prosequi, nisi nobis Luna illuxisset, nulla ratione potuissemus. Confecimus tamen hoc itinere nocturno, tria passuum millia: & in aurora
mare

*campanarum vsus
à Turcu in-
terdictus.*

mare Asphalticum conspeximus, ad cuius demum littus hora diei secunda peruenimus.

Mare hoc vel potiùs lacus (nam viginti tantùm millia-^{MARE ASPHALTICVM.}ribus in longum, in latum verò vbi magis extensus est, sex vel septem tantùm protenditur) in eo loco est, vbi in cælestis iustitiæ testimonium propter peccati turpitudinem, quinque ciuitates immisso cælitus igne conflagrarunt, quarum nomina sunt hæc, Sodoma, Gomorrha, Sochor,^{Gen. 19.} Amona, & Sebion. Sunt qui scribant, quinque has vrbes subuerfas, præsertim Georgius Cedrenus in Historia: qui tres postremas ita nominat, Segor, Adama, & Seboim. Lacus iste totus est sulphureus, habens saxa in littore, quæ accensa, instar ligni ardent: quorùm aliqua, rei experiundæ causâ, mecum attuli. Iosephus de bello Iudaïco, lacum^{Lib. 5. c. 5.} hunc non minùs exactè quàm verè descripsit: illud præcipuè, quòd in die ter mutat colorem; quod & ipse euidenter vidi. Nam manè habebat aquam nigricantem: meridie sole intenso, (sunt enim calores hîc immensi) instar panni fit cærulea: ante occasum, vbi vis caloris remittit, tamquam limo permixta, modicè rubet, vel potiùs flauescit. Ceterùm fructus, quos arbores ad mare hoc, vt scribit Iosephus lib. eod. 5. producant (qui in specie poma videntur, decerpta verò intus cinere & fauilla plena in fumum dissoluuntur) nullos hîc vidi: neque enim sunt ampliùs; vt nec statua salis vxoris Lothi, quæ conuulsa numquam minuitur, vsquam hoc tempore apparet. Nam diligenter ex Arabe nostro, ceterisque qui loca illa habent explorata, quæsiui: qui constanter affirmabant, nihil simile hîc reperiri. Sed & Frater Angelus laicus monachus, qui in Ierosolymitano Conuentu quinquaginta annos exegit, narrauit, multos Europæos Christianos, suo tempore statuam hanc perquisiuisse, nec tamen inuenisse. Lacus hic aspectu ipso horrendus apparet. Nam montibus vndique præruptis, & cautibus surdis cingitur: & aquam colores variantem,

Statua salis
vxoris Loth.

riantem, valdè spissam & fœtentem habet; quæ guttatim degustata, prout à nobis factum, linguam atrociter mordet, & caput graui pestiferoquæ odore vehementer inficit. Reperimus ad littus Æthiopem nigerrimum, nudum, sal colligentem (nam lacus hic sal producit, sed amarum veluti felle mistum) vultu terribilem, corpore & saltu valdè agilem, pharetram & arcum habentem: quem dux noster nouerat prædonem esse famosum; nunc solum, socios latrones vltra Iordanem versari.

**JORDANIS
FLVIVVS.**

**Baptismi
Christi lo-
cus.**

**Locusta &
mel siluestre
S. Ioannis.**

**Iordanis
aqua asser-
uata, incor-
ruptibilia.**

Iordanis fluuius in mare hoc exoneratur, ea parte, quæ ex monasterio S. Sabæ venientibus occurrit. Inde ad vnum & medium milliare, per altas & steriles arenas, ad locum Christi baptismatis peruenitur. Ad dextram fluminis, quod valdè sinuosis flexibus se videndum sæpius exhibet, eo ipso in loco, vbi à Ioanne Christus est baptizatus, lucus est vmbrosus, ad dimidium milliare in longitudinem, & ad iactum sagittæ in latitudinem, prope fluuii ripas se extendens. Habet arbores, quarum folia salices imitantur, non tamen eius sunt generis, prout ex virgis, quas mecum attuli, videre licet. Atque hoc illud desertum est, cuius Euangelistæ Matth. 3. & Mar. 1. meminerunt, in quo Ioannes baptizabat, & pœnitentiam prædicabat. Ea porrò quibus Præcurzor sanctus victitabat, nempe locustæ & mel siluestre, in locis hisce iam non reperiuntur. Sed verisimile est, fluuium, qui non limosum, sed arenosum etiam fundum habet, & inter rupes labitur, conchyliam quædam absque decoctione comestibilia (quorum nonnullas species mare etiam producere alicubi solet) in ripas eiecisse. Hæc vel horum similia num Sanctus comederit, incertum. Mel siluestre etiam lucus hic olim producere potuit, quo, attestante Scriptura, vesceretur. Nunc nihil tale hic inuenitur, cum sit solitudo, nullam culturam admittens. Aquam valdè turbidam Iordanis habet, sed salubrem, quæ in vase asseruata, numquam corrumpitur: prout

prout in ea, quam attuli mecum, indubitanter sum expertus. Aliqui ex nostris ibidem corpus abluebant, cum in ripa refectionem sumeremus. Vix in latitudinem triginta cubitis excrevit, nisi vbi in Mare mortuum influit: quo loco latius etiam diffunditur. Videntur hic ruinae pontis in vltiore ripa, quem lapideum diua Helena olim construxerat. Ultra flumen ad dextram versus lacum Asphaltithem, incipit iam Arabia, quæ est & vocatur merito Deserta. nihil enim præter rupes & arenam producit; prout ex ipso primo aspectu manifestè videre est. Superius ad dimidium milliariis procedendo, locus est vbi Hebræi Iordanem sicco vestigio transierunt, Iosue 3. A Iordane versus Iericho procedendo (quod inde vno & dimidio milliari, vel paulò plus, abest) prope viam publicam, est Ecclesia propemodum integra, à diua Helena in honorem sancti Ioannis Baptistæ fabricata, prout & illa, quæ in loco baptizati Saluatoris visitur. Habent Indulgentiam plenariam. Ad manum sinistram est locus Galgalæ, de quo Iosue 4. Sed lapides quos de alueo Iordanis translato ibi statuerant Israëlita, nulli apparent. Inde ex arenoso & sterili solo, deuenitur in elegantem & fertilitate celebratam conuallem: in qua ciuitas Ierichuntina erat posita. Dimidio ab vrbe milliari ad dextram est collis, in quo Iosue vidit virum stantem contra se, euaginatam tenentem gladium, Ios. 5. Ex colle hoc patebat amplissimus prospectus Ierichuntis, vnde Iosue, tamquam Dux belli peritus, poterat locum oppugnandæ ciuitati per commodum contemplari, & deligere. Peruenimus postea Ierichuntem, quæ ciuitas in amœna & omnium fructuum feraci planicie sita erat: & circa tempus illud, propter intensum calorem, dactylos iam maturos illa regio habebat. Ex ambitu apparet, urbem ingentem, forma circulari constructam fuisse. Vbi erant muri, quasi agger quidam congestus videtur: in turrium autem loco, quas nō paucas fuisse

ARABIA
DESERTA.

Ecclesia
S. Ioannis
Bapt.

Galgalæ.

IERICHO
CIUITAS.

N

liquet,

liquet, tumuli maiores quasi colles quidam rotundi, cōsur-
gunt. Habuit hīc effectum proculdubio illa Iosue impre-
catio, qua, vt in cap. 6. habetur, vrbem grauissimè perculit.
Nullus enim hīc habitat, prāter Arabes depredatores, qui
in tugurijs arundineis degunt. Turris vnica tantū dimi-
diata parte integra, quadrangularis, in ciuitatis extremita-
te superest: quam nonnulli domum meretricis Rahab,
quandoquidē ad murum ciuitatis posita erat, esse volunt:
quæ signo funiculi coccinei ad fenestram ligati, ne ab He-
brais diriperetur, obtinuerat, Ios. cap. 2. Alij etiam Zachæi
fuisse arbitrantur, quam Christus ingressus erat. Quam-
obrem ob memoriam siue Rahab, siue Zachæi, diuinitus
partem eius maiorem reseruata existimant: quando-
quidem in toto illo ciuitatis situ, vix vnus cubiti altitudi-
ne, integer murus inueniri potest.

In descriptione insulæ Cretæ breuibus attigi, quanta sit
ibi cæli diuersitas, montibus à Septentrione versus Meri-
diem superatis: idem & hīc videre licet, quando aliquis Ie-
rosolyma Ierichuntem proficiscitur. Nam licet sex tan-
tū milliariibus per directum hinc distet Ierosolyma, quæ
multas dactylorū arbores circumcircuita habet: fructus ta-
men eiusmodi isthic non maturescunt, hīc autem ad ple-
nam maturitatem perueniunt. Habetur hīc arbor Spala-
ti, quæ maximo pretio æstimatur, & calidissima aëris tem-
perie opus habet: vt & rosæ Ierichuntinæ, quarum vsus
mulieribus ad faciliorem partum mirificè confert. Fru-
ctus omnes & segetes, duabus hīc antè hebdomadis quàm
Ierosolymis citius proueniunt. Nec mirum sunt enim hīc
adeò immensi calores, vt hinc petentibus Ierosolymam,
cælum longè frigidius videatur: vbi aër itidem salubrior,
& noctes nimij caloris expertes.

Ex Iericho discedentes, vno dimidio & paulò ampliùs
milliari, deuenimus ad fontem aquarum, quas Eliseus im-
misso sale sanauit, & ex pessimis optimas effecit. Fons
hic

Rahab me-
reticis do-
mus.

Zachæi do-
mus.
Lucæ 19.

Spalati ar-
bor.

Ierichun-
tina rosa
partum fa-
cilitans.

FONS
ELISEI.
4. Reg. 2.

hic totam vallem illam irrigat, & per fossas antiquitus ductas, in hortos deriuatur: est copiosus, profunditate hominis humeros attingens; pisciculos paruos habet multos. Videntur hinc ingentes aqueductus, qui ad eremum & monasterium S. Hieronymi aquas propellebant. Nunc vix monasterij illius vestigia apparent. Cibo apud fontem refecti, post emensam quartam milliariis partem, deuenimus ad radices montis, qui *Quadrantana* dicitur: vbi Christus à diabolo tentabatur. Relictis iumentis, ad medium milliare progressi, per adedò arctam & lubricam semitam, quæ subtus ingens præcipitium habet, vt multi propter vertiginem capitis & lapsus periculum eò noluerint accedere, peruenimus ad medietatem montis (nec enim vterius patet accessus) vbi planicies ad sex vlnas protenditur in longum, latitudine valdè angusta. Hinc Christus Dominus quadraginta diebus & noctibus ieiunauit, Matthæi 4. & sancta Helena vnum parietem è latere cocto erexit, cui altare exiguum est adiunctum, quod habet Indulgentiam plenariam. Lapidès ibi plurimi, quos Satanas ostendens, Dic, aiebat, vt lapides isti panes fiant. Qui locum hunc, desertum siluæ appellant, errare videntur: cum arboribus planè careat, rupesque tantum & asperissima saxa in altum porrigat. Videtur hinc lacus seu mare mortuum, & vt sub vesperam solet, aquas nobis rubentes, veluti limo permistas, vt antè dictum est, repræsentabat. Iordanis quoque & Iericho, quod vno tantum, si rectà eatur, abest milliari. In summo eiusdem montis iugo (ab ea tamen parte, qua rectà Ierosolymis itur) est aliud Sacellum in eo loco, in quo Christum Satan assumens, mundi regna illi ostendit, prout in eodem habetur Evangelio. Totus hic mons, multas specus habet, in quibus olim Anachoritæ habitabant. Nunc propter barbarorum sæuitiem nullus inhabitat. Inde reuersi denuò sumus ad fontem Elisei, è cuius regione, modico admodum interual-

*Quadrantana mons
ieiunantis
Christi.*

teruallo, est condensum fruticetum, in quo noctem ducere constitueramus, quandoquidem occasus Solis post horam imminebat. Cumq; cœnam appararem, superuenerunt triginta ferè Arabes, ductori nostro partim noti, qui statim panes, gallinas, anseres, quos decoctos habebamus, diripere cœperunt. Ceterum Arabs ductor noster, cum ab illis periculum creari nobis animaduertisset, arte usus, persuadere illis cœpit, ut tamquam ex itinere lassos, quiescere nos permitteret, quandoquidem eodem illo in loco pernoctaturi essemus. Id autem eo consilio fecit, ne subito irruentes, nos opprimerent. Acquieuerunt illi persuadenti non grauatim, noctem magis commodam designato in nos facinori iudicantes: itaque aliquantò modestiùs se gerebant. Interea ductor Arabs, me ad partem vocato, cum absque interprete, qui cum alijs seorsim agebat, loqui mecum non posset, manu gutturi suo admota, signis annuebat, nos ab illis interceptū iri, si pro nocte hîc maneremus. Interpres accersitus, idem mihi renuntiavit. Significauit itaque meis ut abitionem pararent. Arabs verò noster, apud latrones illos tantum perfecit, ut abscederent. Monachi, qui noctis præteritæ itinere, & æstu diurno valdè fatigati erant, volebant omnino hîc remanere. Quamuis autem ego libenter idem fecissem, quoniam tamen ductor profectiōem vrgebat, dixi me quidem illis non difficulter morem gerere velle, sed cum Arabs noster, in tales nos prædatores incidisse, quibus ipse resistere non possit, certò affirmeret, me vnà cum meis profecturum, manerent illi si vellent, sed magno se periculo expositos considerarent, quandoquidem, non expectatis illis, ductor Arabs & Ianissari me essent comitaturi. Cum itaque Arabem nostrum, suis rebus diffidentem, & valdè sollicitum esse animaduertissent, sarcinulas colligere cœperunt; idq; eò etiam alacriùs, quoniā dicebatur, eosdem latrones ante triduum interfecisse vnum ex Locumtenentis Officialibus,

bus, & sex illi Turcas adiunctos, qui tributum in pagis, ad Iordanis amnem iacentibus, exigebant. Itaque prima noctis hora, per silentium ductore sic monente, loco mouimus, & monte Quadrantenæ ad dexteram relicto, rupem altam conscendimus, cumque tria magna milliaria conficissemus, in cacumine montis, Arabs ductor, ut vnam ad minus & dimidiam horam quiesceremus, permisit: ipseque interim cum suis excubias egit. Postea cum ex suo, quem isthic reliquerat, exploratore didicisset, Arabes latrones nocte ad fontem Elisei, ubi quiescere debebamus, accurrisse, excitatis nobis, iumenta conscendere iussit. Perreximus itaque gradum accelerantes, quod via melior esset: & duobus ab Ierosolyma milliaribus, cum iam illucesceret, substitimus, monte Oliueti conspecto (valde enim eminens & latus est, protenditurque in longum, versus viam qua ab Iericho proficiscebamur, ad duo milliaria, in circuitu multo plura habens; prospectum tamen magis amœnum habet versus Ierosolymam, oleis & ficulneis vndique conuestitus) ubi denuo cum nos somnus vehementer infestaret, ut quiesceremus ductor permisit: ipse tamen cum suis aduigilabat. Post duarum horarum quietem, iam alto sole, nos excitauit.

Inde iumentis conscensis, per Bethaniam, & loca superius nominata, reuersi sumus Ierosolymam, ad Portam piscium, ubi relictis iumentis, ante meridiem venimus ad Conuentum. Hic Arabem ductorem dimisimus, donatis illi florenis aliquot, pane itidem, vino, & carnibus: quæ grato cumprimis animo accepit, offerens nobis operam suam, si fortè proficisci adhuc aliquod vellemus. Famulis itidem eius donatiuum dedi, quo erant contenti. Totam diem reliquam, quieti attribuimus, via molestissima fatigati.

Aduenerat iam Ierosolymam ipsemet Sabadinus Maurus, qui cum caramufano siue comitatu suo Ioppen appu-

lerat, vt Tripoli difcedentes, cum eo conueneramus. Interea P. Vicarius, qui in conuentu remanferat, procurabat vt facrum Cœnaculum ingredi nobis liceret. Quamuis enim apud Turcas pecunia plurimum poffit, multum tamen, ad rem ex animi fententia conficiendam, momenti attulit occasio, quod qui in dicto Cœnaculo manebat, vnus ex numero Santonum dignitate eminentior, infirmitate detinebatur. Quoniam autem in dicto Cœnaculo Turcæ Moschæam habent, in quam Christianis ingredi non licet, nifi quis ingreffus, vel in verba Mahometis iuret, vel sex millia Cecchinorum pro mulcta perfoluat, ideò dictus Santonus à fuperioribus facultatem impetrauit, vt monachos noſtrates intus admittere poffet, qui pharmacopolam laicum habebant, cuius opera in valetudine curanda utebatur. Peregrinorum tamen nullus intromittitur. Ego cum duobus familiaribus meis, Georgio Cos & Andrea Skorulski, ac duobus religioſis, intromiſſus ſum.

COENA-
CVLVM
DOMINI.

Die igitur ſexta Iulij, pileolis dumtaxat monachorum aſſumptis, habitu peregrinorum retento, qui monaſtico perſimilis eſt, per portam Sion è ciuitate egreſſi, poſteaquam in cœmeterio Catholicorum, pro animabus quorum corpora ibi quieſcunt, ad Deum preces effudimus, ad prædictum facrum Cœnaculum deuenimus, & à Turcis qui nos omnes pro monachis habebant, abſque difficultate aliqua, intromiſſi ſumus. Eſt elegans atrium intus, triginta circiter cubitos in longitudine & latitudine habens. In parte ſiniſtra eſt Moschæa: quo loco nonnulli (inter quos Pater Stephanus Ragulinus) Chriſtum Dominum Apoſtoliſ pedes lauiffe arbitrantur. In ingreſſu ſtatim calceos abiicere coacti ſumus: qua etiam cærimonia, Turcæ Moschæas ingredientes, vti conſueuerunt. Admoniti quoque fuimus, ne in terram deſpueremus. Nam Turcæ locum hunc in maxima habent veneratione, aſſe-

rentes

*Turcæ ſacrum
Cœnaculum
venerantur.*

rentes Christum in hoc Cœnaculo magnam quandam cum Apostolis cærimoniam peregrisse: qui postea singulari quodam miraculo, linguas igneas super capita accensas portabant, creduntq; ibidem Spiritum sanctum cælitus in discipulos missum, vt Act. 2. Ex hac Moschæa inferiore pater aditus ad Sacellum satis amplum, in quo est monumentum Davidis, ex marmore candido, venis cæruleis distincto: quod adamasco rubeo, fimbrijs flauis sericeis cincto, regitur: ad latus huius, est & aliud quod Salomonis esse dicitur, sed nullum habet integumentum. Lampades hæc multæ sunt appensæ. Supra hanc Moschæam, fit ad aliam superiorem ascensus; & hoc est illud sacrum Cœnaculum, in quo Christus Dominus vltimam Cœnam discipulis exhibuit. Est longum, ad viginti cubitos plus minùs, elegans, lucidum, concameratum: ex vna parte, qua in aream prospicitur, tres amplas fenestras habet: in medio, sunt tres elegantes marmoreæ columnæ, per ordinem dispositæ, quibus testudo innititur. Hic in genua procumbentes, Deo preces pro gratiarum actione obtulimus; & P. Ioannes breuem exhortatiunculam ad nos fecit. Est hic Indulgentia plenaria. Inde ingredientibus ad dexteram pater ingressus ad impluuium, quod ducit ad cubiculum quoddam subobscurum Cœnaculo ipsi contiguum, in quo super discipulos congregatos Spiritus sanctus descendit. Huic aliud subest simile cubiculum, ad quod Christus post resurrectionem, ianuis clausis ingressus, Apostolis apparuit, Ioan. 20. Est ibi Indulgentia septem annorum & totidem quadragenarum. Mystéria quæ hoc in loco sunt peracta, describuntur in Actis Apostolorum fusius, primo & secundo capite. Cœnaculum hoc sacrum distat ad sagittæ iactum ab eo loco, in quo palatium Davidis erat situm, in ipso vertice montis Sion. Reuersi deinde sumus ad monasterium: vbi prandio sumpto per Portam Piscium exeuntes, ad dextram, circumuiuimus me-

diam

Davidis monu-
mentum.

Salomonis
monumen-
tum.

*Sepulchra
Regum Iu-
da.*

diam ferè ciuitatis partem, vsque ad sepulchra Regum Iuda: quæ antea murò ciuitatis comprehendebantur, nunc verò longè distant à porta ciuitatis, qua itur Damascum. Mirum est quanto sumptu & artificio monumenta hæc fuere constructa. Sunt enim in ipso saxo viuo, quasi quædam camera arcuatæ, in quadrangulum excisæ: quarum pars quælibet duas habet portas; portæ verò singulæ aditum præbent ad vnicum Sacellum, in quo duo corpora reponebantur. Ad Sacella siue Capellas prædictas, valuæ sunt ex eadem petra excisæ: quæ in angulis prominentes rotundas extremitates vtrique posti ita insertas habent, vt quasi cardinibus suspensæ, commodè claudi & referari valeant. Mirum profectò, quomodo ex vno eodemque saxo id exsculpi potuerit. In Cathedrali Torcellensi Ecclesia, non procul à Venetijs, sunt etiam magnæ lapideæ tabulæ, quibus fenestræ clauduntur, sed in postes alterius lapidis inferuntur. Hic autem ex vno eodemque viuo saxo parata sunt omnia, & postes qui valuas excipiunt, & valuæ quæ postibus insertæ, facili ductu circumferuntur. Illud etiam cum primis est admirandum, quòd in eiusmodi Capellis sunt tumbæ lapideæ multò maiores, quàm vt per portas introduci potuerint. Apparet omnino, non eas arte humana aliqua importatas; sed intus ex eadem rupe excisas, & sculptorum opera ibidem formatas esse. Operis quoque elegantia, tam in portis, quàm in sarcophagis prædictis, mira florum & foliorum varietate distincta & elaborata admiratione non caret. Poterant ijs in locis quadraginta & aliquot personæ recondi. Nam quælibet concameratio Sacella octo, Sacellum verò quodlibet duo corporum repositoria continebat: in quorum nonnullis ossa etiam visuntur, sed ad quos pertinent, nescitur. Loca hæc, vt in specubus, sunt obscura, quæ non nisi luminibus illatis visitari possunt. In ingressu, qui valdè humilis est, depressus, ac ruderibus oppletus, custodes reli-
qui-

quimus, ne Turcæ lapidibus exitum obstruerent; quod non illibenter faciunt, vt Christianos enecent. Inde redijmus in Ciuitatem per Damasci portam, & ad dexteram diuertimus ad Herodis palatium, quod Turca quidam ciuis inhabitat, & oblata pecunia facilè intus admittit. In parte inferiori est antiquum ædificium quoddam, in quo Saluatorem nostrum alba veste ferunt indutum, & ab Herode spretum. Palatium hoc fuit in monte positum. Tradunt enim Historici, intra murorum ambitum, tres conspicuos & insigniores montes Ierosolymis fuisse, qui etiam nunc apparent. Primus inter hos, mons erat Sion, maior & longè ceteris eminentior, in quo palatium Dauidis erat; cuius nunc maior pars (vt & sacrum Cœnaculum) extra Ciuitatem est. Conueniunt enim scriptores in hoc omnes, modernam Ierusalem vetusta illa longè nunc esse minorem: quæ non Iudææ modò, sed omnium Orientis vrbium longè maxima & clarissima olim fuit, vt Plinius libro quinto, & Tacitus in Augustalibus refert. Habuit enim viginti quatuor fora: in quorum singula viginti quatuor plateæ exonerabantur: quamlibet verò plateam viginti quatuor viculi seu angiportus interfecabant. Menathon præterea quidam Hebræorum Rabinus memoriæ prodidit, fuisse in ea Ciuitate Synagogas, quæ statts temporibus frequentabantur, circiter quadringentas octuaginta. Apparet etiam nunc ex ruinis, urbem hanc ingentis fuisse magnitudinis; quandoquidem, vt dictum est, in ea Regum Iuda monumenta comprehendebantur, quæ nunc extra muros conspiciuntur. Ad hæc palatia Dauidis, Salomonis, Herodis Regum, & Reginarum, hortos spatiosos, immò & ferarum viuaria habebant adiuncta: quæ omnia, post bellorum tempestates, magno murorum ambitu, ex lapidibus sectis, vt apparet, constructo cingebantur. Secundus mons Regius vocabatur, & ipse non valdè quidem eminens, sed vastus cum primis & spatio-

Herodis Palatium.

Montes Ierosolymis præcipui.

Mons Sion.

Ierosolymitana vrbis maiestas.

Mons Regius.

tiosus, in quo amplissimum & celeberrimum illud palatium ab Herode Atcalonita Iudæorum Rege, Innocentium occisore, constructum fuit: in cuius medio aula erat Regia inenarrabili magnificentia eminens: vbi Christus Herodi Antipæ Tetrarchæ Galilææ Ioannis Baptistæ interfectori præsentatus fuit. Tercius mons Moriath appellatur, in quo templum erat Salomonis: vbi nunc Moschea Turcarum, & ingens est area. Mons hic depressior ac humilior est duobus ceteris, quâ ciuitatem versus protenditur, sed à parte vallis Iosaphat, quæ hunc, & Ciuitatem ipsam, à monte Oliueti diuidit, longè altior & diductior est, in quo etiam moderna Ciuitas in longum tota porrigitur. Quartus mons Caluariæ dictus, olim extra Ciuitatem, nunc intra comprehensus (in quo Christus Saluator salutem nostram operatus est) amplissimis Basilicæ celeberrimæ ædificijs occupatur: cuius altitudo quod minor appareat è Ciuitate versus illum pergentibus, substructiones id faciunt; cùm alioquin semper ascendendum sit, & ex alia parte magnum præcipitium immineat, in quo Crux viuifica fuit reperta. Hæc pauca, de quatuor montibus, qui nunc etiam Ierosolymis visuntur, dicta sufficiant. Est & quintus Gion, de quo superius: sed vt apparet, extra Ciuitatem fuit.

Mons Gion.

Tertius ingressus ad S. SEPVLCHRV.

Quod Ierosolymis iam discessuri essemus, sumpto prandio, tertia vice iuimus ad audiendas Vesperas in sacro Sepulchro: vbi & Processionem more consueto peragebamus, & ad perceptionem sacrae Communionis per exomologesin nos præparabamus. Sequenti igitur die manè P. Ioannes de Florentia Missam in sacro Sepulchro decantauit (nam P. Vicarius res itineri necessarias præparaturus è templo discesserat) & nobis sacram Eucharistiam ministravit. Die octaua Iulij circa meridiem discessimus ex Ecclesia. Erat autem dies SS. Apostolorum Petri & Pauli, secundum Kalendarium vetus: itaque vidimus, qualiter per

per integram noctem præcedentem, diuersæ nationes, in locis cuique assignatis suæ deuotionis cærimonias peragebant. Cùm abiremus, gratiæ nobis actæ ab omnibus, quòd occasione ingressus nostri, ipsis quoque hoc die sacro Basilicam ingredi licuerit, quam ipsorum causa Turcæ non erant alioquin aperturi. Aduère hac ipsa nocte in Ecclesia, diuersarum gentium circiter homines ducenti: qui verò tardiùs venerant, expectabant ad portam, vt dum ea nobis referatur, clam intus ingredi, & sacrũ Sepulchrum exosculari obiter possent. Quibus autem ea fors non ob-
 tigit, ij egredientibus nobis vestes nostras attrectabant, & exosculabantur, quæ sacra illa loca tetigissent. Idem antea quoque faciebant, quoties emittebamur ex Ecclesia. Tan-
 tus deuotionis feruor est in Christianis illis; qui etiam si sint Schismatici, loca tamen sacra non auersantur (quod Hæretici faciunt) sed honore potiùs condigno venerantur. Quoniam autem dictum est superiùs, nos ter in Ecclesiam sancti Sepulchri ingressos, operæ pretium est ostendere, qua ratione id fiat. Peregrinus qui nouem Cec-
 chinus numerauit, ter illi debet Ecclesia aperiri. Id eo mo-
 do est intelligendum: vt cùm aperta illi semel fuerit, & ille ingressus, post dimidiam vel vnā horam (quam, si dixerit se egressurum, Turcæ integram expectabunt) inde exierit, vel integrum ibidem annum morari voluerit, ingressus cuiusmodi, pro vna tantum vice computetur: sic & al-
 ter, & tertius: quandoquidem clausa Ecclesia, pro vnica vice sigillatim admissi introitus numeratur: exceptis so-
 lennioribus festiuitatibus, quibus Monachi intromittun-
 tur, quoties opus habuerint: qui etiam nihil pensant, sed vbi primùm aduenerint, xeniolum aliquod Sangiaco & Cadio offerunt. Peregrino cuiuslibet, qui voluerit, ter aperitur Ecclesia: & quoniam pro refectione Turcis semper aliquid est numerandum, tenuiores peregrini, semel ingressi, manent intus quamdiu volunt: cibus verò illis è sue

*Christiano-
rum Schi-
smaticorum
Ierosolymie
deuotio.*

*Peregrino-
rum ad S. Se-
pulchrum
intromittē-
dorum ratio.*

gentis monasterio (in monasterijs enim peregrini habitant) per rotundam portæ templi fenestram suppeditatur. Et iam antiquitate mos hic exoleuerat de trina apertione: nos tamen è consilio Patrum obtinuimus apud Cadium, vt consuetudine antiqua reuocata, ter nobis Basilica aperiretur; & eadem hora, qua pridie ingrediebamur, die insequenti foras dimitteremur. Pro celebrioribus festis, è totius ferè mundi partibus frequentiores peregrini concurrere solent, qui semel admissi, quoad celebritas durauerit, in Ecclesia manent. Non æqualiter tamen omnes pecuniam admissionis exsoluunt. Nam qui prope Ierosolymam manent, minus; qui remotiùs agunt, plus contri-
bunt. Qui Damasco & Cœlesyria veniunt, tres Cecchinos; qui è Syria Phœnices vltra Libanum, quatuor; qui Apamæa & vicinioribus Europæ locis, quinque; qui ex Asia, sex; qui ex vltioribus prouincijs, septem vel octo; Europæi verò omnes nouem Cecchinos viritim pendunt.

Vestigal

*S. Sepulchri
Cæs. Turca-
rum.*

Affirmatur pro certo, quòd ad triginta millia Cecchinorum, qui sexaginta millia florenorum constituunt annuatim, ex hoc peregrinorum vestigali in ærarium Turcarum Cæsaris importantur. Quo ordine, quibùsve carimoniis in diuino cultu peragendo, tam nos Catholici, quàm ceteræ nationes hîc vtantur, P. Stephanus Ragusinus, de quo superiùs, in suo, quem De iugi Terræ sanctæ deuotione conscripsit, libello copiosiùs explicat: illud vnum addendum puto, quòd ingenti Catholici hominis

*Sacra Ierosolymæ
loci visitan-
tium consola-
tio.*

animus voluptate & consolatione perfruitur, dum considerat loca hæc, in quibus nostræ salutis monumenta peracta sunt, Christianis nota & explorata esse: immò integra adhuc conseruari, ea præsertim quæ lapidibus & petris insunt. Multa etiam alia piè creduntur ex antiqua traditione, vera & genuina permanere; quæ nihil impediunt, quo minùs Christi Saluatoris prædictio locum habeat, qui dixit, lapidem supra lapidem hîc non remansurum: neque

tamen

tamen omnipotentiae suae modum praescripsit, ea integra aliqua ex parte relinquendo, quae pii homines ex remotissimis orbis regionibus venientes, nulla sumptuum & valetudinis habita ratione (res admiratione digna) singulari cultu & obseruatione venerantur. Illud etiam notandum, quod non solum Catholici, sed ceterae quoque nationes baptismi Sacramento initiatae, hinc particularia Sacella habent assignata, in quibus Diuinum numen, die nocteque inuocant, & honore debito prosequuntur. In sacrosancto Missae sacrificio celebrando, Maronitae, Abyssini, & Georgiani, quam proximè ad Catholicorum ritum accedunt, aliae nationes panis etiam & vini oblationem retinent. Ceterum nulli sunt hinc Haeretici, nisi fortè qui videndi causa eò veniunt, vt è Gallis & Germanis aliqui. Ministrorum tamen noui Euangelij nullus omnino apparet. Cum tertio in Ecclesiam cum Religiosis ingressus essem, sedens cum filio cuiusdam Episcopi Armeni, per interpretem colloquium habui: qui nos è remotis partibus venientes agnoscens, multa mecum de ratione deuotionis, quae à diuersarum gentium hominibus in hac sacra Basilica frequentaretur, contulit, & quomodo mihi ea probaretur, quaesuit. Respondi, mihi placere omnia. Quamuis enim diuersis linguis & caerimonijs natio quaeque Deum laudaret, in essentialibus tamen eos cum nobis Catholicis conuenire: vnde appareret, vnam semper fuisse & esse Ecclesiam: quae eadem Catholica & Romana vocaretur. In ipso sermonis progressu, quaesui ex illo, num aliquid etiam inaudiuerit de Haeticis, quos Deo propter peccata nostra permittente, in partibus nostris haberemus, quorum etiam nomina recensui, nempe Lutheranos, Zvvinglianos, Arrianos, Anabaptistas, & reliquam Haeticorum colluuiem. Interrogauit, num Christiani essent. Dixi eos esse baptizatos, & Christianos velle vocari. Respondit, nulla ratione se credere posse, quod sint

Sacella nationum in templo Ierosolymitano.

Missae Maronitarum, Abyssinorum, Georgianorum.

Ministri noui Euangelij Ierosolymitani nulli.

Haetici non sunt Christiani, quia non agnoscunt Sacerdotem & Sacrificium.

sint Christiani; quandoquidem ad eum locum, in quo Deus mortali carne assumpta salutem nostram operatus est, non accederent; nullos Sacerdotes, altare nullum, ad offerendum Deo sacrificium, hîc haberent. Nam licet loca hæc sacra in Paganorum manus deuenerunt, ad eorum tamen confusionem, Christianos, cuiuscumque tandem sectæ vel professionis fuerint, ad ea accedere, illaque venerari conuenit. Hæc ille cum tanta simplicitate & mentis affectu proferebat, vt facîle appareret, non fictè sed ex abundantia cordis illa fuisse loquutum. Superuenit intereà Græcus ille Anachoreta, quem apud S. Sabam vidimus: qui, vt suprà dictum est, in partibus nostris aliquamdiu versatus fuit. Is vbi intellexit, de quibus inter nos colloquebamur; narrare cœpit, se sæpius in Polonia Hæreticos vidisse, eorumque mores perspectos habere: eos esse multò Iudæis deteriores. Nam illos quidem Christum crucifixisse, quem Deum non credebant nec agnoscebant: Hæretici verò cùm eum agnoscant, & verbis confiteantur, denuò tamen illum crucifigunt, omnipotentiam eius negantes, & honore diuinitatis illum spoliantes. Magna hæc consolatio, quòd de peste hæreseon nihil in sanctis hisce locis audiat. Inter hæc colloquia quæ in Refectorio miscebamus, vbi diuersarum nationum homines aderant, præcipuè Cophti & Maronitæ, scribere nos quædam contigit. Mirabantur illi, quòd tam citò & expedite characteres formaremus, nec credebant illa facîle posse legi: quandoquidem ipsi lentè admodum, & contrario modo, à dextra versus sinistram procedendo, literas pingunt: & antequam vnum characterem effingant, sæpius chartam hinc inde vertunt & eleuant, vt dispiciant rectè nē an secùs collocauerint. Habent autem hoc, quòd in vnius characteris ductu, syllabas aliquot complectuntur, quas nos vix aliquot verbis exprimere possemus. Quamobrem vbi viderunt, sua verba & dictiones, nostris litteris expref-

Hæretici Iudæis deteriores Orientalium iudicio.

Maronitarum scribendi ratio minus expedita.

expressas, celeriter & exactè nos pronuntiare, laudabant nostram scribendi rationem, quòd & celerior, & lectu facilius esset.

Illud etiam hîc necessariò adiungendum est, quem ordinem in obeunda deuotione sua quælibet natio solet obseruare. Quæ Sacella siue Sanctuaria cuilibet nationi sint attributa, suis locis diximus superiùs. Potest quiuus alterius nationis Oratoria ingredi, & deuotionem suam prosequi: ita tamen, vt ne ritus & cærimonias eorum, quorum locus est proprius, sacrorum tempore aliqua ratione impediatur. Itaque tunc primùm Supplicationes siue Processiones peraguntur, cùm Officiu diuinu natio quælibet suis in locis absoluerit. Missas verò seu liturgias, in alterius nationis Sanctuario, præterquam in proprio, nullus celebrare potest, sub multa mille aureorum, toties quoties contrauentum fuerit, deponenda. Lampades potest vna natio in alterius Sanctuario appendere: sed cùm earum tantus iam sit vbique numerus, vt locus illis collocandis desit, difficulter earum auctio admittitur, in sacro maximè monumento, vbi meo tempore quadraginta duæ erant appensæ: quarum vna tantum & viginti accedebantur: ex his Catholicorum erant quindecim. Neque enim omnes ardent, quandoquidem à fundatoribus oleum non suppeditatur. Vna semper accensa est Pontificis Maximi, altera Collegij Cardinalium, tertia Romanorum Imperatoris, quatuor Regis Hispaniarum, duæ Regni Hispaniarum, duæ Regni Portugalliæ, Regis Galliarum duæ, quæ obliuione quadam, propter bella & hæreses exortas, non accenduntur. Monachi tamen, propter insignia Regum Galliæ in illis apposita, vnam pro paupertate sua perpetuò illuminant. Respublica Veneta habet vnam; Duces & Principes, alij itidem homines pij, suas lampades procurant. Quælibet lampas annuatim oleum viginti quinque Cecchinis, qui florenos Polonicos quinquaginta consti-

*Officiorum
diuinorum
ad S. Sepulchrum ordo.*

*Lampades
S. Sepulchri.*

constituunt, absumit. Si qui elemosynam pro sua lampade accendenda non mittunt, pendet ea nihilominus non accensa; cum semel illatam nefas sit amouere. Ante Sepulchrum Dominicum in Capella rotunda, sunt lampades quatuordecim, quarum duodecim semper ardent, Catholicorum sunt nouem. In foribus dictæ Capellæ vna, exterius per circuitum sacri Sepulchri sex lucent perpetuò. In monte Caluariæ cum locus sit capacior, Catholicorum Ducum & Principum, triginta tres, omnes ardentes, sunt appensæ. Georgiani habent triginta duas, ante locum vbi crux Dominica stabat, ex quibus quinque tantum accensæ. Ante lapidem vnctionis, octo accensæ Catholicorum pendent: ad altare beatæ Mariæ Magdalenæ, Catholicorum tres ardent: in carcere, Græcorum duæ: ad altare Diuisionis vestium, vna: in Capella Inventionis sanctæ Crucis, vna Catholicorum accensa, Græcorum duæ ad paruum altare illorum, quod ibidem in parte dextera habent: in Capella diuæ Helenæ, duæ: in Capella Abyssinorum, vbi columna supra quam Christus Dominus illusit & spinis coronatus fuit, asseruatur, vna. Ceterum lampades istarum nationum, diebus tantum festiuis, aut cum peregrini processionaliter obambulant, accenduntur: postea statim extinguuntur. Semper etiam in hac Ecclesia fuit & hoc obseruatum, & adhuc obseruatur, ut diuersarum gentium Sacerdotes, ad aliquot menses, iuxta superiorum præscriptum, intus recludantur. Ex nostris monachis duo semper sunt Sacerdotes, & laici duo (meo tempore horum senior fuit Fr. Nicolaus Nani de Drusi) qui intra duos vel tres menses mutantur, nisi fortè quis infirmetur; quo in Conuentum recepto, alius substituitur. Idem ceteræ quoque nationes facere solent. Ordo autem diuini cultus peragendi, talis est inter illos: Quilibet alternatim per hebdomadam munus suum peragit, die Dominico in S. Sepulchro; Feria sexta in monte Caluariæ; Sab-

*Sacerdotes
inclusi in Ec-
clesiâ S. Se-
pulchri.*

Sabbato in Capella apparitionis B. Virginis, Missam priuatam, cum thurificatione tamen, celebrat: reliquis diebus, nempe Feria secunda, tertia, quarta, & quinta, in sancto itidem Sepulchro, absque thurificatione, Sacrum absoluit. Sacerdos autem non Hebdomadarius, celebrat ubi vult.

Quamuis plures fuere, qui rationem ædificij Basilicæ sancti Sepulchri, diutiùs in ea commorantes, exactè copioseque descripserunt: quæ tamen, & ipse quantum per temporis breuitatem licuit, obseruare potui, hîc succinctè addenda existimaui, licet iam nonnulla superiùs attigerim. Vt prætermittamus igitur, quanta amplitudine & sumptibus templum hoc cum ceteris ædificiis sit constructum: in quo non solum ingens Sacerdotum numerus, sed integri propemodum militum Templariorum, cum in manibus Christianorum Ierosolyma esset, exercitus receptaculum habebant; sciendum est, totam machinam ex eleganti & magno lapide quadrato, vnà cum turri campanaria, in altum consurgere; templum verò ipsum ad formam crucis esse compositum, lapidè secto concameratum: parietes in quadrangulum coeunt, nisi quòd ad Ortum & Occasum semicirculum insertum habent. Columnas quadrilateras vndique per gyrum habet, (secundùm quas Processiones peraguntur) quæ ambulationem, versus Occasum tantùm, superimpositam sustinet. Supra ipsum Dominicum Sepulchrum, tholus circularis, dimidia tantùm parte testudinatus, consurgit; cuius reliquum trabium contignationes perficiunt, & fenestram vnâ circularem, quæ lumen copiosum præbet, ad instar illius, quæ Romæ apud S. Mariam Rotundam conspicitur. Pluvia in partibus illis rarior; vnde minus ædificijs periculi: maximè quòd sacri Sepulchri Capella, superiùs vndique sit marmore constrata, parietes quoque exteriores cinerei marmoris itidem tabulis, quæ columnis Porphyreticis

P

disting-

*Brevissima
descriptio
templi S. Sepulchri.*

distinguuntur, conuestiti. Tholus, vt Ecclesia tota, habet tectum plumbeis laminis obductum.

Ingressus in Ecclesiam est in medio, Meridiem versus. Ad dextram sunt sepulturæ Regum Galliæ in Capella Græcorum. E regione portæ est positus lapis, in quo Christus è cruce depositus, fuit aromatis inunctus. Paulò ulterius ad duas columnas, sunt duæ sepulturæ aliæ, prope parietem Sanctuarij Ruthenorum (de quo inferius) filiorum vel propinquorum aliquorum, prædictorum Regum. Nam Epitaphia vetustate consumpta legi non possunt. Ad læuam, in ingressu sub curritorio inter duas columnas habent Abyssini paruum Oratorium, tabulis ab Ecclesia distinctum. Nam quælibet natio, vltra Sanctuarium, locum videlicet in quo Christus aliquid est passus, Oratorium etiam particulare habet, in quo deuotionem ritu suo peragere consuevit. Prope Abyssinos ibidem inferius locum habent Syriani siue Maronitæ, qui sunt Arabes baptizati, in quo sunt sepulturæ familiæ Iosephi ab Arimathia. Reliqua pars inferior est Catholicorum, qui etiam curritorium superius olim totum possidebant. Sed cum Georgiani totum Caluariæ montem pro Sanctuario obtinerent, nec locum tamen Oratorij in templo haberent, Armeni itidem, Sanctuarium possidentes, de quo superius dictum, orationis locum in templo non faciliè reperirent; Armeni cum Georgianis, pecunia numerata, Georgiani vicissim cum Catholicis ita conuenerunt, vt dimidia montis Caluariæ parte, in qua Christus cruci affigebatur, illis cederent, Catholici verò ad tertiam curritorij superioris partem, quæ supra Abyssinos & Syrianos est, Georgianos admitterent. In hoc itaque curritorio Georgiani & Armeni sua Oratoria habent, ad quæ per gradus ligneos, separatim è templo fit ascensus. Catholicis verò benè successit commutatio. Nam dimidium Caluariæ montem, & duas curritorij superioris partes obtinent, quod

Maronita
qui.

quod satis amplum & spatiosum est : & licet illis minùs necessarium sit, retinetur tamen ab illis. Hæc permutatio iam pridem facta est, quo tempore Ierosolyma in potestate Sultanorum Ægyptiorum fuit.

Cophti, quos etiam Chaldaeos vocant, cùm nullum Sanctuarium habeant, & Oratorio quoque destituantur, retro Capellam sancti Sepulchri, è regione Syrianorum, qui sunt sub curritorio, fabricarunt sibi exiguum Sacellum, sacro Sepulchro contiguum, vbi deuotionem suam peragunt. A quo tempore, & qua ratione locum hunc obtinuerint, nihil certi intelligere potui. Ad Septemtrionem eiusdem partis, est nostra Catholicorum Capella, de Apparitione denominata, in qua diuina faciunt officia: cui antiquitus mansiones nonnullæ, prope ipsam Ecclesiam, sunt adiunctæ. Habentur hîc non pauca cubacula, & habitationes non incommodæ. Est quoque culina mediocris, Refectorium adiunctum habens, vbi comedebamus. Est & impluuium paruum. Non procul à Refectorio sunt scalæ, quibus ad curritorium templi superius ascenditur. Exeuntibus è Capella prædicta Apparitionis, prope portam occurrit altare, vt antè dictum est, S. Mariæ Magdalænæ. Inde per ordinem deuenitur ad Sanctuaria, de quibus antè quoque dictum, & ad scalam, qua descenditur ad Capellam S. Helenæ, vltra quam ad locum Inuentionis S. Crucis. Postèa sequitur Abyssinorum Sanctuarium, in quo truncus lapideus Christi spinis coronati asseruatur. Hinc per scalam, vt retuli superius, ascenditur ad Caluariæ montem, qui meridianum quadranguli parietem attingit. Græci habent suum Oratorium in medio templi, inter columnas muro depresso cinctum; quod magnitudine nationum aliarum Oratoria superat. Ad Orientem, portam principalem; ad Occidentem, sanctum Sepulchrum prospicit, vnde aditum habet: cui altare paruum, quod etiam illorum est, non tamen ornatum, adhæret. Fe-

neſtræ in templo nullæ, præter vnicam illam rotundam, in tholo, ſupra Capellam ſancti Sepulchri, apertam: quæ ſufficiens lumen admittit, quod etiam ad Oratoria deriuatur; quamuis eius uſus perexiguus, quòd luminariſus vndique illuſtrentur. Eſt tamen in monte Caluariæ, verſus Meridiem oblonga fenestra, plateam reſpiciens, clathris ferreis benè munita. In noſtra quoque Catholicorum Capella, ad Orientem fenestra patet, clathris itidem obducta, quæ lumen illi copioſum præbet. Pauimentum templi lapide quadrato eleganti & magno eſt ſtratum. Ex quibus omnibus facile apparet, quanta diligentia & ſumptu, ad perpetuitatem, ſancta illa Helena Auguſta, hæc ſacrorum locorum ædificia perducere voluerit. Si quis igitur hæc legendo, aliquid à me prætermiſſum animaduernerit, ignoſcere & emendare debebit. Nec enim Architecturæ membra ad amuſſim obſeruare; nec nationum omnium, quæ in templo verſantur, exactè meminiffe potui, cum ter tantum, vt dixi, Baſilicam fuerim ingreſſus, ab hora Veſperarum ad ſequentis diei meridiem tantum ibidem commoratus: vt mirum videri non debeat, ſi propter breuitatem temporis, ſingula diligentius veſtigare non licuit; præcipuè cum ſacraſiſſimus hic locus illud proprium habeat, vt maximum quemque peccatorem, qualem me eſſe profiteor, ſingulari quodam modo, ſenſibus in ſtuporem verſis, ad gratias Deo perſoluendas excitet, pro collatis innumerabilibus in genus humanum beneficijs; ſimul etiam ad contemplantum, qua ratione hoc in loco, per acerbiffimos cruciatus & mortis dolores, Chriſtus Saluator noſtram ſalutem operari dignatus fuerit, vehementer inducat & inflammet.

Cum itaque die octaua Iulij è templo egreſſi, in monaſterio prandium ſumpſiſſemus; quòd poſtridie nobis erat abeundum, ad Cadium perreximus. Vidimus in platea vltra viginti Turcas, poſt meridiem in ardenti ſole ſedentes:
quibus

quibus vnus, ad eum planè modum, quo apud nos equis
 emitti solet, sanguinem minuebat. Nam ferro venæ appo-
 sito, idem non leui, bacilli crassioris, ictu percutiebat, at-
 que ita non absque aliquo doloris, vt apparebat, sensu, san-
 guis in terram defluebat. Nōnulli vulnus panniculo obli-
 gabant; quidam, digito tantum vulneri appposito, discede-
 bant. Postquam ad Cadium accessimus illi valedicturi, vt
 nobis Ianissarum adiungeret, petiuimus. Obrulimus illi
 duos Cecchinos monetæ, ex quibus duos tantum Saynos
 accepit, reliquum nobis restituit. Nam Cadius hic quam-
 uis Turca, vir tamen bonus, & ab avaritiæ vitio, quod
 Turcis innatum est, longè remotus fuit. Attribuit ille no-
 bis Ianissarum, cum quo statim iuimus ad Portam specio-
 sam, de qua Actorum 3. Est magna & cum primis alta, ad
 quam per gradus aliquot ascenditur: quos nobis quoque
 conscendere permissum, sed limen transcendere vetitum
 fuit, eò quod area templi Salomonis immincat. Quod
 cum propius intueri magnopere cupiuissem, ingressi su-
 mus Portam minorem, ad dextram in viculum, qui proxi-
 mè ad templum ducit, & aream angustiolem, vix quadra-
 ginta vlnarum interiectu, oppositam habet. Hinc, quod
 è regione porta sit, patet optimè prospectus in ipsum tem-
 plum: quod elegans & cum primis lucidum esse apparet.
 Lampades plurimas intus accensas habet. Cum ad por-
 tam prædictam stantes introspiceremus, Turcæ subri-
 dentes, per interpretem nobis renuntiari iusserunt, vt
 aream ingrederemur, quasi innuentes, quod statim ad ef-
 fectum legis contra Christianos latæ pœnam essent dedu-
 cturi. Nam cum omnes Turcarum Moschæas Christia-
 nis ingredi sit prohibitum, vt superius artigimus, hîc ne in
 aream quidem descendere permittuntur. Et in alias qui-
 dem Moschæas, si Christianum ingredi contigerit, vbi
 Mahometismum suscipere detrectauerit, sex millibus
 Cecchinorum vitam redimere potest. Hîc verò, qui in

Porta speciosa.

Templum Salomonis Christianis ingredi ne-
 scit.

aream tantum pedem intulerit, aut circumcidi, aut mori necessarium debet. Ita enim Turcæ persuasum habent, quod non solum templum, sed area quoque templi, privilegio Salomoni diuinitus concessa gaudeat, quo Deus se omnem, qui in loco hoc, pro quacumque re supplicauerit, exauditurum promissit. Posset, inquiunt Turcæ, Christianus huc ingrediens Deum orare, ut Turcis exturbatis, iterum Christiani loca hæc obtineant: quem sic orantem, Deus exaudiret proculdubio. In tanta isti miseri cæcitate versantur! Quibus cum à nostris obijcitur, cur illi cum in loco privilegiato orent, à Deo non impetrant, ut Christiani penitus intereant, statim obmutescunt, vel caput concutiunt. Alij, talia postulari non debere, respondent. Qui memoria repetunt quibus laboribus, & quanta sollicitudine Christus Dominus, Iudæorum salutem, eos in templo Salomonis instruendo, procurauerit: ij recitando in hoc loco Orationem Dominicam cum Salutatione Angelica, lucrantur Indulgentiam plenariam. Inde procedentes versus palatium Pilati, per Viam dolorosam, reuersi sumus ad monasterium in ipso Solis occasu.

Interea mulis & iumentis conductis, ad crastinam perfectionem necessaria præparabamus. Et quoniam duabus hebdomadis Ierosolymis mansi, diebus etiam ijs computatis, quibus in Bethlehem & apud Iordanem fui, mansioque hæc mea in tempus illud inciderat, quo longissimi solent esse dies, quærebam, num tam hieme quam æstate semper Ierosolymis sint æquales duodecim horarum dies ac noctes, prout Christus Dominus, Ioan. i. cap. attestatur. Cumque nullum hîc, ne in monasterio quidem haberetur horologium, difficile potui rem hanc obseruare. Quantum tamen ex horologio solari, & clepsydra monasterij colligere licuit, constat noctem non fuisse breuiorem, ab occasu ad ortum Solis computando, decem horis cum dimidia: quod itidem & monachi affirmabant. Vnde

certum

*Ierosolymis
num æqua-
les diei &
noctis horæ.*

certum est, Ierolymis esse variationem dierum atque noctium, propter varium motum Solis, qui supra Horizonem modò longius, modò breuius curriculum facit. Sed quod Veritas dicit in Euangelio: *Nónne duodecim sunt horæ diei?* hoc fortasse usu antiquorum dicit. Antiquitus enim Iudæi, Romani, Ægyptij (vt ex Plinio & Macrobio patet) singulos dies noctesque in horas duodecim distribuebant, quæ modò essent longiores, modò breuiiores, modò æquales pro varietate dierum atque noctium: qua de re Theologi rectiùs iudicabunt.

Hic de Chamæleonte, animali obseruatione dignissimo, aliquid dicamus, occasio facit. Tres enim ibidem in monasterio vidimus, qui in oleæ arboribus, quæ ibi sunt aliquot, asseruabantur. Figuram & magnitudinem habet lacertæ, non mordet tamen, cum nec os habeat, nec cibo vel potu, sed aëris tantum alimento sustentetur. Foramen tamen exiguum, magnitudine parui piperis habet, quo aërem admittit. Caret omni veneno. Motus illi tardior, adeò, vt totius diei decursu, vix vnus cubiti spatium reptando emetiatur: & manui impositus (nec enim in atrectando horrore est) vix sese moueat, donec deponatur. Ex arbore numquam desilit. Maculæ per corpus rariores nigricant. Colorem subinde mutat, redditque eum, quem proximè attingit, præter rubrum & flauum: quod sæpiùs experiri placuit. Maculæ tamen nigræ non mutantur, nisi pellis ipsa. Oculos prominentes, rotundos & hilares habet: quorum altero sursum, altero deorsum, non minùs antè quàm retrò, vno eodemque momento, simul intueri potest. Colori alicui superinpositus, quando diuersus alius color illi ex parte superiori opponitur, vtrumque simul aspicit: & in quem intuitum firmiùs defixerit, eum assumere incipit; mora quasi vnus Orationis Dominicæ interposita, totusque in eum iam notabiliter mutatur. Collocaui illum supra colorem album, viridem, cæruleum,

*Chamæleon-
is natura.*

leum, nigrum; omnes recipit. Supra rubrum collocatus, mansit immutabilis. Flauum ad manus non habebam, sed ne hunc assumere dicitur. Aluum numquam purgat, cum sit clausus vndique, nec cibo potuue vtatur.

*Samuelis
sepulchrum.*

Emau.

Die nona mensis Iulij, Missa manè audita, & prandio sumpto, monachis valediximus, & per portam Piscium egressi, arma nobis adferri curauimus, quæ apud Cadium deposueramus. Et restituta sunt quidem nobis, sed malè tractata, & acie diminuta. Quarta igitur ante Solis occasum hora, discessimus Ierosolymis, & confecta quarta miliaris parte, habuimus ad sinistram montem, in quo templi ruinæ extant, vbi Samuelis Prophetæ sepulchrum fuisse dicebatur, cuius nomen etiam hæcenus retinet. Emenso deinde magno milliari per ascensum montis, ad dextrum latus, dimidio circiter milliari ostendebatur nobis alius mons, ad cuius radices castellum Emau erat positum: quò nulla ratione peruenire potuimus propter Arabes, quorum quingenti equites eò aquatum venerant, quibus loca propter aquas & pascua mutare per familiare est. Qui Emaunta viderunt, dicunt, ab annis aliquot propter Arabum incursiones, planè desolatum esse. Vix decem ædiculæ à longè conspiciuntur. Fuerunt nobis obuij aliquot equites Æthiopes, vt apparebat, prædones: qui cum Ianissarum nostrum agnouissent, liberos nos abire permiserunt: quorum vnus cum sacculum sellæ mei equi alligatum attrectasset, & intus aliquot indusia reposita vidisset, nihil ampliùs attentans discessit.

*Vallu Tere-
binthi.
1. Reg. 7.*

Mille alijs passibus confectis, peruenimus ad vallem Terebinthi, in qua Dauid Goliath interfecit. Ea longa satis est, sed angusta. Pontem habet paruum propter aquarum decursus, quæ nullæ tunc ibi aderant. Solent tamen, vbi pluuiæ, quæ ibi sunt rariores, deciderint, aliquantulum exundare. Post transitum pontis ad dextram, est quædam Turcarum villa, dimidio ab hoc ponte milliari.

Sole

Sole iam ad occasum vergente, peruenimus ad Ecclesiam ^{Ecclesia & Monasteriū S. Ieremia.} S. Ieremiæ, quæ adiunctum quondam habebat monasterium: quod totum ferè dirutum est, ipsa alioquin satis integra. Ad iactum lapidis sub monte, est fons gelidus & copiosus: quem Christiani Arabes à beato Iob ferunt primum adinuentum, cuius etiam ædes dirutas ad manum sinistram ostendunt: qua de re iudicent Theologi, quorum nonnulli Iobum Terram sanctam negant inhabitasse. Reperimus hîc ducentos equites Arabes, qui ab illis, qui erant in Emaus, secesserant, quòd illis malè cum Turcis, villas illas incolentibus, conueniebat: quia tributum, quod Arabes, vt antèa dictum est, è villis Turcarum exigunt, dependere nolebant. Hac ipsa die interemerunt aliquot rusticos Turcas. Cùm nox immineret, coacti sumus ibidem in templo desolato quiescere. Noster Sabadinus Æthiops (qui, vt dictum est, cum Caramusano sua, ad nos deducendos aduenerat) cùm parùm fideret Arabibus, cum quodam illorum antesignano, homine corpòris proceritate & elegancia conspicuo, conuenit, vt circa nos per noctem esset in excubijs. Longos hi & mirabiles inter se tractatus habebant. Nam cùm Sabadinus aliquot ei Maydinos dedisset, ille acceptos in terram proijciebat: quos cùm è terra sublatos, iterùm Sabadinus illi ingereret, & ille plusquam decies excuteret, tandem Sabadinus vnum panem, duo oua cocta, & assatam gallinam illi adiecit: in quibus acquieuit, nisi quòd vinum quoque mirum in modum appetebat, à quo etiam si moriendum illis sit, barbari abstinere non possunt. Sed eo tunc nos ipsi non abundabamus. Sic demum ille cum viginti socijs in statione circa nos, noctem insomnem fideliter duxit.

10. Manè in ipso diluculo inde discedentes, die decima Iulij, cùm ad vnum & dimidium milliare progressi essemus, incidimus in Arabes qui camelorum multitudinem propellebant. Inter hos erat vnus, cum quo noster Æthiops

Q

ex

ex Rama, qui nobis mulos locauerat, inimicitias apertas gerebat. Itaque se inuicem adorti, sagittas hinc inde iaciebant: vnde aliquot vulnerati remanserunt: ipse quoque noster in manu sinistra vulnus retulit. Ex aduersarijs vnus per ventrem dissectus, proculdubio non superuixit. Cùm interrogarem, num percussor pœnas daturus esset, responsum fuit, nihil referre, si vulneratus moreretur. Nam occisorem, quicumque voluerit, poterit impunè è medio vicissim tollere.

*Castrum
boni latro-
nis.*

Montium altitudine superata, excepit nos perampla planities, in qua ad duorum milliarium distantiam Rama sese nobis ostentabat. Ad sinistram in monte exstant ruinæ castri, quod Castrum boni latronis vocatur: & erat patria illius latronis, qui ad dextram Christi in Cruce pendens fuit crucifixus. In ipsa verò planitie ad partem dextram prope viam publicam, est Ecclesia propemodum integra, quæ Machabæorum dicitur, quos eo loco ferunt sepultos.

*Machabæo-
rum sepul-
tura.*

RAMA.

Peruenimus deinde circa meridiem Ramam; quam Stephanus Ragusinus vult esse Arimathiam, illius Iosephi patriam, qui Saluatorem de Cruce depositum sepeliuit. Apparet fuisse quondam magnam & elegantem ciuitatem: nunc tota est diruta. Incolas habet pessimos Æthiopes, Christianorum hostes infensissimos. Diuertimus ad monasterium dirutum, in quo solent hospitium habere peregrini. Sunt hîc quatuor Capellæ, quarum vna Nicodemi, qui ad Christum noctu accedebat, & eundem cum Iosepho aromatibus conditum sepulturæ tradidit. Hic cùm postea factus esset Christi discipulus, eo in loco habitasse, & imaginem Christi crucifixi è ligno sculpsisse (quæ nunc religiosè asseruatur in Luca Italiæ ciuitate, in Ecclesia Cathedrali) memoratur: qua de re Stephanus Ragusinus in suo libro pluribus tractat. Noctû volebant nos Æthiopes adoriri, sed vbi nos vigilare animad-

*Nicodemi
manjio.*

*Crucifixi
imago Lu-
censis.*

animaduenterunt, reintentata discesserunt. Periculosus hîc peregrinis transitus.

Reperimus ibidem Ianissaros aliquot: inter quos Mahometes quidam, qui nobiscum Tripoli venerat, homo nequam & sceleratus, Præfectum accessit, illique persuadere coepit, ut nos detineret, quandoquidem non adeo pauperes essemus, ut videbamur, sed pecunia cum primis abundaremus. Et nisi Sabadinus Æthiops noster impedivisset, in magnas proculdubio difficultates incidissemus. Dedimus tamen Præfecto decem Cecchinos: qui ad priorem, quem Ierosolymis acceperamus, alterum nobis Ianissarum, securitatis causa adiunxit.

11. Manè cum discessuri in procinctu essemus, Ianissarus noster Ierosolymitanus, comitari nos ulterius renuebat, volens ut illi plus aliquid numeraremus. Nam licet in præsentia Cadij cum eo convenissemus, ut numeratis illi quatuor Cecchinis usque ad Ioppen nos deduceret, tamen ut moris est Turcarum in pactis auctorem semper facere (quod in omnibus alijs itidem sumus experti) progredi nulla ratione voluit, nisi illi pro duobus hisce miliaribus, quæ Ramam ab Ioppe diuidunt, duos Cecchinos superadderemus. Ianissarus quoque in Rama nobis additus, nisi prior ille nobiscum veniret, nos comitari omnino nolebat. Nouum itaque cum illis pactum nos inire oportebat: ea maximè de causa, quod Ianissarus ille Mahometes nequam cum alijs complicitibus, nobis in itinere manus injicere constituerat, de quo nos Sabadinus noster præmonuit. Post multas igitur concertationes, dedimus tandem illis pecuniam: quam facile profundere in partibus illis, cum primis periculosum est. Nam qui liberaliùs nummos erogat, illi Turcæ spe lucri magis insidiantur.

Peruenimus tandem Ioppen manè, itinere satis com-^{Ioppe.}
modo. Ciuitas ea in Actibus Apostolorum celebrata. ^{Act. 9.}
Nam hîc diuus Petrus discipulam Tabitham mortuam ^{& 10.}

fufcitauit; & huc, pro illo accerfendo, Cornelius centurio, Cæſareâ viros domesticos ſuos miſit. Fuit vrbs hæc olim in monte poſita; nunc tota diruta, excepta turri vnica, quam vigilæ obtinent. Ad littus maris ſunt aliquot vetuſti forniceſ, in quos diuertimus. Reperimus hîc Sabadini noſtri Caramuſanum in portu, qui anguſtus eſt, nec niſi minorum nauigiorum capax. Quamuis ventus ſecundus eſſet, non potuimus tamen hoc ipſo die ſoluere, quòd Lyddæ (de qua in Actis, quam Rama diſcedentes ad dextram conſpicebamus) illi Turcæ eſſent, qui reſ peregrinorum excutiunt, & an merces aliquas abducere velint, explorant. In craſtinum itaque nauigationem diſtulimus. Inter eâ manè duo minora nauigia appulerunt: quæ Cairo per Nilum Damiatam, Damiatâ verò huc mari delata fuerunt. In eorum altero treſ erant Itali, vnus videlicet Epiſcopus cum duobus famulis, & duo monachi Franciſcani, qui Ieroſolymam tendebant. Epiſcopus hic dignitatis nomen coram nobis celabat, quòd verebatur, ne palàm fieret, eum Ieroſolymis antea fuiſſe, & inde Ægyptum, & montem Sinai peragraſſe. Ramam iſ mulos conducebat, vbi Carauanam expectare debebat, quæ Gaza Damascum veniebat, vt Damasco Aleppum ſiue Apamæam, inde verò Conſtantinopolim terreſtri itinere perueniret. Dum reſ ſuas è nauî exponeret, ſuperuenerunt Lyddâ Turcæ reculas noſtras inſpecturi. Quoniam autem ille Ramam diſcedere feſtinabat, primùm ſarcinas Epiſcopi aperuerūt, in quibus reſ pulcherrimæ, quas Ægypto aſportarat, reſpertæ: inter quas arcula ſcriptoria ex concha gemmarum artiſcioſè laborata, habens reſpoſitoria eburnea, vaſcula è diuerſis lapidum generibus, eleganter concinnata. Hæc omnia illi Turcæ inſpectores ademerunt: cumque nulum haberet, qui illum aliqua ex parte tueretur ac defenderet, in maximo dolore rerum ablatarum verſabatur: quem cum omni auxilio deſtitutum in barbarorum regione

gione vidissem, effeci apud Ianissaros meos, vt eius defensionem susciperent: vnde factum est, vt quasi pro me, res illas à Turcis redimere mihi permissum fuerit: quas ego postea illi clam restitui: quo nomine magnas mihi egit gratias: & anatem Aegyptiam viuam, viridibus & cæruleis pennis eleganter relucentem, pedibus longioribus insistentem, mihi donauit, quam mecum Tripolim asportauit. Narrauit is mihi plurima de insignioribus Aegypti rebus, & animum ad eas lustrandas vehementer inflammauit. Perlustrabant deinde Turcæ aliam nostram suppellectilem: sed cùm præter Cruces arboris Olearum, & calculos precarios Ierosolymis abductos, nihil reperirent, permiserunt nobis vt nostra in nauim imponeremus: in quam, absque eorum permissu, aliquid inferre Christianis non licet.

Illud hîc etiam prætermittendum non est, Pontifices Maximos huic loco Ioppe singulare quoddam Indulgentiarum priuilegium concessisse. Nam qui peregrinus huc appulerit, (prout rectà Cyprio, & ex alijs Christianorum locis, multi adnauigant, sicut & nos, vt antè dictum, facere constitueramus) etiamsi vltiora Terræ sanctæ loca non visitauerit, littus attingens, easdem Indulgentias consequitur, quas eadem personaliter accedentes adipisci solent. Id autem ea de causâ concessum est, quòd propter bella, Arabum latrocinia, pestem, morbos, paupertatem, multi ex peregrinis inde vltèriùs progredi non possunt.

Rebus in Caramusanum illatis, ventus validissimus confurrexit, medius inter Occidentem, Septentrioni tamen propior, quem Itali *Maestro Tramontana* appellant. Expectauimus igitur, ne portu egressos, ad promontorium impelleret, Ioppe vicinum, vltra quod Cæsarea posita est, de qua sæpiùs in Actis Apostolorum fit mentio: vbi Cornelius centurio à S. Petro fuit baptizatus, & quò san-

In Ioppe peregrinus Indulgentia attributa.

Act. 10.

Act. 25. & 27. Etus Paulus sæpiùs accedebat, ibique in carcerem conie-
 ctus erat, vnde etiam ad martyrium Romam profecturus,
 nauem conscendit. Sub vesperam ventus subsedit: & nos
 in littore genuflexi, Oratione Dominica & Salutatione
 Angelica recitata, Deo gratias egimus, quòd pro immensa
 sua misericordia, nobis illa sancta loca videre concesserit,
 quæ sanctissimi pedes illius calcauerunt, quando salutem
 nostram operabatur; quodque in omnibus periculis,
 ira nobis præsens adstiterit, & vt pupillam oculi sui custo-
 diuerit, vt ne capillus quidem capitis nobis deperiret. Post
 oscula igitur Terræ sanctæ data, post occasum Solis Cara-
 musanum conscendimus, qua duobus nauigijs minoribus
 è portu extracta, anchoræ iactæ sunt, propter ventum (qui
 crepusculo noctis, diebus hisce flare solebat) ne nos ad an-
 gulum scopuli, qui longiùs in mare excurrit, allideret. Iac-
 tati sumus in anchoris hinc inde ad duas horas. Affluit
 postea prosperior ventus; quo annuente vela dedimus, &
 ante mediam noctem promontorium illud præteruecti
 sumus. Huic Caurus, qui *Maestro* Italicè appellatur, ven-
 tus nobis percommodus, successit; quo spirante, Cæsaream
 noctu præterijmus. Diluculo autem promontorium Carmeli,
 quod à Ioppe viginti circiter milliaribus distat, conspeximus.
 Postea vento quidem minùs vehemementi, secundo tamen,
 interdiu ferebamur. Sub vesperam Sidonem ciuitatem in
 longum extensam, ipso verò crepusculo præteriuimus
 Tyrum: quæ ciuitas quasi in insula circulari forma sita
 videtur, & erat antea, Plinio teste, præalto mari septingentis
 passibus diuisa: sed Alexander Magnus cum eam oppugnaret,
 lapidibus iniectis, vt continenti iungeretur effecit: qua de re
 Iosephus scribit. Nocte insequente vento quoque fauorabili
 vsi, vltra Berytum, quod decimo à Tripoli milliariorum
 distat, delati, cum ventus etiam intensior aspiraret,
 spatio trium horarum, manè Tripolim Syriæ secundò
 peruenimus, easdem illas oras sub

Cæsarea.

Sidon &
Tyrum.Lib. 5.
cap. 19.Antiq. lib.
11. cap. 8.Tripolim se-
cunda vice.

sub monte Carmelo & Libano positas præteruecti, quas antea ex Ioppe tempestate iactati legebamur: quo tempore intra decem octo horas sexaginta milliaria confeceramus; nunc idem spatium vento prospero per duas noctes, & sesquidiem, vix emensi sumus. Reperimus Tripoli nostram illam Venetam nauem, quam in Cypro reliqueramus, cum aliis pluribus, quæ nuper appulerant Venetiis, & ex Lithuania mihi literas attulerant: qua re factum est, quandoquidem antea Tripoli cum essem, plures notos habebam, ut post tot pericula & labores superatos, quasi domesticam quamdam quietem mihi viderer affecutus.

Nam cum vndecima Iunij Tripoli discessissemus, usque ad quartamdecimam Iulij diem, in vili tantum sago, quod etiam pallioli usum peregrinis præbet, cubare nos fuit necesse, præterquam quod Ierosolymis crassiores culcitrae monachi nobis suppeditabant. Erant & dura peregrinorum lectisternia, quibus utcumque vsi sumus.

Cum in littus descendentes, versus ciuitatem ad læuam pergeremus, vidimus in campo * Dzaffer Bassam tentoria fixisse, cui ad tempus gubernacula Syriæ fuerunt commissa: qui ideò sub tabernaculis agebat, iuxta consuetudinem receptam, quod nondum confirmationem administrationis huius acceperat: quem etiam in Aegyptum proficiscens ibidem hærentem reliqui. Habebat aliquot equitum centena, è quibus maior pars, pantherarum exuvias brachijs appensas gerebat. Ingressi deinde ciuitatem, ad Caruaferiam seu contubernium Venetorum diuertimus, ubi à notis humanissimè salutati & excepti sumus.

Casus hic miserabilis accidit, quem referre operæpretium duxi. Presbyter quidam, Antonius Siculus de Panormo, qui oppidi cuiusdam in diœcesi Mediolanensi parochus fuisse dicebatur, naui Veneta, quam Faleram vocabant, Tripolim peruenit: qui cum ad monachos Franciscanos, quod & alij peregrini faciunt, diuertisset, manè

die

* Dzaffer hic Bassa, ille est, cui Osmanus Bassa, cum ann. 1585. in Perside ciuitatem Tauris, olim Ecbatanis, occupasset, gubernationem Arcis quam in præsidium exædificarat, cōcediderat, iusto exercitu attributo. Ipse vero deinde discedens paulò post dysenterie morbo correptus interijt.

Antonius Panormitanus Presbyter Siculus fuit Turca.

die Sabbati Missam celebrauit, qua finita statim Guardia-
 num loci adiit, eidemque aperuit, quòd dum Missam de
 sancto Spiritu celebraret, inspirationem habuit, vt reiecta
 fide Christiana Mahomerismum amplecteretur. Guardia-
 nus cùm hæc audiens obstupuisset, adhortari eum cœpit,
 vt Deum præ oculis haberet, cuius Sacerdos & minister
 esset. Ille verò egressus, reperit apud portam interpretem;
 quem, antequam ad altare accederet, per famulum accer-
 siuerat. Ex eadem illa domo (prout nobis famulus idem
 retulit, qui interpretem, causam ignorans cur vocaretur,
 adduxerat) ad Cadium se contulit, vbi mercatores ali-
 quot Italos negotia sua tractantes reperit. Huic renuntia-
 ri per interpretem fecit, quòd Sacerdos Christianus esset,
 cumque hodie Missam de Spiritu sancto perageret, ab illo
 inspiratus esset, vt religionem Turcicam suscipere. Ca-
 dius quæsiuit ab eo, num ebrius esset, & an benè quid
 acturus esset, deliberauerit. Respondit, se non comedisse
 quidem, & benè deliberatum, negotium hoc aggredi. Ius-
 sit igitur Cadius cidarim Turcicam adferri, quam capiti
 illius imposuit: quod cùm fieret, apostata flere cœpit, &
 quid in corde tunc habuerit, Deus nouit. Manè die Do-
 minico decima septima Iulij, cum pompa & triumpho (vt
 moris est, cùm Christianus Turca fit) per ciuitatem cir-
 cumducebatur. Præferebantur illi duo viridia Mahome-
 tis vexilla; in quorum summitate, loco cuspidum, caudæ
 equorum marinorum dependebant. Centum Ianissari sti-
 patores latus vtrumque claudebant, bombardis, buccinis,
 & tympanis concrepantes. Ducebatur autem per plateam
 nostram, vt infelicis illius triumphum hunc miserabilem
 spectaremus. Sed nos ex industria fenestras clausimus, per
 tabularum tamen rimas, omnia quæ fiebant, facile obser-
 uabamus. Homo erat iuuenis, triginta circiter annos æta-
 tis habens, pilo nigro. Fusci coloris equo, sessor ineptus,
 vehabatur; non frænum, sed caput sellæ manu leua apprehendens.

*Turcismum
 Christiani
 amplectentis
 pompa.*

hendens. Duo Ianissari equum ducebant. Veste talari Turcica, ex rubeo Damasceno serico, amictus, iaculum in uersum dextra manu gerebat. Sic plateas ciuitatis, more triumphantis, obequitabat. Ad extremum inter macella, in quodam ergastulo circumcisionem suscepit. Neque enim Turcæ tanta solennitate, quemadmodum Iudæi, in actu circumcisionis vtuntur: sed plerumque in macellis hanc peragunt cærimoniam, quæ miserum illum ad eò male tractauit, vt iam mortuus renuntiaretur. Compertum fuit, hominem hunc, ob facinus quoddam in Parochia perpetratum, à Carolo Cardinali Borromæo, castigari debuisse: quod vt ne fieret, Venetias primùm, deinde conscensa naui in Syriam profugisse. Narrauit postea nobis Iudæus interpres noster, se eum in stabulo Cadij vidisse. Nam statim, peracta cærimonia, vestibis pretiosis exuitur neophytus: deinde contribuitur ei aliquid à Turcis (prout huic quadraginta Cecchini tantum dati fuerunt) cuius dimidiam partem Ianissaris & Muscis, qui cum comitati sunt, dare tenetur. Deinde in stabulum mittitur. Postremò stipendium aliquod illi attribuitur. Quærebat is ex Iudæo, Quid, inquit, de me Christiani loquuntur. Respondit is, mirari eos vehementer. Ad hæc ille: Magis, inquit, ego miror quid mecum agatur (nondum enim ex vulnere conualuerat:) sed me tamen illud consolatur, quòd fratrem Constantinopoli, itidem Turcam factum, habeam: ad hunc me conferam, cum quo bona & mala perferre mihi est constitutum.

*Turca in
macello cir-
cumcidum-
tur.*

18. Totis diebus his quibus Tripoli mansi, quæ intra &
19. extra ciuitatem digna visu occurrebant, diligenter perlu-
20. strabam. Ciuitas domos elegantes habet & balnea. Sub-
21. urbia fontibus, hortis, & pomarijs, omni genere fructuum
22. plenis, abundant: moris itidem arboribus, in quibus ver-
23. miculi sericum emittentes nutriuntur: vnde Æthiopes
24. & Syri mercatores ingentes acquirunt diuitias, magnam

R. serici

*Glares Pha-
raonis Tri-
poli.*

serici copiam per Europam vniuersam spargendo. In pomarijs eiusmodi, ingens est glirium multitudo, quos Pharaonis appellant, præsertim in villis: qui maximum damnum, gallos gallinaceos & anseres subinde consumendo, colonis inferunt. Ad vnum & dimidium milliare à ciuitate profectus ad ortum Solis, inspexi Moschèam quamdam ad littus maris positam, quæ dulcis aquæ piscinam ingentem, è muro constructam, habet adiunctam, in qua maxima vis diuersi generis piscium asseruatur. Hic superstitione inualuit, eos pisces esse sanctificatos, ob idque capi eos, sub pœna capitis, interdictum: nisi quòd (si rectè memini) semel vel bis in anno Turcarum sacrificuli, paucos aliquos capere, illisque vesci possunt. Præbetur illis alimentum semper; & quædam superstitionum nugæ per vanos homines exercentur.

*Pisces sanctificati non
comestibiles.*

Est ibidem iuxta mare turris ex lapide quadrato altissima, cum insignibus Nobilis cuiusdam Veneti, qui, quòd cum muliere Æthiopissa cõcubisset (quod facinus Christianis ibi capitale est) non absque maxima difficultate, vitam eiusinodi substructione redemit. Interea naus Caramufana appulit, & cum ea Polona mulier Siekierzecka, cui apud quemdam mercatorem vxoratum, hospitium conduci iussi: quæ cùm domo in publicum prodire non permetteretur, è fenestra in Turcas prætereuntes, quorum etiam nonnullos tetigit, lapides iacere cœpit. Vnde parùm abfuit, quin hospes in magnas difficultates incideret, quòd ex eius ædibus Turcæ lapidibus fuissent impetiti. Quamobrem petiuit eam inde amoueri: & quoniam extra custodiam erat, domo statim profugit, nec nisi post triduum, non absque labore, reperta fuit apud Ecclesiam sancti Iacobi, quæ licet Græcorum sit propria, Catholici tamen in ea quoque deuotionem peragere solent. Distat vno & dimidio milliari à ciuitate Tripolitana. Curaui deinde locum in naui pro ea conduci, in qua res meæ Venetias

tias deportabantur. Vbi valdè anxia, quòd Terram sanctam visura non ampliùs esset, ter è naui in mare prosiliit, vnde vix, ne præfocaretur, est erepta. Custodia deinde diligenter illi adhibita fuit.

25. Venit Tripolim cum quingentis equitibus, totidem-^{Emir Mahometes Syria Phœnicis Regulus.} que peditibus bombardarijs, Emir Mahomet, potentissimus Syriæ Phœnicis Regulus, Aethiops albus, filius Menzur Condan Emir, qui erat Sangiacus Lystris & in Derben, quarum ciuitatum fit mentio in Actis cap. 16. Emir hic quamuis Mahometanus, corporis tamen stipatores habuit Christianos (nempe Gallos illos, quorum superiùs meminimus, qui Drusiani appellantur, & sunt reliquiæ illorum, qui Terram sanctam è manibus infidelium recuperauerant: sed longè à maiorum suorum virtute declinauerunt) annos viginti habens, vultu præpingui, & aspectu terribilis. Est autem is idem, cuius antè mentionem fecimus, à quo sibi Turcæ valdè metuebant, ne cum Aborys famosissimo Arabum prædone vires suas coniungeret. Hunc Turcarum Cæsar maximo odio prosequabatur, hanc potissimùm ob causam. Quidam Sangiacus literas ab Imperatore obtinuerat, vt pater huius Emiri, administratione dictarum ciuitatum, & portorio Tripolis illi cederet: quod summa cum Emiri iniuria coniunctum videbatur; quandoquidem ille, ratione officij & vectigalis huiusmodi, ingentem pecuniæ summam Cæsari numerauerat, vt quasi iure acquisito, dignitates prædictæ, penes familiam & heredes illius perpetuò remanerent. His non obstantibus, quòd Emir usque senio confectus esset, officijs & dignitate per Sangiacum nouum exutusest, ac paulò post mortuus. Filius rei indignitate permotus, iuuenis ferox, decem octo annos vixdum natus, collectis octo millibus sagittariorum, venit Lystram, Sangiacum patris expulso rem, cum magno Turcarum numero interfecit: Lystram, Derben, & portorium Tripolis occupauit.

Hoc nomine cùm dies ei à Cæsare fuisset dicta, non comparuit. Iussus ad expeditionem Persicam proficisci, neglexit, & collecta duodècim millium manu, rei exitum sic expectabat. Et mille quidem milites Tripolim secum adduxit; tria millia in arce sua, duobus à Tripoli milliari-
 bus, collocauit, in alio verò munitissimo præsidio, Gazir dicto, quod nauigantes in altissimo monte positum, non procul à Beryto, à longè conspeximus, quatuor vel quinque millia in promptu habuit. Hæc autem omnia ideò comparauerat, quòd sibi à Dzaffer Bassa, qui erat Tripoli, non mediocriter metueret. Insequenti tamen die, matutino tempore, mille præsidariis stipatus, venit salutatum eundem Bassam, qui tum recreationis causâ extra castra processerat. Eorum congressum vt viderem, in campum excurri. Cùm Bassa cum quadringentis equitibus reuerteretur, serico rubeo auro intertexto indutus, equo fusco aliquantùm albicanti insidens, Emir cum suorum ala ad partem consistens, mutuam capitis inclinatione salutem dedit & recepit. Deinde Bassa ad tentorium perueniens, equo descendit, militibus ad vnam tentorij partem consistentibus. Emir verò, violaceo serico Damasceno amictus, ex equo fusci coloris, prope ipsum tabernaculum descendit, equitibus ex aduersa parte in longum exporrectis. Pedites plures & expeditiores quàm ipse Bassa habuit. Colloquium ad vnam horam inter eos habitum. Bassa percunctante cur aduersaretur Imperatori, rationem innocentiae suæ reddere pluribus verbis conabatur. Sic discessum est postea. Emiro Czaussius Turcicus semper latus dextrum claudebat, quod partibus in illis pro loco inferiori habetur. Czaussius autem hic vectigalis Tripolitani exigendi curam habebat, cuius pars Cæsari debebatur. Emir duos uxores habuit, cum neutra benè conueniens, homo planè barbarus & vitæ profligatissimæ. A Bassa digressus, certamen suorum, Mauris vñsitum, iaculis

*Emiri cum
 Bassa Dzaffer
 congressus.*

lis hinc inde iaciendis habuit, in quo agilis & optimi seſſoris officio, vt apparebat, perfungebatur. Familiares eius magnam conſuetudinem habebant cum Franciſco Teſta-roſſa, qui Venetorum Agentis, vt vocant, munus ibidem ſuſtinebat: & quoniam mercium curam gerebat, Emiro vectigal obtinente, inde ſatis arcta illis familiaritas inerat. Ego quòd in contubernio Venetorum, cui dictus Franciſcus præerat, hoſpitium habebam, vbi frequenter Emiri familiares accedebant, inde didici, quæ & qualia cum Baſſa colloquia habuerit; Chriſtianis enim ad tabernaculum Baſſæ propiùs accedere neſas. In campo redeuntem Emirum præſtolabamur: cuius domeſtici quodam tempore nos in ædes eius introduxerunt, vbi in eius præſentia, ad luminaria Mauri, turpes & inconditos quosdam ſaltus nudato ferè corpore edebant, quos noſtri circulatores longè decentiùs peragere ſolent. Aderat ibidem & Turca quidam ſchœnobates, qui per funem extentum incedebat, (quod apud Turcas non inuſitatum) & hæc ſimiliaque ſpectacula per triduum proponebat in domo Emir; qui lauta conuiuia non ſolùm Mauritanorum primoribus, ſed Turcis etiam iſſis maximo ſumptu & ſplendore exhibebat: quæ res Baſſam malè cumprimis habuit: & vulgò Tripoli ferebatur, Baſſam Imbraimum Ægypti Proregem, mandata à Turcarum Cæſare habuiſſe, vt inde diſcedens, Tripolim ad opprimendum Emirum copias conuerteret, ob eius potentiam valdè Turcis ſuſpectam. Illud quoque paſſim nuntiabatur, Emirum, ſi cauſſam ſuam iure tueri non poſſet, vel interiturum, vel armis aſſumptis, vltima quæque tentandi neceſſitate adactum, quòd non obſcurè præ ſe ferre videbatur, ſeſe ab oppreſſione vindicaturum: quandoquidem & munitiones egregias haberet, & à patre patrimonium ampliſſimum relictum poſſideret. Perſis quidem cladem Turcis inferentibus, mirificè fauebat: vix tamen ludi cum Cæſare Tur-

134 IEROSOLYMITANA PEREGRINATIO
carum inchoati felicem catastrophem illum habiturum
multa augurabantur. Ipse dubiam belli aleam perpendens,
amplissimis donarijs præparatis, Imbraimi Bassæ animum
modis omnibus sibi conciliare contendebat.

*Nundina
Tripolitana.*

Erant eodem tempore Tripoli nundinæ quædam, Tur-
carum & Mauritanorum frequentia celebratæ: in quibus
partim exercitationes saltuum, nullius ferè momenti, pro-
miscuè fiebant; partim etiam fructus varij, quorum ibi in-
gens copia, pretio distrahebantur.

*Drusianorū
religio.*

Io. Tho-
mas in Hi-
storia belli
Pessicil. 7.
narrat, Im-
braimum
Bassam,
cùm Cairo
è guber-
natione
sua reuer-
teretur,
mirabili
arte quol-
dam è pri-
moribus è
medio sus-
tulisse,
nonnullos
captiuos
abduxisse,
regionem
illorū de-
vastasse, &
ingentem
Drusiano-
rum nu-
merū per
fraudem
trucidasse.

Cùm non infrequens hîc mentio fiat Drusianorum,
de quibus plura tradunt Historici, illud nihilominus ad-
ijciendum putavi; etiamsi Christiani sint, dissolutam ta-
men & paganis magis conuenientem vitam ducunt: quo-
rum religio ferè non alia re differt à Turcica, nisi quòd
circumcisionem non adhibent. Habent suum particula-
rem Prophetam, Isman dictum, qui dempta circumcisio-
ne, aliam, quod etiam Mahometes fecit, magis licentio-
sam & turpem superstitionem condidit, & pro religione
seruandam introduxit. Multi ex ijs Tripolim & Dama-
scum sæpiùs accurrebāt, qui Scotorum nostratium more,
in vimineis cistellis reculas venales exponentium, per vi-
cos oberrabant, coriaceam quamdam cistam collo appen-
sam deferentes: in qua vnum aut alterum stanneum scy-
phum, lagunculas coriaceas aqua frigida plenas, duos vel
tres pectines, setaceam scopam purgandis vestibus aptam,
& speculum repositum habent. Horum aliqui in Galilæa,
vbi nos obuios habebant, potum nobis subitò ministra-
bant. Et quoniam Turcæ caput radunt, & barbam nu-
triunt, hanc illi pectere solent; nobis verò qui capitis &
barbæ pilos depresso habebamus, pectinem non offere-
bant, nisi si fortè quis caput pectere vellet; sed oblato spe-
culo, vt in id diligentius introspiceremus efflagitabant.

*Eleëmofyna
Drusiano-
rum.*

Hanc potus, pectinis, & speculi exhibitionem, pro largi-
tione eleëmofynæ reputant: quam promiscuè, non minus

Tur-

Turcis quàm Christianis, etiam non postulantibus, vltro obtrudunt. Quærebam ex illis: cùm aquæ potus sitim extinguat, eleëmofynæ loco præberi possit; speculi exhibitio, quam ratione eleëmofynæ conueniat? Non habebant ad hæc quid responderent. Vnus tamen, cùm Tripolim Ierosolymis rediissemus, qui Mithridaticum apud Ægyptium quemdam Cairi conficiebat, nobis retulit, quòd hunc exhibendi speculi morem ab Ægyptijs acceperunt: qui in conuiujs, symposijs, recreationibus, ceterisque occasionibus, quibus victus opulentia, cultus corporis, & formæ elegantia maximè procurabatur, exhortationes ad extremum faciebant, vt homines, se mortales esse, vellent recordari. Nunc etiam antiquiores & prudentiores Ægyptij, sceleta, seu ossium humanorum compages, naturaliter, aut etiam arte ex ligno vel ebore paratas, vnius & medijs cubiti longitudine circumferunt, mutuoque ostendentes, vltimi finis inuicem admonent, qui morte superueniente, formæ elegantiam in horrorem conuertit. Cùm siti, inquit, laboras, haustu aquæ refocillaris: cùm barbam pectine demulces, ornaris: (quamquam apud Turcas rarior pectinis vsus) cùm speculum inspicias, formam tuam contemplaris, tibi que ipsi fortasse complacebis. Interea statim in mentem tibi veniet, morte hæc omnia commutatum iri, quæ res te humiliorem reddet. Bona satis consideratio, apud barbaros præsertim, & digna, quam & Christiani nostrates præ oculis semper habeant. Sed ad nostra redeamus.

Ægyptiorum sceleta in symposijs exhibitæ.

Cùm Apamæam, vulgò Aleppum, propter Aborys, qui Carauanas, vt iam dictum est, infestabat, proficisci non possem; nec etiam inde propter exercitus Turcicos, ex Europa in Persiam commeantes, iter tutum Constantinopolim esset; naues prætereà Venetæ, & quæ ad oras Christianorum dirigebantur, nondum essent oneratæ; cumque diligentius de me, quis essem, inquireretur (quam rem

*Navigatio
auctoris in
Ægyptū.*

rem nonnulli ex Iudæis diuulgauerant) quod maximè cupiebam, Ægyptum perlustrare constitui. Quamobrem nauigium, Dzerma dictum, mihi cōduxī. Id ad nauigationis celeritatem plurimū confert, sed tempestate superueniente, facile fluctibus obruitur: quandoquidem tabulatum, vt naues onerariæ vel Caramufani, non habet; sed apertum vndique, iniurijs cæli & maris est expositum. Die itaque 26. Iulij prandio sumpto, accessi ad Cadium, oblatoque honorario, petiui ab illo, vt mihi Ianissarum securitatis causa adiungeret; quod etiam fecit, deditque mihi egregium quemdam, Achmeten nomine, qui linguam Sclauonicam callebat, & fideliter se mihi seruiturum promisit. Postea nauigationem apparabamus: & rebus meis dispositis, & in nauim Venetam, quæ nos aduexerat, illatis, cubiculo in ea conducto, vnum famulum ibidem reliqui, qui eas custodiret, & in Italiam deportaret: cui etiam P. Laurentium Pacificum cum socio adiunxi: reliquos qui Ierosolymis vnà fuerant, mecum adduxi.

Dederam ad te priores ex Salinis literas, nunc alteras, & quidem satis prolixas, ad te mitto. Neque enim vt facile potes animaduertere, tempus & occasionem scribendi habere potui, præterquam hîc Tripoli, vnde iam in Ægyptum propero. Vale. Datum Tripoli Syriæ xxi x. Iulij, anno Domini M. D. LXXXIII.

EPISTOLA TERTIA.

ARGVMENTVM.

NVNTIAT se venisse in Ægyptum, & prolixè de illa tractat. Quæ Nilī natura, ortus, aquatilia, piscandi ratio, quomodo, & quo anni tempore Ægyptum irriget, qua solennitate inundatio fluij accipiat, narrat. De incolis docet sub aquis eos diu latere, Dzermas (ita vocatur nauigium quoddam velocissimum) sæpè euertere, mercatores vita & rebus spoliare. De Cairo antiqua & noua multa: quæ illarum amplitudo, qui numerus domorum, Moschearum, platearū, culi-

culinarum publicarum: ciues vt uiuant, quàm opulenti, quanta inter illos Iudæorum multitudo, aqua quo pretio uenales, quæ hortorum fertilitas, calî temperies, conseminationis & messis tempora. Hinc de structura & numero Pyramidum, villarum Egypti copia, arce Cairi, palatio Iosephi Patriarchæ, puteo quæ eiusdem magnifico, Santonum turpitudine, seminarum amictu, antiquorum Egyptiorum sepulchris, de quæ cadauerum arte medicatorum incorruptione, ex quibus Mumia fit, & alijs rebus varijs à se cognitis, differit. Pratercâ Alexandriam à situ, ædificijs, mercatura, portu singulari, carcere & martyrio S. Catharinæ, commendat. Adijcit nonnulla de Dromedarijs, & Arabia deserta. Tandem concludit Epistolam narratione grauissimi periculi in mari Mediterraneo, dum Alexandria rediret in Cretam: ubi apparitiones varias, Mumia proiectionem in mare, prorsusque stupendam erga se Dei gratiam commemorat. Habet hæc Epistola quo recreet atque erudiat Lectorem.

POST literas superiores ad te datas, die 30. Iulij, hora 23. discessi Tripoli, scapha ad naues onerarias, longiùs à ciuitate distantes, uelut, vt nonnullas res quæ vsui pro Ægyptio itinere futuræ erant, inde asportarem: quòd cùm peruenissemus, adeò validus insurrexit ventus, vt scapha ad Dzermam progredi non valente, ibidem noctem ducere coactus fuerim. Cessante deinde Septentrionali vento, & rebus necessarijs assumptis, ad Dzermam perueni, quâ in ipso diluculo conscendimus: & quoniam multos in ea reperi, qui conscendere non debebant, quandoquidem pro me tantùm nauigium hoc conduxeram, quod propter ventorum periculum onerari multùm non potuit, nauclerus Arabs eos abegit; atque ita iam lucente die, Dzermam in altum mare perticis longioribus protrusit: quo tempore à latere ventus validior inter Occidentalem & Septentrionalem medius, Italicè *Ponente Maestro*, consurrexit: cumque aliter non possemus, cursum versus Cyprum direximus; & intra sex horarum spatium, nullam ampliùs continentem vidimus. Acceperam mecum Tripoli Maurum, Faietan nomine, pro interprete: & Ianissarum quoque vnum conduxeram. Erasmus

in naui circiter quadraginta. Dies hæc grauis nobis inprimis fuit, & propter ventum validiorem, & propter rudentes, qui ex cortice arboris dactylorum contorti, & aqua marina aspersi, foetorem reddebant intolerabilem: vnde hac & insequenti die, quilibet nostrum, strophium acetum madefactum naribus perpetuò, etiam inter dormiendum, admouere necesse habuit. Ventus hic tota nocte, & manè superuenientis diei perseverauit.

A V G V S T V S.

Cyprum secundæ vice.

Die prima Augusti, manè conspeximus Cyprum, circa meridiem verò præternauigauimus Famaugustam: quam tamen propter maiorem distantiam, exactè non potuimus contemplari. Ad vespèram, cessante vento, prope littus constitimus, vbi paululùm euagati, nauim repetiuimus. Quoniam autem in hac insula, æstate & hieme, noctu semper à terra ventus nauigia propellit, hac ipsa nocte nauigando longè progressi sumus, & Larnicam appulimus; quo in loco sal, vt antea dictum est, colligitur. Sed quoniam in terrâ descēdere minùs tutum videbatur, propter Cadium, qui Maslochus erat, & propter Græcos Mahometismum professos, qui priùs etiam dum eò venissemus, nobis negotium facecebant, mansimus in nostra naui Dzerma, & nocte, vento leni flante, sensim nauigationem continuabamus. Manè verò circa meridiem substitimus in littorē ad quamdam Græcorum Ecclesiā, planè desolatam; vbi ad noctem vsque mansimus, cœnamque ibidem sumpsimus. Nocte deinde Dzerma conscensā, vento propitio ferebamur, & manè circa Solis ortum Lemissum peruenimus; vbi quòd locus securior esset, & multos mercatores Italos notos haberemus, in terram descendentes, diem integram ibidem posuimus, quandoquidem nullus nobis aspiraret ventus. Intercā manè, antequam nos eò adnauigassemus, appulit nauis Caramusana,

cum

cum viginti peregrinis Ierosolymani contendentibus, qui triduo antè Tripoli discesserant: quorum nonnulli cùm ad nos descendissent, cibum vnà sumpsimus. Aderat ibi quoque & Simon Albimontanus Sacerdos Polonus, de quo suo loco dicetur inferiùs. Post occasum nauem conscensuri perreximus. Et quoniam id in Cypro maximè cauetur, ne quis incolarum ab insula discedat, ea de causa ipsemet Vicebassa in littore præfens aderat. Inde Caramufanus cum peregrinis versus Ioppen soluit; nos verò littus legebamus, vsque ad Felis promontorium, quod Itali *Capo delle Gatte* appellant. Illud hìc non prætermittendum: cùm Caramufanus, circa noctis horam primam loco mouisset, & nos eodem vento, nostra Dzerma littus raderemus, noster nauclerus cum quodam socio suo in contentionem deueniens, vltèriùs progredi noluit. Itaque Ianissaro meo iniunxi, moneret nauarchum, ne tempus frustra tereret: quod cùm ille faceret, & nauta nihilominùs nauem propellere recusaret, ad verba deuentum est, in quibus Ianissarus pugnum illi in caput tam fortiter impexit, vt tiara illius in terram delaberetur, inde securi arrepta, vix certantes ab inuicem auellere potuimus. Nauta se videns inferiorem (magna enim isthic Ianissari gaudent libertate) vela fecit. Sed cùm animaduertissem, vtrunque illos hostilia meditari, ne contentio recrudesceret, pacem inter eos conciliare sum aggressus: à qua cùm vterque initio vehementer abhorreret, tandem circa noctis medium vix inuicem sunt reconciliati. Res erat visu periucunda, cùm vterque more suo imprecationes faceret, quèd ex toto corde, offensas alteri condonarit. Mira fuit vultus & frontis mutatio, antequam in gratiam redirent.

Antequam Cypro discessissem, illud obseruaui, magnam hìc vini lini gossipini vel xylini (vulgò bombycem vocant) passim conseminari: vnde ingentes annui redditus proueniunt. Siquidem naues nullas alias merces, præ-

*Simon Albimontanus
Presbyter
Polonus.*

*Cyprus lini
gossipini se-
tax.*

ter sal, de quo antea mentionem fecimus, & gossipium hinc auerunt: ut & illa Tornelliana, qua primò huc delatus appuleram, arena eiecta, per totum fundum gossipio onerata fuit: atque ita Tripolim profecta, partim panno purpureo (scarlatum vocant) diuendito, partim allata pecunia, sericeas, aliasque vltamarinas merces coemptas, auexit. De ratione porro conseminandi & colligendi gossipij, quandoquidem nonnulli scripsere, ego supersedeo: illud tamen adiungo, cum semel seminatum fuerit, in tertium usque annum fructus producit, in quorum collectione, ubi sementis grana, quæ sunt grauiora, in terram deciderint, absque alia cultura fructus emittunt, minore tamen & sensim decrescente, per annos sequentes, abundantia: donec quarto demum anno seminatio noua reintegretur. Annotandum & hoc obiter, quod Cyprus alba vina non producit; ut modo contrario, nec Ierosolyma fert rubea. Quod si quando in Cypro alba, Ierosolymis verò rubra prouenerint, id perquam exiguum est: & vix ad comedendum dumtaxat, non autem ad exprimendum sunt apta. Rubea tamen Cypria, & alba vina Ierosolymitana bona sunt, nisi quod adeò styptica, ut etiam si aqua diluantur, propter astringendi vim, gutturi minus gratam præstent potionem: rubra dulciora, sed vehementiora sunt. Et quoniam in Cypro cellaria non habentur, adseruari ad futuram usque vindemiam non possent (alba, præ rubeis, naturâ suâ facilius & diutius conseruantur) nisi arte subueniatur. Quamobrem vasa, antequam mustum infundatur, gummi cuiusdam specie, quæ picem redolet, suffumigantur: vnde fit, ut odorem picis ingratum vina eiusmodi perpetuò retineant: quem tamen incolæ multum capiti prodesse affirmant, quod eo vini grauitatem retundi, illudque in suo vigore extra mutationem conseruari, persuasum habeant. Mihi quidem & meis, vina hæc graueolentia videbantur: odoremque illum tam acutum,

acutum, magis obesse quàm prodesse capiti, crediderim. Vux Rhodiæ, quod antea innui, maiores & sapidiores sunt. An autem vina eisdem suffitus gummatos habeant, ignoro: cùm ea non degustauerim. Fructuum omnis generis Cyprus habet copiam. Melones nullibi maiores me vidisse recordor: ut in longum, ad tres ferè cubiti quadrantes excreuisse videantur. Sunt autem optimi & delicati saporis.

5. Diem totam consumpsimus nauigantes versus dictum Promontorium *Capo delle Gatte*; ventum hinc inde captado, quod nauigio huic *Dzermæ* perquàm familiare est, & celeritati eius ita percommodum, ut vel aduerso vento, ^{*Dzermæ nauigij commoditas.*} non planè directè tamen, uti possit, nisi quòd turbine ingruente, euerfionis periculo valdè sit obnoxium. Circa Solis occasum, Promontorium hoc præteriuimus; hora verò noctis secunda, rectà in Ægyptum, Damiatam versus vela direximus, quæ ab inde octuaginta circiter miliaribus distat.

6. Manè vix Cyprum videre, meridiè verò ne vix quidem licuit intueri. Die hac & nocte ventum habuimus proprium. Postridie post exortum Solis, superuenit malacia, siue omnimoda venti cessatio, ita ut necessariò naus consistere debuerit. A meridiè ventus inter Occasum & Septentrionem flare cœpit, qui diem & noctem insequentem durauit.

8. Die octaua Augusti, circa meridiem credebamus nos Ægyptum aspecturos, sed longior tamen fuit à continente distantia. Duabus deinde horis post, ventus vehementior, nobis percommodus confurrexit: itaque hora circiter decimanona terram à longè vidimus: aqua etiam marina turbida videbatur, ex Nili influxu; quem fluuium tur- ^{*Ægypti.*} bidum, qui irrigat Ægyptum, diuina Scriptura appellat. ^{*Ios. 13.*}

Hora circiter vigesima secunda ingressi sumus Ostia ^{*Nili.*} *Ostia.* Nili (id extremum est fluuij ab ortu Solis brachium) ad si-

*Damiata
propugna-
culum.
Damiatā
olim Ca-
phor di-
ctam tra-
dit Benia-
min; sed
quæ ety-
mologia,
non expli-
cat.*

nistrā maris & fluminis habentes insigne quadrilate-
rum propugnaculum Damiatæ, turribus excelsis, & mu-
ro ex lapide quadrato egregiè munitum: quod ducento-
rum militum præsidio antea tenebatur, tunc verò propter
bellum Persicum, vix viginti præsidiarios habebat. In in-
gressu Nili, ad dextram vidimus in mari aliquot naues
non adeò magnas. Nec enim maiores huc appellere pos-
sunt, cum nullus sit portus, sed statio quædam ad tempus,
dum exoncratis illis, in fluuium securitatis causa attra-
hantur. Erant sub ipsa ciuitate tres naues Caramusanæ,
id est minores, prout reuera sunt dictæ.

*Ciconia
Nili.*

In Nilo nauigantes, ad ripas ingentem vim ciconiarum
vidimus, quæ ex nostris partibus eò conuolant, sub hoc
ipsum tempus anni, nempe mense Augusto; quo Nilus
exundat, & recedens, passim per campos, ex putrefractio-
ne maximam serpentum copiam ad earum victum re-

*Anates viri-
des.*

linquit. Anatum viridium & punicearum, pedibus ob-
longis insistentium, quarum vnā Episcopus ille in Iop-
pe, vt diximus, mihi donauerat, maximus itidem ad ripas
numerus. Ad læuam, horti plurimi, fructuum feracissi-
mi, præsertim Orizæ, cuius isthic maxima feritur copia
ad margines amnis, vbi per brachia sese in mare exone-
rat. Propugnaculum vno à ciuitate distat milliari, cuius

Orizæ.

*Equi mari-
ni.*

quarta parte peracta, vidimus equos marinos quatuor in
flumine, vris nostratibus forma, pilo, & magnitudine per-
similes, nisi quòd cornibus carent: Orizæ magna inferunt
damna; vnde fossis altioribus horti præcinguntur; nam
cum pedes depressiores hæc habeant animalia, aggeres
conscendere non possunt. Hominem in hortis repertum,
facile morsu conficiunt. Explosimus in eos aliquot lon-
giores bombardas, sed an aliquem interfecerimus incer-
tum, cum animalia sint magna & robusta, quæ non nisi
valido maioris alicuius tormenti ictu confici possint. Non-
nulli equos hosce marinos, dici volunt Odontotyran-

nos,

nos, quasi dente sæuientes, Græci Amphibia vocant, nem-^{-Odontoty-}
pe animalia, quæ partim in aquis, partim in terra viuunt. ^{ranni, quos}
Scribit Cedrenus, animal hoc tantæ magnitudinis esse, vt ^{Græci vocant}
elephantem deuorare possit. Sed id parùm verisimile vi-^{Amphibia.}
detur. Nam licet vnus præ reliquis magnitudinem ad-
mirarentur incolæ, qui nobiscum eadem Dzerma vehe-
bantur, maior tamen elephante non fuit, nisi quòd longi-
tudine illi adæquatur. Cairi cùm essem, allatum fuit
vnus equi marini, non procul inde interfecti, ingens &
visu cum primis horridum caput, cuius faucibus diductis,
hiatus ad vnus & dimidij cubiti magnitudinem pate-
bat. Vnde dentes notabili itidem magnitudine promi-
nebant.

Hora vigesima tertia peruenimus Damiatam, olim Pe-^{-Damiat.}
lusium, ab alijs Heliopolim dictâ. Nominatur & Ostium
Pelusiacum. Ciuitas est hæc Ægypti prima, supra Nilum
situ eleganti posita, ad dimidium milliare in longitudinem
exporrecta. Quoniam hora tardior erat, constitimus vbi
vectigal deponitur, cuius Iudæi curam gerunt: statimque
telonarius ad nos accurrit, & cùm nos mercatores existi-
maret (pro quibus etiam nos gerebamus propter maio-
rem securitatem, cùm negotiatores à quibus ampla ve-
ctigalia Turcarum Cæsari dependuntur, tutiores in Æ-
gypto esse soleant) nobiscum in eadem Dzerma noctem
duxit.

Manè sarcinæ nostræ excutiebantur, in quibus cùm ni-
hil mercium esset, diximus eas nos in Cairo habere, quò
contenderemus. Sic dimissi, in terram descendimus, &
ad Viceconsulem Venetum, qui erat Thomas Candiotæ
Græcus, accessimus. Diem totam in perlustranda ciuita-
te consumpsimus: sed ex antiquitatibus nihil visu dignum
occurrebat. Conduximus deinde minorem aliam na-
uem Dzerniam, Cairum vsque: in quam etiam, paulò an-
te vesperam, res nostras intulimus, ibidemque dormiui-
mus,

144 IEROSOLYMITANA PEREGRINATIO
mus, & propter maiorem in Nilo securitatem, duos Ianif-
aros nobis adiunximus.

Sole iam exorto, aduerso flumine nauigare cœpimus.
Quoniam autem circa hoc tempus, Caurus, Italicè *Mat-
stro*, flare plerumque solet, & Nilus à meridie labitur, velo
expanso prosperè nauigabamus, nisi quòd in reflexu flu-
minis in terram exponebamur, vbi nautę funibus nauem
aliquamdiu trahebant. Ante meridiem præterijmus ad
Ferchin. læuam, Ferchin ciuitatem cum primis amplam: pro nocte
verò venimus ad oppidum quoddam, (relicta ad dextram
magna ciuitate Serbin) ibidemque, quòd iam Sol ad oc-
casum vergeret, quieuius: vbi diligenter inspeximus
Clibani,
pullos galli-
nacos pro-
ducentes. fornaces seu clibanos, in quibus artificiosè pulli gallina-
cei excluduntur. Sunt autem ex stramine forma rotunda
contexti, & argilla vndique oblici, in superiore parte fe-
nestram paruam rotundam habentes, ne Solis radij per di-
rectum, oua intus posita offendere possint, quæ facilè co-
cta redderentur: quandoquidem à sole tantum caloris
terra concipit, vt in meridie vix aliquis, vnus Orationis
Calores
Aegypti. Dominicæ recitatae interuallo, calceis licet indutus, ter-
ræ ardorem sustinere, illi insistendo, valeat. Incolæ ta-
men nudis pedibus incedunt, & à teneris assueti, ita plan-
tas callo obductas habent, vt, quod experti sumus, ictum
mallei non magis sentiant, quàm equi, cùm illis soleæ ap-
plicantur: adeò vi Solis plantam habent induratum. For-
naces istæ ostiolum habent à Meridie, à Septentrione fo-
ramen, per quod fimo bouum vel bubalorum, fornax pro
nocte calefit, ne oua lædantur à frigore. Interdiu Sol per
limum temperatum calorem clibano suppeditat, in cuius
pauimento oua distinctè collocantur, ne vnum aliud at-
tingat: atque ita facili negotio, absque gallinarum incuba-
tione, pulli celerius excluduntur. In omnibus oppidis &
pagis, eiusmodi fornaces colonorum ædibus sunt ad-
iunctæ, quarum nonnullæ ea sunt magnitudine, vt
tria

tria millia ouorum commodè capere possint. Et quoniam de æstu Ægypti mentio incidit, quàm intensus ille sit, vel hinc non obscurè potest intelligi, quòd cùm Damia-
 ta soluissemus, & studiosè contemplaremur loca arenosa, (nam vltra decem & ampliùs à mari milliaria, & per totam ferè Ægyptum, inter villas & hortos, & in ipsis pagis, fundus totus arenosus est, qualem dactyliferæ arbores plurimùm amant) videbantur nobis aquæ cuiusdam ardentis speciem præbere, & adèò resplendere, vt materia vitri in fornace accensa, oculorum aciem perstringere solet. Credebamus initiò lacus aliquos ardere: cumque arena solibus excocta valdè sit leuis & fluida, ad quemcumque leuioris venti afflatum ita commouetur, vt quasi fluctus quidam ardentium vndarum, à longè intuentibus, exsurgere videantur.

Ad oppidum igitur prædictum consistentes, vt Damiatæ, & ab ipso nauarcho præmoniti fuimus, tota nocte exubias agere coacti sumus. Ægyptij namque non tantùm in terris furantur, sed cùm sint vrinatores perfectissimi, etiam sub aquis latitantes, & ad Dzermam peruenientes, quidquid arripuerint, in aquam pertrahunt, & auferunt. Non infrequèter accidit, quòd hominem in sponda naui cubantem arripuerunt, & demersum vita simul & vestibus spoliarunt. Quòd si plures latrones vniti fuerint, in Dzermas insiliunt, & dormientes interimunt, quòd paulò ante nostrum aduentum euenit, cùm quatuor Galli negotiatores eo modo interierunt, qui Cairo Alexandriam nauigabant. Quamobrem ne quid simile nobis quoque accideret, tota nocte vigilantes, & bombardas in promptu habentes, in fluuium prospectabamus: quod & ipse nauarchus diligenter præstitit. Post noctem mediam loco mouimus; circa meridiem verò, præteriuimus ad læuam oppidum Talcha, quod inter fossas variè deductas collocatum, à latronibus tantùm & deprædatoribus incolitur,

*Ægyptij
vrinatores,
nauigantes
deprædantur.*

*Talcha præ-
donum op-
pidum.*

T

qui

qui nocte per flumen, & quocumque in loco possunt, exercent latrocinia: cumque assidue hinc inde mercatores commeent, in tanta hominum multitudine, quanta per totam Ægyptum latissimè diffunditur, difficilè periculum potest euitari. Nam per omnia Nili brachia, ab vtraque ripa, per campos ingens hominum, gregum, bubalorum, boum, ouium, caprarum, & vaccarum multitudo vbique conspicitur, quo fit vt prætereuntes in laqueos facilè incurrant. Hac eadem die vidimus ad centum piscatores, qui in aquam demersi, (quæ turbida est) manu pisces capiebant: quorû aliqui tres simul extrahebant, duos manibus, tertium ore retinentes. Pisces erant vnus cubiti longitudine, alosis seu barbochis nostris, vulgò Mientus, non absimiles. Alij salmonibus seu esocibus nostris poterant comparari. Erat & quoddam genus albi piscis magni.

Pisces Nilotici sunt pingues & optimi saporis, minùs tamen salubres, eò quòd Nilus fundum limosum non saxosum habeat, cuius nihilominùs aqua salubris est, quòd longo anfractu voluatur, nempe à montibus Lunæ, vbi sumit exordium, vsque dum in mare influit, trecentis septuaginta duobus miliaribus, insuper per vtrumque Tropicum: quo fit vt immensitate caloris, humiditas noxia in ea absumatur. Est autem turbida, vt suprà dictum est, sed in vase posita, per duas horas purgatur: & si per noctē steterit, fit instar crysalli limpida, & potui gratissima. Nili naturam, & eius admiranda, quandoquidem Scriptores multi persequuntur, ad eos Lectorem remitto, attingens ea tantùm obiter, quæ ipsemet vidi. Piscatores quoties respirare volunt, caput ex aquis non proferunt; sed ore ducto halitum emittunt. Certum est, illos per totam diem in aquis posse delitescere, & vbi ad summitatem aquæ enatauerint, capite non prolato, respirare: quos cùm sub aquis natantes conspexissemus, iussit nauarchus bombardas explodere, ne Dzermam subnatando euerterent. Circa

Solis

Solis occasum, præteriuimus ad dextram ciuitatem Abu-^{Abuzyr} zyr elegantem, & situ longiore conspicuam. Iactis ancho-^{Egypti ciuitas.} ris, nocte in medio fluminis constitimus. Nam ad ripas accedere minùs est tutum: immò & vrinatores iam ad nos collimabant; sed vt nos vigilare animaduenterunt, nihil attentarunt.

12. Die tota, prospera sumus vsi nauigatione: post occasum Solis, piratæ scapha in nos incursionem fecerunt, & iaculum intorserunt, quod prope Ianissarum concidit. Sed cùm bombardas aliquot explosissemus, profugerunt. Nocte insequenti conabantur nos vrinatores adoriri, sed vbi nos bombardis oblongis, quas maximè timent, armatos vigilare compererunt, ab incepto destiterunt.

13. Quoniam secundus ventus afflabat, hora vigesima conspeximus Pyramides Cairi: quæ licet vltra ciuitatem sint positæ, propter montes tamen & operis sublimitatem, priùs quàm vrbs ipsa aspectui occurrunt. Apparebat & arx ipsa, in monte quoque posita. Iamque è brachijs, in ipsum fluuium Nilum ingressi sumus, qui tanta^{Nili latitudo.} est latitudine, quantam apud Linczium Austriæ ciuitatem, si duplicaretur, Danubius efficeret. Quatuor autem circiter milliaribus à Cairo, Nilus vnico alueo præterlabitur, postea verò bifariàm diuiditur, & famosum illud Δ ^{Nili Delta.} efficit: quinque deinde milliaribus inferiùs, ipsius Deltæ pars vna in quatuor, altera in tria brachia diuiditur, quibus deinde in mare sese exonerat. Hora vigesima tertia tandem peruenimus ad Bulhach, octuaginta à Damietta^{Bulhach ciuitas Cairo adiacet.} milliaribus, vbi è Dzerma in terram iam descenditur.

Quoniam autem vrbs hæc ipsi Cairo adiacet, operæpretium est, quanta sit eius amplitudo, breuiter attingere. Affirmatur non solùm à Turcis, sed ab ipsis quoque Europæis negotiatoribus qui hîc commorantur, quòd singulis diebus, intra viginti quatuor horas, in portu hoc, vltra decem & aliquot hominum millia hinc inde com-

meant: quorum nonnulli intrant, nonnulli egrediuntur: quodque per dies singulos tria millia Dzermarum præternauigant: quarum plurimæ sexcentorum doliorum sunt capaces. Ex antiqua quoque Cairo, superius posita (de qua paulò post) superueniunt eiusdem generis plurima nauigia, quæ ex regionibus Sait, & peramplis Presbyteri Ioannis ditionibus, triticum, cynocephalos, simias, psittacos, diuersa auium, ceterorumque animalium genera, & merces varias deferant. Nam quæ Mauros vendibiles portant, è Barbaria Rosssettum, inde per Nilum Cairum deuehuntur: & postea ad Bulhach exponuntur: quò cum tardius peruenissemus, in Dzerma noctem duximus, vidimusque vix completo dimidiæ horæ spatio, ultra decem naues aduentantes, & recedentes.

Manè cum è naui in terram cum duobus meis descen- 14
CAIRVS. disse, (reliquos enim in Dzerma dum hospitium inueniremus, manere iussi) statim duo Turcæ vnumquemque nostrum arripuerunt, vt nobis vincula inijcerent: diligenterque scrutabantur, num aliquid reconditarum mercium in sinu vel alibi haberemus, existimantes nos Gallos esse negotiatores, à quibus, vt nobis Turcæ ipsimet referbant, sæpenumerò decipiuntur. Cumque nihil nos habere eiusmodi comperissent, liberè nos abire permiserunt. Interea dum nobiscum Polonicè colloqueremur, Iudæus telonij præfectus (cuius iussu nos Turcæ corripuerant) cum idioma nostrum intellexisset, vt longius etiam à nobis Turcæ recederent, iniunxit, dicens se quoque popularem nostrum esse, ex Chelmenfi Russiæ ciuitate oriundum. Orauit sibi ignosci, quòd nos parum ciuilitè salutasset. Officia sua prolixè nobis detulit, & sæpius nos, quamdiu in Cairo versabamur, humaniter visitauit. Conscensis deinde asinis, inter hortos profecti sumus in Ciuitatem ad domum Consulis Veneti Georgij Emo, cui indicauimus, nos peregrè venisse, petiuimusque vt in hospiti-
tio

rio conducendo, nos opera ſua vellet adiutos. Obtulit ſe nobis humaniter, & Miſſæ Sacrificium vnà cum eo audiui-
 muſ: & quoniam non ita pridem eò aduenerat, non-
 dumque loci rationes planè exploraras habebat, cōſuluit,
 vt Galliæ Conſulem Paulum Marianum, qui itidem Ve-
 netus erat, adiremus. Hic quoniam viginti & aliquot an-
 noſ in ea vrbe poſuerat, magnum rerum, & Turcicæ Ara-
 bicæque linguæ uſum fuit aſſequutus. Reperimus ibi-
 dem in eiſ domo duos Societatiſ Ieſu Patreſ, Ioannem
 Baptiſtam Elianum, qui (vt antea meminimus) ſacraſ ve-
 ſteſ attulerat Maronitiſ Damafcum, & Patriarchæ in
 monte Libano, à Gregorio XIII. Pont. Max. tranſmiſſaſ;
 & Franciſcum Saſſum, qui quo tempore noſ Venetijs
 ſoluebamur, Alexandriam nauigaturuſ, ab eodem Grego-
 rio Pontifice mittebatur. Aderant etiam & treſ monachi
 inſtituti S. Franciſci, quòd in ædibuſ Conſuliſ huiuſ Ca-
 pella Catholicorum haberetur. Marianuſ igitur prædictuſ,
 in altera domo ſua, quam è regione dicti Veneti Conſuliſ
 habuit, nobiſ habitationem conceſſit, in quam diuertim-
 uſ, vnà cum alijs noſtriſ è Dzernia euocatiſ. Aggreſſi
 deinde ſum uſ perluſtrare ciuitatem, quæ quàm ſit ampla
 & populofa, ille tantum poterit iudicare, qui ſuiſ eam
 oculiſ inſpexerit. Meo ſanè iudicio, triplo magnitudinem
 Lutetiæ Pariſiorum in Gallijs excedit: non eam tamen
 elegantiam in ordine & ædificijs habet. Nam noua tan-
 tum Cairuſ muro præcingitur, vrbeſ autem vetuſ & Bul-
 hach ambitu murorum caret. Noua ciuitaſ habet multa
 & magniſ ſumptibuſ erecta antiquituſ palatia, recentiora
 verò moderni quoque mercatoreſ Æthiopoſ non mino-
 re ſumptu & elegantia ædificant: quorum vnum inſigne
 vidimuſ, quod licet nondum ſit abſolutum, trecentiſ ta-
 men ducatorum millibuſ conſtare perhibetur. Mercator
 eiſ Dominuſ bombycina tantum interula indutuſ, tiara
 tectuſ, incedebat, vix calceoſ habent: quo habitu ſimiliter

*Cairuſ, olim
 Babylon,
 maxima
 Egypti
 ciuitaſ.*

*Mercatoreſ
 Carri diui-
 teſ.*

& alij diuites Aethiopum mercatores vtuntur. In Aegypto, Turcæ vel Magiftratu perfunguntur, vel milites funt. Aegyptij incolæ, vel agros colunt, vel œconomiam domesticam exercent: Arabes ex latrocinij viuunt. Aethiopes ferè mercatores funt, vt & reliquum in Ciuitate vulgus.

Multi Europæi negotiatores Itali & Galli, qui à viginti & ampliùs annis hanc urbem incolunt, pro certo affirmant, quòd nos numerare non potuimus, nouæ Ciuitatis ambitu, triginta priuatarum ædium millia contineri. *Aedium Carri nomen vii.* Adiunctis verò suburbijs, veteri Ciuitate & Bulhach, minoribus etiam ædiculis, quarum magnus est numerus, ad summam ducentorum millium ascendere. *Moschæa.* Platearum sunt millia sedecim. Fana, seu elegantiores Moschææ, quæ turre habent adiunctas, (absque ijs quæ turribus & tectis carent, quarum non paruus etiam est numerus) sunt sex millia octingentæ. In vno suburbio, quod sub arce ad Orientem positum est, sunt Moschææ mille & ducentæ. In alio Meridiem versus, septingentæ. Inter eas maior earum numerus recensetur, quas in vsum sepulturæ, principes eius regionis viri, fabricauerant: quarum tamen præcipuæ à Christianis constructæ memorantur, antequam regnum hoc in impias Saracenorum manus deuenisset.

Mercatoris Aethiopiae causus. De vitæ suæ ratione mercator is, cuius tam sumptuosum palatium mirabamur, nobis per interpretem retulit, quòd vxores albas habeat duodecim, Æthiopissas verò decem octo, quarum vnâquamque in separato cubiculo asseruat, ipsemet clauēs ab eisdem retinens. Nam si eas congregi contingeret, inuicem sese suffocarent. Cibus illis per fenestram submittitur. Cùm ad aliquam ingreditur, diligenter post se ostium claudit, nec ceteræ intus penetrare possint, quæ eum proculdubiò opprimerent, manusque sibi mutuas inferrent. Inde facilè colligere licet, quàm misera

fera sit paganorum istorum conditio, quos Deus ob peccatum tanta cæcitate percussit, ut non minùs sibi à semet-ipsis, quàm à brutis animalibus metuant. Cùm diceremus eum hac ratione in maximo periculo perpetuò versari, respondit, ita quidem esse; proptereaquæ illas in diligenti custodia se asseruare: quas tamen omnes si vellet, interficere posset; cùm eius sint propriæ, nempe ipsius pecunia coëmptæ: licitum autem esse cuilibet, re pretio comparata uti prout voluerit. Multa sunt alia turpia & enormia, quemadmodum emptis hisce mancipijs abutuntur, quæ, pijs auriibus parcendo, reticere præstat.

Illud quoque mirabile nec prætermittendum, quanta sit inter ipsos consanguineos diffidentia. Cùm mercator prædictus palatium suum ostendendo nobiscum esset, seruus eius Æthiops nuntiauit filium eius natu maiorem aduenisse. Egressus itaque nobiscum ad propylæum, filio in impluvio stante, sic vnà colloquebantur. Dixitque nobis, filium ad se numquam intromittere, sed eo modo cum illo colloqui solitum. Quærebamus quânam id de causa faceret; Non fido, inquit, illi: posset enim me interficere. Sed & ipse mecum ita agit. Cum alio quoque eundem modum colloquendi seruo. Nam cùm vterque vxores & liberos habeat, non me illis committo. Tertius minor natu filius ad eum ingrediendi facultatem habebat: neque tamen in ijsdem secum ædibus habitabat. Filius hic senior, qui ad eum venerat, triginta circiter annos habebat. Illud passim apud Æthiopes obseruatur, ut etiam si maximè inuicem sanguine sint coniuncti, alter tamen ab altero sibi caueat. Quamobrem in plateis plerumque vnà colloquuntur: raroque ad ædes alter alterum admittit, nisi diligenti adhibita custodia. Mercator hic tres tantùm seruos domi habebat, qui ibidem dormiebant noctu: quos nihilominùs in conclauis dormiturus priùs occludebat, timens ab eis interfici. Manè verò tres artifi-
ces

ces veniebant, qui operas in palatio ædificando illi præstabant.

Bassa Aegypti Imbratimus.

Bassa toti Regno Ægypti præest. Meo tempore fuit Imbratim : quem Turcarum Imperator ad triennium eò miserat, ut dotem pro filia, quam eidem desponsauerat, colligeret, ac vñdecumque posset corraderet, demptis redditibus officio annexis, qui victum illi, ex ordinarijs horum obuentionibus, potissimum suppeditabant. Habebat tum is equites mille, pedites itidem mille. Quandoque maximâ pompâ, cum copiosissimo comitatu, per ciuitatem proficiscens, se spectandum exhibebat. Czaussios trecentos, propter negotia & missiones necessarias, sibi habuit adiunctos, Sangiacos verò viginti quatuor, qui administrandæ ciuitati præficiebantur, quæ in vigintiquatuor itidem regiones est distributa.

Arabum in Castrum incursiones.

Quoniam autem nocte dieque circa ciuitatem custodia est vñdique posita propter incursiones Arabum, qui etiam me præsentem quater ad ipsam ciuitatis portam penetrarunt (vñde magna fuit in vrbe trepidatio) & pluribus Turcarum castris incolumes recesserunt: ideò ad repellendos eorum conatus, antea sex millia equitum totidemque peditum continuò alebantur. Sed propter expeditionem Persicam tria ex equitatu, totidemque ex peditatu millia fuerunt adempta. Equites habent tres Capitaneos, quorum vnus mille præest hastatis: alter totidem sibi subiectos habet Cerkassios (quos reliquias Christianorum, qui quondam Ægyptum incolebant, fuisse memorant, nunc omnes sunt Mahometani): tertius mille itidem Turcas, leuioris tamen armaturæ, in sua habet potestate. Ad eundem modum ordines suos habet compositos peditatus quoque: qui totus è Ianissariis constat. Singulis diebus Veneris aliquot Turcarum centena in campum propè Nilum prodeunt: vbi exercitia militaria faciunt, arundines breuiiores in se mutuò projicientes; ad eò tamen

Custodia militaris Cauri.

Cerkassij Christianorum reliquæ.

teme-

temerè & confusè, vt semper in eiusmodi certaminibus, vnus aut alter, vel ex militibus, vel ex spectatoribus ipsis intereat. Equis enim ad cursum ita frænos relaxant, vt eos deinceps retinere non valeant, atque ita collapsi miserè colliduntur.

Iudæorum ingens est hîc numerus: à quibus in capita ^{Iudæorum} singula census dependitur. Dicebatur meo tempore, ^{Cairi multi-} ^{tudo.} mulieribus & pueris quoque recensitis, eorum ad vnum millionem, & sexcenta insuper millia, numerum ascendisse: quod idem ille Iudæus telonio præsidens nobis retulit. Ex vulgo ad septem milliones recensiti feruntur Assan Bassæ tempore, qui certum incolarum numerum nosse cupiebat. Sed is, propter assiduas mutationes, vix iniri potuit.

In tanta hominum multitudine, vix tertia pars est reliqua, quæ visum integrum habeat. Omnes ex oculis ^{Oculi ciui-} ^{tas Cairi in-} ^{mica.} passim laborant, propter esum fructuum, quibus vulgus promiscuè viuit, aquæ potu superaddito. Ad hæc cùm regio sit calidissima, cidarim nihilominus in capite deferunt, quod integumentum graue satis est: vnde è sudore, oculorum inflammatio prouenit: quam platearum puluis, quæ lapidibus strata non sunt, vehementer adauget. Octo millia camelorum, aquam è Nilo ostiatim deferunt, duobus ^{Aqua ven-} ^{tu Cairi} ^{ratio.} vtribus coriaceis, quorum quilibet dolium nostrum commune capit, ad vtrumque latus appensis. Hæc aqua diuenditur à portitoribus, qui eo nomine Bassæ vectigal pendunt: quidquid superfuerit, per plateas ob sedandum puluerem spargunt. Sunt & plures alij cameli, utpote Sangiacorum, Czaussiorum, & mercatorum, à quibus nihil dependitur, quorum numerus ad octo millia ascendit. Præterea sunt & baiuli, qui in pellibus hircinis aquam venalem in dorso deferunt, aliquid etiam Bassæ contribuentes. Horum ad triginta millia esse perhibentur. Illud quoque cum primis est admirandum (vnde magnitudo urbis perpendi potest) quòd cùm Nilus exundat, & qua-

tuor vel quinque canalibus per ciuitatem fertur, ac cisternas omnes copiosè implet, camelorum nihilominùs & hominum aquam deferentium non minuitur numerus: dicuntque, ea ratione licet aliquantum ex redditibus Bassæ imminuatur, vix tamen damnum ad dimidiam vel etiam tertiam partem ascendere. Culinarum publicarum sunt ad viginti millia. Nam locupletiores tantùm & digniores domi cibum procurant: vulgus è culinis viuit, in quibus maxima copia carnis, agninæ præfertim, pullorum, anserum, maximè verò orizæ & pastillorum in oleo frixorum, venalis exponitur.

*Culinarum
publicarum
Cairi nu-
merus.*

*Victus Cairi
abundantia.*

Rerum ad victum pertinentium, magna est abundantia. Bubulæ grati saporis, copia. Agninæ ingens vis. Anserum itidem & pullorum gallinaceorum infinitus numerus, qui arte, prout dictum est superiùs, in fornaculis exclusi proueniunt. Vinum Aegyptus non habet, in cuius planitie, propter exundationem Nili, vineæ plantari non possunt. Colles autè vel montes nulli sunt. Vnam tantùm vineam cuiusdam Christiani, Nataream (de qua inferiùs) proficiscens, vidi. Quamobrem Christiani vt plurimum vino Cretico vtuntur. Consules tamen Europæi, ex Italia

Pestis Cairi.

vinum sibi adferri curant. Quoniam autem nonnulli tradunt (quod etiam ad frequentiam ciuitatis pertinet) tempore pestis intra vigintiquatuor horas, hîc viginti hominum millia occubuisse, narrauit nobis mercator Venetus Ioannes Leonardus, qui iam vigesimumquintû annû hîc agebat, quòd ipsius tempore tanta pestis per duas hebdomadas hîc grassabatur, vt non modò hunc prædictum, sed maiorem etiam in dies singulos, vigintiquator horarum spatio, hominum numerum absumpserit. Neque id adeò mirum, quandoquidem Turcæ à pestifera contagione sibi præcauere non solent, asserentes, id necessariò fieri, diuinæque vindictæ morem gerendum, quæ cuicumque destituto eueniat necesse est. Itaque Christianos irrident,

*Turcæ pesti-
lentiam non
fugiant.*

qui

qui tamquam diuinæ ordinationi resistentes, luem pestiferam fugiendo declinare nituntur irritò sæpiùs conatu. Defunctos, non vt Christiani pedibus, sed capite obuertos ex ædibus efferunt. Illud etiam notandum, ferè septenis quibusque annis in Aegypto pestem variare, quæ in tertium annum plerumque durat, hoc modo: Primo anno leuiter inchoatur, cùm Sol Libram ingreditur. Maxime autem scuit in mense Decembri, Ianuario, Febuario, & Martio, quo tempore calores sunt remissiores: vbi verò inualuerint, cùm Sol anno insequenti in Leonem ingreditur, statim cessat pestis, & quidem ita, vt si quis apostema pestiferum intus habuerit, & ad horam prædictam ingressus præfati Signi cælestis superuixerit, omne periculum euadat: quæ res magnam sanè habet admirationem. Quamobrem sub illud ipsum tempus mercatores nostri è secessu redeunt, & ædes apertas habent. Quemadmodum enim apud nos frigora, ita hîc calores pestem profligant: duobusque mensibus securè viuitur. Posteaquam verò Sol Libram fuerit ingressus, rursus sensim pestis inchoatur, & durat, prout superiùs dictum est, ad Solis in Leonem ingressum; non tamen adeò violenter scuit. Tertiò eamdem rationem seruat, nisi quòd de acerbitate magis etiam ac magis remittit. Postea si contagio non fuerit alicunde illata, quatuor anni subsequentes à peste sunt immunes: quandoque tamen longiores fiunt induciæ: sed plerumque septennio malum recurrit. Qua quidem in re singularem etiam Dei benignitatem intueri & celebrare licet, qui longè minoribus flagellis Christianos, quàm paganos, castigare & affligere solet.

*Pestis in
Aegypto
septimo
quoque an-
no grassatur,*

*Calores in
Aegypto
pestem pro-
fligant.*

Quoniam autem multi multa de Regno hoc, & exundatione Nili, memoriæ prodiderunt, visum est & mihi, qui sub illud ipsum tempus ibidem præsens interfui, nonnulla breuiter attingere, quæ ipsemet vidi, & quæ à Christianis isthic commorantibus accepi.

*Exundatio
Nili.*

Conducto minore nauigio in Bullhach, aduerso flumi-^{16.}
ne ad vnum milliare, cum mercatoribus locorum peritis
nauigauimus versus urbem antiquam. Inter quam & in-
sulam Mulchias, vbi Bassa ipsemet, de quo paulò pòst,
habitat, nobiliora solent edi spectacula. Ciuitas hæc ve-
tus ripæ Nili adiacet, quando is exundat; ceterum cum
proprio cōtinetur alueo, ad iactum vnus sagittæ ab amne
distat. Nilus itaque non casu & fortuitò, quod multi opi-
nantur, per campos exundat; sed per fossas artificiosè de-
ductas, intra aggeres industria paratos diffunditur, & arua
humectat: quod hoc ipso tempore maximè viderelicuit;
sed & ex ipso villarum situ, quarum in territorio Delta,
demptis oppidis, ad viginti millia esse feruntur, non diffi-
culter intelligi potest.

*Nilus non
casu exun-
dat, sed arte
adhibita.*

Delta Nili.

*Canopicum
Nili ostium.*

Delta autem vocatur locus, vbi primùm bifariàm Ni-
lus finditur, quatuor infra Cairum milliariibus: deinde,
cuius meminimus superius, vna eius pars in quatuor, alte-
ra in tria brachia diuiditur, & ita septem ostijs in mare in-
fluit: cuius vltima pars ab ortu Solis; prope Damiatam ex-
oneratur, per quam nauigabamus; altera ad occasum sub
Rossetto, quod antiqui Canopicum ostium appellant, &
vigintiquinque milliariibus à Damiatam distare volunt. Da-
miata verò à Cairo octuaginta, Cairus à Rossetto sexagin-
ta & aliquot abest milliariibus. Omnem hunc tractum
Delta nominant. Circa duo brachia hæc, per quorum
vnum aduerso flumine Damiatam, per alterum secundo
amne Rossettum versus nauigabam, tanta est ab vtraque
parte villarum multitudo, vt earum numerus iniri nulla
ratione potuerit. A pago verò ad pagum agger proten-
ditur, qui tempore inundationis, viam transcuntibus præ-
bet. Porro aggeres hi, diuturnitate temporis veluti col-
les quidam à natura facti videntur, sed qui diligentius con-
siderauerit, arte paratos facilè animaduertet. Nam & à
pago ad pagum ducunt: & pagi ipsi tumulis editioribus,

ccu

ceu collibus quibusdam in gyrum formatis, incubant. Præterea prædicti aggeres ordine certo sunt dispositi. Nam cum aqua per emissaria (multi namque aggeres hæc habent; plures tamen cum tempus adest, perfodiuntur) dimittitur, fluuius eam partem agrorum & camporum occupat, qui ad Cæsarem vel Bassam pertinent. Quibus adequatis, alius agger perforatur: & sic deinceps per ordinem agri aquas excipiunt. Diligens autem in aggeribus hisce adhibetur custodia, ne quis eos noctu, vbi minimè deberent, aperiat. Sed & post aquæ emissionem, terra obstructis custodes apponuntur, ne furtiuè quis eosdem perfodiat: vnde in aquæ impetu cohibendo, magna futura sit difficultas. Cum igitur Nilus exundat, è regione vrbs antiquæ sit insula, quam Mulchias, vel vt alij, Mechias appellant, quæ dictiones mēsuram significant, quòd eo in loco, stagnante Nilo, mensura aquæ obseruetur. Ceterum cum Nilus suo alueo continetur, ad eam insulam sicco pede perueniri potest, cum nulla sit hîc aqua, prout suprà meminimus. In ipsa quoque ciuitate, per Nili canales, cum aqua non exundat, equites & pedites hinc inde comeant, non minùs quàm per plateas, quæ per ciuitatem in longum protenduntur, nisi quòd profundiores sunt his, quæ aquis non alluuntur. In extremitate dictæ insule, parte superiori, est amplum & elegans palatium, quod Bassa tunc temporis inhabitabat: vbi etiam est Moschæa, in qua est columna seu pyramis erecta, quam aqua per subterraneos conductus alluit, in qua notatur, quàm celeriter aqua crescat & decrescat. Verum qua ratione id fiat, haud facile penetrari potest: cum Christianis eò non pateat aditus. Sed nec ipsis sæcularibus Turcis, præterquam eorum sacrificulis Santonibus, Bassæ, & nonnullis superioribus ad id delectis. Volunt enim hunc locum esse sacratum, quem ingredi nemini liceat, quandoquidem inde exundat aqua, cuius beneficio in vniuersa Prouincia fertilitas

*Mulchias
vel Mechias
locus, men-
sura Nili.*

*Palatium
Bassæ Cæri.*

*Ad pyrami-
dem n. c. su-
ra Nili Chri-
stiani non
admittuntur.*

*In Ægypto
pluuia nulla.*

obuenit, cùm præsertim nullæ sint hîc pluuiæ, nisi mense Decembri: quo tempore ter quaterve vna vel altera hora modicè pluit, idque nullo terræ beneficio, prout inferiùs explicabitur. Versus mare, vbi fluuius prope Damiatam vel Rossettum, aut vbi quinque alijs ostijs in pelagum sese exonerat, fit tamen pluuiæ, prout cùm essem Alexandriæ, vigesima septima Septembris decidit mediocris: quæ fuit cum primis expetita; quandoquidem, vt postea dicemus, aërem noxium purgat & propellit. Cùm igitur in prædicta insula Mulchias, fluuius incipit crescere, statim aliquot centena puerorum in urbem mittuntur, qui per plateas proclamant, quantum aquæ, & quàm celeriter accrescat. Nam si augetur incunctanter, bonam spem concipiunt incolæ, breui aggeres apertum iri, vnde anni insequentis vbertas colligitur: sin parciùs exuberat, sterilitas expectatur, vnde caritas annonæ & fames præ foribus adesse dignoscitur; cùm paucitas aquæ agros omnes irrigare, & quidem copiosè, quæ res ibi maximè necessaria, non possit. Quod si vltra modum aquæ copia prouenerit, ex nimia agrorum humectatione, dum seminatur granum frumenti, in terram altiùs demergitur: neque enim multum, nec in omnibus passim locis hîc aratur: sed vbi copiosè Nilus aquam suppeditauit, ibi leui vomere, vix ad trium digitorum profunditatem terra proscinditur. In locis editioribus, aratio perinde ac in hortis adhibetur. Horti enim arantur, & irrigantur assiduè: quam ad rem boues aquam pertrahunt. Vnde bis in anno fructus proueniunt. Nam in locis tantùm montosis, vbi Nilus non penetrat, horti conferuntur. Vnde autem boues aquam extrahunt, sunt altiores putei, è quibus aqua, rotarum ministerio tubulos habentium eduçta, in ligneos canales effunditur, vnde horti commodè satis adaquantur. Rotas autem ipsas boues circumagunt, quibus oculi pannis velantur, vt etiam nemine præsentè, & stimulos addente, assiduè

*Prognosticū
abundantiæ
ex Nili in-
cremento.*

*Hortorum
fructus bi in
anno proue-
niunt in
Ægypto.*

assiduè rotationis opus exerceant. Stercorationis in agris
 vsus hîc nullus. Nam & natura sua terræ gleba pinguis
 est, & messe finita, ingens iumentorum multitudo per
 campos oberrat, eosque fecundos reddit. Messis porro ^{Messis in}
 sub finem Martij inchoatur, & ante extremos ^{Egypto} Aprilis dies ^{in mense Mar-}
 perficitur. Nam per Maium venti Meridionales spirant,
 qui fruges in campis repertas excoquerent, & planè ad
 nihilum redigerent. Cùm isthîc essem, ex indicio mensuræ
 in Mulchias, dicebatur Nilum viginti vnus cubitorum ^{Nili excre-}
 altitudine exundasse: ob idque annum insequentem fer- ^{scientis ratio.}
 tilem futurum: nam amne ad viginti quatuor, quinque,
 aut sex cubitos excrecente, nimum agros madefieri; rur-
 sus verò ad cubitos decemnouem non ascendente, aquæ
 paucitatem accusari. Numquam tamen minùs quàm ad
 sedecim vlnas excrefcit, quo casu certissima fames expe-
 ctanda. Exundat autem semper in mense Augusto. Dies
 certa præscribi non potest: sed plerumque circa medium
 mensis præfati solet id fieri. Vnde autem tanta aquæ co-
 pia proueniat, compertum iam est, eam à pluuijs oriri, quæ
 à primis Maij diebus, ad finem vsque mensis Augusti vl-
 tra Tropicum Cancrî perseuerant. Nilus autem à mon-
 tibus Lunæ ultra Æquatorem principium ducit: qui à
 pluuijs huiusmodi, non à spirantibus Etesijs (qui venti,
 maris vndas fluuio sese exoneranti obijcere deberent,
 eundemque regredi & intumescere faciant: quæ omnia
 esse fabulosa, & contra rationem conficta facile iudicabit,
 qui rem subiectam oculis habuerit) inundationis suæ in-
 crementa sumit. Qua de re, locorum illorum Cosmo-
 graphi, copiosius tractant; præsertim cùm veluti apud
 nos hieme, ita in partibus illis per quatuor menses præ-
 dictos, propter pluuias continuas, & ventos vehementio-
 res, omnis nauigatio conquiescat. Dicunt etiam, & omni-
 no ita se res habet, quòd citiùs aquarum hoc profluuium
 in Ægyptum descenderet, nî magnus Ioannes Presbyter,

per

Dei prouidentia circa fertilitatem prouinciarū.

per ditiones suas, quas ex hac Aequatoris parte possidet, illas auerteret: quas tamen nisi prædictus Abyssinorum Rex per agros suorum irrigandos deduceret, immensa earum vi, vniuersa Aegypti regio tantam humiditatem contraheret, quòd terra nullas ampliùs fruges productura censeretur. Atque hinc singularem Dei prouidentiam & ordinationem considerare licet, qui ineffabili sua sapientia vniuersas mundi partes ita regit & distinguit, vt quaelibet earum rebus ad vitam necessarijs abundè sit instructa. Confeminatio fit plerumque circa festum S. Andree, cùm mediocriter Nilus exundat: sed vbi minor est aquæ alluuiò, maturior fit seminatio, ex qua tamen satis ampla prouenit vbertas, propter calorem Solis adeò intensum, vt vel circa finem Februarij messis institui possit: quo tempore iam prima vice, ex hortis fructus & olera colliguntur. Cùm minùs copiosè Nilus exundat, non omnes campi adaquantur, nec terra, quod satis sit, madefieri potest, quæ per æstatem adeò induratur, vt speciem petrae durissimæ repræsentet: cùm verò aqua superabundat, tardiùs terræ semina committuntur, ne granum profundius demergatur, atque ita messis ad Maium mensem protrahatur, & omnia ventis Meridionalibus, vt suprà memoratum est, exsiccentur. Illud valdè mirum, quòd licet Nilus in magnam altitudinem apud Cairum excresecat, vbi tamen eius brachia in mare influunt, ferè suis alueis solitis continetur: & si quid accrescit, id vltra vnus cubiti altitudinem non consurgit: quod tamen non nisi rarò fit, quandoquidem aqua quæ ripas supergreditur, per campos diffunditur, & in terram incumbit: vnde nulla eius, dum in mare illabitur, accessio deprehèdi potest. Ad hæc, vt antè dictum est, imber hîc prouenire solet, qui agros, vbi Nilus non ascendit, competenter irrigat. Ita hîc vndique diuinæ prouidentia dispensatio mirabilis elucet.

Totam itaque noctem per flumen nauigando duximus,

mus, res visu dignas annotando: vbi etiam ingens hominum multitudo, die nocteque in scaphis vagabatur. Nam hoc tempore, in publica omnium lætitia, veluti quædam Liberalia aut Nundinæ apud illos celebrantur, vbi & vi-
liori pretio omnia distrahuntur, & victus abundantia per nauiculâs circumfertur.

17. Manè, tertia ab ortu Solis hora, denuò ad Bullhach peruenimus, & scapha egressi, conscensis asinis ciuitatem ingressi sumus.

18. Summo manè, vna ante diem hora, ex hospitio egressi, ad ciuitatem veterem venimus, quæ à noua, quarta milliaris parte, inter hortos semper cundo, distat. Duabus verò horis post exortum Solis, traiccto Nilo, quinta milliaris parte peracta, rectà ad Pyramides peruenimus: de quibus ^{Pyramides Memphis.} quoniam ab auctoribus multa produntur, ego quæ ipsemet coràm vidi, breuiter hîc annotabo. Constat omnium testimonio, Memphim ciuitatem sacris & prophanis literis celebratam, hîc olim fuisse: nunc præter exiguas quædam versùs Meridiem ruinas, eius nulla apparent vestigia. Steriles arenæ omnia cooperiunt. Pyramides tamen decemseptem adhuc integræ conspiciuntur: quarum duæ sunt maiores, & tertia à Rhodope meretrice constructa. Plinius lib. 36. cap. 12. formam & architecturam eius describit. Est inprimis elegans, vix tamen sexaginta vel septuaginta cubitorum habet altitudinem. Hæ tres Pyramides sunt planè integræ, & inter miracula mundi connumerantur. Duæ maiores stupenda & incredibili sunt magnitudine, altera tamen excellit, quæ tam in altitudine quàm in latitudine & longitudine, trecentos habere cubitos dicitur. Intrinsecus habet artificiosos & peramplos gradus; quibus æquè vt extrinsecus, ad ipsam vsque summitatem ascenditur. Habet & concamerationes, quarum duæ maiores, vna super alteram erecta, quæ sepulchra Regum Ægypti continebant. In inferiore extat etiam ho-

die sepulchrum satis magnum, in quo corpus aliquod fuit
Pyramides, repositum. Porro à quibus Regibus, quanto sumptu,
operis lu- quòve modo vel artificio, & num à Iudæis in Ægyptiaca
daorum ex- feruitute constitutis, (quod omnibus ferè auctoribus pla-
citata. cet) Pyramidum hæ moles fuerint excitatæ; vel num
 ijdem Hebræi aggeres & fossas, quibus Nilus deducitur
 (apparet enim non natura, sed arte facta esse omnia) per-
 fecerint, Historicis, qui plenius hæc pertractant, iudican-
 dum relinquo. Illud mirari magnopere conuenit, cùm
 dictæ Pyramides, in sublimi monte, qui totus è viuo saxo
 constat, sint erectæ, quantum tamen è lapidum genere
 colligitur, apparet eas non ex eiusdem rupis lapidibus esse
 concinnatas: nec facilè vestigari potest, vnde aut qua ra-
 tione tanta lapidum congeries eò comportari potuerit;
 quandoquidem etiam Nilus exundans, tribus milliaris
 partibus, à fabrica remotus procurrit. Sed nec illud pene-
 trari potest, cùm quilibet lapidum tres cubitos longus &
 latus, altus verò plus quàm vno sit & semisse, quo labore
 & artificio, in tam altum montē pertrahi, & in summitate
 collocari potuerit. Maxima omnium Pyramis ex lapidi-
 bus eiusmodi sectis & quadratis, in formam montis cuius-
 dam naturalis, singulari quodam artificio est fabricata: &
 licet quadrangulari figura ab ima parte sensim in cacu-
 men confurgat, tamen lapides isti quadrati, ita inæquali
 ordine compositi artē mirabili videntur, vt moles tota
 montis à natura formati speciem representet. Ascensus
 propter lapidum crassitiem grauis & laboriosus, securus
 tamen est: & licet passu conuenienti vsus fuerim, vix ta-
 men intra vnam & dimidiam horam, Pyramidis summi-
 tatem ascendi, vbi planities est quadrata, spatium decem
 cubitorum in qualibet parte complectens. Ab hac maxi-
 ma Pyramide ad sequentem procedendo, in dextra parte
 sunt habitationes in saxo viuo eleganter excisæ, quarum
 superior pars, instar tabulati, quod apud nos trabibus
 trans-

transuersim appositis sustentatur, est formata; nisi quòd trabes prædictæ non quadrata, sed semicirculari forma effinguntur. Parietes eadem quoque similitudine exsculpi. Volunt nonnulli, Regum hæc conclauiâ fuisse, aut Sacerdotum Ægyptiorum: quandoquidem, vt dicitur inferiùs, Pyramides istæ vel familiarum vel Parochiarum receprabula fuisse existimantur.

Secunda Pyramis paulò priore minor, ad geminum sagittæ iactum, ab illa distat. Ingressus interior in illam non patet, quem tamen occultum esse volunt. Exteriùs ad medium vsque potest ad illam conscendi, cum ad eundem modum, vt prior illa, lapides habeat compositos; nisi quòd paulò planiores & minores sunt. A medio verò lapides ita complanati sursum ascendunt, vt vltra progredi sit impossibile: quod eo consilio maximè factum apparet.

Inde verò tertia eiusdem Pyramidis pars, vsque ad summitatem lapides habet, quasi neglectim & inordinatè collocatos, vt in parte inferiori; ita vt nisi series illa faxorum plana, quæ ad aliquot denos cubitos eleuatur, impediret, conscendi eius summitas, quemadmodum prioris, facillè posset.

Tertia Pyramis, ad latus secundæ versus ciuitatem, est Rhodopes illius, cuius iam meminimus, tota ex lapide dolato, vt conscendi non possit, fabricata: à qua ad ternum arcus iactum magis etiam versus ciuitatem, est caput collo & brachijs prominens, eiusdem meretricis, septem cubitorum altitudine, habitu mirabili ex vno viuoque saxo exsculptum. Volunt nonnulli, quòd ex illa maiore Pyramide, quam introgressi sumus, per cauernam subterraneam in rupe excisam, quam lapidibus obrutam vidimus, angustus & occultus in caput hoc patebat aditus: atque ita inde oracula edita, vulgo gentilium existimante, per ipsum capitis os illa proferri. Circa caput lapides aliquot

*Rhodopes
Pyramis.*

*Bellonius
Sphinga
caput hoc
appellat.
sic pro ar-
bitrio Le-
gionis.*

164 IEROSOLYMITANA PEREGRINATIO
sunt erecti, in quibus sacrificia quædam apponebantur.
Nunc, quid fuerit, discerni non potest.

Audiui à quibusdam in Cairo, qui se vidisse id affirma-
bant, ego tamen non vidi, quòd ad Meridiem, vbi extre-
ma pars vrbis Mempheos fuisse perhibetur, sunt duæ sta-
tuæ, seu colossi, viginti cubitorum altitudine, vtraque ex
vno ac integro lapide, pulcherrimo artificio sculptæ: qua-
Colossi Pha-
raonis. rum vna est cuiusdā Pharaonis; altera Reginæ, vxoris for-
tassis eius. Vtraque collapsa, integra tamen manet. A dictis
colossis Pyramides hæc quinque milliariis nostris distât.
Vnde quanta fuerit vrbis eius amplitudo, colligi potest:
Mempheos
vrbs priscæ
magnitudo. quandoquidem & ipsæ Pyramides, prout ex ruinis appa-
ret, vltra quatuor milliaria protenduntur. Quamobrem
si ab hac parte Nili tanta fuit ciuitatis magnitudo, & ipsa
Cairus, vt nunc est, ex alia parte illi fuit coniuncta; (cùm à
magnis Pyramidibus, quæ propiùs imminet ciuitati,
vsque ad nouam Cairum magnum vnum & dimidium
milliare numeretur) sequitur necessariò, vrbem hanc
aliquot milliaria in circuitu habuisse, quam medius Nilus
intersecabat. Ac veterum quidem omnium auctoritate
constat, hîc omnino Memphim fuisse: sed, vt iam dictum
est, vtramque ciuitatem simul iunctam, quod ex ruinis
non obscurè liquet. Postea tamen Sultani Ægyptij, de-
molita Memphi, iuxta diuinas Prophetarum prædictio-
Cap. 30. nes, Ezechielis præsertim, in Cairo iuxta hortos palatia ex-
ædificare cœperunt, & sensim ciuitatem frequentem
reddiderunt.

Beniamin
Hebræum in
suo Itinera-
rio cur Pyra-
midum men-
tionem non
faciat. Miror vehementer, Hebræum Beniamin, qui ante qua-
dringentos annos multas Orbis regiones peragrauit, &
quæ vidit diligenter annotauit, (quamuis interdum in ijs,
quæ audicione accepit, à veritate aberret) nullam Pyrami-
dum huiusmodi in suo Itinerario fecisse mentionem, cùm
tamen Cairum adierit, quam, vt antiqui modernique Iu-
dæi solent, Misraim appellat. Adhæret is eorum opinioni,
qui

qui ciuitatem Balbech ab Asinodæo Dæmone constru- *De hac ciuitate Balbech dictum est superius sol. 27.*
ctam affirmant, quòd propter lapidum magnitudinem, tantas ab hominibus substructiones fieri potuisse non credebant. Sed probabiliùs longè de magica fabricatione fabulam Pyramidibus hisce attribuere potuisset, quæ magnitudine lapidum, structuræ difficultate, & sumptuum impensa, Balbechana ædificia longè superant. Quamuis enim illa sint admiranda; Pyramides tamen in omnibus magis admiratione dignæ, quæ non minùs in latitudinem & longitudinem, quàm in altitudinem, etiam æquali dimensione, summo artificio sunt erectæ. Ego quidem existimo, Beniaminum hunc ex industria Pyramidum mentionem prætermisisse, quòd, vt antè dictum est, per Iudæorum in seruitute constitutorum operas, fuisse suscitatas intellexisset. Hanc itaque suæ gentis ignominiam reticere maluit, quàm Pyramidum mentione iniecta, per quosnam fuerint erectæ, non ponere: quandoquidem ab Asinodæo Balbechi fabricatam ciuitatem affirmauit. Et reuerà in tanta mole suscitanda apparet, incredibili seruitute Iudæos fuisse oppressos. Facit hoc Beniaminus frequenter, vt gentis suæ, vbi sese occasio dederit, honorem impensius tueatur. Quam etiam ob causam in hoc suo Itinerario maximè gloriari videtur, quoties in aliqua ciuitate aliquem Iudæorum numerum reperit, quos etiam nominatim recenset.

Inde ad dextram deflectentes, per quamdam villam redijmus Cairum, tribus ante vesperam horis, & traijcentes ad veterem ciuitatem, denuò cum Consule Mariano in eius scapha per fluuium nauigabamus. Intereà Sangiacorum scaphæ frequentiores vndique confluebant, quòd insequenti die Bassa aggerem aperturus, & aquæ partem per ciuitatis canales emissurus esset. Quamobrem & nos cœnam in ciuitate veteri sumpsimus, ibidemque pro nocte mansimus: quamuis nihil ferè quieti

*Sangiacorum
in apertione
Nili pompa.*

datum, quòd tympana & litui vbique perstreperent. Hoc etenim tempore, quilibet sibi Mulicos concentus aggregare studet, maximè viginti quatuor Sangiaci: qui adhuc interdiu in suis celocibus hinc inde vagabantur, quas duobus maioribus vexillis adornarant, quæ vnusquisque eorum habere debet: vnum Otthomanicæ familiæ rubei & albi coloris; alterum ad libitum. Per spondam verò nauiculæ decem & aliquot minora vexilla collocant; & totam tela eleganti acu picta, prout tentoria varijs coloribus distincta Turcæ habere solent, cooperiunt. Ab vtraque parte naus, pueri decem & aliquot adstant, quos militari suo cultu & armis quisque eleganter exornat, ipse verò Sangiacus in medio residet, ense falcato super caput appenso. Nauem plures quàm decem remiges impellunt, quam altera minor, longiori fune adligata sequitur, Musicam deferens, duo videlicet tympana, cum tribus vel quatuor lituis, quos Æthiopes serui plerumque inflant. Primores itidem Turcæ habent suas similiter scaphas, & pueros eleganter vestitos; nonnulli quoque Musicam. Vexilla tamen exponere nulli licitum, præter Sangiacos, qui omnes tunc præsentés aderant, vnico excepto, qui propter morbum interesse solennitati non poterat, filium tamen minorem suo loco misit, qui in medio sedens, librum in manibus tenebat, quòd armis deferendis nondum idoneus haberetur. Eius naus omnium elegantissima habebatur. Sangiacis & Turcis alijs, ab vtroque latere assident amici vel propinqui, quos in nauim aduocant. Nam qui maiore suorum turba stipatur, honoratior apparet: adèò vt aliquæ naues, vnà cum remigibus, centum personas circumuehant.

*Bassa Im-
braimi in
apertione
Nili maiestas.*

Tertia post ortum Solis hora, ipse Imbraim Bassa in publicum processit, ex palatio insulæ Mulchias eleganti triremi vectus, quam per gyrum plurima vexilla minora cingebant; duo verò magna, vbi sedebat, ad latus erant posita,

posita, vnum viride Mahometis, alterum rubeum dimidia alba luna insignitum familiæ Otthomanicæ. Extremitas hastarum, apud vexilla, loco cuspidum caudas equi marini habebat appensas. In eadem triremi erant trecenti Ianissari bombardarij: quorum qui rubeis vestibus induti, capitis integumenta cristis pennatis condecorata gestabant, ij propiùs Bassam stipabant: ceteri remotiores erant albis induti, contis itidem albis insigniti. Czauflj & reliqui primarij Turcæ illi assisteabant, ipse solus sedebat, puer propter æstum flabello illi ventum excitante. In prora sex erant maiora tormenta, quæ aliquoties sunt exonerata. Quoniam secundo flumine triremis vehebatur, obuersa fuit puppis, vt temone cursus celeritas cohiberetur. Circa triremem, erant viginti quatuor Sangiacorum Dzerma, & alia minora nauigia circiter mille. A palatio Mulchias, agger qui perforatur (est autem is sub turri aquæ ductus, qua ad arcem inferiorem itur) distat ad tres sagittæ iactus, triginta & ampliùs cubitos longus, latus tamen, canalem habens subiectum valdè profundum, licet non magnopere latum. Cùm eò adnauigasset, puppi, vt dictum est, obuersa prope ipsum aggerem triremis substitit: vbi ingens hominum multitudo iam vndique confluerat, adeò vt terra illa tota niue cooperta videretur, propter albicantia capitis integumenta, quæ latissimam aream, quæ ibi est, densissimè complebant. Ego, quamuis antea Romam, Parisios, & plures populosas ciuitates videram, numquam tamen in omni vita mea maiorem hominum multitudinem, vno in loco congregatam, me vidisse recorder. Et quoniam annuatim hæc cærimonia peragi solet, qui rem exactiùs iudicabant, ex aræ illius capacitate, duos hominum milliones præsentis isthic adfuisse asseuerabant. Bassa signum manu dante, statim vniuersa hominum multitudo, quibus quisque potest instrumentis, aggerem perrumpit, vnde sensim aqua in canalem

influxit,

Nili apertionis annuum Cæri spectaculum.

influit, & postea toto impetu aggerem lambit. Bassa verò domum reuertitur. Et quoniam aduerso flumine remigatur, antequam ad palatium, vnde discesserat, perueniat, ad eam partem fluminis, quæ ciuitatem veterem respicit, & à scaphis libera est, ex hac ipsa Bassæ triremi, ingens vis confectionum saccharo conditarum, immò & saccharum ipsum rotundis ligneis vasculis inclusum, passim per aquas dispergitur, quas confectiones vulgi multitudo, circa triremem natando excipit, inuicemque etiam pugnis concertando, sibi præripit. Itaque totum planè flumen cooperitur, ex parte quidem insulæ nauibus, ex parte verò ciuitatis natatoribus istis, quorum vltra decem & aliquot proculdubio fuere millia. Finito spectaculo, scapha nostra delati sumus versus nouam ciuitatem, inde pedibus reliquum itineris ad hospitium confecimus: quod quandoquidem ad ipsum maiorem canalem positum erat, inspieciebam qualiter sensim aqua accedebat: quam iuxta morem paganis receptum, veluti salutando, quòd fertilitatis auctor sit, magna hominum copia deducebat, vnà per profluentem gradiendo, & in latitiæ signum, clamoribus ciuitatem complendo: cui vicissim ex ædibus promiscua multitudo gratulabunda occurrebat. Vbi verò ad mensuram hominis aqua excreuit, quidam egrediuntur indusijs amicti, qui illorum proprius est vestitus, quidam supernatant. Deinde nocte dieque scaphæ commeant, venalia multa, præsertim verò victui necessaria deferendo. Alij recreationis causa nauigia conscendunt, personati incedentes, & Musicam exercentes. Vulgus pro Musico concentu, complosione manuum plerumque vitur: alij testam testæ collidentes, ad numeros quosdam sonitus harmonicos edunt. Passim tamen vbique homines natant: quidam etiam è tectis ædium, quæ altissimas habent substructiones, in aquas magno impetu desiliunt, mirum quomodo non collidantur. Habent autem hoc Ægyptij,

quòd

quòd ad miraculum vsque, egregiè & longo temporis in-
teruallo natare possunt: cui rei à teneris assuescunt, non <sup>*Ægypti
natatores
egregij.*</sup>

solum per canales vrbs, sed per Nilum ipsum natantes.

Sæpiùs videre est, aliquem puero vnus anni brachijs im-
posito, & manibus collum amplexante, fluuium tranare.

Quòd si puer aliquantum succreuit, huic manum suppo-
nens, & aliquando subtrahens, eum natare docet, ipse al-
tera manu aquas fulcare contentus.

In profluentibus ergo istis per urbem, magna semper hominum conspicitur
multitudo.

Nonnulli ex ædium fenestris, à præternavi-
gantibus necessaria cõmunt, bellaria præsertim, saccha-
rum, & varios arborum fructus, pretio per funem demis-
so, & merce retracta.

Ex ædium itidem fenestris, urnis al-
ligatis, aqua sursum fune attrahitur, quæ res vulgo ma-
gnam oblectationem præbet, cùm aquam inemptam pro
domestico vsu habere quisque possit.

Dum itaque aquæ
fluxus per urbem continuatur, quod ad dimidium vsque
Nouembrem durat, nauiculis omnia complentur.

Cete-
rùm aqua canalium prædictorum, urbem præterlapsa, in
Deltam non influit, sed ad partem dextram Orientem ver-
sus, magnum terræ tractum inundat, in quo præcipuæ
Cæsaris & Bassæ villæ continentur, quarum aliquot millia
esse perhibentur.

Nam ultra Deltam, quæ regio viginti
millia villarum complectitur, sunt plurimæ in Ægypto
infra & supra Cairum villæ, quarum campos & agros Ni-
lus inundat.

Earum ad quadraginta millia esse, affirmant
pro certo incolæ. Volunt nonnulli, totum hunc circui-
tum esse terram Gessen, quam Pharaon Patriarchæ Iacob
attribuerat.

Tanta autem rerum omnium hîc prouenit
vbertas, cùm annus est fertilis, vt incolæ tributo, quod
magnum est, persoluto, & annona pro victu reposita,
(nulla autem pars orbis, præter Chinam, quæ à frequentia
commendatur, Ægypto est magis populosa: quod nemo
facile crediderit, nisi qui rem oculis habuerit subiectam)

Y magnam

magnum

magnum

magnum

magnum

magnum

magnum

magnum

Delta Nil.

*Villarum in
tractu Cairi
multitudo.*

*Terra Ges-
sen.
Gen. 17.*

*Ægypti
vbertas.*

magnam insuper partem extra Ægyptum diuendant tritici, orizæ, sacchari, dactylorum, cassiæ, & reliquarum frugum: quarum pretium duobus millionibus æstimatur. Ea nobis ipsimet Christiani negotiatores Europæi retulerunt, qui certam rei notitiam habent, quandoquidem non solum merces diuersas, sed res etiam ad victum pertinentes, assidue pertractant.

Obambulabam perlustrando ciuitatem, quod dies Luna¹¹ esset, quâ & die Iouis mercatus publici esse consueverunt. Plurimæ & diuersæ merces hinc venum exponuntur, animalia quoque omnimoda. Hominum ex omni nationum genere ingens vndique concursus. Non vana de ciuitate hac circumferuntur, quod propter hominum promiscuam multitudinem, difficilis sit per plateas transitus, quas pedites, equites & iumenta passim complent, meretrices præsertim, cultu elegantiore, facie tamen tecta mulis insidentes. Earum (nam, ut ferè vbique, ab eis vectigal exigitur) numerus ad centum millia pertingit. Mulieres ceteræ, quæ viris sunt nuptæ, in publicum prodire non possunt, ne ad Moschæas quidem. Nec fenestra illis in plateam prospectare liberum, nisi per craticulas ligneas. Sunt fora publica, in quibus Æthiopes mares & feminæ, iuuenes, mediocres, & senes, prostant venales. Erant ibi tunc viri septingenti, mulieres sexcentæ, omnes nudis corporibus, præterquam quod adultiore, idque feminæ tantum, vili aliquo panno pudenda cooperiunt. Omnes aures perforatas habent, quidam & nares, à quibus globulus vitreus dependet. Inter feminas plurimæ sunt, quæ labium inferius perforatum gerunt, cui circulus inseritur, cum annexo globulo, qui si ponderosior est, os adeò diducit, ut dentes appareant: res visui permolesta. Valdè vili pretio mancipia hæc veneunt. Nam decem ducatis aureis, puer vel puella, quæcumque emptori placuerit, comparatur. Christianis tamen, sub pœna capitis, seruos educere prohibitum.

tum. Mauri vel Aethiopes eiusmodi ex Barbaria adue-
hantur: & Algieri vel Tripoli Barbariæ primùm venales
exponuntur. Inde mari Alexandriam, vel Rossettum,
postea per Nilum Cairum deferuntur. Vno eodemque in
mercato, ad aliquot centena prostant; illicò tamen distra-
hantur. Quamobrem sæpiùs etiam aduehantur. Qui
mancipiuni marem feminamve emerit, liberum est illi,
quidquid cum eo adlibuerit, agere, (Hunc, inquiunt Tur-
cæ, ego pecunia mea propria emi) vel seruare vel mactare
hominem possunt. prout multi iracundi & furibundi, mul-
tos interficiunt. Puniuntur tamen propter facinus. Om-
nia quæ quis concupiuerit, tam diebus mercatus, quàm
extra, venalia in magna copia reperiet. Incidi tunc tempo-
ris in vnum, qui Maslok comedebat, sedens ad propoliū, in
quo pulvis prædictus, qui est subuiridis, vendebatur: cuius *Maslok po-
tius & alius.*
etiam partem, si vti vellemus, nobis propola offerebat. Is *Qui Maslo-
ko vtuntur,
in quamdam
veluti phre-
nesim inci-
dunt, præser-
tim si vinum
desuper bi-
bant. Cùm-
que vina
sint hic val-
de potentia
& fumosa,
etiam ex
racemorum
usu, Turca
quasi capite
iurbato in
furias agun-
tur.*
qui puluerem hunc hauserat, manibus circa caput aliquid
quasi prendere velle videbatur, oculis contortis, & homi-
ni furioso similibus prospectans, nihil loquebatur. Quere-
bam quidnam hoc esset. Respondit propola, hominem ca-
pitis dolorem maximum habuisse, & sumpto pulvere iam
conualuisse: videri quandoque illi, quasi sub arbori-
bus constitutus, fructus decerpit; vnde apparet, cum il-
lo iam meliùs agi. Mirum certè. Videbamus omnino,
miserum illum furore correptum, iste verò conualescere
illum asseuerabat.

Magnam ciuitatis partem obequitaui; relicta arce ad
læuam, extra portam, ad vnam Moschæam peruenimus,
quæ Magara vocatur: in quam Christianis ingredi licet,
dato aliquo honorario, & calceis detractis. Sunt enim hic *Magara
Moschæa, se-
pulchrum
Ægyptio-
rum clara.*
veterum Ægyptiorum sepulchra. Tota hæc Moschæa in
rupe est excisa, antra & cryptas plurimas, quæ longissimè
extenduntur, habens. Inde profecti, conscendimus præ-
altum montem è regione arcis; è quo maior pars vrbs, &

suburbia, in quibus tot Moschæas esse diximus, optimè conspiciuntur. Res est oculis periucunda, præsertim quòd per omnes vrbs partes, & extrà, quàm latissimè prospectus patet, ingens arborum dactyliferarum copia, ædificiorum culmina diuidit, noua ciuitate dumtaxat excepta, quæ non adeò frequētes eiusmodi habet arbores, quæ proceritate etiam turrium altitudinem superant. Quanta sit

Palma arbor.

palmae arboris elegantia, nullus ignorat. Attollitur enim rectà in altum, comam in cacumine habet: dactylorum autem fructus, non inter folia, sed suis inter ramos palmittibus ad ipsam arborem, tamquam viscus apud nos, innascitur. In hortos etiam prospectus peramœnus patet, quorum circa ciuitatem ipsam infinitus est numerus: in quibus

Saccharum.

saccharum seminatur, & crescit vt arundo, nisi quòd canna media, cui succus inest, crassitiem vnus brachij obtinet. Sunt tamen & graciliores. Horti assidue bouum opera, vt superiùs dictum est, irrigantur. Saccharum ad maturitatem perducitur sub finem Octobris, vt & dactyli: quamuis ij maturiùs etiam in Septembre colliguntur: neque pinguiori terra vel rigatione, vt saccharum, indigent; cum in arenoso solo proueniant, & ardore Solis gaudeant, qui radices sabali calore fouet ac planè decoquit. Quamobrem in Syria & circa Alexandriam dactyli non adeò præstantes obueniunt, quòd minus Solis habeant. Hic verò Cairi sunt planè maturi. Recentes sunt valdè dulces, habentes modicam nihilominus acredinem adiunctam, saporis non ingrati. Ex vna arbore tantum fructuum prouenit, quantum implendo vno cercuisiario nostro dolio sufficeret. Quòd verò nonnulli asserunt, palmam non nisi centesimo ab insitione anno dactylos producere, mera est fabula. Nam vt & ceteræ arbores, in tertio vel quarto anno fructificant, præsertim si sint depressiores. Tria siquidem sunt earum arborum genera. Vnum humile, quod dactylos communes profert: alterum

rum

rum productius, vt nostra pyrus, quod dactylos flauescētes & rotundos gignit, optimi saporis, sed non ita multum durabiles, cum facile marcescant. Tertium genus in magnam proceritatem excrescit, oblongos & sapidos habens fructus: quales ad nostras regiones non deferuntur: sed ex primo genere tantum. Arbores proceræ, in centum usque annos fructificant, postea sterilescent, unde apparet centum iam annos compleuisse, quando fructibus carent. In bonitate arborum, & cura adhibenda, vt & in ceteris, permultum est positum. In eodem monte est parua Moschæa, quam Sexain vocant: hic cum prospectu ciuitatis oblectaremur, misit ad nos Santon, vt illi aliquid tribueremus. Erat tunc ibi mecum Christianus quidam, morum regionis peritus, hic vetuit illi dari aliquid initio, vt nos recrearemur, & videremus quam libenter Turcæ ^{Turcæ pecuniæ cupidæ.} pecuniæ causâ faciant omnia. Cum itaque nihil illi dedissemus, misit ad nos, quod vellet nos ad Bassam deferre, tamquam exploratores, qui ciuitatem ex insolito loco circumspiceremus. Permisimus vt faceret. Consenso igitur asino homuncio senex, in viam se subito dedit. Nos vicissim ciuitatem versus ad dextram progrediebamur, quâ ad mare rubrum iter est: cumque aliquantulum promouisset, subsistebat, & respectabat, si fortè illi aliquid mitteremus. Nos per interualla denarios illi aliquot submittebamus, qui cum pauci illi viderentur, subinde asinum propellebat, & nos ad portam usque ciuitatis eum venire permisimus. Tandem aliquot ei grossis numeratis, gratias nobis egit, & contentus, Bassam non conueniens, reuersus est, succussione senex, satis, vt apparebat, fatigatus.

Santones eiusmodi, qui nudi incedunt, quos antea ^{Santones nudi incedunt.} quoque Damasci me vidisse scripsi, in Cairo sunt quam plurimi: sunt & alij diuersi, sed ij ceteris turpiores, qui pendendis planè detectis obambulant. Manè quodam tem-

pore cùm extra ciuitatem essemus, incidimus in quemdã ex ijs iuuenem, qui deuotionem suam turpiter & mirabili ratione peragebat. Nam quandoque versus Solem stando, eum inspiciebat, expansis brachijs: interdum sese inclinabat, & motus quosdam, vt mente captus, edebat. Vidimus deinde & alium paulò pòst: cumque hominis infaniam (quod isthìc non satis tutum) rideremus, quòd circa ventrem & femora turpiter manibus complofis luderet, ipse quoque nos intuitus cachinnum sustulit, & nos praterijt. Hi more pecudum per ciuitatem vbique oberant, & quidquid illis placuerit, pro victu quotidiano liberè auferunt, vtpote panem & fructus vbi venduntur. Aquam etiam obuijs eripiunt, si longiùs absit. A quo verò victualia eiusmodi rapiunt, is factum pro singulari gratia & felicitate reputat, quòd vir sanctus tale quid ab eo postulauerit. Et quoniam per Cairum, in lagenis coriaceis, aqua venalis circumfertur, videre mihi contigit, Santonem eiusmodi nudum, à quodam lagena accepta, aquam bibisse (quod & alibi vidi;) venditor verò aquæ caput inclinabat, manus complicatas attollebat, quòd illi tanta felicitas oblata esset, exultabat. Narrarunt nobis Christiani, qui à multo tempore in partibus illis degunt, idipsum & Turcæ affirmabant, quod hìc apponere libuit, nempe Santones istos nudiuagos in propatulo cum mulieribus coire, adhibitis quibusdam turpissimis superstitionibus; quas, ne honestæ aures offendantur, prætermittere satius fuerit.

Incipiens à suburbio, quod versus mare rubrum porrigitur, totam ciuitatem in longum pertransui: & quamuis asino calcaria superadderem, qui gradarij in morem passu laxiore ferebatur, vix tamen duabus horis finem nouæ ciuitatis attingi, inde per urbem veterem, & postremum suburbium vsque ad sepulchra Iudæorum, integra hora equitando consumpta. Quater longitudinem vtriufque

que ciuitatis, & suburbiorum, emensus sum trium horarum spatio, idque adproperando: vnde comperi illam ad tria nostra milliaria extendi, quandoquidem non rectè semper proficisci, sed quandoque propter plateas, circumnitione vti oportuit. In supradicto suburbio, quod versus mare rubrum tendit, extat theatrum, per quod via publica protenditur, sed longè alia ratione, quàm in Europa vidi, constructum. Nam in latitudine vix centum habet cubitos: in longitudine, vt qui mensurarunt fatentur, tria cubitorum millia obtinet: vnde apparet hippodromum olim fuisse, vbi cursus equorum & curruum instituebatur. Gradus ab utroque latere, in quibus spectatores confidebant, pauci, nec ij sublimes. Moschæ omnes turræ, quarum maximus, vt suprà dictum est, habetur numerus, in ipso cacumine tholos erectos habent: vna tantum in tota ciuitate, quæ theatro huic vicina est, tholo caret: cuius rei causam hanc adferunt: *Ædificium hoc, prout videre est, antiquissimum, sepultura Ægyptij cuiusdam Magi fuit: qui sub ipso dictæ fabricæ tholo, intus hieroglyphicis Ægyptiorum literis, sensum hunc insculpi fecit; Caput cerebro carens, nullius est valoris. Multis annorum centenis præterlapsis, delubrum hoc integrum permanfit, donec Selimus Primus Regnum & ciuitatem hanc occupauit: quo tempore Magus quidam Moschæam hanc ingressus, & sensu characterum intellecto, Selimum adiit, sibi que fanum eiusmodi donari petiuit: quod cum ab Imperatore, victoria tanti Regni potito, non difficulter obtinisset, tholum eiusdem Moschææ diruit, sub quo ingentem auri reconditi vim reperit: cuius pretio, domos, hortos, & alia id genus coëmit, potensque & prædiues euasit. In cuius beneficii monimentum, tholum delubri apertum reliquit, quod in hanc diem eo etiam solum in omni ciuitate caret. Res consideratione digna, quòd cum omnia fana, eamdem structurâ tholo superimposito obtineant,*

vnicum

Cairus ad tria milliaria nostra protenditur.

Theatrum hippodromicum.

Moschas absque tholo.

unicum hoc eo sit destitutum. Habet fenestram inferiùs versus plateam, intus aspectum admittentem. Non adeò magnum quidem, sed lucidum est, portam semper clausam habens. An aliquas hîc Turcæ superstitiones suas peragant, incompertum est. Nec enim, vbi sepulturae sunt, libenter ingrediuntur, sed Santones tantum: vulgus aut rarò aut numquam.

*Natarea
villa.*

Manè summo, cum Consule Mariano, conscensa scapha, per canalem maiorem, qui hospitium meum alluebat, secundo flumine ferebamur ad dimidium extra civitatem milliare. Apud palatium Gaurca conscendimus asinos; indeque non adeò magno milliari confecto, pervenimus ad villam satis frequentem, quæ vocatur Natarea. Hæc autem eadem est illa, in qua beatissima Virgo mater, cum filio puero Salvatore nostro, cùm in Ægypto esset, Matth. 2. per annos septem, vt Theologi sentiunt, habitabat. Est hîc antiquissima domus, in cuius parte nunc etiam visitur in muro receptaculum quoddam, instar armarij, longum & latum cubitum vnum, in quo Deipara Virgo filium Redemptorem nostrum recondebat. Sub quo est paruum altare, vbi Sacrificium Missæ celebrari solet. Nam quamvis Turcæ locum etiam hunc plurimum venerentur; habeantque Moschæam in vicinia; nihilominus, singulari quadam ordinatione diuina, Catholicis Sacerdotibus, ab immemorabili tempore Sacra hîc peragere licet: & eadem die, quæ fuit Dominica, celebrauit ibidē in nostra præsentia Franciscus Salsus, Societatis I E S V Theologus. Non procul à prædicto loco, est ibidem fons aquæ viuæ, & quidem vnicus hic in tota Ægypto, aliquot vlnas latus & longus, ac satis profundus, valdè frigidus & limpidus. Paulò post, aliquot cubitorum spatio interiecto, rota per tubulos eamdē aquā irrigandis hortis ministrat, quorum in hac villa non exiguus est numerus. Quoniam aqua huius loci est optima & clara, eius potu Bassæ & Sangiaci dele-

delectantur, ob idque per camelos sibi deferri eam procurant. Ad bonum iactum lapidis ab eadem domo, est ficus agrestis crassa & procera, quam ficum Pharaonis appellant. Ficus Pharaonis. Hæc arbor, diuino quodam miraculo, ab ipsis radicibus usque ad summitatem fissuram habet tam notabilem, ut si constringi posset, aptissimè in unum coiret & coniungeretur. Nam ubi in una parte eminent extremitates; in alia concauitatem proportionatam retinet. Ad radices in ipso arboris trunco, est quasi conclaue quoddam paruum, quod nulla arte humana, in tam vasta arbore præsertim, fabricari potuit. Ad eam cum beatissima Virgo peruenisset, repentè arbor miraculosè dissiliens nouæ hospitæ stupendam mansiunculam præbuit, in qua cum cælesti puerulo tamdiu lateret & quiesceret, dum pius & sollicitus Ioseph habitationem aliquam in pago inueniret. Intuentibus certè magnam arbor hæc præbet admirationem: intra cuius concauitatem, Turcæ lampadem habent appensam. Locum enim in magna habent veneratione, & fatentur, id quod cuius intuenti liquet, miraculosè fissuram eam fuisse apertam, in quam, Dei Spiritus (sic enim illi Christum appellant) vnà cum matre diuenteret. Arbor hæc sita est in * horto, in quo * Historici nonnulli balsamum proueniebat, cuius etiam exstant plantulae Hortos eiusmodi, duos circiter cubitos altæ, sed exaruerunt omnes. Nam Natareen- Assan Bassa, prædecessor Imbraimi huius, qui meo tempore prouinciam administrabat, Æthiopem quemdam ses proprio nomine vocant, ut Augerius Gissenius Busbequius legationis Turcicæ Epist. 4. qui curam balsami habebat, quòd magnam pecuniæ vim collegerat, præfocari iussit: quo factum est, ut nullo, qui arborum eiusmodi curam gerere nosset, reperto, penitus deperirent. In Felici tamen Arabia, Imperatore Solimanno procurante, balsamum in copia prouenit, ex hoc Balsami arbores. horto, ut plurimum, transplantatum: quod etiam Mechâ per Carauanam aduehitur, cuius mecum bonam quantitatem asportauit.

*Palatium
Gaurea.*

Redijmus deinde pro prandio ad palatium Gaurea, & ad læuam conspeximus Carauanam cum aliquot centenis camelorum progredientem versus ciuitatem Sues, quæ supra mare rubrum est posita. Palatium hoc ideò Gaurea vocatur, quòd à Sultano Gauro, potentissimo Ægypti Rege, magno sumptu exædificatum fuerat, vnà cum eleganti Moschæa, duobus præaltis tholis conspicua, in qua etiam sepulturam accepit: quæ post Moschæam Aromele (de qua dicitur inferius) pulchritudinis primas obtinet partes. Palatium hoc cum primis elegantes porticus habet, magnis & pulchris columnis sustentatas. In medio est piscina quinquaginta cubitos lata & longa, sex profunda: quam prædictus Rex, quoties aulæ suæ & populo solenne epulum exhibebat, quod sæpius fiebat, aquâ saccharo conditâ implere consueuerat; vt inde quilibet quantum volebat, biberet. Quamobrem ex omni parte, gradus marmoreos habebat, per quos aqua decrescente, ad hauriendum & bibendum descendebat populus: cui sub porticibus cibus apponebatur, ipso Rege ex habitatione superiori prospectante, quam modernus Bassa Imbraimus quandoque inhabitare solet, cùm per fossam Nili commodè nauigio huc peruenire possit.

*Cassia ar-
bor.*

*Moschææ
Carni cele-
brioris.*

Giamalasar.

Apud prædictum palatium, est procera Cassiæ arbor: qua in tota Ægypto celsior non habetur. Tiliæ magnæ similitudinem habet, proceritate & crassitie ipsius considerata. Sub vesperam aduerso flumine in ciuitatem reuerfi sumus, perlustratis aliquot palatijs & hortis elegantioribus, qui profluenti adiacebant. Diebus deinde ceteris, loca ciuitatis obibamus, quæ aspectui semper aliquid nouum obijciunt. Circumspiciebamus insigniores Moschæas, eas tamen non ingredientibus: quarum sunt hæ primariæ. Vna est, veluti apud nos Cathedralis, Giamalasar nuncupata: vbi Turcicus Patriarcha & Santones habitant. Habet areas octo, quarum duæ ad aliquot cubito-
rum

rum centena extenduntur. Eam, quòd aliquoties circumiuissem, intus per fenestras aciem oculorum diligenter dirigens, magnitudine ciuitatem Lublinensem excedere, ausim affirmare. Habet enim in circuitu vnum bonum milliare Italicum. Patriarcham hunc illorum, sæpius per ciuitatem mulâ furui coloris obequitatē vidi, quam Assan Bassa duobus Cecchinorum millibus emerat. aded ^{Mula Cauri magni pretij.} mulæ hîc magno pretio venduntur: quandoquidem magnitudine cum Italicis Curseris certant. Septem eius filij ^{Patriarcha Turcarum.} illum comitabantur; quatuor, iam canis aspersi, antecede-
bant; tres verò eum sequebantur. Omnes autem Santonum dignitate præfulgebant. Ipse statura parua, benè compacta, humeris vltra modum latis. Cidarim gerebat magnitudine incredibili, quæ extra vtrumque humerum, ad quartam cubiti partem protendebatur. Mirum quomodo tantum pondus in capite sufferre potuerit. Vestem exteriorē oblongam ex panno violaceo deferēbat. Vidimus & Vicepatriarcham eiusdem, aded suæ perfidiæ zelosum, vt in Christianos prætereuntes exspueret, tacitè aliquid obmurmurans; &, vt existimabatur, maledicta & execrationes in Christianos iaciens.

Altera Moschæa magnitudine notabili, versus arcem ^{Zuele Moschæa.} progrediendo, est ea, quæ Zuele nominatur: cui porta adiacet Bab dicta. Sed coniunctis duobus vocabulis Babzuele porta vocatur: in qua Selimus Primus Turcarum Imperator ^{Sultanus Tombeus suffensus.} Sultanum Campsonem, aliàs Tombeium, laqueo suspendi fecit, anno millesimo quingentesimo decimo septimo, die Aprilis vndecima: in cuius rei memoriam, etiam nunc fontes, magna ex parte, quod sæpius vidimus, ibidem suspendio afficiuntur. Et quamuis aliquis supplicio eiusmodi affectus dependeat; subtus nihilominus per eandem portam pertranscunt homines. Nam & latro strangulatus, altius alligatur; & portam transitoris, circuitus remotior permolestus esset.

*Saraffia
Moschæa.*

*Galea Iacobi
Regis Cypri.*

*Cyprius quo
prætextu Ve-
netis erepta.*

*Aromele
Moschæa.*

*Id Turcæ
pro certo
affirmant,
sibiq; cre-
di volunt.*

Tertia vocatur Saraffia: in qua per portam introspecien-
tibus apparet in pariete affixa peruetus galea: quæ fuisse
traditur Iacobi Regis Cypri, in bello quodam ab Ægy-
ptijs prærepta. Antiquitus, num ratione huius galeæ, vel
aliquo alio iure incertum, Reges Cypri annuatim Sultanis
Ægypti duodecim Cecchinorû millia pro tributo pende-
bant. Et eo nomine à Venetis Turca pecuniam hanc exi-
gebat: tandem lupino iure, ipsum Regnum occupavit.

Quarta Moschæa Aromele, quæ etiam Czerkassio-
rum appellatur, est ante ipsam arcem, magnitudine & ele-
gantia ceteras omnes exsuperans, quam Assan Sultanus
exædificauit. De modo, quo fuerit constructa, Annales
Ægyptiorum hæc habent: Assan tyrannus, vir callidus &
auaritiæ deditus, cogitans qualiter fanum aliquod ædificij
magnificentia conspicuum, nomini suo, absque sumptu
grauiore consecrare posset, hoc consilium adinuenit. Pro-
clamari vbique fecit, se constituisse Deo templum augu-
stissimum cōstruere: quod opus vt tanto felicius perficia-
tur, velle se publicam eleëmofynam, omnibus vndecum-
que venientibus, abundanter erogare: cui contribuendæ
locum & diem certam præfixit. Est area ingens sub arce
ad læuam, quæ muro tantum à dicta Moschæa distingui-
tur; in qua nunc Carauana Mecham perrectura colligi-
tur, magnæ hominum multitudinis capax, in qua meo
tempore ad duodecim aduenarum millia congregata, iter
Mecham versus adornabant. Huc infinitus hominum
numerus, ex tota Ægypto, illique adiacentibus Regnis &
dicionibus, confluxerat. Assanus autem indusiorum &
tunicarum ingentem vim parari curauit. Ab hac igitur
tam vasta area, per muri aliquot portulas, ad aliam in qua
nunc est dicta Moschæa, homines eleëmofynam acceptu-
ros, singillatim transire præcepit: quam vt quisque ingres-
sus, & ab aliorum conspectu auulsus erat, statim omnibus
indumentis suis spoliatus, ea ibidem relinquere, atque ita indu-

indusium & tunicam nouam pro eleëmofyna accipere cogeatur. Ad eum modum ex priore illa area, in posteriore transibatur, ignorantibus interim, qui in area remanserant, quid cum illis, qui aliam ingressi erant, ageretur: quos amplam ex liberalitate Regia eleëmofynam accipere arbitrabantur. Et licet quilibet, noua tunica restituta, suos veteres pannos libentiùs retinuiſſet (cùm vſitatum ſit iſthïc pecuniam induſio aſſutam, vel ſub cidari inuolutam, deferre) compellebatur tamen veteribus relictis, noua veſtimenta induere, & abire. Quamuis autem vulgus illud, eiulatus & clamores inconditos in Sultanum ederet, vbi tamen omnes in aliam aream tranſierant, indumentis ſuis exſpoliati, mox igne iniecto eadem illa concremari iuſſit: quibus abſumptis, tantam auri & argenti vim reperit, quanta ad excitandam illam ædificij molem ſufficiebat: ex cuius fabrica apparet, magnam tunc illum pecuniæ ſummam per fraudem collegiſſe, qua quod conſtituerat, egregiè perfecit. Sit fides penes illos, qui hæc ita ſe habuiſſe affirmant.

Id ea de cauſa Turcæ faciunt, quòd ſibi parum ſiſdunt. Teniores vero, qui certas ſedes non habent, nec arcas, vbi ſua recondant, pecuniolâ, ſi quæ illis eſt, neceſſariò ſecum ferre coguntur.

Quinta eſt Moraſten, vbi eſt pro infirmis Xenodochium, perampla itidem, rubeo alboque colore exteriori depicta.

Moraſten Moſchæa.

Sexta Igamalifſen, vaſta ſatis & conſpicua.

Igamaliſſen.

Septima Giamachiſon, quæ altiore præ ceteris omnibus turrim habet adiunctam.

Giamachiſon.

Cùm omnes hæ Moſchææ, verſus plateam, fenestras habeant apertas, crate tantum ferrea communitas, equo vel aſino vectis, quid intus agatur, facile patet proſpectus. Sæpius vidimus iſthïc Santones cum alijs, prandium vel cœnam, humi pro more ſedendo, ſumere: interdum ſericum, rotæ circumactione, vbi oblongior eſt Moſchæa, diduci; & fimbrias pro ornamentis veſtium, & cetera eiufmodi parari, quæ abſque maiore aliquo ſtrepitu perfici poſſunt.

S E P T E M B E R.

Prima die Septembris, Ioannes Scholcz, chirurgus excellens, quem habebam mecum, postquam in mörbum, cüm Damasco exiremus, incidisset; & podagra aliquamdiu vexatus, cüm non eam, quam debebat, valetudinis sue curam gereret, in dysenteriam prolapsus esset, hora circiter decima septima mortuus est. Vixdum spiritum exhalauerat, subitò Iudæus accurrit, vt à mortuo, Cæsari vetigal persolueremus: cumque quid moris esset ignoraremus, à Consule Mariano edocti sumus, solui à defuncto debere. Iudæus volebat, vt tamquam à negotiatore Cecchini sex numerarentur. Sed cüm constaret eum mercatorem non fuisse, tres tantùm Cecchinos accepit. Sepultus est extra ciuitatem, in parua Cophtorum seu Chaldæorum Ecclesia. Nam cüm non esset Catholicus, non potuit, vt alij, in Ecclesia beatæ Mariæ in veteri Cairo sepeliri: quod templum etsi quoque Chaldæorum sit, habent nihilominus & Catholici ibidem ad læuam magnam Capellam, vbi sepeliuntur, & Missa celebratur. Mos igitur talis hïc inualuit, quòd à quolibet homine vita functo, iuxta conditionem eius tributum pensitatur, à nostris præsertim Europæis. Si Consul mortuus fuerit, quindecim Cecchini soluuntur. A quolibet Iudæo, grossi aliquot: à Chaldæis itidem, quorum magnus est hïc numerus, penditur etiam aliquid. Habitat enim hïc illorum Patriarcha, qui idem est & Abyssinorum. Mirum autem est, cüm in religione dissideant, quòd nihilominus vnum Patriarcham agnoscant. Vtraque natio die octaua circumciditur, quinquagesimo verò à natiuitate sua die, vnusquisque eorum baptizatur. Circumcisionem quidem adhibent, quòd eam seruare Deus Hebræis mandauerit, Baptismum verò, quòd post resurrectionem Dominicam, hac ipsa die Spiritus sanctus in Apostolos descenderit. In
summa,

*A defuncto-
rum sepul-
tura tribu-
tum datur.*

*Patriarcha
Chaldæorū
& Abyssino-
rum idem.*

summa, ab omnibus mortuis, solis Turcis dumtaxat exceptis, tributum Cæsari dependitur: quod ingentem pecuniæ summam efficit, vt quidam affirmant, & verisimile videtur, propter tantam hominum ex diuersis nationibus multitudinem.

4. Fui in arce, quæ in monte satis alto posita, muro valido ^{Arx Cauri.} ex lapide quadrato vndique præcingitur; habetque turres rotundas per circuitum. In medio eius ad læuam est propugnaculum, in area non ita magna erectum, habens in angulis turres quatuor rotundas ex lapide secto: fossa murata circumdatur. Paulò vltteriùs est palatium, quod Bassa inhabitat, satis elegans, & habet aream spatiosam. Ad læuam, in arcis ingressu, prope ipsam portam est longa porticus, quæ ad parietem scamnum habet præaltum, cum scabello ex lapide quadrato. In hoc superiore scamno, sub pœna capitis, nemini sedere licitum; eò quod Selimus Primus, anno Domini millesimo quingentesimo decimo-septimo, die vigesima quinta Ianuarij, occupata Cairo, ^{Selimus Primus Caurum occupas.} arcem hanc cum triumpho ingressus, equo defiliens, in hoc ipso scamno primùm sedit. Ob cuius rei memoriam in veneratione habetur. In scabello tamen semper magna hominum series confidet. In eadem arce est itidem elegans Moschæa, de foris expolita, quam Solimannus quidam Bassa, cùm Cairo præesset, construxit: in qua successores eius suas supersticiosas deuotiones peragere solent. Arx hæc cum propugnaculo, quod pro arce itidem reputatur, est magnitudine cum primis notabili: quam Itali ciuitati Treuisanæ, in Foro Iulij, parem faciunt in circuitu.

Fui iterùm in arce. E regione supradicti propugnaculi, ad dexteram est peruetus palatium Ioseph filij Patriarchæ ^{palatium Ioseph.} Iacob, ab eodè dum Ægyptum gubernaret constructum: nunc non inhabitatur, patetque per illud aditus ad vltiores habitationes. Columnis magnis ex vno lapide integro formatis sustentatur. Structuram habet mirabilem, varia

varia sculptura exornatam, omni ex parte adhuc integram. In omnibus Cairi ædificijs ea ratio fabricæ servatur, ut in summa ædium parte, magna rotunda vel quadrangularis fenestra, ad vitandos æstiuos calores, habeatur: infra quam aliæ itidem fenestræ eo ordine disponuntur, ut ventus liberè hinc inde perflare possit. Simili modo & palatium hoc, habet quidem supernè in medio eiusmodi rotundam fenestram triginta circiter cubitorum magnitudine, sed in angulis concamerationum, aliæ fenestræ, quibus admittitur ventus, adeò mirabili artificio sunt apertæ, ut etiam si extremi calores incumbant, habitatio tamen illa semper sit frigida. Ab eodem palatio ad sinistram superiùs procedendo, prope habitationem Bassæ, est puteus, quem idem quoque Ioseph fabricarat, adeò stupendo & admirabili opere, ut nunc tale quid à quoquam extrui possè, sit prorsus impossibile. Est forma quadrangulari: cuius latus quodlibet viginti cubitos complectitur. Profunditas verò ipsa trecentorum cubitorum est. Centum & quinquaginta cubitis, videlicet ad medium usque, non solum commodè inferiùs descendere, sed iumento quoque vehi licet. Nam cum puteus totus in rupe sit excisus, curritoria in rupe sunt itidem excisa; quæ puteum ambiunt, & per decliue in profundum, per quadrilatera deducunt, ut securè & nullo negotio, equo insidendo, ad imum descendere possit. Curritoria eiusmodi sunt quatuor cubitos lata: habentq; lumen copiosum, quandoquidem fenestræ sunt excisæ versus puteum; qui cum sit tanta latitudine, sufficiens lumen, per curritoria descendentibus, ministrat. Itaque boues ad medium hoc putei descendunt, qui ab ipso putei fundo, centum quinquaginta cubitis, vrinis ad funes alligatis aquam sursum extrahunt. Puteus autem ipse ex quo aqua educitur, non quadrangularem, ut superior illa, sed rotundam formam obtinet, habetque per diametrum, latitudinis cubitos decem. Porro aqua

Puteus Ioseph.

ex puteo isto interiore extracta, in receptaculum seu castellum, quod instar piscinæ ad latus putei, in eadem rupe magnis impensis excisum, decem & aliquot vlnas in longitudine, totidemque in latitudine habet, infunditur. Ex piscina verò, centum & quinquaginta cubitis, per superiorem quadrilateram putei partem, à bobus suprà trahentibus, educitur, & in lapideos canales exoneratur, per quos deinde ad arcem superiorem, vbi Bassa habitat, in cubicula, & vbi necessitas exigit, per aquæ ductus opportunos commodissimè deducitur. Ad aquam huiusmodi extrahendam, sunt assiduè quadraginta bouum paria destinata, quæ die nocteque huic operi alternis vicibus incumbunt. Viginti paria inferiùs deducuntur: vbi quodlibet par quatuor horis laborat: viginti alia superiùs, per horas totidem, attrahunt. Non cuius autem passim puteus hic videndus obijcitur, cùm superstitione quadam hîc Turcæ ducantur, quòd aqua hæc Bassæ, & aulæ ipsius visibus deseruiat. Credunt enim, quòd Christianorum oculis eæ res fascinentur, quibus illi libenter vtuntur. Vnde & equum, quem in delicijs habet Turca, Christiano videndum non priùs exhibet, nisi nugas illi quasdam applicuerit, quibus fascinationem depelli posse arbitratur. Ego quòd putei huius Magistro honorarium quoddam obtuleram, videre miraculum hoc permissus sum: descendique ad putei dimidium, vbi boues aquam eductam in piscinam siue castellum effundunt.

*Turca à
Christianis
fascinari se
credunt.*

Scapham ingressi, per fossam principalem hospitio meo adiacentem aduerso flumine ad eum locum delati sumus, in quo Bassa aggerem perruperat, qui in veteri vrbe, vt iam diximus, erat. Ibidem in ripa ad læuam extrat magna turris rotunda ex lapide quadrato, non quidem alta, sed crassitie notabili tumescens: in qua rotæ ministerio per tubulos artificiosè aqua sursum educitur,educta, in aquæ ductus ex quadrato itidem lapide factos, quales etiam Ro-

*Turris a-
quaductus.*

Aquaductus.

*Mamymir
pagus.*

mæhabentur, infunditur: qui ad medium milliare protracti, aquam ad arcem inferiorem, prout puteus Ioseph ad superiorem, in qua Bassa moratur, conducunt. Inde per Nilum prospero vento nauigantes, confectis quatuor magnis milliariis, circiter horam vigesimamsecundam peruenimus ad quemdam magnum & valdè populosum pagum Mamymir dictum. Habebam mecum tres Ianissaros: & quia pro nocte nobis hîc manendum erat, conduximus præterea duos notos Arabes, qui in ripa excubias agerent. Scapha exeuntes, deambulauimus per pagum; postea in eadem scapha cœnauius, propter securitatem, vt moris est, nauicula ad vlnas aliquot à ripa deducta, & iactis anchoris, Arabes custodes in ripa fluminis constituimus. Cùm obdormissemus, circa tertiam noctis horam, duo tympana Turcica cum duobus lituis perstrepere audiuius. Musicam sequebantur ferè centum Ægyptij, cum facibus multis, & telis seu iaculis longioribus, quibus in bellis vti consueuerunt, versus nos progredientes. Ianissaris quidnam hoc sibi vellet ignorantibus, nos quoque bombardas longiores arripuimus, quas nouem, minoribus exceptis, habuimus: quibus nos armatos, interdiu deambulantes, quòd iam antea viderant Ægyptij, paratos nos esse considerantes, per nostros illos custodes, qui in ripa remanserant, significari nobis fecerunt, ne bombardas in illos exploderemus; quandoquidem ad ripam accessissent, vt spectaculo exhibito nos recrearent.

*Ægyptiorum
sponsorum
chorea.*

Quòd enim hac nocte quidam ex illis vxorem ducturus esset, agilitatem suam demonstraturus, saltationes edere debebat. Permisimus itaque vt ripæ propiùs appropinquarent. Cœpit igitur sponsus ille ad Musicos numeros saltare, mirabiliter sese huc illuc contorquens ad tripudij Moscouitici similitudinem, quandoque etiam terræ adlabens, vt nostri Haidones solent. Sponsum propinqui simili ratione saltantes imitabantur. Durabat hæc chorea
illorum

illorum per dimidiam circiter horam. Misimus postea illis decem & aliquot grossos; quibus cum gratiarum actione perceptis, ad villam sunt reuersi, in qua totam ferè noctem choreas duxerunt, nec nisi sub diluculum sponsus uxorem traditam accepit. Nam quò in saltando se magis agilem & expeditum præbuerit, hoc citius sponsam accipit, iuxta morem vulgi receptum: qui, ratione feminarum, mirabilis hîc apud illum obseruatur. Nam in decimum vsque ætatis annum, puellæ agrestium, in villis incedunt nudæ per totam Ægyptum, postea indusio bombycino amiciuntur, facie panniculo simili velata, foraminibus pro oculis excisis: qui vento faciliè commouetur, vt facies non difficulter conspici possit. Faciunt & hoc feminae agrestes, quod etiam in vrbibus nonnullæ è vulgo obseruant; quo tempore adhuc nudæ incedunt, aqua quadam corrosiua, in corporis cute, florum quamdam speciem depingendo effingunt, cui deinde diuersorum colorum varietatem superinducunt: qui adeò corpori adherent, vt nulla deinceps arte ablui & deleri possint. Mirabile est videre, corporis pellem floribus depictis variegatam, & colores perpetuò retinentem.

Post saliorum sponsalitorum discessum, cœperunt nobis latrones regionis insidiari: sed cùm aduigilarent custodes, & nos ad bombardas confugissemus, tacitè dilapsi & dispersi sunt.

11. Primo manè, conscensis asinis quos Cairo præmisimus, progressi sumus ad vnum bonum milliare, inter Pyramides ad Meridiem positas, penes quas sunt antra plurima subterranea in petra excisa, quæ vel Parochiæ olim fuerunt, vel familiarum diuersarum sepulchra. Nuncomnia sunt arenis oppleta; quibus amotis, per funes in cryptas illas descenditur. Quamobrem & nos, apud Pyramidem quamdam altiorē, in foramen decem & ampliùs vlnas profundum, nos eadem ratione demisimus: vbi in

*Mumia
quid, & eius
extrahendi
ratio.*

*Idola Ma-
mularum.*

petra reperimus plurima alia antra in longum excisa: in quibus multa hominum cadauera erant sepulta: è quibus Mumia, quam vocant, petitur. Affirmant, ea corpora siue balsamo, siue alijs diuersarum herbarum vnguentis condita fuisse: quæ qualia esse potuerint, discurrant Medici. Apparet certè aliquid egregium & singulare fuisse: quandoquidem à tribus annorum millibus, absque minimi alicuius membri putrefactione, eiusmodi corpora integra in hanc vsque diem conseruantur. Quotquot igitur hîc cadauera reperiuntur, (quorum magnum numerum inueni, cùm eò me demississem cum Arabibus, qui ea vendere consueuerunt) omnia intus, quandoquidem exenterari more Anatomico solent, idola quædam reposita & circumcircà etiam collocata habent.

*Personata
defunctorum
facies.*

Idola hæc sunt ex argilla, cærulei vel violacei coloris, ad vnus digiti longitudinem; quædam etiam minora, formam infantuli fasciolis circumligati, adiectis multis Ægyptiorum characteribus, exprimentia. Qualia autem sunt idola, tali modo & ipsa corpora linteis sunt inuoluta, quæ ob antiquitatem adèd sunt marcida, vt papyrum combustam, quæ nigrescit & facillimè diffluit, imitentur. Singula autem membra, separatim tela obuoluuntur. Tumbæ siue lapideæ, siue ligneæ, in quibus apparet nobiliorum corpora fuisse reposita (aliorum enim vulgarium sine ordine in terra simpliciter proiecta iacent) eadem ratione sunt paratæ, qua corpora inuoluta, & idola recondita. Sunt ibidem & alia idola maiora; quorum nonnulla vnus cubiti habent magnitudinem, & defunctorum cadauera circumdant, ex lapide vel ligno, diuerso formarum genere efficta. Nam alia hominum, alia auium, alia reptilium, alia dæmonum, prout apud nos depinguntur, simulacra retinent. Corpora, quæ in tumbis deposita reperimus, habebant in facie personas coloribus vel auro depictas: ex quibus apparebat, lineamenta faciei eorum qui depo-

fiti

siti ibidem fuerant, ea ratione ad viuum fortassis expressa fuisse. In tela verò, qua corpora sunt inuoluta, veluti limbi & cinguli, passim ex minutis vitreis diuersorum corporum orbiculis, assuti vbique conspiciuntur. Sunt deinde zonæ, materia quæ gemmis (non sunt tamen) assimilatur, vbique punctatim refertæ: quibus supernè, linteamina illa fimbriata, præcinguntur. Inter masculorum & feminarum cadauera discrimen nullum: vnde colligere est, mares barbæ pilos non nutriuisse, nisi quòd eorum corpora vastiora sunt, & diuersam à mulieribus personarum formam, & capitis ornamentum retinent. Tanta autem est in eiusmodi cauernis horum cadauerum multitudo, vt qui ea perlustrare vult, pronus perrepere necesse habeat; qua de causa, pauci sunt qui fastidium hoc perferre valeant. Ex eiusmodi igitur corporibus, vt antè innuimus, Mumia conficitur: quæ aromatum & vnguentorum pinguedine adeò condensantur, vt in modum picis indurata, resplendeant; cerebrum præsertim, muscoli & scapulæ carnosiores. Nam pectus, manus & pedes, cùm modicum carnis habeant, & in modum membranæ extendantur, huic rei non deseruiunt. Odor ex eiusmodi corporibus proueniens, non est adeò grauis, vt facilè tolerari non possit: propter aromata tamen acutior est: & quantum ex narium iudicio colligi potest, myrrhæ multum vnguentis hisce admisceri debuit. Nam vbique per cauernas, illius odor acriùs spirabat. Ossa eiusmodi corporum sunt candidissima: quibus vnguentorum illorum compositio candorem mirificè conseruat. Tum & hoc non caret admiratione, quòd circa eadem antra extrinsecus magna vistalium ossium proiècta iaceat, ingenti varietate, à quibus Mumia ablata. Inter quæ non obiter nec breui tempore contemplantur caluarias & inferiores maxillas, vbi dentes fixi: nullam autem inuenimus omnino, quæ vel vnum dentem cariosum, aut aliquam euulsionis notam habuerit, ita

*Egyptio-
rum in ex-
ornandis
& condien-
du defuncto-
rum corpo-
ribus dili-
gentia.*

in omnibus maxillis erant pleni, sinceri, & candiduli dentes instar ossium aliorum. Apparet homines fuisse bene sanos, & expertes doloris dentium. In nonnullis caluarijs, & ossibus manuum atque pedum, vulnera cæsione fractioneue in viuis inflictæ cognoscebantur, simul quomodo vulnerum oræ se glutinarunt. Sed hoc mirabile prorsus fuit, in tanta ossium multitudine (ferè enim aliquot centurias maxillarum inferiorum & capitum collustrauimus, ad extremum manibus tractauimus ac versauimus) nullam maxillam fuisse, quæ dentium aliquo vitio laboraret. Fuerunt multæ seniles, quibus dentes breues & erosi extabant (quales in senibus videntur) at quæ dentem vllum putridum, cauum, foraminosum, aut signum elapsi haberet, fuit nulla. Emeram tunc temporis ab iisdem Arabibus duo corpora maris & femine duobus Cecchinis, quæ ibidem in tumbis reposita inueneramus: de quibus quid actum sit postea, cum Alexandria nauigaremus, dicetur inferiùs.

Hæc quæ de Mumia ex ipso visu certissimè didici, hîc referre libuit: idque ea de causâ maximè, quòd aliter à multis ea narrari audiui. Affirmant enim, quòd Mumia sit ex ijs corporibus, quæ in partibus illis arena obruuntur.

*Mumia non
fortuitò sed
arte conficitur.*

Sed meræ sunt fabulæ. Nec enim Mumia fortuitò fit, sed ex corporibus, ab immemorabili tempore vnguentorum commixtione conditis, ita vt dictum est, coalescit. Fabula est itidem, quòd arena aliquem obruere & præfocare debeat; nisi fortè quis ex industria ad eum effectum sese composuerit: quod vel in ipsis partibus nostris, vbi terra est arenosa, euenire posset. Quamuis enim per arenas illas (quas nostrates Arenosum mare vocitant) dum validior est ventus, iter peragi non possit, & necessariò sit sustinendum, quoad ventus conquiescat: nullus tamen stantium arenis obruitur, nisi fortè, si quem mori ibidem contingeret, non sepeliatur: quod non rarò euenit. Tunc enim

*Arenarum
Arabiarum
commoda.*

enim corpus eiusmodi, maximo Solis ardore in arena ita decoquitur, ut nigredine carbonem exsuperet: Mumia tamen ex eo non fit, nec vñsibus aliquibus prodest. Profecturi igitur per arenas illas, expectare propter ventum coguntur ijs de causis, quod vias cumulis arenarum, quæ fluidæ sunt, impetuias reddat; quodque puluerem oculis inimicum excitet; tùm quod signa quædam itineris auferrat, quæ profecturi necessariò debent obseruare, cùm diebus aliquot transeundum sit, vbi ne minima quidem arbor, vel rupes videri potest. Ad hæc cameli quoque pulueris molestiam tolerare non valentes, miserè sese contorquent. Quamobrem dum confidat ventus, ut dictum est, meritò expectare viatores debent; neminem tamen viuum arena obruit.

Cùm in subterraneas cauernas illas, conductoribus Arabibus, nos cum Ioanne Emo Veneto demitteremus, præmoniti fuimus, ut si non pugiones, saltem cultros nobiscum intrò deferremus: sæpius enim accidere solere, quod Christiani ibidem interficiantur; haberemus in omnem euentum, quo nos defendere possemus: sed ut ne simul quoque omnes descenderemus; utque aliqui è nostratibus in superiori parte, cum bombardis pro custodia remanerent: contigisse aliquoties, quod superuenientes Ægyptij, vel Arabes deprædatores, eos qui intus descenderant, terra obruebant, rebus eorum quas superius reliquerant, ablatis: quandoquidem indusio tantùm, & quodam ex tela simpliciore amictu retento, descendendum intus est, propter puluerem, & aërem inclusum ac suffocatum, qui antris includitur. Cùm iam cryptis prædictis appropinquaremus, accurrit Arabs quidam eques, quem Ianiissari & Arabes nostri exploratorem iudicabant. Sed vbi nos bombardis armatos aspexit, illicò discessit. Igitur cùm me in subterranea demitterem, familiares meos bombardis armatos cum duobus Ianiissaris, ad

os antri reliqui. Tertius enim apud scapham, ne nobis eriperetur, remanserat. Postquam ex antro sumus extracti, ad scapham reuertebamur, per ruinas, quarum nonnullæ eo in loco exstant, vbi antiquitus Memphis erat: cuius tam amplæ, vt diximus, ciuitatis vestigia, præter Pyramides nulla planè conspiciuntur. Villas etiam aliquot pertransiimus, per quarum aggeres aperto exitu, Nilus maximo impetu ferebatur, campos, qui supra Cairum sunt, inundans. Paulò post meridiem, ad scapham peruenimus, & asinis Cairum remissis, secundo flumine trium horarum spatio ad veterem ciuitatem delati sumus: quam, naue egressi, obequitabamus, ruinas eius considerantes, in quibus egregia quondam constructa fuisse palatia appareret: prout etiam nunc plurima, magnifico sumptu suscitata conspiciuntur. Fuimus & in duabus, quæ ibidem sunt, Christianorum Ecclesijs; vna est beatissimæ Virginis, in qua sunt Moniales Chaldææ, quæ eandem cum Abyssinis obseruant religionem: altera S. Georgij, quam itidem Sanctimoniales Chaldææ obtinent. Huic est adiuncta perampla Catholicorum Capella, cuius superius meminimus. Postèa ad nouam Cairi ciuitatem, circa occasum Solis, redijmus.

*Ecclesie
Christianorum
Cairi.*

Tertia vice arcem sum ingressus: vbi Bassa iudicia exercebat. Habebat ad latus Sangiacos viginti, Czausfios circiter ducentos. Atrium maximum, omni hominum genere fuit refertum. Indutus erat veste talari ex raso serico onychini coloris contexta, aureis confibulationibus anteriùs exornata. Puer flabello ventum ei faciebat. Iudæorum litigantium magnus erat numerus. In area inferiori sexcenti stabant Ianissari: vbi etiam vltra decem & aliquot paria struthionum cicurum obambulabant: inter quos, duò stupendæ magnitudinis, etiam ipsis incolis, quibus eiusmodi animalia videre non est insolitum, erant admirationi.

Bassa iudicia.

Struthiones.

Moris

Moris est, antequam Bassa Senatū ingrediatur, vel causas iudicare incipiat, ut prius causa deuotionis Moscham adeat, prout eadem die hanc in arce adiuit, quam Bassa Solimannus fabricauerat, cuius superius mentionem fecimus. In reditu ex Moschæ, occurrerunt ei propinqui cuiusdam occisi, conuerentes de eade sui consanguinei. Erant verò circiter viginti, qui potu quodam, etsi non vino, sed quod tamen caput peteret, inebriati, in fontem hominem interfecerant. Respondit Bassa, iuris esse, qui ^{Ebriarum} ^{Turcarum} ^{fustigatio.} ebrius hominem mactauerit, eum fustigationis pœnam subire debere; quandoquidem non ille, sed potio rationis impos, homicidium perpetraverit: quoniam autem viginti essent, & quidem ebrij, homicidij istius nomine accusati, qui vnicam tantum personam interemerunt, neque constaret quisnam eorum plecti deberet, iniquum esse, propter vnum occisum in viginti pœnam extendere. Pronuntiavit igitur, frustra propinquos occisi conqueri: cum non adeo magnum censeretur debeat, vnum à viginti ebrijs interemptum. Adhæc in corpore occisi non vulnera, sed liuentia tantum signa percussione apparere; vnde liquet, potationem potius, quàm malam illorum voluntatem, causam homicidio præbuisse. Ita causâ decisâ, accusatores discesserunt. Tres tamen vel quatuor, quibus præ ceteris homicidium hoc imputabatur, malè sunt fustibus à Ianissariis excepti. Cum ex arce discederem, in area maiore ad sinistram, Carauana Mecham profectura congregabatur. Nam propter calores nimios, non nisi mense Octobri in viam se dare consuevit. Et iam tunc ultra duodecim hominum millia congregatum iri existimabantur; quandoquidem omnes catalogo Bassæ inscribuntur, qui eò proficisci constituerunt.

Manè sacrosancto Missæ sacrificio audito, & diuinissimo Sacramento suscepto, Cairo discessi, circa quintamdecimam horam Dzermam conscendens, & per Nilum se-

*Turcarum
ieiunium
Septembris
mense.*

cundo flumine vectus. Appropinquabat Turcarum solenne ieiunium, quod illi seruare consueuerunt, noua Luna Septembris conspecta, & durat quousque noua vicissim Luna mensis Octobris conspiciatur. Octiduo antequam discederem, suas iam caerimonias peragebant, quæ ieiunium hoc ipsorum antecedunt. Nam omnes Moschæarum principalium turres, post occasum Solis, lampadibus ad ipsam vsque summitatem, per totam noctem accensis vndique collucebant: quæ in tanta delubrorum Cairi multitudine, elegantissimum præbebant intuentibus spectaculum. Diem hanc & noctem absque intermissione nauigationis continuabamus, eandem cautionem propter latrocinia adhibentes, quâ, cum Cairum deueheremur, vsi fuimus.

*Crocodilus
Niluaci.*

Die insequenti ventum minùs propitium habuimus. 17. Ostendebatur nobis Crocodilus fluuium tranans: sed quòd maior erat distantia, rectè considerare non potuimus; quandoque tamen tergum natantis ex aquis prominebat, ad morem Delphini in mari colludentis. Videbatur is non magnus fuisse, ad mensuram mediocris hominis utroque brachio expansi. Minùs frequentes hîc habentur, propter villarum multitudinem & hominum frequentiam. Sed supra Cairum versus Sait, multi & magni reperiuntur, ad ternam brachiorum hominis expansionem. Vidi vnum, non viuum tamen, decem cubitorum magnitudine. Vesperiperuenimus ad ciuitatem Fua, ripæ Nili adiacentem, non adedò magnam illam sed elegantem. Turris Moschææ, ob prædictam instantis ieiunij Turcarum solennitatem, lampadibus accensis erat vndique condecorata. Inter fructus ceteros, ciuitas hæc malorum granatorum vbertate excellit: quæ nullibi maiora, ut ipsemet vidi, reperiuntur. Eadem nocte tribus miliaribus confectis, sinistrorsus fossam fluminis arte paratam ingressi sumus, quæ Alexandriam vsque pertingit.

*Fossa Ale-
xandriam
Cairo ducēs.*

git. Computatur autem pro octauo Nili brachio.

Tota die hac, inter villarum frequentiam nauigabamus per hunc canalem, qui triginta cubitos plùs minùs habet in latitudine, profunditatem verò tantam, quanta Dzermis maioribus sufficit: aqua tamen caret, quando Nilus non exundat, totusque planè desiccatur. Vbi verò fluuius intumuit, per eundem aqua Alexandriam perducitur, & omnes cisternas ciuitatis implet, quæ aliunde dulcem aquam habere non potest, ac ne puteos quidem similis aquæ. Atque hac ipsa de causa fossa hæc deducta est. Ciuitas enim hæc situm depressiorem habet, nec propter maris vicinitatem bonam aquam potest habere: vnde hæc deductitia, in cisternis per totum annum diligenter asseruatur, quoadusque Nilus exundet. Cisternarum eiusmodi publicarum, & quæ priuatorum ædibus continentur, ingens est numerus: in quibus, si quando casu aliquo fortuito aquam deficere contingit, propter eius penuriam, multi incolæ Alexandria excedere coguntur. Cum Imbraimus Bassa, propter Ægypti gubernationem, Alexandriam cum triginta & amplius triremibus peruenisset, aquam adeò consumpsit, vt propter eius inopiam, quamuis diutiùs manere in ciuitate constituerat, sexto tamen die, Rosssettum proficisci, inde verò per Nilum, Cairum peruenire necesse habuerit. Distat autem Rosssettum octo ab Alexandria milliaribus, vbi extremum Nili brachium versus Barbariam in mare influit: per quod è Cairo benè oneratae naues Rosssettum deferuntur: quandoquidem per canalem Alexandriam deductum, nauigia maiora commeari non possunt. Septem nihilominùs Nili brachijs, in suis alucis permanentibus, maioribus Dzermis commodè nauigatur; præcipuè tamen duobus, quorum vnum Damiatam, alterum Rosssettum ducit, etiam maiores & oneratae naues rectè deferuntur, quòd duo hæc ostia latiora sint & profundiora. Rosssetto, mari-

*Alexandria
dulci aqua
deserta.*

tima nauigatione , Alexandriam vsque , circiter decem milliaria numerantur . Quoniam eadem die noua Luna Septembris oriri debebat, Ianissari, quos tres habebam, & nautæ Arabes viginti , integram diem à cibo abstinebant, Nouilunium sub occasum Solis accuratissimè obseruantes: quod cùm videre non possent, petiuerunt à nobis , vt Lunam exorientem ipsis indicaremus: quam paulò pòst, vbi magis tenebrę inualuerant, aspeximus. Nam cùm tertia esset ab eius ortu dies, difficulter dignosci poterat. Visam tamen, mox eis denuntiauius: qui, cùm nobis gratias hilariter egissent, Luna conspecta, defixis in eam oculis, & manibus expansis precationum suarum cærimonias inchoarunt . Postea statim carnes, pisces, & quidquid illis apponebatur, comedebant: totamque noctem sedentes cibis infarciebantur dum illucesceret, asserentes interdum comedere peccatum esse, nocte non item: & vt Alexandria vidimus, opulentiores & primarij, vsque ad meridiem somnum protrahunt: inde Moschæas precum fundendarum caussa frequentant: quod dum fit, è summitate turris vexillum maius appenditur (Alexandria ex serico violaceo prominebat) vix per quartam horæ partem; quod finitis precationibus statim demittitur . Sic quilibet redit ad propria, post occasum Solis cibum sumpturus: vtque nobis Christiani nostrates, qui Cairi habitant, retulerunt; cùm hora comedendi appropinquat, paulò ante Solis occasum, quibus id negotij incumbit, cum tympanis per ciuitatem discurrent, subinde vociferantes, licitum iam esse comedere, bibere, & quauis minùs honesta operari. Alexandria tamen, eiusmodi cum tympano proclamationes non audiui.

*Ecce Turca-
vniuersa.*

Quatuor circiter nostra milliaria progressi inter rui- 19.
Alexandria, nas amplissimorum palatiorum & palmarum dactyliferarum, vtramque aluei ripam præcingentium, Sole iam ex-
oriente, peruenimus ad portā ciuitatis Alexandrinæ, quæ
ante

ante Alexandri Magni tempora vocabatur Racasta, & abest ab ipsa ciuitate, quarta milliaris parte, vbi è canali in terram descenditur. Significaui de aduentu meo statim illis, cum quibus iamantè Cairi notitiam contraxeram; qui cùm aduenissent, conscensis asinis, versus ciuitatem profecti sumus. Non longè à porta vrbis, ad sinistram in monte sublimi, est columna Pompeij elegàs & mirabilis. Basis cui *Columna Pompeij.* insistit, est alta cubitos sexdecim, habens in qualibet quadranguli parte cubitos nouem. Columna ipsa in rotundum ex lapide formata, habet sexaginta cubitorum altitudinem: latitudinem verò tantam, quantam homines quatuor passis brachijs complecti possent. Capitellum cum abaco quadrangulari, decem cubitos altum. Tota itaque columna, cum suis membris, ad altitudinem octuaginta sex cubitorum confurgit. Color marmoris est cinereus, qui in ipsa columna ad rubedinem vergit, adeò vt basis & capitellum diuersi generis esse videantur. Mirum qua ratione lapides tanti ponderis, in montem adeò altum pertrahi, & pertracti erigi potuerint. Narrant Historici, qualiter à Iulio Cæsare erecta, & cur Pompeij columna sit dicta: ego supersedeo.

In ipso portæ ciuitatis ingressu, Turcæ perlustrabant, si quid mercium haberemus. Sed cùm Hebræus interpres, quem Consul Venetus isthicalit, nobiscum esset, dixit res nostras in scapha esse, quæ asinis impositæ nos sequerentur. Quamobrem idem cum seruatoribus meis ibidem remansit, dum vectigal persolueretur. Nec enim à mercibus tantum, sed à minutissimis quibusque rebus, & à pecunia ipsa, Alexandria telonium numerare oportet. Ego interea ad Caruaseriam seu Contubernium Venetorum profectus, ibidem sum hospitatus. Prandio sumpto, iui ad videndum portum, cum mercatore Veneto mihi noto Hieronymo Vitali, qui, cùm notitiam haberet cum Turcico Capitaneo, qui paulò ante aduentum meum,

Rhodo cum decem triremibus Alexandriam appulerat, voluit cum eo colloqui. Petiui itaque vt me pro socio secum acciperet, quò triremem huius Capitanei, qui primus post Occhialum habebatur, videre possem, qualiter sit milite & bellicis tormentis instructa. Nec enim aliter, quàm sub mercatoris specie, eò patebat accessus, Turcis id sedulò cauentibus. Conscensa igitur nauicula, deuenimus ad triremem. Capitaneus tum præsens non adfuit, in ciuitatem profectus. Expectabamus dum veniret, plusquàm dimidiam horam. Triremis erat elegans, tota deaurata, minor tamen quàm quibus Christiani vtuntur: Turcicæ namque omnes sunt minores. Serui omnes erant Christiani, quini ad remum alligati, vsque ad mediam nauis arborem, deinde tantum quaterni. Homines ad bellum apti vix quadraginta, tormenta bellica satis multa. Cùm rediisset Capitaneus, postulauit à mercatore, vt pannos diuersorum colorum, de quolibet quinque frustra, ex Europa illi procuraret. Deinde iussit nobis dari vix Rhodiæ racemos, qui tantæ erant magnitudinis, vt ad tres vlnę partes extenderentur. Grana verò singula talia, qualia pruna solent apud nos esse. Facta Capitaneo reuerentia, conscensa nauicula redijmus ad littus, & inde ad ciuitatem, cùm iam Sol in occasum vergeret.

Rhodij racemi notabilis magnitudinis.

Area portus Alexandrini.

Inter admiranda, quæ in hunc vsque diem habet Alexandria, est amplissima & spatiosissima ante portum maris area: quam cùm arte factam scribant Historici (Pharus enim insula olim vocabatur) non est cur pluribus agam. Apparet enim, humana industria, magno sumptu & artificio paratam. Quoniam autem in ciuitate, vt inferiùs dicetur, aer est minus salubris, in hac area incolæ libentiùs ædificia construunt: quin & Sangiacus ibidem habitat: vnde ciuitas desolata, maioribus etiam ruinis oppletur: quandoquidem suburbia securiùs inhabitantur.

Causa aduentus triremium fuit, quòd deducebant tres mini-

ministros Assan Bassæ, qui antea Cairi cum potestate versabatur, nempe Cancellarium, Notarium, & Secretarium: ^{Assan Bassæ ministri supplicio affecti.} qui Constantinopoli Rhodum, inde Alexandriam missi, postea per Nilum deferebantur Cairum, ut ibidem ex illis supplicium sumeretur, quod ij auctores exercendæ crudelitatis essent, qua prædictus Bassa provinciales auarissimè depeculabatur. Id quomodo sit actum, breuiter commemorare operæpretium est. Assanus hic Bassa Eunuchus, cum non paruo tempore Cairi versaretur, valdè ^{Assani Bassæ Amatilia.} mercatores expilabat, quod & in hanc usque diem videre licet: quandoquidem propter eius inexplabilem auaritiam, merces ex Indijs & Mecha non importabantur. Ne autem loco, suæ cupiditati peropportuno, decedere iuberetur, maxima munera matri & uxori Cæsaris Amurathi clam submittebat. Illi verò qui ab ipso opprimebantur, propter loci distantiam, & difficilem ad aures Principis aditum, quem Bassa studiosè procurabat, de iniurijs illatis conqueri Cæsari non poterant. Hic idem Bassa cum intellexisset, Æthiopem illum, qui balsami curam gerebat, non contemnendam vim pecuniæ habere, eundem absque aliqua culpa in carcerem coniecit; & ut de pecunia fateretur, quæstionibus adeò crudeliter in eum defæuijt, ut paulò post moreretur: quo mortuo, cum inspector deesset, balsami quoque liquor ibidem deperiit, prout superius meminimus. Erat & alius Æthiops mercator ditissimus, quem ipsemet vidi. Hunc, confecto crimine, carceri mancipauit, & miserrimè afflixit, ut merces, quæ ducentis aureorum millibus æstimabantur, illi, redimendo vitam, tradere cogeretur: quæ res licet parùm verisimilis videatur, vnum hominem tam grauem multam deponere potuisse, & eò magis, homuncione viso qui cidari tantum & bombycina interula tectus, nudis pedibus obambulare: sed cum palatium Cairi tam elegans habeat, quod etiam vidi, ut sumptu & splendore, cum primario illo, quod me inspexisse

inspexisse iam antea scripsi, non obscure certare possit; affirmant constanter omnes, cum tam incredibilem multam Bassæ deposuisse. Cùm igitur is de tanto suo infortunio passim conquereretur, quidam illi suavit, ut Constantinopolim profectus, de tam insigni iniuria ad Cæsarem referret. Deterrebat mercatorem à suscipiendo itinere, & eius longitudo, & periculi metus: ad extremum dixisse fertur; Ego quidem non ibo Constantinopolim, sed libenter reliquorum omnium bonorum meorum impendium faciam, dummodò Imperator Assanum Bassam capite mulctare velit. Tum consultor: Da mihi, inquit, pecuniam: ego, quod cupis, breui tibi effectum dabo. Fertur igitur septuaginta Cecchinorum millia Constantinopolim misisse. Quinquaginta millibus empti sunt lapides pretiosi, Cæsari pro honorario tribuendi. Viginti millia Bassæ Visiro donata: quibus cùm iam sibi facilem apud illum aditum conciliaffet, dixit se itidem pro Cæsare munus luculentum habere, & quòd eidem præterea rationem conquirendi non contemnendi thesauri esset indicaturus. Eum itaque Cæsar ad se accersiri iussit: qui ingressus, lapides pretiosos eidem obtulit, inter quos fuit adamas valoris octodecim millium scutorum, quem ego Venetijs anno octuagesimo vidi apud mercatorem, qui anno sequenti eundem Constantinopolim transmiserat, & emptus pro Cæsare dicebatur. Eodem tempore conquestus est de Assano Bassa, ostendens iam à multo tempore cum ditiores quosque expilare: unde ingentem pecuniæ vim compararit. Vlsceretur miserorum iniurias, depradatorem castigaret, pecuniamque illius omnem fisco suo attribueret. Placuit ea res Cæsari: & protectionem in Cairum Imbraimo Bassæ iniunxit, filiam suam in matrimonium eidem daturum pollicitus. Literas insuper ad Assanum dedit, mandans eidem, ut primùm Cairum Imbraimus perueniret, ut Assanus caput proprium Imperatori trans-

transmitteret. Literas eiusmodi Cæsar manu propria scribere consuevit, quas holoferico vel raso nigro inuolutas mittit. Imbraimus Imperatoria mandata delaturus, in viam se statim dedit. Interea mater & vxor Cæsaris, postquam didicerunt quæ de causa Imbraimus Alexandriam proficisceretur, considerantes cum suo cliente malè actum iri, per cursus publicos magnis itineribus illi significarunt causam aduentus Imbraimi, hortatæque sunt, vt eo non expectato, quamprimùm Alexandriam appelleret, statimque Constantinopolim versus cum thesauris suis proficisceretur: se interim curaturas, vt iram Cæsaris aliqua ratione mitigare possint. Antequam igitur Imbraimus cum triginta sex triremibus Alexandriam peruenisset, Assan premonitus, iter cum duobus hominum milibus adornare cœpit: quod cum Cairo significatum Imbraimo fuisset, Assanumque aduentus sui causam ignorare arbitraretur, scripsit illi, vt ne se loco moueret: habere namque se quædam ardua Cæsaris negotia, quæ sibi cum illo communicanda essent. Sed Assanus sibi præcauens, se cum suis omnibus iam in viam dederat. Nec nisi quattodecimo ab ipsius abitu die (non enim citiùs poterat) Imbraimus Cairum peruenit. Scripsit tamen Alexandria Constantinopolim, Assanum Cairo profugisse. Mater verò cum vxore Cæsaris de reconcilianda gratia diligenter laborabant: & res iam eò deducta ferebatur, vt thesauros, qui ad duos milliones cum dimidio aestimabantur, Cæsari traderet, eiusdemque gratiæ & fidei sese totum permitteret. Tandem in arce carceri mancipatus, ibidem non multò post, fractis clam laqueo ceruicibus, iustas auaritiæ pœnas dedit. Ministros autem eius prædictos Cairum deferri præceptum, vt ibi gratum extremi supplicij spectaculum populo exhiberent.

Vidi Obeliscum quadrangularem in ciuitate, qui est
ex lapide rubeo porphyrite, characteres hieroglyphicos

Cc

inscul-

*Obeliscus
porphyreus
cum Alexan-
dria.*

in sculptos vndique habens. Est cum primis elegans & altus; licet inferior eius pars terrâ sit cooperta, quadraginta cubitis tamen, aut circiter, adhuc eminet: latitudo ad terram cuiuslibet anguli, sex vel paulò plus vlnas completitur. Non procul ab eius latere, versus mare, extant sub terra non parua vestigia elegantis palatij, magno sumptu olim exædificati. nam parietes marmoreis tabulis tecti, similibus columnis sustentantur. Erat & aliud palatium superiùs, sed totum iam prostratum. Subterraneum illud, etsi ruderibus opplerum, forma tamen eius benè internoscitur. Sub ipso ciuitatis muro, & eius quadam rotunda turri, extant itidem elegantes marmoreæ habitationes, sub quibus & alia ampla & pulcherrima ædificia conspiciuntur, in quibus nonnulli Cleopatram habitasse volunt, quæ sibi vltro mortem consciiuit.

Montes ciuitatis Alexandrina.

Conscendi duos montes, qui sunt in ipsa ciuitate, satis altos. In primo est Turris excubiarum, non adeò alta, ex qua tot vexilla minora explicantur, quot naues portum ingrediuntur. Alter mons est eminentior Rossættum versus, ex quo ciuitas ipsa optimè conspicitur, & vsque ad muros vrbs extenditur: subtus sunt per amplæ palatiorum elegantiorum ruinæ, in quibus pulcherrimi marmoris copia reperitur. Hoc ipso die, & postea sæpiùs, in longa & principali ciuitatis platea, vidi carcerem in quo S. Catharina detinebatur. Est paruus & depressus fornix: à quo non procul distant duæ altæ & crassæ columnæ, ex rubeo & integro marmore excisæ, inter quas dicta Virgo sancta martyrij coronam percepit.

S. Catharina carcer & martyrij locus.

In eadem platea longa & eius medio, quæ Rossættum itur, est lapis quadrangularis, in quo S. Marcus Euangelista Alexandrinus Episcopus, capite fuit plexus. Locum hunc ipsimet Turcæ habent in veneratione: ob idque lapis eiusmodi, alia petra latiore ex industria parata contegitur, ne martyrij huius sancti viri locus, quem genuinum

num esse affirmant, pedibus prætereuntium conculcetur.

22. Visitaui Ecclesiam sancti Marci, quæ non procul ab Obelisco distat. Est parua & obscura, quam Cophti seu Chaldæi obtinent. Eundo ad altare maius ad dextram, est fornix perangustus sub alio altari: vbi post martyrium, multo tempore corpus S. Marci repositum iacuit, donec à Venetis clam surreptum (cuius rei recordatione, Cophti prænominati magno dolore & pudore afficiuntur) Venetias delatum est: de quo cum extet Historia, ego scribere prætermitto.

23. Sangiacus Alexandrinus ciuitatem est ingressus: qui ab Imbraimo Bassa accersitus, è Cairo redierat. Habuit equites viginti, pedites Ianissaros totidem. Reliqui dies perlustrandæ ciuitati sunt impensi, quam pulcherrimis fuisse ornatam ædificijs apparet, quorum vastæ ruinæ supra & subter terram conspiciuntur. Nunc omnia sunt desolata. Meo quidem iudicio, vix quinta ciuitatis pars, sparsim tamen, ab hominibus incolitur. Balneum nihilo-
Balneum Solimanni Alexandria.
 minùs est hic amplum & elegans, à Solimanno Cæsare magnis sumptibus exædificatum, in quo nos quandoque abluebamus. Ex palatijs subterraneis facilè liquet, anti-
Alexandria subterranea ciuitas.
 quitus aliam ciuitatem sub terra constitutam fuisse: in qua æstatis tempore, vitandi caloris causa incolæ habitabant; hieme verò ad superiores mansiones commigrabant. Ex multis subterraneis habitationibus nunc cisternæ sunt paratæ, in quibus ex Nilo aqua conseruatur, quæ per canalem in ciuitatem deriuatur. Sunt quædam cisternæ publicæ; quædam in priuatorum ædibus exædificatæ: in quibus aqua per totum annum pro vsu domestico seruatur: quæ si quando deficit, vt antè dictum est, nouem milliari-
 bus, per mare, Rossetto aduehitur.

Aër Alexandriæ à mense Maio vsque ad primas Autumni pluuias (habentur enim hîc pluuiæ, & meo tem-
Alexandria aër in salubrem, & causam.
 pore parua quædam die vigesima septima Septembris de-

cidit) infalubris, & propemodum pestilens est. Quamobrem primarij ciues, & negotiatores illis diebus ab vrbe discedunt: nonnulli in suburbia ad maris portum commigrant. Qui verò in ciuitate degunt, sunt semper pallidi, & ægris colore perfimiles. Causfam mali aëris, quidam ad palatia illa subterranea referunt: quæ desolata & humida varia serpentum & reptilium genera copiosè producant. Humiditas igitur reptilium foetori & veneno (sunt enim in Ægypto passim reptilia venenosa) permista, aërem inficit. Nonnulli paludem Mareotidem, seu Aræpoten, quæ vno & dimidio milliari abest à ciuitate, causfam mali existimant: in quam cum Nilus sordes omnes, ex agris & campis, qui sunt ab illa Alexandria parte, collectas exoneret, multaque venenosa animalia comportet, spirantes per æstatem Etesia (quem ventum Caurum vel Maestrum vocant Itali) aërem putredine corruptum, in ciuitatem propellunt; quoadusque pluuiæ superueniant, quæ vento salubriore aspirante, pestiferas illas exhalationes dissipent & amoueant. Lacus siue paludis huiusmodi meminerunt, qui res Alexandri Magni scriptis consignantur.

*Mareotis
palus.*

Sed quæcumque tandem causa sit, constat pessimum hîc aërem esse, noctu præsertim: quamobrem fenestras tabulis benè claudi & obstrui solent, ne aër in conclaue nocuius penetret, alioquin vita periculo exponitur: id quod & per me aliquoties deprehensum est. Nam statim ut quis, vel ad modicum, domo nocte prodibat, illicò capitis immensum dolorem, & debilitatem totius corporis contrahabat. Quamobrem incolæ ipsi, nocturni aëris deuittandi causa, diligenter pannis quibusdam se, caput præsertim, inuoluunt.

*Alexandriæ
Turcæ im-
mune peri-
culum, &
Terræ san-
ctæ à Chri-
stiano occu-
pamini.*

Illud quoque hîc obiter annotandum, vnde cæcitas paganorum deprehendi possit. Habent Turcæ in Prognosticis (valde enim magiæ & supersticiosæ obseruationibus sunt dediti) Terram sanctam in potestatem Christiano-

rum

rum redactum iri, die Veneris, scilicet Feria sexta, vbi in suas Moschæas ad deuotionem conuenerint. Quamobrem Damasci, vbi Palæstina principium sumit, Feria sexta, noctu diligens adhibetur custodia, & ciuitas vna hora, quàm ceteris diebus, maturius clauditur. Arcem Ierosolymitanam, de qua superius, nullus Christianorum ingredi permittitur: immò eam vel à longè contemplari non satis tutum. Et quoniam in suis vanis augurijs habent, per Alexandriam Christianos ad occupandam Terram sanctam transituros, veterem portum (qui à nouo, ut dictum est, & Historici attestantur, iniectione terræ ab Antonio separatus est) vel minimæ Christianorum naues ingredi prohibentur: quòd per eundem, quamuis propter cautes & scopulos sit periculosus, Christianos irruptionem facturos persuasum habeant. Ad hæc cùm Feria sexta, quod circa meridiem fit, Moschæas ingrediuntur, contubernia seu Caruaferias Christianorum (quorum duo habent Veneti, Galli vnum, Genuenses, Ragusæ, ceteræque Europæ nationes) de foris suis serraturis claudunt. Ad quod munus, deputatos habent ministros, qui singulis Ferijs sextis, nos per mediam horam, tantum enim illorum superstitiosa deuotio durat, claudebant. Christiani quoque iisdem diebus & hora per ciuitatem non ambulant, sed ad sua domicilia, antequam claudantur, se maturè conferunt, ne in quam suspicionem deueniant, vnde illis periculum creari possit. Noctu quoque prædicta contubernia à Turcis obserantur, ne calumniari possint, Christianos conuenticula facere vel aliquid moliri. Studiosè namque causas peruestigant, quibus multas emungere possint. In ipsis etiam Caruaferijs semper est aliqua Turcarum custodia, quæ obseruet, nihil tale Christianos moliri, vnde calumnia strui possit. Mos hic ab antiquo, propter maiorem negotiantium securitatem, Alexandria receptus, diligenter obseruatur.

*Alexandria
negotiorum
frequentia.*

Quandoquidem ciuitatem hanc, vt nobilissimum Orientis emporium, non pauci accuratè descripserunt, ego diutiùs hìc immorari nolo: illud vnum addam, ex omnibus Christianorum nationibus, maximam hominum, diuersorumq; nauigiorum hìc frequētiam reperiri. Erant meo tempore quindecim spectandæ magnitudinis Galeones, quorum vnus mille quingenta dolia capiebat. Alterum similem, cum centum Cecchinorum millibus, duæ Melitenſium triremes in potestatem redegerunt, non procul ab Alexandria. Vnus itidem, prospero vento adiutus, impetum duarum similium triremium euasit, ictu tormentorum bellicorum valdè perforatus. Nam quatuor Melitenſium triremes, duos Galeones inuasérant.

*Constanti-
nopolis ab
Ægypto
victum mu-
tuatur.*

Bis in æstate similium Galeonum Carauana, quæ quandoque vicinas naues comprehendit, Constantinopoli Alexandriam appellere solet. Galeones autem eiusmodi ad Constantinopolitanos mercatores pertinent, qui merces quidem paucas, pecuniæ autem non contemnendam vim aduehunt, pro qua orizam, saccharum, triticum, dactylos, & alias merces, quæ Mecha, & ex Arabia Felici Cairum importantur, in magna copia coëmunt. Nam etsi Constantinopolis sit in loco fertili sita, maiore tamen ex parte, quæ ad victum pertinent, ab Ægypto mutuatur. Prima vice Galeones eiusmodi Constantinopoli mense Martio soluant, in Iunio reuertuntur; altera vice mense Augusto prodeunt, sub finem verò Octobris redeunt. Semper autem, siue Alexandriam, siue Constantinopolim petant, tempus obseruant, vt vento prospero Rhodum primò adnauigent; inde habita itidem temporis ratione, quò volunt cursum instituunt, & mira celeritate absoluunt. Propter securitatem verò, Turcarum triremes quæ in Archipelago versantur, sex & viginti circiter, eosdem Galeones deducunt. Cùm essem Alexandria, Generalis Occhiali cum eiusmodi triremibus indices expectabatur. Iam enim
Galeo-

Galeones vela facere debebant, nisi quòd tempus expectabant, futurę tempestatis metu, quam signis quibusdam nauticis pręuidebant, & nos nauigando, vt dicitur paulò post, experti sumus. Duo igitur Galeones prædicti, quorum vnum Melitenfes prehenderant, seorsum ab illis, qui à triremibus deducebantur, nauigabant; quòd Rhodo tardiùs discesserant, in tormentorum bellicorum copia spem reponentes. Et certè si ventum propitium habuissent, non erat cur à Melitenfibus sibi metuerent. Vbi verò naus oneraria vento caret, etiamsi validissima sit, tribus vel duobus etiam triremibus resistere non potest. Illa igitur vna, vento adiuta, periculum euasit. Quatuor ante meum inde discessum diebus, trecentæ Dzermæ cum tritico simul appulerant: è quibus frumentum eiusmodi, in Galeones qui erant in portu, comportabatur.

Nec illud prætermittendum, portum Alexandrinum Alexandrinus portus privilegium. eo priuilegio gaudere, (cuius immunitatem etiam nunc Turcæ, limitatè tamen, conseruant) vt liberum sit quibusuis, etiam inimicis nauibus, illum ingredi & egredi cum adlibuerit. Hispani tamen huic concessioni non fidunt, nec eorum naues huc commēant. Florentinæ naues portum nihilominùs frequentabant, in quo tutum receptum habebant; sed cum ad viginti miliaria in altum mare processissent, Turcarum triremes illis occurrerunt, & vnā ceperunt, duæ vel tres reliquæ fuga sunt elapsæ. Eas idè Turcæ infestabant, quòd triremes S. Stephani Florentinę, excursiones maritimas facientes, non exigua damna Turcis inferre soleant: quod etiam paulò antè quàm Cyprum appulisset, acciderat, vt suo loco dictum est. Excursiones istæ eiusmodi propè sunt, quales nostrates Kosaci in campos effusi exercere consueuerunt: quibus si res feliciter successerit, benè est; sin minùs, damnum vel interitum non magni æstimant.

Portus Alexandrinus, est valdè capax & apertus; ideòque

*Garyophylli
rupes Ale-
xandrie.*

que hieme parùm securas habet stationes. Quamobrem naues Turcicæ, vt & Galeones supradicti, apud arcem maiorem subsistunt, quæ est ad dextram in ipso portus ingressu; ibi enim rupes in mare procurrunt, quæ venti violentiam cohibent. Est in extremitate vna satis alta, quæ propter diducta in ipso vertice cornua, Garyophyllus vocatur. Ad hanc naues vento adactæ sæpiùs alliduntur, quandoquidem versus arcem alteram, quæ in portus ingressu ad dextram est posita, accessus propter rupes minùs tutus est. Sed & in medio quoque portu non desunt scopuli, qui naues sæpiùs dissipant, & tranquillo ac sereno mari è superioribus locis facilè conspiciuntur. Arx ab arce iusto distat spatio: naues tamen per medium ingredientiæ, ab vtraque missilibus tormentorum globis attingi possunt: quo argumento, quanta sit portus in ipso ostio latitudo, facilè deprehendi potest. Arx, quæ est ad dextram, magna satis & munita est: altera ad læuam minor est, & quòd scopulis pluribus sit præcincta, artificiosam munitionem non habet. Circa portum veterem, quem Christianis ingredi nefas est, duo sunt parua propugnacula; vnum versus ciuitatem, versus mare alterum, non procul ab Arsenali, quod huic eidem portui adiacet. Triremes hîc stationem habent: quarum quatuor tantùm pro custodia portus Alexandrini, nîeo tempore erant, neque satis benè (vidimus enim sæpiùs) instructæ.

Heluetus Ianissarum.

Erat Cairi Ianissarus quidam mediocriter canis aspersus, natione Heluetus: qui ante triginta annos in quodam Italiæ littore à piratis captus, seruitute adactus, Mahometismum susceperat. Is libenter mihi ibidem in Cairo inseruiebat, de pecuniaria mercede non adcò sollicitus, dummodò cibo, quem parcè sumebat, vinum adijceretur, quo se assiduè ingurgitabat. Nam in tanta hominum multitudine, non facilè vitium hoc deprehendebatur: nec tanta, vt alibi, fit in illud animaduersio. Totum namque hoc
nego-

negotium ab ipso Bassa dependet : qui si sobrius fuerit , in
 ebrios inquit, eosque castigat ; si verò libenter & ipse vi-
 num bibat, in peccantes poenam hoc nomine non exten-
 dit. Conscientiâ igitur Ianissarus ille stimulatus, clàm pe-
 tiuit, vt in Europam abduceretur, & hac intentione Ale-
 xandriam nobiscum venerat. Vnde antequam soluere-
 mus, diebus aliquot, cum ijs qui rerum ibidem vsum ha-
 bebant, consilia communicabam, qualiter iste miser iu-
 uandus & educendus foret. Nam palàm simile quid
 attentare non licet, occultè verò perpetrare, plena res
 periculi, propter exploratores, qui diligentius obser-
 uant, num eadem illæ res quæ ad portum deferuntur,
 in nauim inferantur : insuper & nauem è portu iam
 iam soluturam, liberum est illis ingredi, & euoluere : in
 qua si Turcam educi repertum fuerit, & naus cum mer-
 cibus fisco adiudicatur, & omnes qui in eadem fuerint,
 absque omni remedio, in perpetuam seruitutem abdu-
 cuntur, ex religionis ipsorum præscripto. Quamobrem
 nullus suadebat, vt in tantum periculum, hominis istius
 causa, me conijcerem : cui cùm hoc renuntiassemus, fle-
 bat miser ille, nobis valedicens tenerrimè : & mihi lacry-
 mas excussit, qui libenter ea in re gratificaturus illi eram.
 Habebam autem ibidem & duos Italos, quorum vnus
 Ascanius erat, ex territorio Romano, in littore quodam à
 piratis abreptus, anno primo Pontificatus Pij eius nomi-
 nis Quinti : qui cùm in seruitute per decemseptem annos
 apud Sangiacum quemdā versatus fuisset, quorum quin-
 decim in triremibus exegerat, pretio se in libertatem vin-
 dicare conabatur, ad quod persoluendum, cùm illi resi-
 duum deesset, petiuit id à me suppleri. Alter fuit Andreas
 Siculus piscator, per celoces ex Barbaria excurrentes ibi-
 dem in Sicilia captus ; quem centum & aliquot scutis au-
 reis redemi, cùm decem & aliquot annos in carcere deli-
 tescent, iam canitiem contraxisset. Vtque Ascanius ille

*Vini vsus
 apud Turcas
 à Bassa de-
 pendet.*

*Christianos
 Turcas sa-
 eos educa-
 di ex Turcia
 difficultas.*

*Christiani
 ab auctore
 redempti à
 Turca ser-
 uantur.*

vir bonus & pius, sic iste pessimus & impius fuit. Nam in mari nauigans, semper blasphemabat; & adeò terribilem ferocemque se ostentabat, vt palàm iactare non dubitarit: Vbi primùm, inquit, in Siciliam rediero (habebat autem vxorem & liberos) si vxorem alteri nuptam inuenero; statim illam, post salutationem, cum liberis & secundo marito interficiam. Cumque cum hoc nomine reprehenderemus, indignissimè ferebat. Duos itidem alios egregios iuuenes Italos redemi, quos Cairi reliqui, vt eos Consul Marianus in Italiam remitteret. Nec enim rationibus meis expedire iudicabant aliqui, si innotesceret, tot me simul redemptos circumducere: vnde verisimiliter conijci potuisset, nos multum pecuniæ habere. Hi, tamquam Christiani, poterant omnes redimi in Cairo, consensu tamen Bassæ accedente, qui emolumentum etiam inde percipit. Nam is qui pretium serui redempti percipit, aliquid etiam Bassæ contribuere tenetur, à quo literę patentes eliberatis dantur: alioquin è portu Alexandrino non dimitterentur. Ceterùm huic, qui Mahometismum professus est, discedere non liberum, nisi clàm; quod cum maximo periculo coniunctum antea diximus.

Pridie quàm Alexandria discederem, venit ad me Italus quidam Ioannes, cum duobus alijs qui mercatoribus inferuiebant; loquebatur Hispanicè satis expeditè; prouolutus ad pedes orauit, vt eum à seruitute Turcica redimerem. Erat autem is ex vna triremium, quæ semper sunt in portu propter custodiam. Deferebat compedes, vt serui solent: miseriam suam enarrabat: dicebat se esse Chirurgum, & in rebus ad medicinam spectantibus satis bene versatum, promittebat se fore fidelem, & meum perpetuum seruum, dummodò à Turcarum iugo, triremi præsertim, eliberaretur. Professio medica, qua se imbutum iactitabat, non tanti apud me erat, vt mihi, quod postulabat, persuaderet, maximè quòd iam haberem Chirurgum bonum

num Antonium Genuensem Italum, quem in locum demortui assumpserā, nec tutum videbatur, homini ignoto curam valetudinis concedere. Sed calamitas tamen & miseria ipsius me permouit, ut eum redimerem. Et quoniam habebam leopardos, capricornos, ceteraque animalium & auium exoticarum genera, eorū curam eidem in naui demandavi. Benè se gessit, coactus, nempe quamdiu fuit in mari. Sed posteaquam Cretam perueni, duas hebdomadas commoratus, ubi res nonnullas furto abstulisset, profugit; quod non nisi quarto die à meis compertum est. Et quoniam minutiora quædam desiderabantur inter familiares meos, res mihi sensim innotuit: nam cum quatuor meis in palatio Ducis habitabam; ceteri in Monasterio S. Francisci erant. Quamvis non vrgerem, missi sunt, qui eum perquirerent: mihi quidem satis erat, quòd à Turcis eliberatum, ad Christianos aduexissem. Repertus tandem est, ex illa parte montis Idæ versus Barbariam: & mirum cur se eò contulerit, unde exitum nullum habiturus erat: quidnam in animo haberet, non constabat. Comprehensum volebant extremo supplicio afficere: sed eum etiam denuò non solum à morte, sed etiam à trireni eliberaui, ad quam omnino condemnandus erat. Duplici namque dolore cōflictari me oportebat, tum ob mortem hominis, tum quòd per me centum aureis redemptus, laqueo suspendendus erat. Restituit igitur ea, quæ meis furto abstulerat: pecuniæ modicum quid consumpserat. Denuò mihi volebat inferuire: sed reieci. Conscenso deinde Galeone nouo, qui in Italiam expediebatur, abiit: nec quid postea cum illo sit actum, intelligere potui.

Mercator quidam Venetus, qui Cairi multis annis mansit, non dubitanter affirmauit, quòd redemptitij isti, Christi mi redemptitij à Turcis rati bona frugiu. vix ad aliquam bonam frugem perueniunt. Quod equidem sciret, ad duo millia seruorum eiusmodi fuisse liberata suo tempore: è tanto verò numero vix quinquaginta

vel sexaginta bonos euasisse; reliqui furabantur, latrocinia & cædes perpetrabant: vnde & extremo supplicio affecti fuere. Nonnulli ex illis, quod horrendum est, in libertatem vindicati, impio Mahometi nomina dedere. Id quod valdè probabile est. Nam non habentes vnde viuerent, neque modum ad suos in Europam redeundi inuenientes, degustata libertate, ne iterùm in seruitutem deuenirent, hac ratione sibi prospectum voluerunt. Adducebat etiam idem, morales, at non Catholicas rationes. Quem Deus, inquit, in seruitute & captiuitate versari permiserit, is facilius à peccatis abstinebit. Sed rationes eiusmodi subsistere non possunt, quandoquidem de captiuorũ liberatione diuersum extat Christi Saluatoris præceptum.

Animalia multa & varia reperiuntur Alexandriae venalia; quorum & ego aliqua coëmeram, & mecum in Europam adduxeram: leopardos duos; glires Pharaonis duos, quorum similes per ædes priuatorum Alexandriae, & per campos, præsertim in Syria, multos videre mihi sæpiùs contigit: selem Zibetum odoriferum, quem cùm essem Tripoli, curaueram Apamææ pro me emi: cynocéphalos marem & feminã, pilo subrubeo, à ceteris diuerso; femella, quoties puer aliquis paruus aut femina occurrebat, statim eosdem morfu petebat; viris adultioribus parcebat: simiolos varij generis decem & aliquot, quorum potior pars aquis obruta, cùm apud insulam Carpathos tempestate iactaremur. Psittacos etiam elegantes habebam. Capricornos tres eduxeram; quorum duo in mari expirarunt. Animal hoc incredibili pedum pernecitate plurimùm valet; qua per asperrimas rupes, licet pedes graciles cumprimis habeat, cum spectantium admiratione dexterrimè vtitur.

Est & altitium genus in maxima copia circa Alexandriam, illi non absimile, quas Parduas vocamus, quæ volare non possunt, sed adeò velociter currunt, vt à canibus prehen-

prehendi nulla ratione possint, nisi in retia præparata incidant. Cibo alio non vtuntur, præterquam glareis ex arena depromptis. Est auis præpinguis, & optimi delicatique saporis, sed ad vescendum valde periculosa, si recens sit. Nam vbi aliquoties ex eo genere aliquis comederit, moritur. Causa rei adfertur, quod cum alites eiusmodi lapillis pro cibo vtantur, vbi iisdem aliquis intemperanter vescitur, in hydropisim incidit, atque ita mortem sibi accelerat. Deplumata igitur sale primum asperguntur, & per noctem ita aspersæ asservantur: postea assantur, & in acetum imponuntur; quo macerata valde sapida & salubres redduntur. Idem fit & cum alijs paruis auiculis, similibus nostris quas Cize dicimus. Volant, & sunt pingues. Harum in Cypro etiam habetur copia: sed aceto similiter macerari debent. Qui Arabiam Felicem peragrunt, narrant Parduas eiusmodi ibidem reperiri. nonnulli easdem illas esse volunt, Iudæis in deserto cælitus missas, quas sacra Scriptura coturnices appellat.

Circa montem Horeb in territorio Sinai, manna quodque veluti in Calabria prouenit, minus tamen candida, ad rubedinem vergens. Vidi eandem Cairi, quæ etiam vim purgandi habet. Talem è cælo Iudæis datam affirmant nonnulli: vtrumque tamen comprobare non possunt.

*Manna mō.
tū Sinai.*

In deserto illo arenoso, versus mare rubrum, ingens habetur struthionum multitudo: quos Arabes conspicati, quandoq; in modum coronæ à longè cingunt, & in vnum globum coactos inuadunt & occidunt. Sed quoniam Arabes carnes non comedunt, nec pennas, quarum ingentem vim mercatores aliàs distrahunt, facile diuendere possunt, rariùs eiusmodi venationes exercent, cum vix inde lucri aliquid, lassitudinem verò equorum notabilem reportent. Nam struthio celerrimè currit, alarum beneficio adiutus: vt apud nos maiores illæ aues, quas *Dropy* dicimus, facere solent, currentes antequam altiùs euolent.

*Struthiones
& eorum
venatio.*

*Dromedarij
& eorum
celeritas.*

Cùm spectaremus Cairi Turcarum certamen equestre, quod, vt superiùs diximus, singulis hebdomadis die Veneris à prandio, exercitationis caussa instituitur, venit eò Æthiops nudus insidens dromedario. Cameligenus id cumprimis expeditum, passu gradarij adeò celeriter currens; vt equus etiam citatiore gressu, illum æquare non possit. Hic per postas, vt vocant, Mechâ aduenerat. Cursus autem ratio talis adhibetur, vt quintadecima die Mechâ Cairum perueniatur. Cursor vnus dromedario per continuos quinque dies insidens proficiscitur: rursus alius alium dromedarium conscendit, & quinque alios dies progreditur: tandem tertius, quinto itidem die, tertio iumento vectus, Cairum deferitur. Idem profectionis seu cursus publici mos, Cairo Mecham redeuntibus obseruatur. Cursor vicem suam obiturus, tantum comedit, quantum in quinque dies sufficiat, nec cibum alium præterquam paucos dactylos secum defert. Panis etiam nullus reperitur in illis locis desertis, arenosis, & petrosis: sed nec aqua, nisi quinto demum die. Dromedarius quoque, aque potum in sextum vsque diem differre potest: cibus eius pastilli è farina triticea confecti, quos non adeò multos cursor deferre potest, ideoque parcè illum reficit. Aquam nec in suos quidem vsus circumfert: quam etsi haberet, dromedario danda non esset. Nam vt quidam affirmant, ego non ausim, si in vase aliquo deferretur, eam odoratu deprehenderet, sitimq; statim contraheret, propter quam, præfixam quinque dierum itineris continuationem prosequi non posset. Quies illi perquam exigua. Nam per viginti quatuor horas, ter tantùm subsistit cursor propter opus naturæ. Dromedarius eundo vrinam emittit. Cùm descendendum est, bacillo pedes percutit fessor, atque ita dromedarius in terram procumbens, descendendi facultatem commodam illi præbet; qua modicum vsus, cœptum iter prosequitur.

In-

Incolæ Arabiæ desertæ, numquam pane aut carnibus, ^{Arabia deserta incolarum victum.} sed dactylis tantum vescuntur: lacte caprino valdè salubri sustentantur: aqua illis potus est: atque hac de causa vitam producant, & plerumque centesimum ætatis annum attingunt: valetudine prospera utuntur: forma sunt corporis egregia. Equis pro pabulo carnes caprinas offerunt; quas primò in sole desiccant, & deinde in minuta frustula concisas, equis præbent: quæ & magnum nutrimentum vescientibus administrant, & paruo negotio in capsula coriacea, equo alligata, per deserta loca, circumferuntur: de quibus si tantum sumatur, quantum duo pugilli capere possunt, id per viginti quatuor horas, vni equo pro pabulo assatim sufficit. Carnes insuper eiusmodi, si- ^{Equi carnes comedentes.} tim equis non excitant, in illa aquæ penuria, eosque validos & agiles conseruant: quos à teneris ita educant incolæ, ut non nisi ad nonum diem materna sugant vbera, postea lac illis camelorum apponitur, ne materno debiles efficiantur. Ita & formam naturalem cum primis elegantem retinent; & vires cameli, eorum lacte hausto, acquirunt: quod etiam à siti mirificè præseruat, cum in partibus illis aqua, thesauri instar, æstimetur. Cum inhabitantibus Cairum & Alexandriam narrarem, nos Europæos ubique aqua abundare; respondebant, nos immortales haberi posse, qui aqua recenti & dulci semper abundaremus. Cum Cairi panem illis obtulissemus, quem illi *Chops* vocant, eo vesci recusabant; sed panno inuolutum asseruantes, dicebant se ad suos perferre velle, ut ostenderent, quid nos manducaremus: quod si panem itidem & illi manducarent, eos facile morituros. Vidi & Alexandria vnum dromedarium, cui Arabs Rossetto adueniens infidebat. Boni velocis gradarij passum habet animal hoc, & ad iter accelerandum plurimum valet: sella namque illi imponi potest; cum vnum tantum gibbum habeat, non duos; ut ceteri cameli, qui onera deferunt.

Reliquis

Reliquis Septembris diebus, quæ in ciuitate, extra, & ad portum digna visu occurrebant, inspiebam. Neque enim discedere celerius potuimus, propter Sangiacum, qui à nostris quatuor nauibus, quæ simul vela facere constituerant, multum pecuniæ exigebat. Conuenerunt ad extremum cum illo mercatores, non exigua illi summa numerata: cumque ventus esset contrarius, non nisi nona die Octobris inde soluere potuimus.

O C T O B E R.

Nona die Octobris conscendimus Saitiam nostram nauem, hora circiter decimaquinta: decima verò sexta è portu promouimus: sub vesperam hora vigesimatertia, littus Barbariæ conspiebatur. Die insequenti nihil continetis apparebat, quam non nisi die decima septima mensis eiusdem, manè tandem conspeximus. Quatuor simul vno eodemque die naues è portu soluerunt. Vna fuit Gallica nostrâ maior, quæ primò in Siciliam, inde Massiliam petebat. Hæc parum aberat, quin portum egrediendo, ad scopulum seu rupem Garyophylli allideretur. Nam vela, citius quàm in hoc portu oportuit, sunt expansa, vento inter Boream & Aquilonem acriter spirante, quem Itali *Græco Tramontana* vocant. Vix decem cubitorum tractu nauis aberat à periculo. Iamque voces periclitantium, miserabiliter clamantium, audiebantur. Nauis enim gubernator, rerum peritus, periculosè decumbebat: qui verò vires eius gerebant, minùs cautos in præternauigando scopulo periculosissimo se præstiterant. Altera nauis Galeon Peraïsto vocabatur; in qua ego nauigare debebam. Sed quoniam eius Patronus, alia naui pro se empta, nautas peritiores in eam transtulerat, illa verò multum onerata, nusquam diuertere debebat, dissuadebant aliqui ne me eidem committerem. In Galeone hoc quòd mercatores erant prædiuites, Capitano honorarium dederunt, & fecerunt,

fecerunt, vt duæ Turcicæ triremes, è portu eos in altum extraherent. Postea naus hæc tempestate Cyprium delata est. Tertia naus erat Patroni, qui rectâ Venetias cursum dirigebat. Hanc itidem vna triremis Tureica extra portum deducebat. Quarta nauis erat nostra Saitia Gallica non adeò magna, quam conduxì, vt me Cretæ exponeret, quòd inde triremibus in Europam deferri poteram, per ditiones Venetorum, in quibus etiam subsistere commodum erat, si propter instantem hiemem nauigatio periculosior incideret; maximè, quòd cùm priùs isthîc essem, multorum notitiam mihi conciliauerim. Conueneram cum nauclero, vt in portu deserto, qui nunc Callolimioni Callolimio-
ni portus,
Actor. 27. vocatur, cuius etiam diuus Lucas meminit, exponeret, propter ipsius commoditatem, & quòd minùs ab Alexandria distet: tum quòd in Archipelagum ingredi, ad exponendum me in aliquo portu, non auderet; quòd iam hiems appropinquaret, neque ex mari Mediterraneo eò vela dirigere tutum esset. Sed omnia hæc postea fuere in-
15. uersa. Nam die quintadecima Octobris, circa vigesimam secundam horam, tempestas atrox confurgens, quatuor hæc naues, quæ eundem cursum tenere debuerant, per mare hinc inde disiecit, nostram præcipuè Saitiam, quæ minor ceteris erat, terribilem in modum ventis iactitauit; donec circa medium noctis S. Germanus nobis illuxit, quem hac eadem nocte sexies vidimus, atque ita tempe-
16. stas conquieuit. Die insequenti etiam iam aduersascente, ventus validissimus superueniens, nos tota nocte in
17. maximum periculum coniecit. Die verò decima septima, paulò ante vigesimam secundam horam, adeò procellosus Tempestas
atrox. turbo nos concutiebat, vt spem euadendi omnem abiceremus. Nam duo venti contrarij Africus & Aquilo (Italicè *Garbino* & *Graco*) inuicem horrendum in modum deproeliantes, validissimo flatu & imbre, nauem adeò in gyrum versabant, & in ima deprimebant, vt fluctus intumescen-

mescientes superior arboris pars attingeret. Euacuabamus
 nauem quantum licuit, lapides videlicet eijciendo, cùm
 nullę nobis essent merces: sed neque, propter turbinis vio-
 lentiam, ea res adiumento nobis fuit, cùm nihilominus
 fluctus in nauem tanto impetu insilirent, vt iam iam ab
 illis absorbendi videremur. Cumque nox esset obscurissi-
 ma, & tonitrua ac fulgura subinde terribiliter corusca-
 rent, viderunt nautę insulam geminis rupibus in altum
 consurgentem: qua visa existimabant nautę nos in Archi-
 pelagum delatos ad insulas duas desertas, quę non adeo
 magno interuallo à se disiunctę, passim Diuonię appellan-
 tur. Cùm igitur in extrema necessitate se constitutos vi-
 derent, quod Saitia parua esset, depositis velis, in medium
 nauem deducere satagebant, vt in tam atroci tempestate,
 sibi quacumque tandem ratione consulere possent, naui
 inter duas insulas constituta, vbi minùs à ventis impetere-
 tur. Cumque iam non procul inde abessemus, singulari
 quadam diuina ordinatione, nauta, ex summo navis malo,
 quod coruscationes perseuerarent, animaduertit, vnam
 tantum esse insulam, quę propter duas rupes eminentes,
 duarum illarum, inter quas nauem adducere constitu-
 tum erat, similitudinem exprimebat. Quamobrem velis
 omnibus demissis, vnum tantum appensum remansit,
 Trinchietum vocant, vt insulam præternauigare liceret.
 Ceterum cùm iam Saitia vi tempestatis propemodum de-
 mergeretur, & ventorum violentia concussa, ita rimis fa-
 tisceret, vt assidue aquam è sentina exhaurire fuerit neces-
 se, nauarchus omni præsidio destitutus, palàm enuntiauit,
 nullam spem salutis reliquam superesse, & nos naufragio
 ibidem perituros. Quo tristi nuntio, quilibet de anima
 sua sollicitus, Deo sese permittens, extremam horam ex-
 spectabat.

*Diuonia
insula.*

Inter-

IOB CAP. XXXVI.

Si voluerit extendere nubes quasi tentorium suum, et fulgurare lumine suo desuper, cardines quoque maris operiet.



PSALMO CVI.

*Quia descendunt mare in navibus, facientes operationem in aquis multis.
Ipsi viderunt opera Domini, et mirabilia eius in profundo.
Dixit, et stetit spiritus procella: et exaltati sunt fluctus eius.
Ascendunt usque ad caelos, et descendunt usque ad abyssos: anima eorum in malis tabescebat.
Turbati sunt, et moti sunt sicut ebrius: et omnis sapientia eorum devorata est.*

PSALM. CIII.

*Quam magnificata sunt opera tua Domine: omnia in sapientia fecisti:
impleta est terra possessione tua.*

ESAÏÆ CAP. XLIII.

*Noli timere, quia ego tecum sum: ab Oriente adducam semen tuum,
et ab Occidente congregabo te. Dicam Aquiloni: Da: et Austro: Noli prohibere:
affer filios meos de longinquo, et filias meas ab extremis terre.*

IEREM. CAP. X.

*Ad vocem suam dat multitudinem aquarum in celo, et eleuat nebulas ab
extremitatibus terre: fulgura in pluuiam facit, et educit ventum de thesauris suis.*

NAHV. CAP. I.

*Dominus in tempestate et turbine viæ eius, et nebula pulvis pedum eius.
Increpans mare et exsiccans illud, et omnia flumina ad desertum deducens.*

ECCLESIASTICI CAP. I.

*Arenam maris, et pluuiæ guttas, et dies sæculi quis dinumerauit?
Altitudinem cæli, et latitudinem terre, et profundum abyssi quis dimensus est?*

ECCLESIASTICI CAP. XVI.

Et vias illius quis intelligit, et procellam quam nec oculus videbit hominis?

ECCLESIASTICI CAP. XLIII.

In sermone eius siluit ventus, et cogitatione sua placavit abyssum.

PSALMO CVI.

*Et clamauerunt ad Dominum cum tribularentur: et de
 necessitatibus eorum eduxit eos.
 Et statuit procellam eius in auram: et siluerunt fluctus eius.
 Et letati sunt quia siluerunt: et deduxit eos in portum
 voluntatis eorum.*

PSALMO LXXVI.

Deus in sancto via tua: quis Deus magnus sicut Deus noster? tu es Deus qui facis mirabilia.

SAPIENTIAE CAP. XIII.

Tua, PATER, PROVIDENTIA gubernat: quoniam dedisti et in mari viam, et inter fluctus semitam firmissimam, ostendens quoniam potens es ex omnibus saluare, etiam si sine arte aliquis adeat mare. Sed ut non essent vacua sapientiae tuae opera: propter hoc etiam et exiguu ligno credunt homines animas suas, & transcentes mare per ratem liberati sunt.

PSALMO LXXVI.

Viderunt te aquae Deus, viderunt te aquae: et timuerunt, et turbatae sunt abyssus.

ISAIAE CAP. XL.

Quis mensus est pugillo aquas, et celos palmo ponderavit? quas appendit tribus digitis molem terra, et librauit in pondere montes, et colles in statera? Quis adiunxit spiritum Domini? aut quis consiliarius eius fuit, et ostendit illi? Cum quo iuxit consilium, et instruxit eum, et docuit eum semitam iustitiae, et erudiuit eum scientiam, et viam prudentiae ostendit illi?

PSALMO LXXVI.

Illuxerunt corrugationes tuae orbi terrae: commota est et contremuit terra.

Interea plus quàm media nocte transacta, S. Germani ^{S. Germani} ^{fidus.} fidus conspeximus, statimque Aquilo impetum aliquantum remisit, vt Africus iam validiùs Saitiam propelleret, quæ hac ratione insulam præterijt. Septies nobis S. Germanus apparuit, & ad vicem quamlibet, Aquilonis vehementia magis ac magis imminuebatur: atque ita dies appropinquare cœpit: cumque illuxisset, deprehendimus insulam, ad quam vela direxeramus, fuisse Casso dictam, ^{Insula Casso.} totam desertam, & rupibus arduis horridam: quam si attingissemus, in scopulos & cautes nobis incidendum cum extremo periculo erat, qui noctu videri & vitari propter fluctus consurgentes haud poterant: iuga tantum præclarum rupium, per coruscationes, aspectui sese offerebant.

18. Die decima octaua conspeximus insulam Rhodum: & per ^{Rhodus insula.} integram hanc diem, & noctis partem, maximo vento iactati sumus: qui S. Germano apparente statim conquieuit, & noctis residuum tranquillitas occupauit. Sequentem diem totum oberrando consumpsimus inter Rhodum & Carpathum insulam (Italisch *Scarpanto*) in qua Pal- ^{Carpathos,} ladem natam & educatam Poëtæ fabulantur. Cumque nauclerus situm loci perspectum non haberet, appropinquare, naufragium timens, non audebat, donec vesperi in quodam promontorio ignes insulani accenderent (moris enim est, vbi incolæ nauem erraticam conspexerint, igne fuscitato nautis signum dare, quo loco tutò accedere possint) quibus visis tota ferè nocte insulæ oras legebamus. Circa horam quartam noctis, densissima nube, absque pluuiâ, prorepente, S. Germanus comparuit: statimque & ventus cessauit, & nox serena esse cœpit.

Sunt nonnulli qui affirmant, cum naturalis sit eius luminis prouenientis causa, illud non apparere, nisi quando pluit. Itaque hic annotandam putavi, etiam si hoc tempore nulla fuerit pluuiâ, lumen tamen hoc resplenduisse, & ventum subito confedisse.

Manè

PORTUM A-
GATA.

Manè vigesima Octobris, accedentes ad insulam, par-^{20.}
uum portum tenuimus, antea dictum Portum Agata, qui
minores tantum naues admittit. Fixis anchoris, rimas na-
uis obstruere, & pice obducere coepimus, affirmantibus
nautis, si per duas horas tempestate iactata fuisset, nauem
Saitiam vnà nobiscum fuisse interituram. Descendentes
in littus victui necessaria à Græcis coëmimus. Nam pulli
gallinacei quos habebamus; fluctibus in naui suffocari
fuerunt. Quamuis hæc insula Turcarum sit, & Capita-
neum eiusdem gentis habeat, Græci tamen homines, vt
& in ceteris Archipelagi insulis, arua & vineas excolunt.
Turcæ verò de comœatu prouisi, in præsidij arcium se
continent, nec vsquam Græcorum metu prodeunt. Cùm
verò pendendi tributi tempus aduenerit, aliquot triremes
cum Ianissaris insulas eiusmodi accedunt, & ab incolis
census exigunt. Oppida aliquot exigua in hac insula ad
latus conspiciantur, ad quæ tamen naues non accedunt,
cùm portu careant. Ab eo loco, vbi descenderamus, non
procul aberat villula Lare dicta.

TURCA à
GRÆCIS VA-
SALLI SIBI CA-
uent.

Die sequenti manè, cùm Aquilo seu *Graco* potius in-^{11.}
furgere coepisset, cui obstaculum nullum erat oppositum,
extractis anchoris, mare ingressi sumus, credentes nos
rectà Cretam delatum iri. Sed vento denuò mutato, hac
& insequenti vigesima secunda Octobris die, circa insu-^{12.}
lam Casso prædictam ventos inaniter captabamus. Tan-

CRETA SE-
CUNDA VICE.

Cap. 17.

dem vigesima tertia die manè Cretam appulimus, ad Pro-^{13.}
montorium Salomonis, antiquitus Samnium: de quo in
Actis S. Lucas. In monte, iusto interuallo, est turricula, in
quæ excubiæ propter piratas aguntur. Vt primùm ancho-
ras iecimus, relatum nobis fuit, quòd vno die antè, Saitia
illa, quæ nobiscum Alexandria soluerat, & Siciliam versus
discesserat, tempestate quoque eò delata fuerit, adeò con-
quassata, vt rimas quòque obducere nautæ fuerint coacti.
Nauarchus verò, qui æger Alexandria discesserat, in mari
mortem

mortem acceleravit, & hîc in littore sepultus est. Hæc eadem Saitia, quòd non procul Venetorum ciuitas Sitia abesset, ad littus accedens, indicauit me eò venturum. Antonius namque Barochi mercator hac de causa ad Gubernatorem, quem isthîc Rectorem vocant, accesserat. Itaque aduentus meus expectabatur.

Quoniam sæpius commemoratum est, Saitias naues ventorum impetu conquassatas propemodum interiisse, nemini mirum id videri debet. Certum etenim & comprobatum est, nauigia, quæ vel vetustate, vel artificum incuria debilitatem aliquam incurrerunt, exorto turbine, fluctibus grauius contundi solere, eoque tempore in presentissimo periculo versari. Nam vbi naus in arenam vel scopulum impeerit, ex littore propinquo facilius enatandi subsidium ministratur, & tabularum confractarum natatu multi euadunt. Sed naue in alto mari dissipata, quæ euadendi ratio? etiamsi quis tabulæ adhæserit, fluctibus à turbine agitatæ, opprimitur, vel vbi à terra remotior est, fame & frigore moritur.

Antonius hic, cuius suprà meminimus, multas orbis partes peragrauit. Nam bis in Orientali India fuit, re-
Antonij Veneti nauigatio.
 rum illarum partium vsum non mediocrem consecutus. Vtraque vice Apamæâ, ad Euphratem primùm, inde secundo flumine ad mare Persicum, antea *Elcatiff* dictum, postea ad Ormus & Goam peruenit. Cairum tandem per mare rubrum reuertebatur: expositus ad ciuitatem Tur, quæ ad littus eiusdem maris eo in loco sita
Tur ciuitas ad mare rubrum.
 est, vbi Iudæi fugiendo Pharaonem, sicco pede mare transierunt. In secunda sua peregrinatione fuit captus à Bassa, qui curam gerebat maris rubri, quod infra positum est, antequam ad fines, vbi Felix Arabia incipit, perueniatur. In eo nauigatio Christianis est interdicta: in quam à Tur-
Mare rubrum Christianis non licet nauigare.
 cis maximè inquiritur. Nam non procul à Mecha nauigatur (cùm mare cum primis angustum sit, cuius vtrum-

que littus maiori ex parte nauigantibus apparet) & quæ naues ex India Orientali adueniunt, eò deflectere solent. Antonius tamen isthîc non fuit, quòd eius nauis rectum cursum propitio vento tenens, locum hunc præternauigauit. Narrauit is quòd Bassa prædictus ab eo valorem decem millium ducatorum in varijs mercibus perceperit; præsertim in lapidibus, qui in certis illarum regionum animalibus reperiuntur, nec hæcenus in partibus nostris viscebantur, & in vnionibus ac margaritis pretiosis. Captum Bassa ille, qui de principalioribus non erat, secum Cairum perduxit, eumque ad carceres Imbraimi, tamquam supremi Ægypti Gubernatoris, tradidit: vnde Consul is Veneti (quoniam Venetus erat Antonius) fide interposita eliberatus, nostrò tempore facultatem in Europam redeundi impetrauit. Nauigatio autem eius in Hispaniam erat potissimùm instituta, quandoquidem Catholici Regis iussu, quod etiam ipse non diffitebatur, peregrinationem hanc obeundam susceperat, vt quænam per mare rubrum nauigandi commoditas, & quod nauigationis emolumentum edisceret. Vir hic fuit mihi apprimè notus: à quo multa, quæ ad naturam & mores nationum quas peragravit pertinebant, edidici. Sed quandoquidem ea Scriptorum industria sunt euulgata, non est, quòd in his immeremur. Posteaquam domum rediissem, plures ab eodem literas, partim ex Hispania, partim ex Italia scriptas accipim: in quarum vltimis significauit, se in Syriam, & inde in Indias Orientales iam tertio nauigationem instituere.

Factum autem est singulari diuinæ gratiæ beneficio, quòd dum circa Rhodum, & in faucibus Archipelagi oberraremus, in classem Turcicam, cui Occhialus præerat, non incidimus. Nam vigintiquinque triremes è Nigroponto Rhodum versus velificabant, quibus obuias naues diripere non est insolitum. Quoniam tamen Saitia hæc Gallica fuit, cum quibus Turcæ societatem colunt, poterat

*Occhialus
pirata.*

rat

rat mitius aliquid ab hostibus expectari: sed vel pecunie numeratione, vel captiuitate res transacta proculdubio fuisset: quod itidem paulò antè ipsi Galli sunt experti, prout nauarchus Gallus nobis retulit. Euasimus itaque per Dei gratiam manus impij Occhiali, qui valdè tunc exacerbatum erat, quòd Veneti Melitensem militem illi tradere volebant, quos cum duabus triremibus non ita pridem in potestatem redactos, Corcyram perduxerant. Eos Occhialis insequèbatur: cumque septem Venetæ triremes inde Cretam reuerterentur, ubi custodiam Philippo Pasqualigo præsidente posuerant, Occhialis in portu Naxiarino præstolabatur, ut eos adoriri posset: qua de re, cum Zacyntho triremes Venetæ notitiam accepissent, denuò Corcyram sunt reuersæ, cum resistere se non posse viderent Occhialo, qui ex vigintiquinque ordinarijs delectu habito, decemotto triremes benè instructas habebat. Sed ubi vidit consilium sibi præmeditatum non succedere, in furias actus, obuios quosque inuadere decreuit, Cæsarem veritus, quòd parùm cautè egisset. Incidit igitur in aliquot mercatorum Christianorum naues, quas, hominibus in captiuitatem abductis, in potestatem redegit. Euasimus itaque Deo opitulante, manus ipsius, qui Carpatho versus Rhodum cursum tenebat, nos verò à Rhodo itidem vehemur. Mirabantur omnes insulani, quòd Occhialum obuium non habuimus.

Si cui mira vel impossibilia videbuntur, quæ hîc de sancto Germano à me scripta sunt, me vera retulisse quilibet affirmabit, qui nauigando in periculosas tempestates incidit. Nullus enim est, qui hæc non oculis aspiciat, in extremo procellarum irruentium periculo constitutus. Siue igitur S. Germanus, ut multi credunt, periclitantibus appareat, siue à naturali causa, quod plerique autumant, luminis eius ratio proficiatur, ego temerè affirmare non ausim. Illud certissimum est, lumen hoc nauigantibus ap-

S. Germanus tempestatum sedator.

parere: quod non solum ego, sed & omnes qui mecum erant in naui, toties vidi, quoties me vidisse superius annotaui. Apparet autem specie sideris lucentis, vel accensæ facis, interdum plus, interdum minus coruscans. Fit quandoque splendor eius planè lucidus & albicans veluti stella: confidet sepè vel in medio arboris, vel alibi, semper tamen editiore in loco. Si quis attingere velit, sursum mox eleuatur, & refugit. Frequentius tamen in ipsa arboris summitate, & cruce, quæ ibidem desigi solet, cōsistet, permanens eodem in loco, quantum temporis in recitanda Oratione Dominica consumeretur: quandoque per dimidiam quadrantis horæ partem, quandoque quadrantem integram lucebat. Sed in magna illa tempestate, per dimidiam horam durauit, in modum accensæ candelæ ardens. Vbi apparuerit, certum & indubitatum est, ventum notabiliter subfidere: & quò frequentius emicuerit, eò magis ac magis turbinem diminui. Vnde ad ipsius ortum, homines ab interitu tuti, certam spem salutis concipiunt: quod pluribus exemplis confirmari posset. Illud quoque nautæ affirmabant, quòd pluribus nauibus in vna eademque tempestate simul constitutis, in quibus sidus eiusmodi conspiciabatur, ea euaserunt; in quibus non, naufragio perierunt. Narrarunt iidem quoque, quando duo sidera coniunctim apparent, quod rarè admodum fit, nauem omnino interituram. Cùm autem duo fuerint, dicunt spectra seu Dæmones esse, qui numquam vniformem, sed geminatam speciem in apparendo retinent. Quæ de Castore & Polluce scriptores Ethnici tradunt, ea non attingo: quæ verò hîc adiunxi, ea ex fida eorum relatione accepi, qui naufragijs eiusmodi præsentibus interfuerunt.

Sed nec illud hîc prætermittendum putaui, quod nautæ certò se didicisse affirmabant. Quacumque in naue Mumia fuerit deportata, eam vel in maximum periculum adduci, vel certissimum naufragium subire oportere.

*Mumia in
naui depor-
tata tempe-
statem ciet.*

Quam-

Quamobrem diligenter admonentur ij, qui res in nauem inferunt, ne Mumiam secum accipiant: cuius rei ea redditur ratio. Quandoquidem Mumia, Ethnicorum sunt cadauera, in quibus idola, vt dictum est superius, reconduntur: dubium non est, quin in cura & potestate Daemonum, prout & animæ ipsorum, sint constituta: qui numquam ab eis, etiamsi de loco in locum transferantur, recedere solent. Cùm Cairi in antrum, vbi eiusmodi cadauera sunt condita, me demissem, duo integra corpora, vt iam diximus, maris & feminæ, pretio empta acceperam; eodem modo, prout ibi asseruabantur, inuoluta: quæ vt commodius deferri possent, quodlibet in tres partes diuisum, in capsas maiores ex corticibus arborum siccatis confectas, imponendum curauit: ita vt sex eiusmodi capsas Mumia refertas haberem: in septima verò erant idola fictilia ijsdem illis corporibus copulari solita. Cùm igitur de periculo deportationis ex nautis intellexissem, consului negotiatores mihi notos, quid mihi agendum suaderent, & num vera essent, quæ nautæ dicerent. Multi affirmabant rem ita se habere: multi pro fabulis hæc ducebant, affirmantes, quòd ipsimet in Italiam sæpissimè Mumias per mare deportarunt, neque tamen in vllum periculum hoc nomine inciderunt. Persuasione igitur illorum adductus decreui corpora hæc mecum asportare, vt in Europa ostenderem, qua ratione condita reperiuntur; maximè quòd ad partes nostras, à quoquam integra delata fuisse numquam antea intellexeram. Quamobrem nihil ea de re cum nauclero communicans, septem capsas illas Mumiarum, cum rebus alijs in nauem inferri iussi. Sed parum abfuit, quin statim in magnas difficultates incidissem. Nam cùm Turcæ, res meas inspecturi, in Alexandria nos conuenissent, vt telonium ab illis persolueremus, habebant in comitatu Iudæum, qui eorum interpretes & Notarius fuerat. Hic quoniam Christianis vtcumque fa-

uebat, quòd Christianorum merces assiduè pertractaret, à quibus non parum emolumenti, & honoraria frequentiora percipiebat, cùm in capsis Mumiam repositam animaduertisset, statim easdem capsas claudi, & funiculis ligari præcepit, & Turcis quibus vinum propinabamus, retulit, nos in capsis illis nihil aliud habere, præterquam cochlearum testas & conchas, quales in maris littore legi solent: cuius relationi fidem Turcæ adhibuerunt, quòd & eorum minister esset, & quòd è conclauis, in quo vinum hauriebant, pedem efferre minùs festinarent. Causa cur Mumias Turcæ prohibeant efferri, hæc esse perhibetur. Quandoquidem ipsi magicis superstitionibus valdè sunt addicti, persuasum habent, Christianos eiusmodi Ethnicorum cadaueribus ad Magiam abuti. Verentur itaque ne per incantationes aliquas damnum ipsis, & eorum ditionibus, non facilè recuperandum inferant: idquæ diligenter præcauent. Difficulter igitur integra Mumia extrahitur à mercatoribus: qui clàm & minutatim eiusmodi merces auertere solent. Iudæo itaque illi bonum honorarium dedit: qui si Turcis de Mumia aperuisset, non paruum discrimen nobis imminerebat, quod ingenti aliqua pecuniæ summa redimendum erat. Cùm itaque priori tempestate iactaremur, nullus nostrum de Mumia hac meminerat. Erat mecum in eadem naui Sacerdos Polonus Simon Albimontanus, qui patentes Regis Stephani literas habebat, & sepulchrum Dominicum visitauerat. Eum primùm Ierosolymâ reuertens, Tripoli videram, & denuò Cypri cùm in Ægyptum proficisceretur, obuium habui, qui Ierosolymam tendebat. Postremò venit Alexandriam Sabbato hora vigesima: ego verò sequenti die circiter quintamdecimam horam nauem conscenderam. Hic igitur cùm pecunia destitutus esset in extera regione, nec consilium reperiret quidnam agere deberet, petiuit à me, vt illi opem ferrem; quod potui, non inuitus eidem obtuli. Sed

cùm

*Mumia cur
Turca ef-
ferri prohi-
bent.*

cùm animaduernerem, illum breui ad necessitatem redactum iri; nec, visitatione S. Sepulchri absoluta, cur in Ægypto moraretur, causam esse: instante eo vt eum mecum in partes Christianorum reducerem, acquieui libenter; quod bonum virum & pium Sacerdotem viderem, & meum quoque popularem, cui deesse non liceret. Hic de Mumia cadaueribus hisce nullam planè notitiam habuit: nam antè quàm Alexandriam peruenisset, triduo res meæ in nauem illatæ erant; ipse interim in ciuitate degens, venti & nauigationis commoditatem operiebar. Cum igitur in priori tempestate versaremur, Sacerdos hic Preces horarias recitans, conquerebatur duo sibi spectra magnum impedimentum adferre, & quocumque tandem loco in naui consisteret, semper se comitari. Hæc cùm primùm audiremus, mirabamur: postea verò (vt hominibus inusitatum non est, in communi calamitate, ad fortuitos proximi casus, risu potius quàm compassione commoueri) tempestate sedata rem in iocum vertimus, existimantes has imaginationes è metu prouenisse, vt plerumque nauigantibus, in periculis obijci solent. Sed cùm in altera tempestate, denuò de spectris eiusmodi vehementer conquereretur, asserens, se virum & mulierem nigram, tali & tali habitu indutos videre: qualem nec mei quidem seruitores, duobus tantùm exceptis, in Mumijs illis viderant, nec de illo Sacerdoti indicare poterant, mirari accuratiùs cœpimus. Certissimum enim erat, neminem seruitorum de cadaueribus istis sciuisse, præter duos illos, qui secretum hoc nemini proculdubio, extraneo præsertim, aperuerant. Sed nec tunc quidem Mumia nobis in mentem venerat. Postremò totus conturbatus, pallidus, & tremens Sacerdos ad me accurrit, exposuitque quàm horrendum in modum à spectris hisce inter orandum exagretur, immò laceretur. Tandem incidit mihi, fortè illum hæc pati occasione corporum istorum Mumiatricorum,

Misi

*Spectra duo
Simoni Pre-
sbytero ap-
parent.*

Misi itaque ad nauarchum, vt inferiorem Saitiæ nauis partem nobis recludi iuberet, caussam tamen reticendo: volebam siquidem capsas illas Mumiarum clàm in mare proijcere. Sed nauarchus respondit, se id facere non posse propter ingentes fluctus, qui Saitiam ita operiebant, vt omnes madeficeremus. Exspectaremus modicum, statim nos omnes interituros, nec esse cur inferiùs descendere-mus, mox in ipso gurgite futuri. Et videbamus quidem apertè periculum maximum instare, si nauis aperiretur: ex alia parte Presbyter de spectrorum vexatione mirum in modum lamentabatur. Nesciebamus itaque quid nobis agendum esset.

Vbi verò S. Germanus apparere, & ventus contrarius subsidere cœpit; cùm iam illucesceret, nauem aperiri iussi. Et quamuis, vt paulò superiùs scripsi, apparente eiusmodi fidere, nauis extra periculum esse soleat, spectris nihilominùs Sacerdoti molestiam inferentibus, septem capsas illas in mare proijci iussi. Quod vbi factum, nauarchus statim ad me accurrit, percunctans quidnam abicissemus: numquid Mumiam? Fassus sum. Expauit illicò vehementer; sed postea se recolligens erat recreatus; & certò promittebat, nos tempestatem ampliùs non habituros. Et non frustrà hæc prædixit. Nam licet apud insulam Carpathos insurrexerat, minùs vehemens tamen fuit, & S. Germano semel apparente, statim cessauit. Dixit mihi postea nauarchus, quo tempore ad eum mittebam vt nauem aperiret, etiamsi illi dictum fuisset, id propter Mumiam fieri, numquam tamen aperturum fuisse, propter vndarum insurgentium imperum: & quod iam certò nos interituros credebat, momentum tantùm demersionis expectans. Quærebat & Sacerdos, quidnam in mare proiectum fuisset. Cumque illi dixissem, maiore etiam timore correptus, tamquam vir Ecclesiasticus arguere me cœpit, quòd Ethnicorum corpora circumferre veritus non fu-

rim,

rim, propter quæ tantum vexationis pertulerit, nec aliam spectrorum apparentium causam fuisse. Ego reprehensionem boni Sacerdotis grato animo suscepi: ne tamen sinistri aliquid de me suspicaretur, reddidi causam facti, me Mumiam, cuius in medicinis frequens & necessarius esset usus, propter iuuandos infirmos asportare voluisse, neque ab Ecclesia prohibitum cuiquam esse, ne Mumiam in partes Christianorum deferret. Cretam cum deuenissemus, quærebat Theologorum de Mumia sententiam: qui docuerunt, eius importationem Christianis non vetari. Atque ita demum me purgatum & excusatum habuit. Apparuit & hinc, nihil illum de corporibus istis cogitasse: de quibus, si notitiam aliquam habuisset, non intermisisset profecto, & metu periculi, & officio Sacerdotali adductus, quin me commoneret: maximè quod iam nos morituros credebamus, & ipsemet Orationes in periculo recitari solitas, nobis subsequenter, inchoabat.

Neque hæc idè sunt hæc à me commemorata, quasi pro certo comprobare velim, propter Mumia corpora, quod multi volunt, naufragia eiusmodi prouenire: sed ut doceam, ista nobis in hac nauigatione contigisse. Certè Sacerdos hic valdè pius & vitæ exemplaris fuit. Nam Corcyram usque mecum nauigauit. Postèa cum ego me in Italiam conferrem, & Hydrunti ex naue descendissem, ipse cum famulo & rebus meis, in triremi Venerias nauigauit, & aduentum meum ibidem expectauit. Postèa Compostellam, voti exsoluendi causâ, perrexit: vnde Romam, & deinde in Poloniam redire cõstituerat. Vbicumque mecum loca Christianorum attigit, singulis diebus Missam deuotissimè, cum lacrymarum profusione, celebrauit. Domi vero minima quæque obsequia, pueris consueta, cum tanta alacritate obibat, ut admoneri per nos necessariò debuerit, ne se ad vilissima culinæ ministeria, ollarum cacaborumve ablutionem, vel scoparum purgationem, dmitteret. Admi-

Reuerfus est in Poloniam, & Craconiam in hanc usque diem degit, in Ecclesia B. Virginis deferuiens.

rationi fuit omnibus, tanta pij Sacerdotis huius humilitas.

Illud operæ pretium fuerit hoc loco inferere, qualem Sacerdos hic post magnam illam tempestatem, qua apud insulam Carpathos, cum nobis S. Germanus semel tantum apparuisset, iactabamur, visionem oblatam habuerit, quam statim mihi, qui proximus illi eram, deinde ceteris omnibus reuelauit. Nam cum in oratione positus esset, videbatur sibi videre Saitiam nostram nauem in partes ruptam, & nos per mare natantes demergi. Interea beatissima virgo Maria, pallio suo nos cooperiens, nauis partes recolletas in vnum composuit, & dixit, Ecce in quanto periculo fuistis. Atque ita veluti è somno quodam experrectus se proripuit: quod apertè videbamus. Nam subito consistens, & hinc inde aspiciens, nauem & nos omnes saluos reperit, quos in visione mari iam obrutos crediderat. Hæc obiter hîc annotanda putauî, quæ coràm ipsemet intuitus, & magna ex parte sum expertus. Certum est, si tēpestas in duas horas, vt attigimus antea, protracta fuisset, Saitia vim eius sustinere nulla ratione potuisset: id quod euidenter deinde apparuit, cum apud insulam prædictam Carpathos, per continuas viginti quatuor horas, nauem reficere, & pice obducere coacti fuimus: quæ adeò vndarum violentia concussa fuit, vt per vices nautæ continuò aquam exhaurire necesse habuerint.

Cum igitur ad prædictum Promontorium delati essemus, quod in ipso diluculo fuit (nam noctu eò appropinquare nauta propter scopulos nō audebat) iactis anchoris, & Saitia ad rupem longis funibus alligata (fundus enim hîc non adeò stabilis, & vel ad modicum ventum anchoræ mouentur: vnde nisi nauarchus sit peritus, sæpenumerò naues periclitantur, quæ vt tutiorem habeant stationem, funibus prælongis ad rupem alligari nautarū industria solent) statim famulum Sitiam, quæ tribus inde miliaribus distabat, misi, qui Reçtori Constantino Rinero de

*Simoni
Presbytero
Virgo beatissima
in tempestate
apparet.*

de aduentu nostro significaret. Is quoniam iam antea, vt dictum est, de me certior factus erat, equos, & vltra decem & aliquot equites, qui minores hastas deferre solent, & Stradiottę vocantur, ad me deducendum expediuit; qui ^{Stradiotta equites.} vesperi vnà cum famulo venerunt: vnde noctem in Saitia me adhuc ducere oportuit. cumq; conscensis scaphis me salutassent, & mandata Rectoris exposuissent, vbi nauarchus didicit quis essem, vehementer indoluit, quòd id Alexandria rescire non potuerit. Aliter enim mecum transfactus erat. Quis enim nosse poterat, quæ de nobis facere constituisset? Animaduersum enim fuit, (an autem hoc in mente habuerit, Deus nouit) nisi maior nostrum in Saitia (remanferant etenim mecum etiam Stradiottę aliquot) numerus fuisset, quòd noctu in mare denuò nos abducere cogitabat; vt nos pretio redimeremus; vel alias lucri occasiones, prout & alij facere solent, inuestigaturus fuerat. Sed malum præuidentes, tota nocte diligentem adhibuimus custodiam, perpetuò vigilantes.

24. Manè egressus naui, rebus nauiculâ, quæ venerat, Sitiam præmissis, & nauarcho iuxta conuentionem pretio persoluto; familiaque ipsius donata, ita vt iam contentus remanserit, equis conscensis, versus Sitiam perrexì. In itinere ad monasterium beatissimæ Virginis, in quo Græci monachi habitant, qui locus singulari populorum deuotione frequentatur, descendi, Deoque gratias egi, quòd nos hactenus incolumes seruauerit. Circa meridiem Sitiam perueni, Rectore cum multorum nobilium frequentia obuiam mihi prodeunte: qui cum me ad domum nobilis cuiusdam Veneti ex familia Corneliorum deduxisset, & hospitij commoditatem ordinasset, in palatium redijt. Sitia enim muro cincta non est, ducentas circiter domos tantum habens. Palatium verò Gubernatoris angustum, munitionem nullam habet. Nam tempore belli omnes ad loca tutiora se conferunt: nec nisi propter

Iudicia, cum tractus sit peramplus, Rector hic manere consuevit.

Manè venit ad me Rector, & me ad Ecclesiam parui Conuentus sancti Augustini deduxit, vbi Missam audiui-
mus. Prandio peracto, visitaui eundem in palatio, vbi Iudicia quædam exercebat. Patebat inde latior in mare prospectus, vidimusque Saitiam nostram; quæ, vt constituerat, ad aliam insulæ partem versus Barbariam cursum tenere propter ventum contrarium non potuit. Mare namque cum sit hic magis amplum, securam præbet nauigationem. Saitia verò prope Archipelagum tendebat, & de nouo in tempestatem incidit; quæ Corcyram vsque delata est.

Hanc ad te tertiam Epistolam hinc scribendam existimaui, quòd verear, ne hic Cretæ propter tempestates diutius mihi sit hærendum, quàm vellem, & rationibus meis expediret. Adproperabo tamen Candiam: & quidquid postea fuerit, certio rem te reddere non intermittam. Datum Sitia, x xv. Octobris, anno M. D. LXXXIII.

EPISTOLA QUARTA.

ARGVMENTVM.

HIC funebres Sitiesium carimonias exponit. Candiam appellit. Honorifice à Cinitatibus & Insulis Venetorum excipitur. Arces, ciuitates, portus complures describit. Casum mirabilem nautarum Sicilia, literas liberi transitus à Turcico Imperatore missas, eiusdem insidias, quas diuina prouidentia euasit, inserit. Apud Zacinthum, fratrem Cardinalem factum cognoscit. Barium Apulie ciuitatem, sepulchro diui Nicolai celebrem, & alia regionis loca perlustrat. In itinere à latronibus spoliatur, qua de causa maxima rerum difficultate inter ignotos circumuentus, agrè Venetias adnauigat, vbi famulum Tripoli cum sarcinis præmissum reperit, alter decimo post suum aduentum die Corcyra venit. Denique votorum compos, feliciter ad solum paternum reuertitur.

RECTOR

26. **R**ECTOR Sitienſis, pluribus nobilibus conuocatis, epulo ſolemni me excepit in palatio: quo finito, deambulabat hinc inde mecum. cumque paruam quamdam Græcorum Eccleſiam præteriremus, incidimus in funebres illius regionis cærimonias, quæ veteribus Ethnicorum non erant abſimiles. Maritum defunctum vxor ſepeliebat, quæ facie vnguibus conſciſſa, capillos euellens, veſtem in pectore dilacerans, caput muro allidens, non abſque ſanguinis effuſione orbitatem ſuam miſerabiliter deplorabat. Adhibiti ſunt etiam pretio conducti lamentatores & lamentatrices, qui funus deducenſes, eiulatus, & manibus contortis vociferationes inconditas edebant. Mos abominabilis, & Chriſtiana profeſſione indignus. Veſperi valedixi Reſtori, qui mihi Stradiottas aliquot, qui me deducerent, attribuit, & nobilibus vicinis ſignificauit, vt quocumque diuerterem, me honorificè & luculenter tractarent, quod ab ipsis, etiam maxima cum humanitatis teſtificatione, copioſè factum eſt.

*Funebres
cærimonia
Sitiorum.*

27. Manè Miſſa audita, & diuiniffima Euchariftia percepta, antequam plenè illuxiſſet, diſceſſi prænſurus in Turlotha, palatio cuiuſdam nobilis: inde per conuallem amœnam & fertilem, pro nocte peruenimus Cauuſam, vbi nobilis Venetus ex Cupreſſi arboribus lucum elegantem, pulcherrimo ordine plantauit, & ad competentem perfectionem deduxit.

28. Perueni Iſtrônâ ad locum cuiuſdam nobilis peramœnum. Pertranſiui Pomeriacum, villam benè habitatam. Inde pro nocte, cùm tardior hora eſſet, diuerſi ad monaſterium ſancti Antonij de Sumete de Cares, Ordinis ſancti Franciſci. Exceptus ſum à Fratribus perhumaniter, qui, quoniam ex eleëmofynis viuunt, fructus varios nobis apoſuerunt. Ad dextram prope viam publicam, vidimus Di-

238 IEROSOLYMITANA PEREGRINATIO
rapetram, olim Hyrapeam. Ibidem quoque ad dextram,
supra littus maris, quod iam non poteramus conspiceré,
habuimus insigne Venetorum propugnaculum, Spina
longa cognominatum, in rupe exædificatum, quod mari
vndique alluitur.

Prandio sumpto discessi ex monasterio, pernoctaturus ^{19.}
in Maglia, villula cuiusdam nobilis, & palatio paruo. Huc
Dux Candiaë quemdam propinquum suum, cum Secreta-
rio & honesto comitatu præmisit, qui me salutarent, vt
que rectà in palatium diuerterem, inuitarent.

*Candia ci-
uitas.* Summo manè quatuor ferè ante diem horis disceden- ^{20.}
tes, itinere valdè difficili & saxoso, peruenimus circa me-
ridiem ad Candiaë ciuitatem. Diuersti rectà ad monaste-
rium sancti Francisci, Deo humilem gratiarum actionem
offerre, ibidemque manere deliberatum habens: quando-
quidem antea quoque hospitium hîc habebam. Sed cùm
pransurus cum eo, ad Ducem accessissem, omnibus modis
vrgebat, vt in palatium diuerterem. Quamuis autem cer-
tis de causis libentiùs in monasterio mansissem, ad ma-
gnam tamen Ducis instantiam, qui subuerebatur, ne in-
humanitati ipsius id adscriberetur, si alibi hospitium ha-
buissem, precibus eius locum dedi, & per quinque hebdo-
madas, antequam Caneam me contulissem, hospitij eius
beneficio vsus sum.

De situ ciuitatis Candiaë, & munitione eiusdem, belli-
corumque tormentorum insigni apparatu, quandoqui-
dem alij perscripsere, ego supersedeo. Cetera breuiter
perstrinxi, cùm primùm eò aduenissem, in Palæstinam
nauigaturus.

N O V E M B E R.

Die septima Nouembris, duodecim Venetæ triremes ^{7.}
appulerunt Corcyrà: quarum septem erant ad custodiam
maris deputatæ, quæ milites Melitenses à Venetis captos
dedu-

deducebant; quinque verò erant nouæ, quas illi Arcillas vocant, & in Arsenali asseruantur, vt necessitate superueniente, vbi opus fuerit, expediri possint. Nullibi etenim, præterquam Venetijs, triremes ædificantur: & inde vbi vsus postulat emittuntur.

Toto hoc tempore diligenter & sæpiùs ciuitatem perlustraui. Inspeci & arcem portui imminentem: quæ parua quidem, sed valdè munita est, omniaque nauigia portum ingredientia excipit. Maiora bellica tormenta habet plurima.

Nobiles quoque omnes, in Magistratu constituti, suis me conuiujs semper adhibebant, humanissimè tamquam hospitem inuitantes & tractantes. Debebant mihi statim duæ triremes dari, quæ me in Italiam deportarent, qua de re literas Reipub. Venetæ ad loci huius ministros habui: & ex parte negotium fuit determinatum. Sed Capitaneus triremium, Philippus Pasqualigus, executionem differebat: cumque mandatis vrgeretur, loco duarum, vnâ mihi triremem assignauit Ioannis Diedo: qui, cum fratrem haberet Castellatum in Spina longa, mercimonia olei oliuarum pertractantem, expectando suum oleum, profectionem differebat; ita vt tardiùs inde discedere coactus fuerim, idque cum alijs triremibus, vt inferiùs dicetur.

30. Fui in altissimo monte supra ciuitatem Candiam, vbi est paruum Græcorum monasterium, ad quod tamen, cum iam hora tardior esset, peruenire non potui. Hîc Poëtæ fabulantur Iouem sepultum; & nonnulli affirmant, epitaphij quosdam Græcos characteres ibidem reperiri, qui vetustate ita exoleuerunt; vt discerni non possint. Georgius Cedrenus scribit, inscriptionem illam ad eum modum se habuisse;

- HIC SITVS EST PICVS: QVI ET IVPPITER MORTVVS.

D E C E M B E R.

Die quarta Decembris Missa manè audita, discessi ex Candia, à Consiliarijs & Nobilibus multis honoris causa comitatus. Meridie Telizam, pro nocte Camariotum peruenimus: quæ loca ad nobiles Candia pertinent.

*Retimum
Venetorum.*

Manè Daphnedades, vesperi Retimum attigimus: vbi Consiliarij, Nobiles, & Capitaneus cum equitibus circiter quinquaginta, obuiam mihi processere. Nam cum propugnaculum peramplum sit, plures hîc milites alunt Veneti. Diueri recta in arcem, in qua Rectoris munere perfungebatur Angelus Barocius: qui me humanissimè excepit, omnibus tormentis bellicis exoneratis. Ciuitas ipsa superioribus bellis, à Turcis exusta. Arx, in edita rupe in mare procurrente, exstructa, vt à continente auulsa videatur. Assimilatur situi Tyri in Syria Phœnices, nisi quod locus hic minor est.

Manè cum Rectore iui ad salutandum Episcopum, qui Iulius Carara dicebatur. Postea Missa in Ecclesia audita, redijmus in arcem vnà cum Episcopo. A prandio itinere permolesto, iam tardè peruenimus ad locum Piscopi dictum: vbi est villa & palatium dicti Antistitis, quo procurante, ibidem per noctem sustentati & tractati fuimus.

*Monasteriū
S. Ioannis de
Patyna.*

Exeundo manè, & relicta supra montem ad dexteram prope mare, altera Dirapetra, olim Hiera Pithna, vbi Nobiles alunt etiam milites aliquos, propter piratarum Turcarum incursiones, peruenimus tribus horis ante vesperam ad monasterium Græcorum S. Ioannis de Patyna dictum. Est enim insula in Archipelago Pathmus dicta, in qua S. Ioannes Apocalypsim conscripsit. Multa sunt eiusdem ordinis in Græcia monasteria, quæ omnia S. Ioannis de Patyna vocantur. Non procul à dicto monasterio in monte sublimi, per quem transiuimus, visuntur muri satis adhuc integri, ex lapide quadrato constructi, vbi appa-

ret

ret magnam olim fuisse ciuitatem. Prope monasterium prædictum, quod vno ferè Polonico milliari à dictis murorum ruinis abest, habentur cisternæ magno sumptu in terra effossæ, & muro solido ædificatæ, è quibus aqua ad prædictam ciuitatem deferrebatur. Mirum cur ciuitas illa in monte posita fuerit, vbi nullas habere potuit aquas, quæ tanto interuallo perebantur, è pluuiæ tantùm collectæ: nec enim ibi surgentes habentur. Tota namque insula duo tantùm habet flumina, exigua cymba nauigabilia. Si alicubi fons emergit, is perquàm exiguus, modicas aquas ministrat.

8. Quatuor horis antelucanis equitando consumptis, ^{Cydonia, sive Canea.} Caneam, antea Cydonia dictam, perueni, priusquàm ciuitas aperiretur: vbi ad vnam & mediam horam mihi fuit expectandum. Ideò autem maturiùs veni, ne equitatus mihi cum pompa occurreret. Porta ciuitatis aperta, statim ad monasterium S. Nicolai, Ordinis D. Dominici, diuerti. Nam militiæ Præfectus Raphaël Razbonius, vt ad suum palatium descenderem, rogabat. Sed quoniam data opera ex Candia discefferam, ne diutiùs in palatio Ducis hærerem; & libertate potiùs gauderem, quàm cærimonijs illis distrahentibus, quas pro sua humanitate magnas mihi nobilitas illa tota exhibebat; ideò in monasterio potiùs subsistere decreui. Scripseram enim Candiâ Fratribus, vt mihi apud se locum habitationis concederent: quod libenter fecerunt. Habebant enim cubacula, excipiendis hospitibus studiosè præparata, quando honoratiores aliquæ personæ eò accederent. In Græcia namque publica ^{Hospitia publica in Græcia non habentur.} diuerforia non reperiuntur: apud priuatos vel fauore vel pecunia hospitium conquirendum est. Venit illicò ad salutandum me ciuitatis Rector, Ioannes Dominicus Ciconia, cum Consiliarijs Marco Antonio Contareno & ceteris ex familia Lauredana. Diebus postea sequentibus, pluries ciuitatem perlustraui. Nam ibi per nouem hebdo-

madas mansi. Ciuitas est valdè munita, cum portu; quem tamen onerariæ naues, propter scopulos, ingredi non possunt: sed vno abhinc milliari nostro, apud paruam insulam, quæ Turlures habet munitionem, tutam habere solent stationem.

Quandoquidem multi scribunt de hac insula Creta, Plinius præsertim, quòd olim centum Vrbes habuerit: ego nihil temerè affirmare volo, vt qui eam in transitu tantùm viderim, neque studiosè totam peragrarem. Sed ex frequentibus ruinis apparet, eam plurimas vrbes habuisse, vt valdè verisimile videatur, quod Plinius scripto tradidit.

Naui Siculorum erratica.

Occurrit hoc tempore casus hîc mirabilis. Conspecta fuit à longè maior naui (quales propter angustiam portus & latentes scopulos huc adpellere non solent) prospero vento rectà versus portum ferri. Animaduersum est, eam loci inexpertem; atque ob cautelam tormenta iam explodi debuerant, cum ecce, cum omnium spectantium trepidatione & admiratione, salua miraculo quodam, in portum irruit. Erant in ea homines vndecim, qui ignorabant quorsum deuenissent. Dicebant se nautas esse Siculos, qui Syracusis lignatum vltra Promontorium quoddam profecti, cum nauticam pixidem non haberent, vento validissimo abrepti, tribus hebdomadis per mare oberrabant, nescientes planè vbi essent, qui à diebus iam octo panem non degustarunt: cumque se iam fame perituros viderent, (quod etiam ex pallida illorum & ferè emortua facie apparebat) conspecta Insula, versus illam vela direxisse, quæ etiam si Turcica fuisset, maluisse in seruitutem abduci, quàm fame contabescere. Nauem hanc emit ab illis mercator quidam septingentis scuris; quam vendere coacti sunt, cum non haberent vnde se sustentarent, nullique mortalium in istis partibus noti essent. Mercator magnam difficultatem expertus est, antequàm nauem è
portu

portu, propter cautes & scopulos educere potuisset: illi autem, absque damno aliquo, miraculosè in eum delati sunt. Qui portum hunc, quàm periculosus sit, considerauerit, vix illi possibilia ista viderentur. Tres ex ijs nautis, eamdem, quam & ego, triremem postea mecum conscenderant.

26. Appulit Caramufana nauis ex insula Milo, & cum ea duo Poloni nobiles, Martinus Lubieniecki & Petrus Broniewski: qui declinantes periculum (nam sub illud idem tempus Iacobus Podlodowski à Turcis fuit interfectus) ^{Iacobus Podlodowski à Turcis occisus.} huc Constantinopoli delati erant, nihil minùs cogitantes, quàm vt me hìc inuenirent. Hi, vt Constantinopoli faciliore negotio discedere possent, acceperunt patentes literas, quas Amurates Tertius Turcarum Imperator mihi trans mittebat. Cùm enim Ierosolymam proficiscerer, scripseram ex Candia Stephano Regi, petens ab eo, vt mihi eiusmodi patentes literas à Turcarum Cæsare obtineret, quarum præsidio, terrestri itinere ex Syria rectà Constantinopolim peruenire possem. Et licet contra genium quodammodò meum profectio hæc mea futura erat; quoniam tamen nauigatio, etsi breuis, valetudini meæ fuit contraria, neque credebam me Ægyptum peragratum, propter immensos calores, & exercitus, qui, vt antea inuimus, in Persiam mittebantur: decreueram, visendæ etiam Constantinopolitanæ vrbis caussa, illac iter facere. Itaque quòd me Stephanus Rex diligenter commenderet, eiusmodi patentes literæ Turcicæ expeditæ, & mihi per dictos Nobiles allatæ fuerunt.

SVLTANVS AMVRATES

IMPERATOR.

SPECTABILIBVS, & *Præfectura Cadiatus dignis ac strenuis Ierosolymâ Constantinopolim versus, in itinere*
Hh 2 ubi-

ubicumque residentibus Cadijs, optantes omnium bonorum affluentiam, simulque mittentes hoc excellens mandatum nostrum, notum esse volumus; Quod hisce temporibus ex ditione Regis Polonia quidam nomine Petrus Broniewsky Polonus, ante celsitudinem Maiestatis nostra veniens, retulit, quod Lithuania Ducatus Marschalcus supremus, nomine Nicolaus Christophorus Radziwil, Dominus spectabilis, Ierosolyma sancta rediens, cum duodecim personis Constantinopolim venire constituit ac proposuit: & ut ubique in itinere, in diuersorij locisque, quocumque conuersari & subsistere voluerit, ipsius persona cum famulis, equis, & omnibus suis sarcinis, à nemine aliquam difficultatem & impedimentum patiatur, ille ipse à nobis hasce sacras literas mandatorias exposulauit. Quamobrem mandauimus, ut quamprimum ubicumque locorum praefectura Cadiatus, cum hisce literis sacris aduenerit, in primis persona sua Dominationi, famulis, equis, sarcinis ac necessarijs omnibus in itinere, hospitij, eundo, commorando, & in omnibus locis conuersando, nihil omnino alicui eorum ab quopiam molestia ac impediementi facere permittatis: quandoque voluerit suo sumptu res sibi necessarias & alias ad victum pertinentes coemere (modo iuribus nostris ne sint contraria) ut à nemine itidem aliquod impedimentum & fastidium habeant, diligenter prouideatis. Hac omnia scientes, quando hac epistola nostra vobis ostendetur, plenam fidem adhibeatis. Datum Constantinopoli ultimis diebus mensis Romasana: nostro Septembre ultimis diebus, anno M. D. LXXXIII.

INSCRIPTIO SIVE TITVLVS.

Ex Ierosolyma sancta ubique in itinere, ad Cadios, Constantinopolim versus eundo, haec litera pertinent.

Quoniam autem acciderat, quod sub idem tempus Nisouienfes Kosaci Tehiniam oppidum, Turcarum commercio clarum, propemodum funditus euerterant, quam ob causam, de bello Poloniae Regi inferendo inter Turcas mus-

muſſitabatur: quamuis eiufmodi patentes literæ datæ fuerant, Secretarius tamen Nobilibus illis, prout mihi narra-^{Auſtori inſi-}
rūt, hæc Latinè dixit; Eatis, quia non curamus vos, ſed Prin-^{die à Turca}
cipes veſtros. Statim igitur itinere terreſtri, quatuor ſunt ^{parata.}
Czauflij expediti, vnus Aleppum & Tripolim, alter Da-
maſcū & Ieruſalem, tertius Cairum, quartus Alexandriam
(quò iam vna triremis cum duobus celocibus aduenerat
Feria quinta, ego verò Dominica diſceſſeram) cum eiuf-
modi mandatis, quod mihi poſtea ex iſdem locis ſignifica-
tum fuit; nempe, eſſe quosdā quibus literę paſſus à Cæſare
ſunt conceſſæ: quibus nō obſtantibus, debere nihilominus
perſonas illas comprehendere, diligenterque aſſeruari, &
quamprimùm de ijs Conſtantinopolim perſcribi. Sub hoc
ipſum tempus, paulò antè quàm ego Cairo diſceſſiſſem
Alexandriam, accidit caſus, qui ad oſtendendam circa me
diuinæ prouidentię ſingularem miſericordiam non me-
diocriter pertinet.

Quinque Nobiles viri, obtentis literis patentibus, ope-
râ Breyneri defuncti Cæſaris Legati, à Turcarum Impe-
ratore, Conſtantinopoli cum Galeone Turcico Rhodum
peruenerunt: vnde ſoluentes (cum altero Galeone, quem
ceperant Melitenſes) ſua naue vecti ad nauigarunt Ale-
xandriam primùm, deinde Cairum, vbi ſæpiùs cum illis
conuerſatus ſum: quorum nomina ſunt hæc; Pancratiuſ
Freyndt, Georgiuſ Menden, VVolffgangus Aurbach,
Bernardus VVarkoc, qui Regi Stephano inferuiuit, &
quintus erat Polonus, Ioannes Kobilnicki. Hi antequam
ego Alexandriam diſceſſiſſem, proſecti ſunt ad montem
Sinai, & vnà cum illis Abrahamuſ, Baro à Dona, qui me-
cum erat in comitatu, & reuerſuſ è monte Sinai, me poſt-
eà Alexandria reperit. Ceterùm quinque illi Cairo Iero-
ſolymam proſecti ſunt: cumque terram Philithinorum
pertranſirent, inciderunt in Arabes, & quoniam Caraua-
na triginta tantùm perſonas habebat, ab illis ſunt ſpoliati.

Peruenerunt tamen Ierosolymam : cumque inde Damascum peterent, in Samaria ciuitate Sichar, de qua superius, habuerunt obuium Czaussium illum, qui Cairum mittebatur. Hic ubi quinque externos vidit, existimans me cum famulis esse, eosdem iuxta mandata sibi iniuncta detinuit: cumque illi patentes Cæsaris literas Czaussio exhiberent, maiorem etiam illi suspicionem iniecerunt, me illum ipsum, qui comprehendi iubebar, fuisse. Quamobrem ostendit vicissim illis literas Cadio destinatas: in quibus continebatur, ut etiam si literas passus à Cæsare haberent, nihilominus in custodiam conijcerentur; & statim de comprehensis Constantinopolim referretur. Itaque omnes illi quinque adèd strictè catenis ferreis ad collum sunt simul colligati, ut vno versus terram inclinante, ceteri quoque incuruarentur. Literæ verò passus, quas habebant, per eundem illum Czaussium, Constantinopolim sunt transmissæ. Priùs tamen Damasci fuerunt exhibitæ; ex quibus cum constaret me non esse, (quod itidem mercatoribus quibusdam sibi notis significauerant) missus est Damasco Czaussius, qui illos è carcere dimitti iussit, in quo per duas hebdomadas miserè detinebantur. Agnosco itaque vel hinc gratiam Dei singularem, quòd consilium illud Stephani Regis Grodnæ datum, qui me, ut in Palæstinam per Constantinopolim irem, hortabatur, sequutus non fuerim; idque propter offensam Regi Stephano temerè per Kosacos Nisouienes conflatam; cuius rei pœnam Iacobus Podlodouius, absque sua culpa interemptus, sustinuit. Collaudauit postea factum hoc meum Rex Stephanus, cum reuersus è peregrinatione, ibidem Grodnæ illum salutassent, quòd diuersum ab illo, quod suadebat, iter instituere maluerim; alioquin maximum vitæ discrimen incururus.

Itinere terrestri ad vnum & medium, maritimo verò ^{18.} ad dimidium tantum milliare progressus, visitaui pugna-

pugnaculum Venetorum in hoc ipso regno munitissimum, in Suda insula constructum, quod iam antè à longè ex monasterio S. Ioannis de Patyna conspexeram, cum isthìc, ante meum Cydoniam ingressum, pernoctarem. Arx hæc quinque habet validissimas frontes seu propugnacula, tormentis bellicis & multis militibus egregiè instructa: portui adiacet amplissimo, qui duo navium millia commodè capere potest, quæ præterlabentes, bombardæ longioris ictu peti possunt. Fuit mecum vnà Consiliarius Marcus Antonius Contarenus. Castellanus loci erat Ioannes Antonius Buon, qui nos ibidem prandio excepit, & quæ visu ibidem digna videbantur, humanissimè demonstravit. Sub vesperam redijmus Cydoniam.

ANNVS M. D. LXXXIV.

I A N V A R I V S.

1. Manè è turri speculatoria Cydoniensi, quæ est ad litus maris, significatum est, duas triremes visas, quæ versus Candia ciuitatem ferebantur. Et quoniam pridem proclamatum fuit, ^{Latinus Vrsinus in Candiam à Venetis missus.} Latinum Vrsinum in Candiam venturum, qui à Repub. Veneta mitteretur in Insulam, vt antiqua propugnacula restauraret, nouis erigendis loca per opportuna designaret, cum vir hic in rebus bellicis apprimè à multo tempore versatus haberetur, creditum statim est, cum triremibus his aduectum, prout etiam res ipsa comprobauit. Is enim ciuitatem Candiam ingressus, statim Caneam triremes aliquas expediuit (quarum septem in Candia ad custodiam maris deputatas antèa diximus) vt non procul ab ipsa ciuitate confisterent, in loco Grabusses dicto, cuius D. Lucas meminit, vocans Phœnicem portum ^{Astor. 27.} Cretæ, respicientem ad Africum & ad Corum. Est enim satis commodus, & qui facilem Turcis accessum præbere posset. Quamobrem cum adhuc in Insula versarer, nouum in eo, benè munitum propugnaculum fuit excitatum.

Armamentarium Cydonien.

tum. Mensis hic totus per aduersam valetudinem mihi transactus est. Nam per septem ferè hebdomadas malè habui: per quinque verò febrem quotidianam, cum grauissima tussi, sum expertus. Dum hìc hærerem, Armamentarium seu Arsenal pro viginti vel circiter triremibus, ædificando perfectum fuit. Quoniam lateres cocti in partibus istis non habentur, testudines substructionum lapidibus quadratis erant concameratæ, qui cùm calce tantùm compacti essent, quæ nondum induruerat, neque superiùs opere albario, vt aqua commodiùs decurreret, obducti fuissent, (neque enim ibi fornices tecto aliquo cooperiuntur) superueniente pluuiâ vehementiore, lapidum compage resoluta, & quòd fundamēta perfunctoriè iacta fuerant, vna nocte duæ concamerationes ædificij corruerunt, & duas, quæ præ ceteris instructiores erant, triremes conquassarunt: quæ res Officialibus loci plurimum perturbationis attulit: propter Turcarum tamen vicinitatem, quorum aliquot Caramusanæ naues in portu eorum constitisse videbantur, mira celeritate, & fundamenta roborata, & fornices denuò erecti fuerunt.

Appulerunt Sudam duæ triremes illæ, quæ Latinum 15. Vrsinum aduexerant. Et quoniam Venetias reuertebantur, cùm Ioannes Diedo, cuius mihi triremis oblata fuit, indies moras necteret, misi Petrum Bilinam famulum ad Laurentium Priulum, qui vni dictarum triremium præerat, (Veneti Supracomitem vocant) & mihi, propter intrinsecam familiaritatem, quam cum Francisco eius fratre habebam, notuserat, petens ab eo, vt in eius triremi Corcyram deferri possem: quod ille libenter concessit. Nam pro humanitatis officio ducunt Veneti, quoties in triremes suas aliquæ ex nationibus exteris, qui nobilitate polleat, admittunt: & eo nomine à Repub. gratiam reportant. Accelerauit igitur, & vt primum ventum propitium nactus est, Canam venit die trigesima Ianuarij cum 30. socio

ſocio ſuo ex familia Venerea, qui alteram itidem triremem habuit. Priùs tamen ad me idem quoque Laurentius terreſtri itinere venerat, officiaque ſua humaniſſimè mihi detulit, petiuitque vt eius triremem conſcenderem.

F E B R V A R I V S.

More antiquitus recepto obſervatur apud Venetos, vt nulla triremis hinc pelago ſe cōmittat, niſi alteram ſibi ad minus adiunctam habeat, idque periculi alicuius conſideratione, quod in legendo tam longo Turcici littoris tractu occurrere poſſet. Quamobrem cū tertia illa Diedonica, quæ mea eſſe debebat, duabus illis triremibus adiecta fuiſſet, neque compareret, quòd Diedo diutiùs in Candia hæreret, Priulus cum naue ſocia diutiùs ſibi exſpectandum non putauit. Itaque die quarta Februarij, cū Reſtori ciuitatis ceteriſque notis valedixiſſem, paulò ante veſperam, Priuli triremem conſcendi. Tandem tertia noctis hora, nuntium Sudâ allatum eſt, triremem Diedonis appuliſſe: quæ cū à Canca tribus tantum milliaribus abeſſet, duæ noſtræ iam iam ſoluturæ, exſpectare illam debebant.

Manè triremis illa portum eſt ingreſſa, ſtatimque Diedo cum Caſtellano fratre ſuo, ad eam triremem, quam conſcenderam, paruo nauigio peruenientes orabant, vt illorum nauem ingrederer, quæ iam pridem à Regentibus Candia mihi eſſet attributa. Reſpondi, ſi mihi hoc genus officij & humanitatis detuliſſent eo tempore, quo illis hoc demandatum à ſuperioribus fuit, nihil me facturum fuiſſe libentiùs: ſed quandoquidem, propter priuata illorum negotia, integram hiemem in Inſula me duxiſſe oportuit, & nunc iam optimi viri amici mei nauem conſcendiſſem, pro ipſorum hac bona erga me voluntate, gratias me illis agere, me in conſcenſa triremi, in Dei nomine nauigaturum. Rogabant illi ne hoc facerem. Dixi illos in

250 IEROSOLYMITANA PEREGRINATIO
culpa esse : mihi aliter facere non licere . Sic abierunt.

Hac eadem die , cùm triremis hæc propter inferendas
res victui , vt moris est , necessarias , soluere non posset ,
vesperi ventus validissimus Boreas , nobis valdè contrarius
flare cœpit , vt remigare nulla ratione possemus : qui die
quoque insequenti magis etiam auctus est : cuius natura
cùm nautis explorata sit , quòd in quartam vsque diem
durare soleat , die septima eiusdem mensis denuò ad mo-
nasterium prædictum diuertere ; in quo venti opportunita-
tem exspectans , vsque ad decimam diem mansi : qua circi-
ter secundam noctis horam , cœna sumpta , amicisq̃ salu-
tatis , rursus triremem conscendi . Hora quinta sumus è
portu egressi . Manè conspeximus insulam Venetorum
Cytheraa. Cerigo ; olim Cytheræa dictam : & hora decimoctaua ,
partim remis , partim velis acti , sub arcem ipsam in altissi-
mo monte positam peruenimus , quæ non ad eò magna ,
præsidium Venetorum habet . Cytheræam à Canea mil-
liaria nostra viginti numerantur . In medio itineris est par-
ua insula deserta Cecerigo nominata . Poteramus vltra
progredi , sed quoniam in triremi Diedonis antemna repa-
ratione indigebat , ratione ipsius noctem ibidem duxi-
mus . Castellanus loci , me vt in arcem diuerterem inuita-
uit : sed quòd parum bellè habebam , remansi in littore , ibi-
dem deambulatione peramœna me recreans .

Ventus contrarius insurrexit : cumq̃ue portus , in quo
substitueramus , paruus & minùs esset securus , nauigaui-
mus retrò ad duo milliaria nostra , portumq̃ue securio-
rem , quamuis desolatum , in eadem Insula tenuimus , qui
Portus
S Nicolai &
Ecclesiæ. S. Nicolai dicitur , ab eiusdè Diui parua Græcorum Eccle-
sia : supra quam in excelsò monte exstant peramplæ ruinæ
palatii Helenæ , quæ ibi habitasse perhibetur . Sed vnde
Palatium
Helenæ. aquam potuerit habere , incertum . In alia parte Insulæ ad
littus maris , est paruum & satis integrum Veneris templū ,
Helenæ va-
præluc. vnde eamdè Helenam à Paride raptam Poëtæ fabulantur .
Cùm

Cùm sub arce in illo eodem portu essemus, venerunt ad dictum Nobilem Supracomitem, decem & aliquot homines, orantes vt eos in triremem acciperet; quandoquidem ipsorum nauis, quæ Nigroponto veniebat, ad insulam allisa, magno cum ipsorum damno interijisset. Admisit eos; ita tamen, vt ne secum merces inferrent, quarum nonnullas in naufragio recollegerant, ne triremis nimium oneraretur, quæ circa trecentos homines habebat.

13. Propter eundem ventum hærere in eodem portu coacti fuimus. Interea prandio peracto, superuenit nouum, tres triremes ex Barbaria circa Insulam vagari, cum quibus manus conferere parati eramus: sed ex paulò post, vltra promontorium versus Peloponnesum vela direxerunt.

14. Discessimus è portu circiter horam decimamseptimam, & post occasum Solis peruenimus ad alium, *delle Quaglie* dictum, Cerigo duodecim miliaribus distat: qui propter infinitam coturnicum multitudinem, quæ ab incolis capiuntur, ab eisdem nomen accepit: prout dic-
Portus del-
le Quaglie
feu Cotur-
nicum.
 insequenti, quandoquidem propter ventum ibidem manere necesse fuit, multi rusticorum plurimas nobis, & alia ad victum pertinentia, afferebant. Qui cùm maiori ex parte inter montes delitescant, & latrocinij assueti, non semper tributum Turcarum Cæsari pendant, in tractatione cum illis diligens adhibetur cautio, & tormenta bellica aduersus eos in promptu habentur instructa, si quid attentare velint: atque ita in triremes, vt victui opportuna diuendant, admittuntur; & ad eos in littus etiam descenditur, quod & nos fecimus. Quilibet illorum lorica indutus arcum in manibus gestat. Sub vesperam, contentione inter ipsos oborta, sagittis inter se acriter decertarunt, nobis spectantibus. Portus hic Italicè *Braczo de Mayna* ap-
Braczo de
Mayna
portus.
 pellatur, quòd montibus vndique præcinctus, brachij curuati similitudinem exhibeat. Paruus ille quidem, vtpote

sex vel septem tantum triremium capax, sed valde tutus. Erat hic antea Venetorum propugnaculum; sed nunc à Turcis derelictum. Nam cum Venetorum triremes huc diuertere soleant, ne à Turcis infestentur, inter pacis fœdera, hæc quoque apposita est clausula, ut in arce nullum præsidium Turcicum collocetur.

Manè discedentes, constitimus non longè in portu, ^{16.} quem Veterem appellant, præterimus tamen promontorium Matapam: ubi indicatum nobis fuit à custodibus, sex liburnicas rectà versus nos contendere: quas cum è Barbaria piraticam exercere crederemus, instruximus nos tamquam cum illis congressuri. Postea animaduersum est, maiores esse piscatorum Christianorum cymbas, qui à S. Mauro in Archipelagum nauigabant. Fuerunt & aliquot inter eos Turcæ, sed propter fœdus cum Cæsare initum, liberè dimissi sunt.

Vituli portus.
 Hora decima octaua propter ventum, è prædicto discessimus: postea tamen, alio contrario exorto, retrocedendum quodammodo nobis fuit ad eum, qui dicitur, Vituli portus: ad quem tertia demum noctis hora peruenimus, in eoque nauem Venetam, non adedè magnam reperimus, quæ Candiam petebat. Præmonuerunt nos nautæ, ne eo in loco subsisteremus, in quo anchoras ieceramus; & propter ventum si vehementior insurgeret, & propter littoris vicinitatem; cum præsertim vesperi visa fuerit hominum multitudo non procul congregari, licet incertum quanam de causa, sed tamen cautè hic agendum esse. Portus isti duo desolati quidem sunt, sed circumcircuità plurimas villas habent adiunctas. Si rectà nauigandum nobis fuisset, proculdubio trigintaquinque milliaria iam confissemus: sed ad hosce portus diuertendo, parum tuta nauigatione, ultra quinquaginta milliaria emensi sumus.

Mare Coronicum non absque difficultate præterueni, propter ventum nobis contrarium, substitimus longius

giùs ab arce Coron, ne tormētorum globis impeteremur. Hora noctis septima vlteriùs progressi sumus, prætereuntes S. Venedici insulam, ad aliam, quæ Sapientia dicitur, ^{Sapientia portus.} decem milliaribus decursis peruenimus. Portus hic elegans & tutus, plurimum triremium capax: non tamen Venetorum proprius, quandoquidem etiam Turcæ, propter Methonæ vicinitatem, communem in eo stationem habent.

19. Manè cùm ventus spiraret contrarius, non nisi hora decimaoctaua nostræ triremes è portu mouerunt: cumque læuam petere tutum non esset, quod Methonæ ciuitas ^{Methona Turcarum ciuitas.} præternauiganda erat, vnde ex propugnaculis Turcæ nobis damna inferre potuissent, cursum ad dexteram circa Insulam tenuimus: vnde tamen Turcæ tres machinas bellicas in nos exploserunt. Sed longiùs diffiti eramus. Responderunt eis & nostræ naues, bombardas itidem in amicitiae signum exonerantes. Præterijmus postea & Nauarinum ^{Nauarinū.} celebré Turcarum in monte propugnaculum, à quo ciuitas ipsa longiùs distat. Sed arx ipsa imminet portui, in quo Occhialus cum decemocto benè instructis triremibus, septem illas Venetorum, de quibus superiùs dictum est, præstolabatur.

Sub vesperam, confectis duodecim milliaribus, appulimus ad insulam desertam Prodona, ^{Prodona.} in qua aprorum siluestrium ingens est multitudo. Media nocte, Sirocco seu Euro valido, secundo tamen aspirante, inde discedentes, per mare Arcadicum hora quartadecima attigimus Zacynthum. ^{Zacynthus secunda vice.} Statim vt anchoræ sunt iactæ, mercator quidam Marcus Securi, mihi benè notus adueniens, nouitum attulit, fratrem meum Georgium Radziuilum, creatum ^{Georgius Radziuilus auctorū fratris Cardinalis creatus.} esse à Gregorio XIII. Pont. Max. S. R. E. Cardinalem. Cumque nauiegressus ad Ecclesiam pergerem, magnus fiebat ad me omnium concursus: qui, vt moris est, me salutantes, familiæ meæ de nouæ dignitatis huius accessione

congratulabantur. Vento illo eodem decemseptem miliaria confeceramus: qui cùm magis ac magis inualesceret, cùm in anchoris navis minùs esset tuta (neque enim portus hìc, sed Sorsitor, id est statio tantùm nauium habetur) quoniam comeatus importandi causa, multi in lictus descenderant, in reditu eversa vna fregata, vix ab interitu homines vindicati sunt. Suffocatus tamen in mari fuit ibidem famulus meus natione Germanus, quem in Candia susceperam, iuuenis bonus & singulari pietate præditus, qui sæpiùs affirmabat, statim vt Italiam attingeret, quòd Societatem Iesu ingredi omnino constituerat. Igitur periculum declinantes, quatuor miliaria, minore velo propter ventum validiorem appenso, quod Magistram dicunt nautæ, eoq̃ue in periculo simili triremes vtuntur, progressi sumus vltra rupem Schiuari vocatam; vbi procelloso vento vehementiùs insurgente, imbre quoque maximo decidente, in loco paulò quietiore versabamur.

Auctoris famulus suffocatus.

Naufragiū nauis Emo mercatoris Veneti.

Cùm ad Zacynthum essemus, reperimus nauem ibi ante duas hebdomadas ruptam: quæ cùm violentiori vento eò appulisset, iecit quinque anchoras in consueta illa nauium statione, quæ tamen nauem retinere non valuerunt, sed arena sensim cedente ad extremitatem rupis, quæ est sub monasterio S. Eliæ, collisa interiit. Fuit hæc navis Georgij Emo, qui Consul Venetus fuit in Ægypto, nobilis mihi apprime notus. Æstimabatur damnum quingentis ducatorum millibus. Præcipuæ namque & magni ponderis merces, quæ ex Syria proueniunt, in ea naui deferbantur. Perierunt in hoc naufragio homines triginta-septem, vndecini euaserunt. Vidi nauem hanc Tripoli, vnde, me præsentē, Cyprum versus nauigauit, vt ibi venti propitij commoditatem exspectaret. Et quoniam Alexandria soluens, Cyprum me delatum iri confidebam, quod ventorum occasione plurimis accidere solet, eo præsertim tempore, quo me velis committebam, constitueram cum prædi-

prædicto Emo, vt si hanc eius nauem, quæ noua, firma, & benè munita fuit, in Cypro reperirem, eam conscendere, & in Italiam proficisci mihi liceret. Nec mirum quòd ea con fracta nihil recuperari potuit: nam & nocte con quassata est; & si quid ad littus vnda propulit, id omne ab agrestibus Græcis ablatum est: qui si quem viuum enatafse deprehendebant, illicò interficiebant: adeò vt propter eiusmodi spolia & direptiones, Rector ex arce descendere coactus fuerit. Altera itidem nauis Ruggina, eandem calamitatem exspectabat, cùm anchoris etiam retineri non posset. Iamque ij qui in ea deferebantur, tormenta versus latrones rusticos direxerant, vt naui con fracta, quibus fors enatandi facultatem obtulisset, ne in littore ab illis interficerentur. Ceterum cùm iam iam rupi immineret, diuino beneficio ventus quieuit, & nauis periculò liberata est.

21. Quatuor ante lucem horis, nauigauimus per mare Corinthiacum: in quo Christiani fœderis classis, insigni illo ad Naupactum prælio, Turcicam classẽ, diuinitus concessa victoria, superauit, anno reparatæ Salutis millesimo quingentesimo septuagesimo primo, die septima Octobris. Appulimus ad portum Viscardo insulæ Cephaloniæ, vbi quatuor dies integros propter contrarium ventum manendum nobis erat. Est portus duodecim triremium capax, desolatus. Sed apparet ciuitatem fuisse per amplam (quæ olim Petilia, patria Chilonis, vocabatur) ex muro quadrato constructam. Visuntur ibi quædam ædificia depressa, tamquam cellariorum frontispicia, sursum tamen, non deorsum tendentia. Quidnam fuerit hoc, incertum: nam tantum cellulæ protenduntur, quantum homo extensus occupare spatij possit, non tamen assurgere valeat, propter cauernarum humilitatem. E regione ad dimidium milliare est alia insula Venerorum, quam Cephaloniam veterem appellant, & habet villas aliquot.

*Naupactica
victoria
Christianorum
sub
Pio V.*

Cephalonia.

Inter

Gymnasium
Philosopho-
rum.

Inter hæc duas Insulas, sita est in medio parua quædam alia ex viuo saxo Insula, rotunda, deserta, ad iactum arcus lata & longa, quam propè nauigando attingebamus. Affirmant nonnulli eam fuisse Gymnasium seu scholam Græcorum: in qua Philosophi à tumultu vrbano liberi, contemplationi vacabant. Qui Historiographos legunt, rectiùs hæc quomodo sese habuerint, intelligunt. A Schiuari ad hunc Viscardi portum numerantur circiter viginti milliaria.

Coreyra.

Antelucanis quatuor horis, sulcauimus mare Albani-
cum, quod Itali *Golfo de Preusa*, aliàs S. Mauræ nomi-
nant: & relicta ad læuam insula Venetorum Paxo, qua-
tuor villas habente, circiter vigesimam tertiam horam, vi-
ginti duobus propemodum milliaribus confectis, veni-
mus Coreyram. Statim diuerſi ad quoddam exile hospiti-
um, in quo noctem duxi. Manè cum vellem in hospitio
S. Francisci hospitari, Regentes loci, ad quos literas Ducis
Venetorum habebam, miserunt ad me rogantes, vt ad pa-
latium nobilis cuiusdam, quod pro me adornatum erat,
commigrarem: quod etiam à me factum est. Accesserunt
deinde me salutatum Andreas Nauagerius loci Præfectus,
quem illi Bailum vocant; Prouisor itidem alius Benedictus
Erizzo, cum alijs Consiliarijs. Delatus est etiam gestatoria
sella Zacharias Salomone podagricus, vsu pedum ferè de-
stitutus, qui maritimæ Classis Prouisoris munus obibat.
Omnes magna mihi humanitatis officia exhibebant.

Atx noua
Coreyta.

Fui cum vniuerso Magistratu in Ecclesia Archiepisco-
pali, quæ in arce veteri sita est, quâ postea perlustraui-
mus.

Visitaui arcem nouiter suscitatum, quæ quàm famosa,
& egregiè munita sit, nullus est qui ignoret: vt meritò ma-
ris Adriatici clauis appellari possit. Visitaui itidem Magi-
stratum. Cumque hîc subsisterẽ, occurrit casus, quòd na-
uis Occhiali, quæ Tripoli Barbariæ trecentos Mauros &
Mauras venales deferebat, tempestate acta, in breuia Al-
banæ

bania impedit, unde retrocedere non potuit. Quoniam autem Veneti absque causa Turcam non exagitant, & Occhiali rationem habendam ducebant, consultatione habita, decrevit Magistratus, triremibus suis nauem extractandam: missusque est Zacharias hic ad Bastiam Turcarum ciuitatem, quæ vno & dimidio à Corcyra distat milliari, qui extractam Cadio repræsentaret & traderet. Et quoniam naus hæc commeatu erat destituta, diuendebantur singula vtriusque sexus Maurorum mancipia, viginti scutorum pretio, è quibus duodecim idem Zacharias coëmit, quæ postea cum duabus triremibus, quas mihi concesserat, Hydruntum misit, vbi pro quolibet statim centum & plures ducati ab emptoribus offerebantur. Hæc Occhialina naus in causa fuit, quod non nisi octauo ab aduentu meo Corcyram die, duæ triremes mihi ad nauigandum fuerint attributæ; vna Ioannis Longi, quam ipse conscendi; altera huic adiuncta illius Venerei, qui vnâ nobiscum fuit in Candia.

M A R T I V S.

1. Prima Martij profectus sum, vno à Corcyra milliari, ad monasterium Græcorum, S. Mariæ dicatum: quod cum primis celebre, antiquum, & eleganti structuræ artificio conspicuum est.
2. Fui in Ecclesia Græca S. Suiridi, vbi integrum adhuc corpus eiusdem Sancti asseruatur; quod cum magnis cærimonijs Græci venientibus spectandum exhibent. Inter eâ quæ digna visu occurrebant perlustrando, famulum meum cum rebus & animalibus vltamarinis quæ adduxeram, cum tribus triremibus, quæ in Italiam nauigabant;
3. Venetias expediui. Ipse verò die insequenti, tertia Martij, circa vigesimam horam triremem conscendi; & quoniam vento carebamus, remigio naus propellebatur. In medio itineris, habuimus, & præteruecti sumus ad dextram sinus

*Botarga
piscium ona.*

maris, quos Veneti in Epiro obtinent; vnde, vt nobis ipsimet retulerunt, ex ouis piscium cephalorum extractis & cera obductis, vulgò Botarga vocant, viginti millia ducatorum annuatim colliguntur. Circa vigesimam tertiam horam constitimus apud eamdē Insulam in paruo portu, vix trium quatuorve triremium capace, quem S. Maria de Cassopo vocant, & quatuor milliariibus à Corcyra distat: vbi propter ventum contrarium, diem quartam Martij, 4. quæ fuit Dominica, & quintam transegitimus. Est in ipso 5. littore parua Græcorum Ecclesia; sed desolata. Dum hîc hæreremus, parua nauis Balonâ, quod est Turcarum oppidum, Corcyram versus ferebatur; cumque, vt moris est, triremium iussu, vela demississet, indicauit nobis, ante dies aliquot, tres piratarum Turcicorum celoces, in mare, versus Apuliam prodijisse: quæ postea, cùm Barij essemus, conspectæ, non paucos homines ex littore abriperunt.

*Fano insula
Hispaniâ.*

Manè, vento cessante, remis adhibitis, peruenimus ad 6. insulam Fano, quæ ad Regem Hispaniæ pertinet. Est elegans; pulchram conuallem, & vt apparet, fertilem, si coleretur, habens; aqua etiam dulci optima abundans. Sed propter piratas, tota est desolata. Ad sinistram reliquimus scopulum petrosum è mari prominentem, dictum Manler. Confeceramus iam duo milliaria à priore portu, cumque ventus nullus aspiraret, & mare Adriaticum versus Italiam, vbi nullæ iam sunt insulæ, nobis transeundum esset, cùm subuereremur, ne nox in medio mari triremes prehenderet, instante præsertim aëris mutatione, decretum fuit, vt in sequentem vsque diem hîc expectaremus. Sub vesperam ventus vehemens flare cœpit: qui cùm magis ac magis increbresceret, & inter Subsolanum & Eurum, paululùm ab Orientali declinans (Itali *Leuante Sirocco* vocant) periculum triremibus minitaretur, quòd portus nullus isthîc esset, retrogredi verò non liceret, defixis anchoris, extremitate insulæ vtcumque tecti, noctem quæ

quæ valdè fuit obscura, ibidem ducere constitueramus, quousque dies appropinquaret. Sed cùm maior etiam ventus insurgeret, quamvis inuiti, hora nona ante diem, ^{Tempestas atrox.} mare ingressi sumus: cumque velo maiore, Artemonem vocant, vti non possemus, Tercerolam (minus id est veli genus) expandimus. Mari itaque vehementer intumescente, in magno periculo fuimus: tum quòd nox in medio nos offendisset, tum quòd fluctus triremem contegerent, qui triremibus maximè inimici; quæ minores etiam tempestates, quas nauigia minora perferrent, tolerare non facilè possunt. Nam cùm triremis in longum protensa, lata sit & depressa, facilè à ventis validioribus conquassatur & rumpitur. Vna res nos consolabatur, quòd triremes nouæ & benè compactæ erant: quæ quoniam tanto impetu ferebantur, vt ad arboris extremitatem fluctus diuiderent, coacti sumus, propter pondus, sub scamnis inferiùs sedere, vbi remiges operi incumbere solent. In tantum enim fluctus insurgebant, quòd licet triremes sibi essent vicinæ, die tamen appropinquante, vna alteram, quòd vndis contegerentur, conspiciere non potuerit. Vnde factum est, vt non solùm nos, sed nautæ quoque & remiges qui à viginti annis & ampliùs in mari versati sunt, ita iactarentur & concuterentur, vt vix decem in nostra triremi reperti fuerint, quibus nauseam iactatio non excitaret. Omnes tamquam enecati iacebant, fatebanturque si diutiùs tempestas durasset, quòd resistere vltra non valuissent: vnde naus in extremum discrimen adducta fuisset. Sed Deo disponente, circa quartamdecimam horam, cùm primùm illuxisset, terra tandem apparuit: comper-

ITALIA.

Hydruntinus portus.

conspici sub aqua non possunt: in quorum vnum, parùm aberat, quin impingeremus. Ita ab eo tempore, quo velum explicuimus, vsque dum portum ingressi, nauem, quod per quinque horas durauit, colligaremus, (nam iactis anchoris vndique triremis funibus præcingitur, quod nautæ Ormezar vocant) cōfecimus nostra decemseptem millia-
ria. Sumpto ibidē in triremi ientaculo, nisi famulos Hydruntum, qui mihi equos procurarent. Quoniam autem per nauigium quod Corcyrā præcurrerat, Regis Hispaniarum Gubernator Matthias de Lagunna, de aduentu meo certior factus erat, misit rogans vt in arcem diuerterem. Respondi me adproperare, & visitata Ecclesia Fratrum S. Francisci de Obseruantia, me rectā iter continuaturum: cumque ad monasterium prædictum venissem, ipse quoque veniens me rursus ad arcem inuitauit: sed cū rationes festinationis meæ reddidissem, acquieuit excusationi, & me cum suo comitatu extra ciuitatem deduxit, ductoresque duos mihi attribuit, qui me per suam iurisdictionem comitarentur. Eodem die descedentes

*S. Maria de Carpignia-
no Ecclesia.* quarta milliaris parte ad Ecclesiam S. Marię de Carpigniano, eleganter & magno sumptu exædificatam, vbi Deus multa ostendit virtutum miracula; gratijs Deo persolutis; quòd nobis littus attingere concesserit, sub ipsam vesperam peruenimus ad villam Calismeriam.

*Lecium, &
eius Vicerex
Caraffa.* Manè peruenimus Lecium, vbi Vicerex habitat. Is erat ^{8.} Franciscus Caraffa: qui vt didicit me ad hospitium diuertisse, venit statim cō cum magno comitatu, & suis stipatoribus (quæ res mihi plurimùm incommodauit; nam eiusmodi carimonijs diuulgatum fuit, nos esse nobiles extraneos, non paruæ auctoritatis, vnde facilè suspicio orta pecuniam nobis suppetere: & proscripti latrones, vt inferiùs dicetur, nos in itinere spoliarunt) meque cum comitibus in palatium inde abduxit. Cumque potiuissem ab eo, vt ne eiusmodi officia nobis publicè exhiberet, quæ

nos

nos in discrimen aliquod adducere possent, utque nos in hospitio manere sineret, permisit tandem ut abiremus. Prandium tamen ieiunij (erat enim Quadragesima) nobis deferri curauit: quo peracto eidem in palatio valedixi: qui nobis septem equites Hispanos attribuit, ut nos Barium deducerent. Noctem in villa Cielino duximus.

9. Ad ciuitatem Messianam pro prandio, pro nocte peruenimus Astunum: quæ ciuitas in monte, situ eleganti posita, pertinebat quondam ad Reginam Poloniae Bonam: <sup>Astunum ciuitas Regi-
nae Bonae.</sup> quæ cum eò ex Polonia reuersa descendisset, sub eius insignibus in duabus portis congratulationes inscriptæ fuerunt, quæ vetustate una cum coloribus exolescunt.

In prima porta, supra insignia:

BONÆ SFORTIÆ ARAGONIÆ REGINÆ IOANNIS GALEACII DVVIS INSVBRVM FILIÆ OB REGNUM SARMATIÆ ET IMPERIVM IN SCYTHAS AD TANAIM ET BORYSTHENEM MVLTIS ANNIS RECTO ORDINE EX REPVB. ET RELIGIONE GESTVM ASTVNEN. PVBLICE.

In altera porta in vrbis ingressu, supra insignia:

BONÆ SFORTIÆ SARMATAR. SCYTHARVMQ. CIS TANAIM REGINÆ AB VLTIMO SEPTENTRIONE POST ANNOS TRIGINTAOCTO REDVCI OB IVRA ET IVSTITIAM IN VRBEM REVOCATAM ASTVNENSES PVBLICE.

Distichon sub insignibus:

AVREA SATVRNI REDIERVNT SECVLVA FIRMA
SCEPTRA TENENTE MANV NOMINE REQ. BONA.

10. Die decima Martij peruenimus Monopolim: vnde

11. ma, ad Moli villam: postea Barium pro nocte, quæ ciuitas <sup>Barium A-
pulci ciuitas.</sup> eiusdem olim Reginae fuit: in qua quæ digna visu occurrebant vidimus, præcipue sepulchrum D. Nicolai Myrae <sup>S. Nicolai
Episcopi se-
pulchrum,
& Manna.</sup> Episcopi: è cuius venerandis reliquijs manna stillat, cuius aliquam partem ad Ecclesiam Niesuisiensem mecum de-

Bona Polonia Regina corpus.

tuli. Quamuis autem, quis essem, illis non proderem: quòd tamen Sigismundi Augusti Regis aulicum me fuisse profitebar, ostensum mihi fuit Reginae Bonae corpus, quod in Sacristia Ecclesiae Cathedralis est repositum, in tumba nigro serico villosa cooperta. Nondum enim erat sepulturae demandatum. Est adhuc integrum, nisi quòd superior labri pars aliquantum defluxit. Postquam me aduenisse intellexit Archiepiscopus, misit famulos ad hospitium, qui me ad palatium suum inuitarent. Sed cum me coenantem reperissent, excusauit me, neque passus sum illum me esse, quem Archiepiscopus arbitraretur. Id ea de causa feci, quòd summo manè inde discedere constitueram: quandoquidem iam à Gubernatore nouos conductores acceperam, remissis illis qui Lecio mecum venerant.

Venimus Malfettam; inde pro nocte Barlettam, olim Cannas.

Hic iam situs, & loca urbium, quaeque in illis notabilia sunt, describere minùs necessarium iudico; quandoquidem Italiam visere multis per familiare est, qui illius prouincias accuratè peragrarunt.

Manè tribus à Barletta miliaribus confectis, transuimus per pontem, fluuio superimpositum, quem Cannam vocant: quòd ab eodem illo loco proueniat, in quo memorabili clade Hannibal Romanos affecerat. Abfuimus ab illo loco, qui nobis ab laeuam erat, duobus tantùm miliaribus. Pro nocte Cariginolam peruenimus.

Ad Cannas Romanorum clades.

Venimus ad ciuitatem Foggiam; vnde à Rege Hispaniarum, Reginae Poloniae Annae census annuatim pendebatur.

Attigimus oppidum S. Seuerini: pro nocte in Sera, Gonzagarum oppido, quieuiamus.

Peruenimus ad Teruimos: deinde pernoctauimus in Guasto, vbi Aprutiorum, qui antea Samnites dicebantur, confinia incipiunt.

Primò

17. Primò ad Fossam Cacam, deinde pro nocte Ortonam deuenimus: qui locus tunc temporis ad Parmę Ducissam, Margaritam ab Austria, pertinebat.

18. Venimus Piscariam: vnde conductores, qui Bario nos ^{Piscaria ciuitas.} comitabantur, à me dimissi redierunt: ea maximè de causa, quòd cùm certò sciremus, nos in globum aliquem proscriptorum, qui Italicè *Banditi* vocantur, & pręda ac rapinis viuunt, incidere debuissē, si in comitatu nostro, satellites eiusmodi iustitię administros, quos *Barigellos della campagna* vocant, deprehendissent, nec illos nec nos viuos abire permisissent, id quod sæpissimè vsu euenisse comprobatum fuit. Maluimus igitur in manus prædonum, qui in hisce locis sedes quodammodò fixas habent, absque odiosis stipatoribus deuenire, quàm nauali itinere in certissimum naufragium nos conijcere. Nam propter continuos ventorum turbines mare attentare, non modò insipiens, sed planè exitiosum consilium videbatur. Vtque ^{Hiems ventosa.} facilius intelligi possit, quantopere hiems hæc ventis obnoxia fuerit, hic addendum existimaui, multos affirmasse, à quinquaginta circiter annis, tempus hibernum nauigantibus numquam magis inimicum & perniciosum fuisse. In freto siquidem Herculeo sexaginta & ampliùs onerarias Christianorum naues tempestas absumpsit. Et intra sexdecim hebdomadas, quibus in Candia moram duxi, in ipso Archipelago, siue mari Ægæo, non minùs Turcicę quàm Christianorum Caramusanę naues vltra viginti sex ventorum iniuria deperiere. Cùm itaque spe vltioris nauigationis præcisa, terrā nobis iter faciendum esset, vesperi conuocatis meis seriò edixi, vt à prædonibus circumuenti, in vnā narrationem ab illis interrogati conueniremus: quę res nobis cumprimis salutaris fuit. Nam si non vniformes in examine reperti fuissetus, vel nobis illicò intereundum erat; vel qui snam essem non adedò difficulter deprehendi poterat, vnde in custodia detentus,

magna

magna proculdubiò pecuniæ summa libertatem redimere necessariò debuisssem. Hoc enim viarum obsessores isti facere solent, si quem adepti fuerint, qui aliquem persoluendi modum habeat. Erat tum etiam mecum Italus quidam, qui se Alexandrum Cēsarini appellabat, & Roma proscriptus, cum Latino Vrsino in Candiam appulerat: vbi cum alio quodam Italo cū graues inimicitias suscepisset, timens ne deterius aliquid subsequeretur, in Italiam eadem qua & ego triremi vectus reuertebatur. Petiuitque vt terrestre quoque iter mecum continuaret: quod non grauatim concessi, ita vt vecturam & victum vnà cum meis communem haberet. Eo itaque cum alijs meis accersito, iussi, vt casu, quem verebatur, occurrente, omnes dicerent se esse socios, nullumque inter eos dominum aut superiorem haberi: Venetis in Corcyra militarem operam nauasse; & missione habita Venetias primum, inde ad suam quemque domum proficisci: quandoquidem diuersarum gentium homines essemus, vt pote Germani, Poloni, Lithuani. Ad eundem modum, vt omnes seorsim interrogati, responderent, conclusum. Quòd si de pecunia inquireretur, dicerent eam esse in cista, quam habebamus. Nam negare impossibile foret: quandoquidem vestigata & reperta, mortem indubitata nobis, ob negationem, acceleratura esset.

Manè Piscarià exeundo, præmissi coquum, vt nobis ad tertium milliare prandium prepararet. Progressi ad vnum magnum milliare, habuimus ad læuam, arcem in monte positam, quæ *Monte Syluano* cognominatur, & ad Nuceriæ Ducem spectat. Ibidem est fluuiolus equo vadabilis, qui Sala seu Salina vocatur: ultra quem, ad vnius sagittæ iactum, est diuersorium è muro constructum, ab eodem fluuiolo denominatum.

*Mons Syl-
uanus.*

*Salina flu-
uiolus.*

*Auctor cum
socijs à præ-
donibus spo-
liatur.*

Ad amnem igitur hunc vadofum appropinquant, ab altera eius parte conspeximus tres prædones, quos nullo nego-

nego-

negotio discernere licet. Nam quilibet eorum bombardam longam gerit, duas breuiiores, aut saltem vnam, ad cingulum appensas, pugionem itidem, & cultrum longiorem habet. Per humerum, loco capsæ, pelle ouilla dependente præcingitur, in qua panem, sal, & alia ad victum spectantia deferit. Et quoniam coquo præmisso, sex numero eramus, quinque longas bombardas habentes, ijs præparatis, quod plures essemus, fluuiolum transibamus: quem vixdum egressi, conspeximus alios tres, priorum illorum vestigia paruo intervallo prementes: cumque numero pares essemus, animo satis præsentem eramus. Priores illi nobis obuiam facti consalutarunt nos: quibus reddita salute, cum ultra fluuiolum retrospexissemus, ecce alij circiter decem comparuerunt, qui inter fruticeta prope viam delitescabant, nec à nobis prætereuntibus videri poterant. Postea tribus alijs obuiam facti, quod nos non sunt adorti, arbitrabamur prædones hosce vel occasionem nos inuadendi non habuisse, utpote quod propinquum hospitium esset, quod mare ad dextram vicinum, quod ante nos campus patens immineret, vel aliquod illis impedimentum allatum, quandoquidem arx Montis Siluani duobus tantum Italicis miliaribus inde abesset. Cum igitur hospitium præteriremus, aperto illius ostio, proruperunt inde ultra quinquaginta, cum longis bombardis ad explodendum paratis: quas vnicuique nostrum, aliquot ad latus applicuerunt, & ut ad hospitium rediremus coëgerunt. Et quoniam præteritis illis tribus posterioribus prædonibus, securiores facti, bombardas nostras thecis imposueramus, manus illis statim adinouerunt, & clausam hospitij portam, totas illarum, ne globos excluderent, relaxarunt: iusseruntque ut ab equis desiliremus, & arma quæ habebamus, ademerunt. Reperimus ibidem ultra viginti & aliquot personas: & cum ijs coquum etiam meum. Nam cum prædones isti aduentum nostrum expectarent, quem-

cumque Piscariâ redeuntem, vel versus Piscariam euntem in itinere offenderunt, eum illicò detinebant, ne progredi vel regredi possêt: utque postea comperimus, exploratores suos, qui nos vestigarent, iam habebant, Gualtij, Ortona, ad extremum Piscariâ: sed & vltra non deerant, qui nos semper obseruarent. Quasiuerunt deinde à nobis, unde & quò veniremus, qui homines, & si quem Dominum inter nos haberemus. Postremò de pecunia percontabantur, seorsim quemlibet abducentes. Cumque in dando illis responso, nobis optimè conueniret, palàm proclamantes, Ne celaueritis, inquiunt, pecuniam: alioquin fiet vobis, quod alijs facere solemus. Cumque denuò seorsim nos examinarêt, quatuor vel quinque ex illis, cultros longos lateri cuilibet nostrum admouebant, vrgentes ut vnusquisque fateretur, quantum pecuniâ haberet. Primò itaque sacculum meum arripuerunt, in quo erant Cecchini sex, & aliquantulum monetæ. Fecimus autem ex industria, ut quilibet nostrum aliquantum pecuniâ haberet, quò faciliùs intelligeretur, nos esse in itinere socios, & quemlibet separatim sumptus facere. Cumque illis sacculus meus perplacuisse, eum à cingulo abscederunt. Deinde per latera & vbique me attrectabant, sed habebam tamen interulam bombycinam, quam è triremibus descendens nondum deposueram. In ea nihil pecuniâ repperunt. Non omnia tamen apud me exactiùs excusserunt, quòd adproperarent: de qua re dicetur inferiùs. Postea Abrahamum Duninum inuasert, cui sacculum cum vndecim Cecchinis ademerunt. Et quoniam thoracem ex aluta alcina benè bombyce refertum indutus erat, eum diligentius quilibet prædonum (erant autem circiter octoginta simul congregati, viginti tantum pro custodia relictis) attrectabat, & ita obuersabat, ut globulos fibularum auulserint, ad extremum & indusium quoque concerperint. Adorti sunt deinde Georgium Kos,

qui

qui quoniam pecuniam meam in sumptus quotidianos erogabat, habebat in sacculo circiter triginta Cecchinos, qui illis pergrati acciderunt: cumque eiusdem vestes excussissent, nihil repererunt amplius. Deuenerunt postea ad Andream Skorulski, cui cum aliquot Cecchinos una cum oculis ademissent, nec aliquid amplius offendissent, eundem reliquerunt. Porro qui pecuniam à nobis adimebat, erat administer superioris quem pro capite suo agnoscebant (is in superioribus cubiculis remanserat, neque se nobis spectandum exhibuit) homuncio staturâ paruus. Is cum ad Alexandrum Italum demum accessisset, qui, ut cautiore, pecuniam quam habebat omnem, quadraginta videlicet vel quinquaginta scutos, in thecam bombardici pulueris coniiciens, eam appensam collo gerebat, eandem è collo illius, ut eiusmodi stratagematum peritus, abripiens, suo imposuit. Italus damnum permolestè ferens, voce submissiore usus, Omnem, inquit, pecuniam mihi ademisti. cui exactor; Vbinam ea? In theca ista pulueris, inquit. Subintulit exactor; Tace, ait, si vis incolumis una cum socijs euadere. Hoc ideo vetuit, ut, de pecunia illa reticens, in diuisionem totius pecuniæ nobis ereptæ, cum reliquis prædonibus veniret; & in signum gratitudinis hoc perfecit, ut ne sarcina huius Alexandri ab illis attrectaretur. Iusserunt deinde, ut illis cista recluderetur, in cuius summitate, ducentos Cecchinos inuenerunt, statimque numerarunt; & cum vnus defuisse videretur, volebant denuò numerare, sed quoniam properabant, intermiserunt. Acceperunt etiam in moneta ad ducentos scutos: & alia quæ ibidem erant reposita. Habebam enim elegantes cultros Turcicos, auro inclusos, lapides etiam pretiosiores ex partibus illis, & nonnulla alia ex auro solido artificiosè & eleganter elaborata. Hæc omnia abstulerunt. Agnosco autem & hinc eximiam Dei erga me benignitatem, quòd ex diplomatibus varijs quæ in cista erant, spo-

liatores me non agnouerint. Fuit enim in cista, quam auidè scrutabantur, theca viatoria parua ex tenui ferri lamina, in qua diplomata ne madefierent, Pontificis, Regis, Reipub. Venetæ, item literas quorundam Venetorum ad suos Agentes, quibus iuebant, vt mihi aureorum millia quot vellem, crederent, reposueram. Hanc cùm acres inquisitores in manibus haberent & versarent, tamen illam non aperuerunt: sed vt leuem esse & absque pondere senserunt, reliquerunt, fortasse rem parui momenti existimantes. At verò si thecam aperuissent, & literas omnes explicuissent, ita me in ijs inuenissent expressum, vt ego verba illis dare nullo modo potuissem, sed res potius pro capite fuisset dependenda. Ceterùm exactor ille noster ad superiorem illum suum, latronum ducem, sæpiùs ascendebat (erat namque in eodem stabulo scala) & mutuò colloquebantur. Cumque rigidiùs nobiscum iam agere cœpissent, pileos & vestes detrahendo, Alexander Italus ille per Deum orabat, vt ne illum interficerent. Huic ego clàm insinuaui, ne hoc ab illis efflagitaret: caussamque hanc reddidi: Si nos interficere constituerunt, nihil supplicationem profuturam; si non, celeriùs te mactabunt, vbi viderint, te nimio plùs mortem timere. Sed cùm ille nihilominùs iterùm iunctis manibus preces ingeminaret, tum ego clara voce, Frustrà inquam, eos his vocibus obtundis: sunt enim viri boni & Christiani; sed cùm necessitatem patiantur, debent, vt eam profligent, alicunde accipere. neque tamen nos occident, cùm nihil tale promeriti simus. Vnus igitur eorum, qui mihi adstabat, hæc audiens, me hoc nomine complexus est, & gratias egit, quòd rectè de illis sentirem. Nec malè mihi officiosa hæc locutio successit. Nam cùm quidam pallium mihi detrahere cœpisset, admonuit vt me sineret, quem bonum virum dicebat. Interea exactor ille pulueream quoque thecam meam attraxit; sed postquam vidit, orificium eius esse peran-

perangustum, per quod pecunia intus immitti non posset, eam dimisit. Venit & alius, cui Corona mea, ex calculis oratorijs connexa, adlibuerat, quam cingulo alligatam gerebam, eam omnino sibi dari iussit. Et quoniam ea carere, dolenter admodum ferebam, quod magnis Indulgentijs à Gregorio XIII. dotata esset, quodque loca Sancta mecum vbique attrectasset, obnixè petiui, vt eam mihi relinqueret. Accepit ille nihiloniùs: & eam diligentius intuitus, erat enim ex Canna Indica, vbi cranium demortui ex ebore sculptum, alligatum inuenit, illam conspuit, & in terram abiicit, mortis fortasse memoria conterritus: atque ita abiectam sustuli. Cùm itaque nobis omnem pecuniam ademissent, petiui, vt nobis tamen aliquid pro victu relinquerent. Itaque mandato sui ducis Cecchinos decem manui meæ imposuerunt: inter quos erat vetus numisma Valentis Imperatoris: quod erat inter alios antiquos nummos in quadam sarcina repositum. Vnde apparet, omnia illos simul commiscuisse quæ nobis rapuerant. Iusserunt deinde, vt nobis calcaria adimeremus: fecerunt hoc mei: ego vno deposito, cùm aliud deponere incipio, scrutator scriniorum exclamat cum risu: Vnum (inquit) tibi calcar habe, vt equum incites ad cursum, si quem cui fortè abstuleris. Quid aliud diceret veterator, nisi quod ipse facit? Igitur cùm sibi applicuissent calcaria, consensu equis nostris discesserunt. Reliquerunt tamen duos mulos mactros, & duos equos claudos, qui res deferebant. Abeuntes per iocum dicebant, vt eos exspectaremus, quandoquidem pro nocte ad nos iterum redituri essent. Cùm discessissent, ascendimus superiorem hospitij partem, vbi hospitem ipsum cum famulo ligatum reperimus. Nam cùm nocte præcedente hospitium esset clausum, & illi in eo delitescere constituissent, nonnulli ex illis finxerunt se mendicos, & frigore confectos: vtque calefierent, se intro-mitti orabant. Hospes verum id credens, domum aperuit:

vbi statim ab illis raptus, & cum scruiore ligatus est, crescente magis ac magis eorum numero. Hora plus minùs transacta, posteaquam à nobis discesserunt prædones, è locis circumuicinis homines armati congregari cœperunt; prout moris est, vbi hoc genus directorum esse comperit. Venit eodem & ipse Gubernator Caraffa oppidi S. Angeli Ducis Nucerix. Erant iam ad mille homines congregati, qui nos spoliatos à prædonibus viderunt, ipsis intra montium abdita sese recipientibus. Itaque Gubernator secum nos in oppidum abduxit, quod vno milliari ab hospicio prædicto distat: nobisquæ cœnam & diuersorium in suo palatio præbuit. Intelleximus hîc, exulum illorum superiorem fuisse quemdam Iacobum de Monte Brandon, prædonem famosissimum: qui postea cum quatuordecim socijs captus, & extremo supplicio affectus fuit. Nam Gregorius Papa XIII. qui me singulari quadam gratia complectebatur, diligenter ad Don Petrum Ossunæ Ducem, Neapolitanum Viceregem, scripsit, vt malefactores istos perquiri, & in eos animaduerti iuberet. Quamobrem vltra prædictos, & multi alij comprehendebantur, ex indicijs spoliiorum nostrorum agniti. Nam in partes omnes scripta direxeram, è quibus qualiter acta res fuerit, intelligi poterat. Hic ipse latronum dux, vnà cum substituto suo comprehendi timens, vltra mare iam fugâ euaserat. Sed tandem in Dalmatia captus est.

*Iacobus de
Monte Brā.
don Lirro
insignis.*

*Petrus de
Ossunæ Vi-
cerex Nea-
polis.*

Post acerbum hunc casum manè consultabamus quid nobis faciendum esset. Nam & pecunia in sumptum itineris destituebamur: & tutam profectionis rationem non facile reperiebamus, quod viæ à pluribus prædonum globis passim obsiderentur. Misi itaque ad Regis Hispaniarum ciuitatem, Cento dictam, in qua Vicerex Prouinciæ residebat, ab eo consilium & auxilium petens. Respondit, sibi consilium non suppetere; quandoquidem antè dies octo, centum proscripti, triginta & aliquot itidem homi-
nes,

nes, Neapolim euntes spoliarunt, decemseptem insuper interfectis, qui se defendere conabantur. Conclufum igitur fuit, vt eos nobis conductores adhiberemus, qui vel ipsi prædones fuerunt aliquando, vel qui familiares aut sanguine coniuncti eis essent: vt nos per eorum cuneos deducentes, fidem facerent, nos eos ipsos esse, qui iam antè per proscriptos omnibus exuti essemus: quæ res passim vbique iam erat diuulgata. Itaque duos conduximus: vnum Franciscum nomine, qui octo annos inter prædones conuersatus cum illis amicitiam arctè colebat: alterum, Sacerdotem quemdã, qui fratres duos illiusdem farinae habebat. Diem igitur apud Gubernatorem commorati, & acceptis ab eo decem octo scutis mutuis, Anconæ illi restituendis, insequenti die à prandio Adriam versus
12. iter instituimus. Et quoniam duos tantum mulos habuimus, qui res nostras deferebant, & duos itidem exiles equos (neque enim plures conductitios inuenire potuimus) partim pedites, partim alternis vicibus equitando, Adriam pernoctaturi peruenimus, certatim ad nos videntes incolis concurrentibus, quòd illis, qua ratione à prædonibus tractati fuerimus, iam innotuerat.

Peruenimus ad oppidum, quod Iulia noua dicitur. Hic *Iulia noua.* intelleximus, quòd iidem illi prædones, qui nos spoliarāt, in oppidum hoc (sicut, vbi plures numero congregantur, facere plerumque solent, incolas occidendo, domos spoliando) irruere volebant. Sed quoniam in monte positum eminebat, vbi animaduersum fuit eos aduentare, portam ciues clauferunt: prædones verò ad dexteram versus mare deflexerunt. Hic Franciscus ille, qui mecum erat, cum sciret matrem habitare cuiusdam celebri prædonum ductoris, Baronis Neapolitani, accessit ad illam, casum nostrum illi exposuit (quamuis eum iam omnes notum habebant) petiuit, vt nobis aliquem è suis adiungeret, qui filio notus esset, vt si fortè in eum incideremus, propter eius

eius intercessionem, liberos nos abire permetteret. Fecit hoc illa non grauatim. Quoniam verò idem Franciscus sciebat, nos in alios quoque incurfuros, quotquot notos illorum habere poterat, qui in vicinia prædabantur, eos omnes conduxit; ita vt prandio peracto, cum quinque eiusmodi prædonum amicis nos in viam dederimus. Equos etiam ibidem conduximus, ne quis pedester nostrum iret. Vix vno dimidio milliari à ciuitate confecto, conspeximus in monte tres prædones. Itaque vnus è comitibus illis, dixit ne conturbaremur, quòd eius amici essent: statimque ad læuam prope viam ad lapidis iactum ostendit nobis Ecclesiam paruam desolatam, in qua dixit circa quinquaginta prædones delitescere: qui alios inimicos suos, prædones itidem, vt cum illis armis decertarent, opperiebantur. Nam vbi quis cum altero inimicitias contraxerit, vterque proscribitur: atque ita proscripti proscriptos quisque sibi aggregare studet: seque mutuò cædibus persequuntur, donec vna factio alteram funditus exterminet. Sub vesperam peruenimus Trontum: vbi ditio Regis Hispaniarum terminatur, & Pontificis ex illa parte fluuij incipit; qui cum sit profundus, habet naualem traiectionem. Hic verò credebamus, quòd nos inuasuri essent. Nam in monte excelso supra traiectionem, erant circiter ducenti, prout nobis ductores nostri narrabant, affirmabantque hic esse Baronem illum, cuius mater in Iulia noua habitaret; qui vel quia alios prædones (nam cum plurimis habebat inimicitias) expectabat, vel quia sciebat nos iam esse spoliatos (habent enim vbique suos exploratores) idèd nos inuadere negligebat. Hic, qui à matre eius nobiscum mittebatur, dicebat, fieri posse, quòd nos nihilominus adoriretur: sed vbi cognouerit, nos à matre commendatos, illicòd nos liberos abire patietur. Traiecimus interea fluuium: & quoniam abhinc dimidio milliari hospitium aberat, in quo noctem ducere debebamus, Franciscus nos-

*Proscriptorum
miserum
conditio.*

ster,

ster, qui in eadem arte benè versatus fuerat, opinionem hanc habuit, quòd illi tantisper expectarent, dum ad hospitium diuerteremus, vt nocte superueniente possent nos ibi liberiùs excutere. Adiuuit & hoc fortasse, quòd à meridie pluuia ingens deciderat, quæ lutum maximum in terra pingui excitauit: itaque cùm equos non haberent, pedibus incedentes difficilè nos assequi poterāt, qui equis calcaria addebamus. Quamobrè licet hospitium illud esset benè clausum (sed nec hospiti quidem fidèdum erat; nam hospites etiam cum proscriptis communionem obuio deprædandi habent) vbi nox aduenit, & à prædonibus è monte conspici non poteramus, data licentià abeundi apud traiectum socio illi, qui nos à matre Baronis missus comitabatur, arripuimus iter per tria nostra milliaria ad ciuitatem Grottam, certò nobis persuadentes, quòd pedites nulla nos consequi ratione poterant, & quòd ciuitas illa diligenter clausa propter prædones custodiretur. Cùm itaque eò circiter horam noctis quartam peruenissemus, prope portam ciuitatis, in hospitio reliquum noctis transigimus.

23. Manè confecimus quinque milliaria ad portum Formanum: vbi, quòd locus iam esset securior, & equi fatigati, pro nocte substitimus.

24. Venimus Lauretum manè: & quoniam Sabbatum Lauretum
B.V. fam. erat Palmarum, quilibet ad deuotionem se præparabat. Venit eò hac ipsa quoque die Iulius Gonzaga ex aula Cæsaris deuotionis causa, apud quem erat quidam seruitor Polonus: qui cùm intellexisset, nos Ierosolymâ redire, percontabatur diligenter de Siekierzecka Polona, quam sibi propinquo sanguinis gradu coniunctam affirmabat. Cumque dictum esset, quid cum illa ageretur, libenter id audiebat, & gratias agebat, quòd intellexerat, eam, nauem conscendisse, quæ Venetias contendebat.

25. Dominica Palmarum, percepto diuinissimo Sacramen-

Ancona.

to in ædícula beatissimæ Virginis, in qua illi Angelus Dominicam incarnationem annuntiauit, & prandio sumpto, peruenimus Anconam: & quoniam pecunia indigebamus, nam & illi Gubernatori decemoocto scutos remittere, & ijs qui nos deducebant soluere, & de itineris sumptu providere debebamus, quærebamus notum aliquem^{16.} mercatorem, qui nobis in hac angustia subueniret: quo non reperro, cum & locatores nostri reditum vrgerent; & hospita videns nos laceros, & pecunia destitutos, se ad Magistratum ituram, vt in custodiam conijceremur, minitaretur; consilium cepi (quandoquidem ciuitas Anconitana Pontificis esset, à quo nempe Gregorio XIII. literas patentes, quas superiùs inferui, habebam) Gubernatorem ipsum cum diplomate Pontificio accedere, qui erat nobilis Bononiensis, è familia Lambertina. Assumptis itaque mecum Abrahamo Dunino & Georgio Kos familiaribus, accessi ad eum, cum Audientiam, quam vocant, publicè daret: exposui casum qui nobis acciderat, qui non est ijs insolitus, qui terras alienas peragrant. Et quoniam nullum hìc notum habebam, productis literis Pontificijs, petiui, vt mihi in tanta necessitate præstò esset, & si aliam rationem me iuuandi non haberet, saltem fidem suam apud aliquem mercatorem interponeret, vt nobis de ducentis scutis saltem, dum Venetias perueniremus, prouideret, quandoquidem ob præteritas & futuras necessitates, ea pecuniæ summa hoc tempore vehementer indigebam. Gubernator lectis literis, quibus me Pontifex diligenter commendabat, & vestitu nostro lacero inspecto, me hunc ipsum esse, qui commendabatur, non credebat, & nos impostores aliquos arbitrabatur. Quod cum animaduertissem, petiui vt interim vnum ex familiaribus meis pro obfide acciperet, in quem animaduertere posset, si se ludificatum deprehenderet. Ille in furias se proripuit, & parùm aberat, quin nos è palatio exturbari iuberet. Hæc ego post-

cà

*Lambertinus Anconæ
Gubernator.*

ea Romam perscripsi: cumque ei hoc nomine dies dicta fuisset, excusabat sese, quod non credebat me illum ipsum esse, sed putabat Breue Pontificis nos aliqua ratione assequutos (vt per fraudem quandoque fit) cum ad nos minime pertineret. Responsum illi fuit, quod quandoquidem fidem nobis non adhibebat, literas Pontificis videns, poterat nos honesto aliquo modo detinere, & literas Pontificis Romam mittere: cui rem gratam fecisset, si hunc recollectisset, quem sua Sanctitas commendabat: sin verò diuersus aliquis ab eo deprehendebatur, poterat de eo capitis supplicium sumi, qui falsas literas circumferendo, cum se fingeret, qui non erat. Quamobrem reprehensus, officio Gubernatoris postmodum hac de causa exutus est.

Discedentes igitur absque vlla consolatione à Gubernatore, cum, quid agendum nobis esset, nesciremus, diligenter inquirendo didicimus de quodam mercatoris Veneti Quirini negotiorum curatore. hunc igitur ego conueni. Et quoniam prædones, licet sinus meos excuterent, propter festinationem tamen, non deprehenderunt Agni Dei reliquias, quas circumferebam: vbi quoque erat particula sanctæ Crucis, auro & lapidibus adamantinis exornata; cuius valor ad minus ducentis scutis poterat æstimari. Habebam & Crucem Ierosolymitanam, quam collo appensam gestabam, quæ & ipsa quadraginta ducatos Vngaricos adæquabat; catenulam quoque auream, qua culter alligabatur. Andreas quoque Skorulski habebat annulū, quem cum duobus aureis Portugallensibus in ocream immiserat, & prædonum rapinæ subduxerat. Enarraui huic procuratori singula, quæ nobis acciderant, & offerens illi quæ nobis erant reliqua pro pignore, petiui vt nobis centū scutos daret, licet multo pluris æstimarentur. Acquieuit non grauatim. Sed cum debitis persolutis, locatoribus expeditis, in hospitio quoque pro victu & equis Laureto conductis, pretio dato, residuum nobis pro itinere nullum re-

quum esset: licet iam Georgius Kos Venetias pro pecunia mittendus in procinctu esset, quoniam tamen ad minus per octiduum reditus illius expectandus erat, & hospita carcere nos subinde territabat, denuò ad illum ipsum mercatorem cum illo tractaturus accessi, ut nobis centum adhuc alios scutos mutuos daret. Ille quamuis videret, pauca, quæ habuimus, iam pignore sibi obligata, nosque viros bonos iudicaret, non valdè tamen, quod postea ipsemet fatebatur, nobis fidebat. Exhibui itaque illi Pontificis, Regis Stephani, & Ducis Venetorum literas: è quibus cum iam didicisset, quis essem, de cuius cognomine & familia etiam antea inaudierat, paulatim dictis fidem adhibere cœpit. Ostendi illi præterea literas, præcipuorum quorundam negotiatorum Venetorum manu & sigillis cõsignatas, quibus per Syriam, Ægyptum, Cyprium, ministris suis iniungebant, ut mihi pecuniam suppeditarent, quæ ad aliquot Cecchinorum millia ascendebat. Atque ita demum magis etiam nobis credere cœpit. Nam ut postea ipse dicebat, literæ Principum patentes, cum priuatorum schedis, quibus pecunia mihi numeranda continebatur, in nomine & cognomine meo optimè conueniebant. Dedit itaque mihi & alios centum scutos. Sic locatoribus nostris cum eorum satisfactione expeditis, debitis, & quæ in hospitio dare tenebamur, persolutis, currum cum quatuor equis nobis conduximus.

Senogallia. Manè discedens, pro prandio veni Senogalliam; inde Fanum transeundo, quòd via esset propter pluuiam lutulenta, & equi fatigati, ut plus itineris pedibus confici fuerit necesse, tertia noctis hora Pisaurum peruenimus, & clausa ciuitate, in hospitio suburbij pernoctauimus.

Ariminum. Manè Catholicam; vespèri Ariminum venimus. 18.

Quoniam dies erat Cœnæ Domini, sanctissimo Sacramento suscepto, apud Fratres S. Francisci de Obseruantia, inter 19.

inter quos vnum quoque reperimus qui multo tempore Ierofolymis ad S. Sepulchrum conimorabatur, iter nostrum Cæsarnagam prosequuti sumus; pro nocte verò Ra-^{Ravenna.} uennam venimus. Quoniam verò pro festo Paschatis Venetijs esse constitueram, per equos dispositos, postas vocant, Chiozzam versus cursum institui: vnaque posta
 30. confecta, duos Germanos nobiles, qui Chiozzâ veniebant, obuios habui, qui dixerunt, in Ferrariensibus & Venetorum confinij, in hospitio triginta & aliquot prædones herere, quemnam expectarent, nesciri. Itali quoque professionem hanc dissuadebant, affirmando, quòd sæpius isthic homines spolientur. Quamobrè ad læuam iter aliud arripui versus Argentam, Ducis Ferrariæ ciuitatem, quam^{Argenta.} tertia equorum per postas mutatione, hora vigesima secunda, ingressus sum: cumque duæ tantum postæ Ferraria^{Ferraria.} superessent, manè eò perueni: & quia Sabbatum sanctum erat, mansi ibidem, & per sacrum Paschæ diem, qui in primum Aprilis inciderat.

A P R I L I S.

1. Manè, deuotione, quantum peccatoris humilitas dabat, peracta, curru conscenso, perueni Francolinum: deinde nauigio per Padum ad oppidum Loreo post horam vigesimam quartam, vbi dormire constitueram. Sed quoniam in hospitio famulus, quem præmiseram, nonnullos vagabundos reperit, qui eum eicere volebant, & quia oppidum non erat clausum, nolimus hic quiescere, cum & nauis dehortarentur. Itaque conducta nauicula, hora noctis quinta Chiozzam perueni.

3. Feria tertia Paschæ, cum fuisset in Ecclesia B. Mariæ, vbi Deus multa miracula operatur, prandio sumpto, versus Venetias nauigavi. Et præteruectus portum Mala-^{Malamecho} mocho, in quo nauem conscenderam, Ierofolymam pro-^{Venetiarum} portum. secturus, ad monasterium sanctæ Mariæ *della gratia* ap-
 pli-

plicui : in quo hoc die quo mihi in Terram sanctam discedendum erat , sacrosanctam Eucharistiam manè sumpseram ; & prandio peracto , Venetijs iam nauem conscensurus , proficiscens , denuð indignas orationes meas Deo obtuleram. Huc itaque descendens , indignus Deo gratias egi , quòd per immensam misericordiam suam , nos in hac peregrinatione nostra custodire , & incolumes huc reducere dignatus fuerit. Inueni hìc loci huius superiorem Patrem Pompeium , qui meus erat Confessarius , pius & innocentis vitæ senex , qui mihi profecturo coronam suam Oratoriam dederat , vt eà loca sacra attingerem : quam cùm illi restituissem , maximam inde lætitiā habuit. Petiui vt die insequenti ibidem in monasterio sacram Eucharistiam ex eius manibus percipere mihi liceret ; quod etiam fecit. Deinde cùm vrbi appropinquassemus , vbi is accessit , qui testimonia scripta excipit , ne quis ex loco infecto veniat , cùm nobis potestatem è naui exeundi fecisset , conducta cymba , quam Gundulam vocant , profectus sum ad Ecclesiam sancti Sepulchri , vbi Deo gratijs pro felici reditu persolutis , ad hospitium postea me contuli. Reperi hìc Michaëlem Konarski , quem Tripoli cum rebus præmiseram. Petrus Bylina , quem Corcyrà cum trimibus expediueram , nonnisi decimo post aduentum meum die , Zarà peruenit. Konarski de Polona Sykerzeczka narrauit , quòd cùm naui propter tempestatem ad Calliopolim in Apulia in littore constitisset , licet à me haberit mandata , vt eius diligentem curam haberet , de necessarijsque omnibus illi prouideret , tamen illa cum alijs in littus egressa , clàm ita se abscondit , vt reperiri nulla ratione potuerit , atque ita naui , cùm eam diutiùs expectare non posset , è littore soluit . Sed antequam Venetias appulisset , certam notitiā habui , eam in Italia fuisse , & peregrinationi insistere , quodque in patriam numquā redire constituerit. Quamobrem postquam illam in Christiano-

rum

Sancti Sepulchri Ecclesia Venetijs.

rum oras delatam cognoui, ab ea peruestiganda ulterius mihi temperandum existimaui.

Quamdiu hoc tempore Venetijs mansi, quod valetudine debili ex itineris molestijs fuerim impeditus, nusquam ferè prodij, medicis & recuperandę sanitati deditus. Antequam tamen inde discessissem, fui in palatio: cumq; Dux decumberet, Senatoribus valedixi: quibus etiam binas literas reddidi, quas mihi ad Zacynthi & Cephalonię superiores tradiderant. Nam cüm in reditu Zacynthum peruenissem, & Rector infirmaretur, ego verò cum triremibus inde soluere adproperarem, reddere literas non potui. In Cephalonia verò non fuimus ibi, vbi Rector moratur: quandoquidem portus Viscardo, vbi quatrimum egimus, ex altera parte insulę positus est. Missę mihi sunt deinde per Secretarium in hospitium literę, quibus Dux Serenissimo Regi respondebat ad commendationem pro me factam, cüm me iam itineri committerem.

M A I V S.

3. Die tertia discessi Venetijs in patriam per Tridentum, Oenipontem, Halam, vnde per Danubium, Viennam.
29. Perueni ad confinia Polonię.

I V N I V S.

42. Perueni Grodnam: vbi salutato Rege, illique gratijs actis pro cura & solitudine, quam planè paternam in rebus meis adhibuit, decem diebus transactis, perueni per Dei gratiam,

I V L I V S.

Die septima mensis Iunij Niesuisium, anno Domini M. D. LXXXIV. cüm inde ad obeundam hanc peregrinationem, die sextadecima Septembris discessissem, anno Domini M. D. LXXXII.

Vnde sit nomen Domini benedictum in secula. Amen.

Hanc

Hanc quartam ad te iam ex ipsa domo scribo epistolā: quò me diuina bonitas die septima Iulij perduxit incolumem. Post literas vltimas ex Sicilia ad te datas, quòd reditum in patriam accelerabam, nihil ad te scribere potui. Significaueram tamen, cùm adhuc ibi essem, ex palatio Rectoris, nauem illam meam Saitiam, quæ me Cretam aduexerat, visam procul fuisse. Corcyram cùm venissem, ipsam quoque magnis tempestatibus iactatam, eò appulisse. Peregrinationem hanc meam ita scripto comprehendi, quantum itineris difficillimi occupationes permittebant; neque (quod denuò tibi insinuandum existimo) Historicorum more eam pertractaui, cum quibus in certamen non descendo: neque res eorum nonnullas refuto, quæ cum scriptis illorum, prout coràm inspexi, minimè concordant. Perfunctoriè etiam hæc, & velut per transennam perlustraui; & quòd, vt vetus prouerbiū habet, in oculos ipsos incurrebat, id tantum obiter annotaui. Quæ verò ab alijs auditione accepi, ea quoque, sed parcè tamen addidi. Neque enim relationes aliorum disseminare mihi propositum. Ceterum qui oculis hæc suis ipse vidit, quæ à me sunt commemorata, proculdubio fatebitur, me plurima diligenter & accuratè, verè autem omnia complexum esse. Nam qui ex aliorum relatione historias suas confarcinarunt, manifestè deprehendi, eos à vero plurimis in rebus aberrasse.

Illud quoque addo, diuina quadam ordinatione & prouidentia factum, quòd, sicut antea tibi significaueram, licet in contrarium persuasiones non deerant, propositum tamen meum constanter retinueram, per Constantinopolim iter non faciendi. Quamuis enim à Rege Stephano peramplas commendationes habebam, nouo tamen illo casu, vt intellexisti, emergente, in casses proculdubio incidissem. Deo immortalī sit honor & gloria, qui me indignum, per laboriosas huius peregrinationis vias duxit;

duxit, & ad propria incolumem reduxit. Datum Niesuisij, x. Iulij, anno Domini M. D. LXXXIV.

His adiunctū ad te mitto Ordinem Processionis, à peregrinis in Ecclesia S. Sepulchri obseruari solitum, vñà cum planta dictæ Basilicæ delineata; non tamen ad debitas Architecturę mensuras, quod temporis breuitas & deuotionis occupatio non patiebatur, reducta, vt facilius intelligere possis, quæ quolibet loco salutis nostræ mysteria sint peracta: in quibus piæ commemorationes diuinorum beneficiorum ob oculos ponuntur. Mitto & descriptionem Cærimoniarum, quæ in creatione Militum S. Sepulchri obseruantur. Hæc tu omnia boni consule, quæ vt à me colligi potuerunt, hîc in vnum coadunata mittuntur: illud semper (toties iam à me repetitum) memineris, me, non Historici, sed amici potiùs more descriptam peregrinationis meæ seriem, ad te dirigere. Vale.






ORDO
PROCESSIONIS
S. SEPVLCHRI.

ITEM
MODVS ORDINANDI
EIVSDEM S. SEPVLCHRI

MILITEM.



Loca Ecclesiæ sacri SEPULCHRI,

in imagine per numeros assignata.

1. Sepulchrum Domini.
2. Atrium S. Sepulchri à S. Helena extructum.
3. Cophorum vel Chaldaeorum capella.
4. Syrianorum capella, vbi sepulchra familia Ioseph.
5. Locus vbi Christus stetit, cum in forma hortulanæ Maria Magdalene apparuit.
6. Hic Maria Magdalena stabat.
7. Altare Mariae Magdalene.
8. Altare maius.
9. Altare minus, vbi columna flagellationis.
10. Hæc porta ex capella ad partem Monasterij, quæ concessa est nostris Religiosis, vbi thesaurum, cameras aliquot, culinam & aream parvam habent; ingressus nullus alius illis est nisi per Ecclesiam.
11. Ad radices montis Caluarie est carcer, domuncula hortulani antea erat, vbi Christus Dominus detentus fuit, dum necessaria ad crucifigendum parabantur.
12. Altare Longini, nullius nationis.
13. Altare diuisionis vestimentorum.
14. Scala in templo per quam descenditur ad capellam S. Helena, & tandem ad capellam Inuentionis S. Crucis; tota lapidea, continet circiter 40. gradus.
15. Solium S. Helena ex marmore rubeo.
16. Altare columnæ improprij Abyssinorum.
17. Paries vltra cruce, in quo fenestra vna tantum est in templum: capella ibi Abyssinorum, in qua lapis est ex marmore asperso, ad latitudinem & longitudinem vlnæ vnius, in quo Isaac debebat immolari.
18. Vbi cruce erant. locus est Georgianorum, vbi optimè videri etiam potest Saluatorem nostrum facie versus occasum pendisse.
19. Duo altaria Catholicorum, in eo loco, vbi Christus cruce affigebatur, sita.
20. Hic petra scissura inter crucem Christi & latronis qui ad laeuam pendebat, in Inuentionis S. Crucis, & in ea vbi sepulchra Regum Gallie sunt, capella ærinitur.
21. Scala lignea in montem Caluarie, circiter quindecim gradus habens.
22. Hæc capella, vbi sepulchra Regum Gallie, sub illo planè loco, vbi Saluator fuit crucifixus, sita est. Ibi etiam conspicitur illa petra rupta inter crucem Christi & leui latronis.
23. Sepulchra Regum Gallie.

24. Porta magna templi.

25. Lapis unctionis.

26. Altare Græcorum extra murum
quo sunt circumdati.

27. Murus humilis Græcorum cir-
cum dans Sanctuarium.

28. Porta Græcorum speciosa, vel, ut
illi vocant, aurea.

29. Per has lineas designatur mons
Caluaria, cuius medietas minor
inclusa est in templum, altera
verò, maior videlicet, est extra
templum.

30. Oratorium Abyssinorum inferius
situm, quod asseribus vel tabu-
lis ligneis ab Ecclesia disjungi-
tur, supra quod Armeni habent
suum Sanctuarium.

31. Supra hoc est Georgianorum, vel,
ut alij vocant, Gorgianorum
Oratorium, qui ut & Armeni
habent ad ista sua Sanctuaria
scalas ligneas de templo.

32. Hic circulus denotat fenestram
quæ est in tholo Basilicæ.



ORDO

O R D O
P R O C E S S I O N I S
Q V Æ F I T
P E R E C C L E S I A M
S. S E P V L C H R I
D O M I N I N O S T R I
I E S V C H R I S T I.

Incipiendo ab altari Columna flagellationis.

H Y M N V S.

E Ia fratres charissimi,
Christi mortis my-
steria

Canamus, & vestigia
Sequamur, corde flebili.

Qui poenā primi criminis
Delet vigore sanguinis:
Hūc ad columnā acriter
Cædit Pilatus pessimè.

Cur sic, ô crudelissime,
Flagellis eum percutis,
A quo vitam acceperas,
Vitam conaris rapere?

Cur tu columna soluere
Tunc noluisti Dominū,
Cū te crudeles milites
Rigassēt eius sanguine?

Cur non fregisti illicò
Tūc te, columna impia,
Dolore Christi ninnio
Flagellis tātis languidi?

Iam orans fudit sanguinem
Qui potuit sufficere:

Nā gutta huius sanguinis
Crimina vincit omniū.

Nos ergo qui diligimus
Hūc flagellatum Dñm,
Rogamus, vt criminib⁹,
Suis ignoscat meritis.

Gloria tibi Domine
Pro tāto fuso sanguine,
Pro tanta amoris copia
Quo trahis ad te omnia,
Amen.

Anti-

Antiphona. Apprehendit IESVM Pilatus, & ad hanc columnam ligatum fortiter flagellavit. *ŷ.* Verè languores nostros ipse tulit. *ŕ.* Et dolores nostros ipse portavit.

O R A T I O.

Adesto nobis CHRISTE Saluator, per tuam pœnalem flagellationem, & per tuum stillantem & aspersum sanguinem pretiosum, vt omnia peccata nostra deleas, nobisque tuam gratiam tribuas, & ab omni periculo & aduersitate protegas, & ad vitæ æternæ gaudia perducas. Qui viuís & regnas in sæcula sæculorum, Amen.

EVNDO AD CARCEREM.

Q Vi lucē dedit Patribus,	Iam sufficit afflictio,
Quos ab inferni tenebris	Mœror sudorque sanguinis,
Eduxit, & cœlestibus	Proditoris venditio,
Ornauit donis gratiæ;	Ac turpis pretij vilitas.
Ipse Saluator sæculi	At si pietas deficit
Qui vincla soluit criminū,	In homine, quē redimis,
Duris ligatus funibus	Tu bonitate propria,
Obscuro datur carceri.	IESV succurre innoxio.
O nimis dura vincula,	Ob peccatores talia
Quæ vinctum Dei Filiū	Gratis tulisti, Domine,
Tenetis velut pessimum,	Vt corde, ore, & opere
Vt mortē detis corpori;	Tuam lucrentur gratiā.
Sœuitiam dimittite,	Ignosce ergo miseris,
Agnumq; miteni soluite,	Qui peccatorū pondere
Qui culpæ & mortis	Grauantur, vt per sæcula
compedes	Sit tibi laus & gloria,
Soluit amore, morteque.	Amen.

Antiphona. Ego te eduxi de captiuitate Ægypti, demerso Pharaone in mari rubro; & tu me tradidisti carceri obscuro. *ŷ.* Dirupisti Domine vincula mea. *ŕ.* Tibi sacrificabo hostiam laudis.

O R A -

O R A T I O.

Domine IESV CHRISTE, Angelorum decor, gaudium & libertas animarum: qui pro redemptione mundi capi, ligari, carcerari, alapis cædi, flagellari & conspui voluisti: fac nos, quæsumus, indignos famulos tuos, pœnas & contumelias pro tui nominis gloria lætanter suscipere, ut ad tuæ pietatis consortium mereamur feliciter peruenire. Qui viuis & regnas, &c.

EVNDO AD LOCVM DIVISIONIS
VESTIMENTORVM CHRISTI.

MOdò narramus, qualiter

Noster Saluator pertulit
Iniurias quàm maximas,
Et passus est ab impijs

A Patre qui est genitus,
A quo semperque gignitur,

Et idem in essentia
Cum Patre & sancto Spiritu.

Qui à cælorum sedibus
Descendit huc obediens,
In habituque hominis
Mundum replet virtutibus:

Qui cælos implet lumine,
Ornat atque sideribus,
Hominibus, & Angelis,
Hunc veste priuant milites.

Qui Sanctos vestit gloria,
Vitam dedit & mortuis,

Ac reis donat veniam,
Repletur ignominijs.

Qui campi vestit lilia,
Fructusque dat arboribus,
Suis priuatus tunicis,
Pauper nudus relinquitur.

Qui vestit volatilia
Pennis atque coloribus,
Ornatque prata floribus,
Ipse priuatur vestibus.
Ad locum sanctum pergitur,

Vbi redemptor omnium
Cum pœna & ignominia
Vestem permisit diuidi.

O gens iniqua & pessima,
Quali madescis crimine,
Dum tunica incôsutilis
A te sorte diuiditur?

Heu Christus nudus vestibus,

Solo cruore induitur,

O o

Et

Et super eas milites	De Christi raptis vestib ⁹ .
Sortes miserunt impij.	Precamur ergo cernui
Hic locus est sanctissimus,	Te Creatorem sæculi,
Vbi David oraculum	Vt hîc priuatus vestibus
Completum est in forti-	Nos induas virtutibus.
bus	Amen.

Antiphona. Milites postquam crucifixerunt IESVM, acceperunt vestimenta sua, dantes vnique militi partem. *ꝑ.* Hîc diuiserunt sibi vestimenta mea. *ꝑ.* Et super vestem meam hîc miserunt sortem.

O R A T I O.

Benigne IESV Christe, qui pro nostra redemptione ab indignis peccatorum manibus, non solum in cruce nudus suspendi & mori voluisti, sed & tua sacratissima vestimenta partiri & donari permisisti; concede, vt spoliati vitijs, & virtutibus adornati, tibi Deo viuo & vero in cælesti gloria præsentari mereamur. Qui viuis & regnas, &c.

AD LOCVM INVENTIONIS

S. CRVCIS EVNDO.

A D Crucis locum per-	Et ad Sanctorū præmia.
gere	O Crux cunctis excelsior
Debemus: & hanc quæ-	Thronis, sceptris, hono-
rere,	ribus,
Velut gefferūt Martyres	Ad te fac nos ab infimis
Qua meruerunt gloriā.	Humilitate scandere.
O Crux, miranda gloriæ	O Crux tam admirabilis,
Scala, quæ ad cælum ele-	Ornata Christi sanguine,
uas,	Quæ cum Sanctotū ag-
Ascēdit per te Dominus	mine,
Ad Patrē fuso sanguine.	Mundū illustras lumine.
O Crux arbor dignissima,	O Crux arbor dulcissima,
Qua mediante animæ	Quæ mortis das myste-
Ascendunt ad cælestia,	rium

Chri-

Christi, & nobis pretiū Nunc per te nobis gra-
 Donasti atque gaudium. tia
 O Crux aue spes vnica, Detur, ac tandem gloria,
 Inuenta hīc ab Helena; Amen.

Antiphona. Orabat Iudas dicens, Deus, Deus meus,
 ostende mihi lignum S. Crucis: cumque ascendisset de
 lacu, perrexit ad hunc locum, vbi iacebat sancta Crux.

ŷ. Hoc signum Crucis erit in cælo. R. Cū Dominus
 ad iudicandum venerit.

O R A T I O.

DEus, qui hīc in præclara salutiferæ Crucis inuentio-
 ne, passionis tuæ miracula suscitasti; concede vt vi-
 lis ligni pretio, æternæ vitæ suffragia consequamur. Qui
 viuus & regnas, &c.

EVNDO AD CAPELLAM.

S. HELENÆ.

NVnc Helenæ suffragia Inuenta Cruce Domini,
 Queramus primū Cānamus illi canticum,
 laudibus, Per quam Saluator om-
 Vt cum beatis meritis nium
 Acquirat nobis veniam. Donauit nobis præmiū.
 Deuota Christi Helena O Helena sanctissima,
 Crucē quæsiuit feruida, Quæ Crucē tantę gloriæ
 Quam reperit cū titulo, Amasti totis viribus,
 Corona, clauis, lancea. Nos tuis iuua precibus.
 Quam Crucem vt acquire- Exaudi sancta Trinitas,
 ret, Preces nostrorū omniū,
 Tulit timorē omnibus, Et per Sanctorū merita,
 Sub pœna mortis illicō, Dones & nobis gloriam.
 Amore ardens calico. Amen.

Antiphona. Helena Constantini mater Ierosolymam
 petijt. ŷ. Ora pro nobis beata Helena. R. Vt digni effi-
 ciamur promissionibus Christi.

O R A T I O.

DEus, qui inter cetera potentiae tuae miracula, etiam in sexu fragili, virtutem rectae intentionis corroboras; praesta quaesumus, ut sanctae Helenae Reginae exemplo, cuius studio desideratum Regis nostri lignum sanctae Crucis detegere dignatus es, ea quae Christi sunt iugiter indagare, & te fauente consequi mereamur. Per eundem.

EVNDO AD COLUMNAM
IMPROPERIORVM.

C hristi magna impro-	Heu qui semper gloriae
peria	Honorisque meruerat
Rumpamus & ludibria,	Coronam; cur sic vepribus
Quando indutus purpura,	Circumdat & aculeis?
Sputa rulit & alapas.	Rigamus nosmet lacrymis,
Iam flagellato corpore	Pro improperto Dño,
IESV, cuius effunditur	Vultum cuius sic impij
Purus sanguis ab impijs,	Tinxerūt, sputis, sordib⁹.
Aue Rex cōclamantibus;	O tu IESV humillime,
Perfundūt vultū sanguine,	Concede nobis meritū
Dum ij coronam spineā,	Tui sacrati sanguinis,
Afflicto suo capiti,	Quem effudisti, capitis.
Dura premūt arundine.	Amen.

Antiphona. Ego dedi tibi sceptrum Regale, & tu capiti meo imposuisti spineam coronam. *ŷ.* Posuisti Domine super caput eius. *ꝛ.* Coronam de lapide pretioso.

O R A T I O.

Domine IESV Christe, qui humano generi condolens, coronam spineam in tuo sacratissimo capite humiliter suscepisti, & sanguinem tuum pro salute omnium fudisti: respice ad indignas preces nostras, ut à te clementer exauditi, humilitate & patientia te sequi mereamur. Qui viuis & regnas, &c.

QVAN-

QVANDO ASCENDITVR AD
MONTEM CALVARIÆ.

A d montem nunc Cal-	Ecce locus sanctissimus,
uariæ	Sacratus Christi sangui-
Properemus cum lacry-	ne,
mis,	Qui hîc salutem animæ
Vt Christus sua gratia	Inuenit Crucis opere.
Ignoscat nobis omnibus.	Manus, pedesque, viscera,
Ad montem sanctū ibimus,	Dum hîc foderūt impij,
Deuoti totis viribus,	Cum magna oblata est
Iesumq; contēplabimur	gratia
In Cruce nudū pendere.	Iam pro redēptis hostia.
Ad montem hunc mœstif-	O sacer sanguis victimæ,
simi	Salusque nostræ animæ,
Eamus, vbi sanguinis	In hoc fusus Caluario
Christus iam sacrificium	Ex Christi IESV corpo-
In Cruce pendens obtu-	re.
lit.	Gloria tibi Domine,
Ad locū nunc peruenimus,	Pro nostro passo scelere,
In quo Saluator sæculi	Infunde nobis veniam,
Se obtulit pro omnibus,	Quā acquisisti sanguine,
Ipseque emisit spiritum.	Amen.

Antiph. Ecce locus vbi Saluator mundi pependit: ex cuius latere sanguis & aqua in nostram redemptionem, ac nostrorum criminum ablutionem exiuit, Venite adoremus. *ꝫ.* Adoramus te Christe & benedicimus tibi. *ꝫ.* Quia per sanctam Crucem tuam hîc redemisti mundum.

O R A T I O.

Deus Pater æternæ pietatis & infinitæ charitatis, qui furorem irę tuę, quē nos pro peccatis nostris merebamur, hoc in loco, super Filium tuum vnigenitum totius humani generis Redemptorem, erupisti; cū ipsum in Cruce suspendi, aceto & felle potari, clauis & lancea vul-

nerari permifisti; concede nobis indignis feruis tuæ lan-
ctiffimæ maiestatis, eiuſdem Filij tui doloribus compa-
tientibus, vt fructu tantæ paſſionis & mortis, in æternæ
felicitatis gloria perfrui mereamur. Per eundem Chri-
ſtum Dominum noſtrum, Amen.

VBI CRUCIFIXVS FVIT CHRISTVS.

O Dulcis amor cordiũ,	Nec tantis in doloribus,
Noſtræ ſalutis pre-	Oblitus erat Virginis,
tium,	Tenſis in Cruce brachijs,
Qui pedes, manus impijs	Ipfam reliquit Virgini.
Hic extendiſti, crucique.	Et hunc illi ſanctiſſimæ
Decreti tunc chirographũ	Matri donauit iuuenem,
Chriſtus extingui cu-	Quem diligebat feruidè,
piens,	Ex charitate nimia.
Hic crucifigi manibus	Gloria tibi Domine
Permiſit atque pedibus.	Pro effuſione ſanguinis,
O quanti fuit pretij	Qui toto ſtillans corpo-
Gutta illius ſanguinis;	re
Quæ infiniti meriti	Lauauit noſtra crimina.
Fructum dedit fidelibus.	Amen.

Antiphona. Ego quaſi agnus innocens ductus ſum ad
immolandum: & poſtquam carnem meam totam verbe-
ribus repleuiſſent, ita vt dinumerare valerent omnia oſſa
mea, & pupugiſſent caput meum ſpinis & vepribus, fode-
runt hic manus meas, & pedes meos, ferreis clauis confi-
gentes cruci. *ŷ.* Ipſe vulneratus eſt hic propter iniquita-
tes noſtras. *ꝝ.* Cuius liuore ſanati ſumus.

O R A T I O.

Domine IESV Chriſte Fili Dei viui, qui hunc ſacra-
tiſſimum locum, pro ſalute humani generis, tuo pre-
tioſo ſanguine conſecraſti, ad quem hora tertia baiulans
crucem duci voluiſti, ac demum hora ſexta cruci affixus
pro peccatoribus exoraſti, matremque doloroſam Virgi-
nem

nem Virgini commendasti, concede quæsumus, vt nos omnes, qui hîc tuo pretioso Sanguine redempti sumus, & tuæ passionis memoriam celebramus, eiusdem passionis beneficium consequi valeamus. Qui viuus & regnas, &c.

DESCENDENDO A MONTE CALVARIO
AD LOCVM VNCTIONIS IESV CHRISTI.

A D Christum modò vngere	Dolore mortis filij, Cuius amore moritur.
Deuotionis oleo,	Hîc & Ioannes adfuit,
Pergamus omnes feruiddè,	Qui Matrem vice filij Accipit Virgo Virginē Pro pietate mortui.
Vt nos inungat gratia.	
Qui pietate nimia,	Venite ergo comites,
Nomen, effusum oleum,	Huc cum Ioseph & socio
Habens atq; dulcissimū,	Vngere IESVM oleo
Suis rigauit lacrymis.	Mixtura myrrhæ cordium.
O tu excelsa pietas,	Beata vestra brachia,
O IESV ardens charitas,	Quæ meruere cingere Corpus IESV sanctissimum,
Qui mortem morte destruis,	Et id vnguentis vngere.
Sic vitā donas mortuis.	Gloria tibi Domine,
De Cruce iam depositus,	Decus tibi perpetue,
In matris suæ brachijs	Honor tibi sanctissime,
Repositus (vt creditur)	Inuncto suauī nomine.
In loco isto vngitur.	Amen.
Contempla matrem lacrymis	
Plenam, atq; mœstissimā	

Antiphona. Vnguentum effusum nomen tuum: idèò adolescentulæ dilexerunt te. *ŷ.* Dilexisti iustitiam & odisti iniquitatem. *ŷ.* Propterea vixit te Deus, Deus tuus.

ORA-

DUlcissime IESU Christe, qui in tuo sanctissimo corpore tuorum condescendens deuotioni fidelium, vt te verum Regem & Sacerdotem ostenderes, inungi ab iisdem voluisti: concede, vt corda nostra vnctione Spiritus sancti valeant ab omni infectione peccati continuè præferuari. Qui cum Patre, &c.

AD GLoriosVM CHRISTI

SEPVLCHRV M.

I Am ad locum sanctissimum,	Perunctū ponunt mortuum
In quo corpus Domini-	Corpus Christi sanctissimum.
cum	
Conditū fuit, pergimus:	Iam anima sanctissima
Ipsū quæramus laudibus;	Ad inferos descenderat,
Ad locum tam amabilem	Vt lumen daret mortuis,
Cūctis Christi fidelibus,	Eosq; ad cælos duceret.
Pergentes nos cū iubilis,	Contriuit portas areas,
Feruore moti Spiritus.	Ligauitq; Luciferum
Ecce Ioseph Decurio,	In pœnis ijs perpetuis,
Arimathiæ nomine,	Sua virtute propria.
Qui Christi corpus vn-	Sic ergo tulit animas,
xerat,	Atque Sanctorum cor-
Cuius erat discipulus,	pora,
Et Nicodemus pariter,	Quæ, resurgētes pariter,
Cum sanctis quoq; alijs,	Conduxit ad cælestia.
Tulerunt hoc in proprio	Vnitur posthæc anima
Sepulchro pleni lacry-	Sacrato Christi corpori,
mis.	Cū in vtroque fuerit
In hoc exciso lapide,	Excelsa illa diuinitas.
In quo numquam quis	Resurgit tunc in gloria,
fuerat,	Passurus numquam am-
	pliùs,

Sed

Sed vita beatissima Intus tamen prospiciens,
 Vfurus, & perpetua. Tunc vidit linteamina,
 Huc currunt duo pariter Quibus cū aromatibus
 Ad gloriosum tumulū: Corpus IESV ligauerat,
 Sed præcurrit citius Sacratumque sudarium:
 Ioannes Petro iunior. IESVM tamen nō viderant,
 Ioannes tamen ingredi Qui iam liber à mortuis
 Non vult, præ reuerētia Tertia die fuerat,
 Pastoris iam Ecclesiæ; Vt ipse iam prædixerat.
*Quando vero circumdatur sanctissimum Sepulchrum
 una vice tantum, dicatur hic, Gloria tibi Domine, ut habe-
 tur in fine.*
Rēsumpsit CHRISTVS Aromatum huc copiam
 omnia, Portantes, his vt vnge-
 Quæ patiens amiserat, rent
 Et sanguinem & alia, Corpus IESV sanctissi-
 Ad vnionem corporis. mum.
 Reuoluit tunc ab ostio, Tunc IESVM nō inueniūt,
 Sepulchri huius lapidē, Sed vident secum Ange-
 Vt legitur, hic Angelus, los
 Ad resurgētis gloriam. Sedentes hic in albis,
 Fit terræmotus maximus, Qui dicūt ipsum viuere.
 Quo assistentes milites Ex his ergo prodigijs,
 Tremunt, nūc perterriti Pergunt huc omnes po-
 In terram velut mortui. pūli,
 O diuina potentia, Illumque adorant, prædi-
 O summa sapientia, cant,
 En post tormenta talia Qui morte mortem per-
 Hic surgit tanta gloria. didit.
 Surgunt autem diluculo Ex mundi plagis omnibus,
 Mulieres, cū tenebræ Ex omni sexu & genere,
 Essent adhuc, sollicitæ Omnes deuotè properāt
 Cuius erant discipulæ. Amore Christi anxij.
 Pergunt in prima sabbati, Ex Orientis partibus,
 P p Et

Et Aquilonis montibus,	Pergunt Romani aduenæ,
Meridici plagisq̃ue,	Omnes feruore calidi,
Et ab Occasu pariter.	Ob Christi reuerentiam
Festinant Parthi, Medi q̃ue,	Ac Matris suæ Virginis.
Sic Elamitæ cursitant	Prece mur Patrē supplices,
Atque Mesopotamij,	Ex corde cum his omni-
Simul & Cappadocij.	bus,
Ex Ponti q̃ue prouincia,	Vt ob Christi victoriam,
A regione Libyæ,	Donet nobis & veniam.
A Phrygia q̃ue populi,	Gloria tibi Domine,
Omnes amore accelerāt.	Qui surrexisti à mortuis,
Gentes huc ex Pamphylia,	Cum Patre & sancto Spi-
Et ex Ægypti partibus,	ritu,
Atque totius Asiæ,	In sempiterna sæcula,
Ad locum hunc perue-	Amen.
niunt.	

Quando autem circumdatur tribus vicibus, addantur versiculi applicati ad locum S. Mariae Magdalene, post quos dicatur Antiphona pro S. Sepulchro.

Antiphona. Quem totus mundus capere nequiuerat, hîc vno saxo clausus fuit; atque morte iam perempta, inferni claustra penetravit. *ŷ.* Surrexit Dominus de hoc Sepulchro, Alleluia. *ŕ.* Qui pro nobis pependit in ligno, Alleluia.

O R A T I O.

Domine IESV Christe, qui die tertia, ex hoc sanctissimo Sepulchro, deposita mortalitate, vt primitiæ dormientium surrexisti, & immortalis pro nobis apparere voluisti: concede nobis famulis tuis, qui ad tui laudem hîc congregati sumus, vt eiusdem resurrectionis gloriæ cum Sanctis & electis tuis participes esse valeamus. Qui viuus & regnas, &c.

VBI CHRISTVS APPARVIT MARIAE

MAGDALENÆ IN FORMA HORTVLANI:

QVANDO FIT IBI PROCESSIO.

<p>A Magdalena feruida Quæramus nûc quid viderat, Dicentes; O discipula Christi, quid tibi appa- ruit? Sepulchrum cum sudario, Et testibus angelicis, In albisque sedentibus, Meis consexi oculis. Meum querebam Dominû, Tota conspersa lacrymis, Hinc inde currês rediês, Et mori secum cupiens. Euntibus discipulis, Ego iam ibam illicò; Sed igne amoris anxia, Ardebam desiderio. O vitæ nostræ gloria, O nostræ amor animæ, Clamabam vt insipiens, Amore eius languida. Ipse post hæc apparuit Sua diuina gratia,</p>	<p>Licet tunc non cogno- uerim, In hortulani habitu. Sed qui donauit mortuis Vitam,& hos ab inferis Reduxerat ad gaudia, Me consolari voluit. Noli deuota plangere Maria, sed à lacrymis Iam cessa, corde iubilo Exulta plena gaudijs. Ad ipsum citò adij, Otu mi dulcis Rabboni, Dixi,& pedes protinus Tunc osculari volui. Sed ille, quia omnia Nondum sciebâ optimè, Nec ad Patrē ascēderat, Noli, inquit, me tangere. Gloria tibi Domine, Et nobis hîc ignoscere Digneris, qui discipulæ Dilectæ tuæ credimus. Amen.</p>
--	---

Antiphona Surgens IESVS manè prima Sabbati, appa-
 ruit hîc Mariæ Magdalenæ, de qua eiecerat septem demo-
 nia. *℣.* Maria noli me tangere. *℟.* Nondum enim ascendi
 ad Patrem meum.

O R A T I O.

Benignissime Domine IESV Christe, alpha & omega: qui manè prima Sabbati Magdalena lacrymabiliter te querenti, in hoc loco apparere voluisti, & ei te affabilem iucundis confabulationibus & vultu desiderabili præbui-
sti: concede nobis indignis famulis tuis, vt sacratissi-
mam faciem tuam, gratiarum plenam, in celesti gloria me-
ritis tuæ resurrectionis videre valeamus. Qui viuis, &c.

*Hinc ad Capellam VIRGINIS MARIAE, ubi fertur
CHRISTVM IESVM post Resurrectionem apparuisse ipsi
beatissima MATRI suæ.*

R Egina mundi cælique,	Quem crucifixū corpore,
Lætare super fide-	Die vidisti tertia,
ra,	Surrexit iam in gloria
Quem meruisti parere,	Et corporis & animæ.
Vidisti eum viuere.	Ex his ergo mysterijs
Surgens liber ab inferis	Sit Trinitati gloria,
Christus, primo diluculo	Actibi Matri Virgini,
Venit ad te cum iubilo,	Nobisq; æterna gaudia.
Ferens cæleste gaudium.	Amen.

*Tempore Paschali dicantur ista quæ sequuntur, scilicet Ver-
sus & Oratio.*

Ÿ. Gaude & lætare Virgo Maria, Alleluia. R. Quia
surrexit Dominus verè, Alleluia.

O R A T I O.

DEVS, qui per Resurrectionem Filij tui Domini nostri
IESV Christi, familiam tuam lētificare dignatus es;
præsta quæsumus, vt per eius genitricem Mariam perpe-
tuæ capiamus gaudia vitæ. Per eundem Dominum no-
strum IESVM Christum, &c.

Ÿ. Dominus vobiscum. R. Et cum Spiritu tuo. Ÿ. Be-
nedicamus Domino. R. Deo gratias. Ÿ. Diuinum au-
xilium, &c.

Alio verò tempore dicantur subscripta.

Ÿ. Ora pro nobis sancta Dei Genitrix. R. Vt dignificiamur promissionibus Christi.

O R A T I O.

COncede nos famulos tuos, quæsumus Domine Deus, perpetua mentis & corporis sanitate gaudere: & gloriosa beatæ Mariæ semper virginis intercessionem præsentiliberari tristitia, & æterna perfrui lætitia. Per Dominum nostrum IESVM Christum filium tuum: qui tecum vivit & regnat, &c.

P R O S A C R O P R A E S E P I O.

NVnc ad Præsepe Domini sacratum
Pergamus omnes, offerentes Deo
Ex corde preces, propter IESV nomen

Dulce per omnem

Omnes amore moti contemplemur

Puerum sanctum, Deitate plenum,

Vt sic ad Patrem sua nos perducatur

Morte crudeli

Ad nos pervenit Sanctus pietate,

Carne indutus, qui à Patre Deo

Genitus fuit ante mundi lucem,

Gignitur tamen

Hoc nato cantat Angelorum cœtus,

Gloria Deo ac æterno Patri,

Sit illi semper, atque pax in terra,

Omne per ævum.

Pulchrior cælo, vultu, mente, corde,

Iacet cum brutis humilis ac plorans,

Crimina nostra cupiens rigare

Lacrymis suis.

Dum hîc de Matre nascitur, in cælo

Oritur stella, mundumque illustrat,

Qua mediante, currunt citò Magi,
Christi amore.

Munera portant, Aurum, Thus, & Myrrham,
Deferunt nato puero, iacenti
Ad pectus sacrum Virginis beatæ,
Isto in loco.

O amor tantæ pietatis tuæ,
Quem ostendisti nascens hîc de sacra
Matre, quæ Virgo extitit intacta
Gratia tua.

Gloria tibi Genitori Patri,
Qui hunc misisti Redemptorem sanctum,
Vt nos ab hoste liberaret omnes,
Sanguine suo. Amen.

Ÿ. Hîc notum fecit Dominus, Alleluia. R. Salutare
suum, Alleluia.

O R A T I O.

DEVS perpetuæ & immensæ bonitatis, qui coæter-
num & consubstantialium Filium tuum, sancti Spiri-
tus operatione, nostra mortali carne vestiri voluisti, & de
sacra & intacta Virgine in hoc loco nasci, & à Magis atque
pastoribus adorari fecisti: concede nobis, vt eundem Fi-
lium tuum, quem tota mente & totis viribus nos diligere
debemus, eadem sacra & beatissima Matre eius interce-
dente, apud tuam clementissimam bonitatem mediato-
rem habere mereamur. Qui tecum, &c.



IN NOMINE DOMINI

A M E N.

INCIPIT MODVS PERFICIENDI

SIVE ORDINANDI

MILITEM SANCTISSIMI SEPVLCHRI

DOMINI NOSTRI IESV CHRISTI

ANte omnia igitur ordinandus Miles præparet se ad deuotionem, ut valeat percipere gratiam officij sacra Militia: ac præmissa Confessione, auditaque Missa, & percepta Dominica Communione, intromittatur in atrium S. Sepulchri. Et tunc incipiatur iuxta modum qui sequitur.

In primis congregatis omnibus intra sanctissimū Sepulchrum, cantatur Hymnus, Veni Creator Spiritus. *℣.* Emitte Spiritum tuum, & creabuntur. *℞.* Et renouabis. *℣.* Domine exaudi. *℞.* Et clamor. *℣.* Dominus vobiscum. *℞.* Et cum spiritu tuo.

O R E M V S.

DEVS, qui corda fidelium sancti Spiritus illustratione docuisti: da nobis in eodem Spiritu recta sapere, & de eius semper consolatione gaudere. Per Christum Dominum nostrum, Amen.

Deinde interrogari debet à P. Guardiano: Quid quæris? Respondet flexis genibus: Quæro effici miles sanctissimi Sepulchri Domini nostri IESV Christi.

Interrogatio. Cuius conditionis es?

Resp. Nobilis genere, ex parentibus generosis.

Interrogatio. Habésne vnde honestè manu tenere possis statum & Militarem dignitatem absque mercantijs, & arte mechanica?

Resp.

Resp. Habeo cum gratia Dei mei, bonorum sufficientem copiam.

Interrogatio. Esne paratus corde & ore iurare, & pro posse militaria sacramenta seruare, quæ sunt ista, quæ sequuntur.

1. Miles sanctissimi Sepulchri omni die, habita opportunitate, Missam audire debet.

2. Miles sanctissimi Sepulchri debet, cum necesse fuerit, bona temporalia & vitam exponere, scilicet, quando est bellum vniuersale contra infideles, & venire in propria persona, vel mittere idoneum.

3. Miles sanctissimi Sepulchri, est obligatus sanctam Dei Ecclesiam, & eius fideles ministros, ab eorum persecutoribus defendere, & pro posse liberare.

4. Debet iniusta bella, turpia stipendia & lucra, hastiludia, duellum, & huiusmodi, nisi causa militaris exercitij, omnino vitare.

5. Debet pacem & concordiam inter Christi fideles procurare, Remp. zelare & augmentare; viduas & orphanos defendere, iuramenta execrabilia, periuria, blasphemias, rapinas, vsuras, sacrilegia, homicidia, ebrietatem, loca suspecta, & personas infames, atque vitia carnis vitare, & tamquam pestem cauere, & se apud Deum & apud homines irreprehensibilem exhibere, ac etiam verbis & facto, se dignum tanto honore demonstrare, Ecclesias frequentando, & cultum diuinum augmentando.

Queratur ergo, si est paratus corde & ore hac omnia protestari, iurare & facere. *Resp.* Sic.

FORMA PROFESSIONIS.

EGO N. profiteor & promitto Deo IESV CHRISTO, & beatæ Virgini MARIAE, hæc omnia pro posse, vt bonus & fidelis CHRISTI miles, obseruare.

His peractis benedicatur Ensis à Guardiano, secundum formam inferius positam, si non est benedictus: sed si est benedictus,

etus, & vel post benedictionem, vocato uno Ordinando, & genu flexo ante sanctissimum Sepulchrum, Guardianus ponat manus super caput eius, & dicat:

Et tu N. esto fidelis, strenuus, robustus, & bonus miles Domini nostri IESV CHRISTI, & sanctissimi eiusdem Sepulchri, qui te, finito mundi termino, cum electis suis in gloria sua collocare dignetur, Amen.

Hoc finito, Guardianus dat in manu sua calcaria deaurata, qua ponat in pedibus suis in terra existens; postea dat ens sem nudum, ipsi militi dicens:

Accipe N. sanctum gladium, in nomine Pa ✠ tris, & Fi ✠ lij, & Spiritus ✠ sancti: & vtaris eo ad defensionem tuam, ac sanctæ DEI Ecclesiæ, & ad confusionem inimicorum Crucis CHRISTI, ac fidei Christianæ: & quantum humana fragilitas permiserit, cum eo neminem iniuste lædas. Quod ipse præstare dignetur, qui cum Patre & Spiritu sancto regnat DEVS, per omnia sæcula sæculorum. R. Amen.

Deinde ens in vaginam reponitur, & Guardianus prædicto ense cingit eum, dicendo:

Accingere N. gladio tuo super femur tuum potentissime, in nomine Domini nostri IESV CHRISTI, & attende, quòd Sancti non in gladio, sed per fidem vicerunt regna.

Ense accincto miles surgit, & genibus flexis, inclinato capite supra sanctum Sepulchrum, à Guardiano ordinatur percutiendo ter cum ense prædicto super scapulas, & dicendo ter:

Ego constituo & ordino te N. militem sanctissimi Sepulchri Domini nostri IESV CHRISTI, in nomine Pa ✠ tris, & Fi ✠ lij, & Spiritus ✠ sancti, Amen.

Deinde osculetur eundem in faciem, ponens secundum antiquam consuetudinem torquem auream cum cruce pendente in collo eius; & Ordinatus deosculetur sanctum Sepulchrum, postea descendat & restituat omnia: & vocato alio, Ordina-

tus in atrio remanet, quousque omnes Ordinandi erunt ordinati. post quorum vel cuius ordinationem, cantando à Fratribus, Te Deum laudamus, itur ad Capellam nostram, vel ibidem statim, secundum dispositionem Guardiani. Deinde dicitur Antiphona hac in singulari, si est unus: si autem plures, in plurali.

In singulari dicitur: Speciose forma præ filijs hominum, Accingere N. gladio tuo super femur tuum potentissimè.

In plurali: Speciosi forma præ filijs hominum, Accingimini gladijs vestris super femora vestra potentissimè.

℣. Domine exaudi orationem meam. R. Et clamor.

℣. Dominus vobiscum. R. Et cum, &c.

O R E M V S.

DA Ecclesiæ tuæ, misericors Deus, vt sancto Spiritu congregata, hostili nullatenus incursione turbetur. Omnipotens sempiterne Deus, super hunc, [vel hos] famulum tuum [vel famulos tuos] qui eminenti mucrone circumcingitur [vel circumcinguntur] gratiam tuæ benedictionis infunde: & eum [vel eos] dexteræ tuæ virtute munitum [vel munitos] fac contra cuncta aduersantia cælestibus armari præsidijs, quibus nullis in hoc sæculo tempestatibus bellorum turbetur [vel turbentur.] Per Dominum nostrum, &c.

Vltimò amplectantur à Guardiano, & ab alijs, si quis vult eos amplecti. Et sic est finis.

SEQUITVR BENEDICTIO

ENSIS MILITIS VEL EQVITIS

SACRI SEPVLCHRI.

*Is qui benedicit, teneat ensẽ nudum ante se, & dicat: ʒ. Ad-
iutorium nostrum. R. Qui fecit, &c.*

O R E M V S.

EXaudi, quæsumus Domine, preces nostras, & hunc
Ensem, quo hic famulus tuus circumcingi desiderat,
maiestatis tuæ dextera dignare benedicere: quatenus pos-
sit esse defensor Ecclesiarum, viduarum, orphanorum,
omniumque Deo seruientium, contra sæuitiam pagano-
rum; aliisque sibi insidiantibus sit terror & formido, præ-
stans ei æquæ persecutionis & iustę defensionis effectum.
Per Christum Dominum nostrum. R. Amen.

O R E M V S.

Benedic ✠ Domine sancte Pater, omnipotens æterne
Deus, per inuocationem sancti tui nominis, & per ad-
uentum Christi filij tui Domini nostri, & per donum Spi-
ritus sancti, hunc Ensem: vt hic famulus tuus, qui hodie-
na die, tua concedente pietate, præcingitur, visibiles & in-
uisibiles inimicos sub pedibus conculcet, victoriaque per
omnia potitus, semper maneat illæsus. Per Christum, &c.

Benedictus Dominus Deus meus, qui docet manus
meas ad prælium, & digitos meos ad bellum. Misericor-
dia mea & refugium meum, susceptor meus & liberator
meus, protector meus & in ipso speraui, qui subdit popu-
lum meum sub me. Gloria Patri. Sicut erat, &c.

ʒ. Saluum fac seruum tuum Domine. R. Deus meus
sperantem in te.

ʒ. Esto ei Domine turris fortitudinis. R. A facie ini-
mici. ʒ. Domine exaudi. R. Et clamor meus, &c.

ʒ. Dominus vobiscum. R. Et cum spiritu tuo.

Qq 2

O R E.

O R E M V S.

Domine sancte, Pater omnipotens, æterne Deus : qui cuncta solus ordinas & rectè disponis , qui ad coërcendam malitiam reproborum, & tuendam iustitiam, vsum gladij in terris hominibus tua salubri dispositione permisisti; & militem ordinem ad populi protectionem institui voluisti; quiq̃ue per B. Ioannem militibus ad se venientibus, vt neminem concuterent, sed proprijs essent contenti stipendijs, dici fecisti : clementiam tuam, Domine, suppliciter exoramus, vt sicut Dauid puero tuo Goliam superandi largitus es facultatem , & Iudam Machabæum de feritate gentium, nomen tuum non inuocantiũ, triumphare fecisti; ita & huic famulo tuo N. qui nouiter iugo militiæ colla suppositus, pietate cælesti vires & audaciam, ad Fidei & Iustitiæ defensionem, tribuas ac præstes, Fidei, Spei, & Charitatis augmentum; & da timorem ei pariter & humilitatem, perseverantiam, obedientiam, & patientiam bonam, & cuncta in eo rectè disponas : vt neminem cum gladio isto vel alio iniuste lædat, & omnia cum eo iusta & honesta & recta defendat; & sicut ipse de minori gradu ad nouum militiæ prouehitur honorem, ita veterem hominem deponens cum actibus suis, nouum induat hominem, vt te timeat, & rectè colat, perfidorum consortia vitet, & suam in proximum charitatem extendat, præposito suo in omnibus rectè obediat, & suum in cunctis iuste officium exequatur. Per Christum Dominum nostrum. *g.* Amen.

R E-

RERVM MEMORABILIVM

L N D E X.



BACVC Propheta domus.

82

Abel sepultura.

30

Aborys Arabs famosus

pradator.

37

Abfalonis sepulchrum.

62

Abuzyr Aegypti ciuitas.

147

Abysinorum denotio.

51

Adam apud Damascum creatus.

31

Adrichomij opinio de domo Saltus Liba-

ni.

27

Aegyptus.

141

Aegypticalores.

144

Aegypti vbertas.

169

in Aegypto calores pestem profligant.

155

in Aegypto fructus hortorum bis in anno

proueniunt.

158

Aegyptij natatores egregij.

168, 169

Aegyptij vrinatores nauigantes depræ-

dantur.

145

Aegyptiorum sceleta in symposiis.

135

Aegyptiorum sponforum chorea.

186

Aegyptiorum in exornandis & condien-

dis defunctorum corporibus diligentia.

189

Aëris mutatio notabilis intra breue loco-

rum spatium.

18

Aethiopes faciem lapidibus exornant.

34

Agata portus.

224

Alexandria.

196, 197

Alexandria dulci aqua caret.

195

Alexandrie subterranea ciuitas.

203

Alexandria aër insalubris, & canſa.

203, 204

Alexandria Turcis periculum imminere,

& Terram sanctam à Christianis recu-

peratum iri.

204, 205

Alexandria negotiatorum frequentia.

206

Alexandrii portus area.

198

Alexandrii portus priuilegium.

207

Alphonsus Aragonum Rex libros vocabat

morinos magistros.

2

Amphibia Gracis equi marini.

143

Ananke domus.

33

Anates virides.

142

Anachoritis S. Saba mille interficit

Sathagiacus.

94

Ancona.

274

Animalia diuersa Alexädrice venalia.

212

Anna Pontificis domus.

58

Antonius Panormitanus Presbyter Sicu-

lus sit Turca.

127, & seqq.

Antonij Veneti nauigatio.

225

Antrum Latibuli B. Virginis.

86

Apparitionis Capella.

49

Aqua Iordanis asseruata incorruptibilis.

96, 97

Aqua Nilotica salubris.

146

Aquaductus Cairi.

185, 186

Aqua venalis Cairi ratio.

153

Arabes Christiani in Syria.

28

Arabes viarum depradatores, cur à Tur-

cis non possint exterminari.

37

Arabes Turcis fortiores.

38

Arabes iuraturi panem cum sale come-

dunt.

92

Arabia deserta.

97

Arabia deserta incolarum victus.

215

Arabum in Cairum incurſiones.

152

Arabum inter se disidentium octo vexil-

la.

27, 28

Area portus Alexandrini.

198

Arenarum Arabia incommoda.

190

Argenta ciuitas.

277

Ariminum ciuitas.

276

Armamentarium Cydoniense Venet.

248

Aromele Cairi Moschaa vel Czerkassio-

rum. 180.

à quo & quomodo exſtrn-

ſſa.

ibidem.

Arx Cairi.

182

Asphalticum mare seu lacus.

95

Aſſani Baſſa auaritia & supplicium.

199

Aſſani Baſſa miniſtri supplicio affecti.

199

Aſſunum Regina Bona ciuitas.

261

Auctori Historici partes non aſſumit.

2

Auctoris ad Decum conuerſio.

5

Auctoris votum viſendi S. Sepulchrum.

5

Auctoris ingreſſus ad S. Sepulchrum.

492

65, 106

Auctori miles S. Sepulchri cum familiari-

bis creatur.

65

Auctoris donaria S. Sepulchro attributa.

68. & seqq.

Auctori

I N D E X.

<i>Auctor fabrica S. Sepulchri restaurande procurator à Religiosis F. designatur.</i>	71	<i>Cairi custodia militaris propter Arabes.</i>	152
<i>Auctori insidia à Turcarum Casare parata.</i>	245	<i>Cairi victus abundantia.</i>	154
<i>Auctoris navigatio in Aegyptum.</i>	136	<i>Cairus ad tria millia nostra protenditur.</i>	175
<i>Auctoris famulus in mari suffocatus.</i>	254	<i>Cairi adium & Moschearum numerus.</i>	150
<i>Auctor cum socijs à Banditis spoliatur.</i>	264, 265, & seqq.	<i>Cairi Iudeorum multitudo.</i>	153
		<i>Cairi publicarum culinariu numerus.</i>	154
		<i>Cairi Ecclesia Christianorum.</i>	192
		<i>Callolimioni portus.</i>	217
		<i>Calores Aegypti.</i>	144
		<i>Calores in Aegypto pestem profligant.</i>	155
		<i>Calnaria mons.</i>	106
		<i>Campanarum usus à Turcis interdictus.</i>	94
		<i>Candia, siue Creta.</i>	238
		<i>ibidem Iouis sepultura.</i>	239
		<i>Candia ciuitas.</i>	238
		<i>Canea siue Cydonia.</i>	241
		<i>ad Cannas Romanorum clades.</i>	262
		<i>Canopicum Nili osium.</i>	156
		<i>Capella Apparitionis.</i>	49
		<i>Capella Carceris.</i>	50
		<i>Carauana Mechamentes.</i>	39
		<i>Carcer Christi.</i>	58, 59
		<i>Carmelus mons.</i>	24
		<i>Carpathos insula Palladis patria.</i>	223
		<i>Casso insula.</i>	223
		<i>Cassia arbor.</i>	178
		<i>Castrum Pisanum.</i>	80
		<i>S. Catharina virginis carcer & martyrij locus.</i>	202
		<i>Cedri montis Libani.</i>	27
		<i>Cedron torrens.</i>	62
		<i>ibidem vestigia cadentis Christi.</i>	62
		<i>Cephalonia.</i>	16, 255
		<i>Chamaleontis natura.</i>	119
		<i>Cercaeij Christianorum reliquia.</i>	152
		<i>Christiani Arabes in Syria.</i>	28
		<i>Christiani ad pyramidem mensura Nilis non admittuntur.</i>	157
		<i>Christiani à seruitute Turcica ab Auctore redempti.</i>	209
		<i>Christiani redempti, raro bona frugis.</i>	211, 212
		<i>Christianorum Schismaticorum Ierosolymis deuotio.</i>	107
		<i>Christianos Turcas factos educendi difficultas.</i>	209
		<i>Chrizoroa mons.</i>	30
		<i>Ciceronis sepulchrum.</i>	16
		<i>Ciconia Nili.</i>	142
			Cir-
B.			
<i>Balbech ciuitas & palatium Salomonis in monte Libano.</i>	27		
<i>huius structura à quibusdam Asmodeo demoni adscribitur.</i>	166		
<i>Balduini & Godefridi Regum Ieros. sepulchra.</i>	55		
<i>Balncum Solimanni Alexandriae.</i>	203		
<i>Balona Turcarum ciuitas.</i>	16		
<i>Balsami arbores.</i>	177		
<i>Banditi Auctorem spoliant.</i>	264, 265, & seqq.		
<i>Banditorum miscra conditio.</i>	272		
<i>Baptismi Christi locus.</i>	96		
<i>Barium Apuliae ciuitas.</i>	261		
<i>Bassa Aegypti Imbraimus.</i>	152		
<i>Bassa Imbraimi in apertione Nili maiestas.</i>	166, 167		
<i>Bassi Cairi indicia.</i>	192		
<i>Benedictio maris in Ianuario apud Venetos.</i>	9		
<i>Beniamin Hebraus in suo Itinerario cur Pyramidum non meminerit.</i>	164		
<i>Berytum.</i>	24		
<i>Bethsabee piscina.</i>	81		
<i>Bethagil locus castrorum Sennacherib.</i>	88		
<i>Bethania vicus.</i>	72		
<i>Bethlehem & S. Praeepij Basilica.</i>	83		
<i>Bethsaida S. Petri patria.</i>	42		
<i>Bona temporalia umbra assimilata.</i>	4		
<i>Bona Polonia Regina corpus.</i>	262		
<i>Botarga piscium oua.</i>	258		
<i>Braccio de Mayna portus.</i>	251		
<i>Bulbach ciuitas Cairo adiacens, & eius magnitudo.</i>	147		
C.			
<i>Caesarea Cappadociae.</i>	24, 126		
<i>Caipha domus.</i>	58		
<i>Cairus olim Babylon, maxima Aegypti ciuitas.</i>	149.		
<i>oculus inimica.</i>	153.		
<i>à Secilimo I. occupatur.</i>	183		
<i>Cairi arx.</i>	183		

I N D E X.

<i>Circumcisi in quibusdam Terra sancta locis ultra triduum vivere non possunt.</i>		<i>Desertum S. Ioannis Baptista.</i>	89
88		<i>Deus diuersis medijs hominem saluat.</i>	3
<i>Circumcisionis Domini locus.</i>	85	<i>cuius prouidentia circa provinciarum fertilitatem.</i>	160
<i>Circumcisionem Turca in macello peragunt.</i>	129	<i>Diploma Militie S. Sepulchri datum Auctori.</i>	66
<i>Cisterna David.</i>	82, 83	<i>Diuonia insula.</i>	218
<i>Cisterna Ioseph, in quam à fratribus fuit missus.</i>	42	<i>Domus saltus Libani.</i>	29
<i>Clibani pullos gallinaceos producētes.</i>	144	<i>Domus mali consilij.</i>	81
<i>Calesyria, vel Syria caua.</i>	27	<i>Donaria Auctoris S. Sepulchro attributa.</i>	68, & seqq.
<i>Cenaculum Domini.</i>	59, 102	<i>Dromedarj, & eorum celeritas.</i>	214
<i>Cenaculum sacrum Turca venerantur</i>		<i>Drusiani, Christianorum Gallorum reliquia.</i>	24
102, 103		<i>Drusianorum elemosyna.</i>	134, 135
<i>Columna flagellationis.</i>	49	<i>Drusianorum religio.</i>	134
<i>Columna improperij.</i>	51	<i>Dzaffer Bassa Tripolitanus.</i>	127
<i>Columna Pompeij Alexandria.</i>	197	<i>Dzermæ nauigij commoditas.</i>	141
<i>Constantia Fratrum Minorum in celando thesauro S. Sepulchri.</i>	66	E.	
<i>Constantinopolis victum ab Aegypto mutuatur.</i>	206	<i>Ecce homo, locus.</i>	77
<i>Conuersio Auctoris ad Deum.</i>	5	<i>Ecclesia Christianorum Cairi.</i>	192
<i>Corcyra.</i>	16, 256	<i>Elemosyna Turcarum Drusianorum.</i>	134, 135
<i>Corcyra arx nona, clauis maris Adriatici.</i>	256	<i>Elia statua petra impressi.</i>	82
<i>Corozaim.</i>	41	<i>Elisei fons.</i>	98, 99
<i>Creta, seu Candia.</i>	18, 224	<i>Emaus castellum.</i>	120
<i>Crocodili Niliaci.</i>	194	<i>Emir Machomet Syria Phœnicis Regulus.</i>	131
<i>Crucifixi Lucensis imago.</i>	122	<i>Emiri cum Dzaffer Bassa congressus.</i>	132
<i>Crucis Christi inuentiæ locus.</i>	50	<i>Emo nobilis Veneti nauis naufragiū.</i>	254
<i>S. Crucis monasterium.</i>	90	<i>Engaddi mons.</i>	87
<i>Cydonia, siue Canea.</i>	241	<i>Epulonis dinitis Euangelici domus.</i>	79
<i>Cydoniense armamentarium Venet.</i>	248	<i>Equi marini.</i>	142
<i>Cyprus insula.</i>	20, 138	<i>Equi carnes comedentes.</i>	215
<i>In Cypro vinorum conditorum ratio.</i>	140	<i>S. Eusebij sepulchrum.</i>	85
<i>Cyprus quo prætextu Venetis erepta.</i>	180	<i>Expeditio Lithuanorum in Lituoniam.</i>	5
<i>Cyprus lini Gossipini ferax.</i>	132	F.	
<i>Cytheræa Venetorum insula.</i>	250	<i>Fano, insula Hispanorum in mari Mediterræneo.</i>	258
D.		<i>Feminarum agrestium in Aegypto habitus.</i>	187
<i>Dalmatia.</i>	14	<i>Ferchin in Aegypto ciuitas.</i>	144
<i>Damascus amplissima Syria ciuitas.</i>	31	<i>Ferraria.</i>	277
<i>Damascena Mauza.</i>	35	<i>Ficus Pharaonis.</i>	177
<i>Damiata, vel Pelusium.</i>	143	<i>Flagellati Christi columna.</i>	42
<i>Damiata propugnaculum.</i>	142	<i>Fons S. Pauli baptizati.</i>	33
<i>Davidis cisterna.</i>	83	<i>Fons R. Virginis.</i>	46, 63
<i>Davidis monumentum.</i>	103	<i>Fons S. Philippi.</i>	88
<i>Defunctorum suffragia.</i>	14, 55	<i>Fornaces seu clibani Aegypti, in quibus pulli gallinacci artificiose excluduntur.</i>	
<i>Defunctorum sepeliendorum apud Turcas tributum.</i>	182		
<i>Delta Nili.</i>	147, 156, 169		

I N D E X.

<i>Fossa Alexandriam Cairo ducens.</i>	<u>194</u>	<i>Hiems ventosa.</i>	<u>163</u>
<i>Franciscus Caraffa Vicerex Lecij.</i>	<u>260</u>	<i>Hieronymi conclauē Bethlehemicum.</i>	<u>85</u>
<i>Fructus horiorum bis in anno proueniunt in Aegypto.</i>	<u>158</u>	<i>Homines viriſque ſexus Cairi venales.</i>	
<i>Fructuſitas malū granatū abundans.</i>	<u>194</u>	<i>Hora diei & noctis num Ieroſolymis a-</i>	
<i>Funebres carimonia Sīſiorum.</i>	<u>237</u>	<i>quales.</i>	<u>118</u>

G.

G <i>Abaa Saulis.</i>	<u>47</u>	<i>Hortorum fructus bis in anno proueniunt in Aegypto.</i>	<u>158</u>
<i>Galea Iacobi Regis Cypri.</i>	<u>179, 180</u>	<i>Hortus agonie Chriſti.</i>	<u>61</u>
<i>Galgala.</i>	<u>97</u>	<i>Hoſpitia publica non habet Gracia.</i>	<u>241</u>
<i>Galilea conſinia & fertilitas.</i>	<u>41</u>	<i>Hydruntinus portus.</i>	<u>259, 260</u>
<i>Gallinacei pulli in clibanis Aegypti excluſi.</i>	<u>144</u>		

I.

<i>Garyophylli rupes Alexandria.</i>	<u>208</u>	I <i>acob Patriarcha pons.</i>	<u>41</u>
<i>Gaurca palatium Cairi.</i>	<u>177, 178</u>	<i>eiſdem luſta.</i>	<u>ibid.</u>
<i>Gedanenſe bellum Rege Stephano.</i>	<u>5</u>	<i>Iacobi maioris decollationis locus.</i>	<u>58</u>
<i>Genezareth lacus.</i>	<u>41</u>	<i>Iacobi ieiunantis antrum.</i>	<u>62</u>
<i>Georgius Radziuilus Auctoris frater Car-</i>		<i>Iacobi Regis Cypri galea.</i>	<u>179, 180</u>
<i>dinalis creatus.</i>	<u>253</u>	<i>Iacobus Podlodowski à Turcis occiſus.</i>	<u>243</u>
<i>S. Germani ſidus.</i>	<u>223</u>	<i>Iacobus de monte Brandon, latro famoſus.</i>	
<i>tempeſtates in mari ſedat.</i>	<u>227, 228</u>		
<i>Geſſen terra Iacob Patriarcha attributa.</i>	<u>169</u>	<i>Idola Mumiarum.</i>	<u>188</u>
		<i>Ieremia Eccleſia & monaſterium.</i>	<u>121</u>
<i>Gethſemani villa.</i>	<u>61</u>	<i>Iericho ciuitas.</i>	<u>97</u>
<i>Giamachiſon Moſchaa Cairi.</i>	<u>181</u>	<i>Ierichuntina roſa partum faciliat.</i>	<u>98</u>
<i>Giamalaſar Moſchaa Cairi primaria.</i>	<u>178</u>	<i>Ieroſolyma.</i>	<u>47</u>
<i>Gion mons & palatiū Salomonis.</i>	<u>90, 106</u>	<i>Ieroſolymitana peregrinatio abſque fa-</i>	
<i>Glires Pharaonis Tripoli.</i>	<u>130</u>	<i>culatate Rom. Pont. riſe ſuſcipi quare</i>	
<i>Gortina ciuitatis ruina.</i>	<u>19</u>	<i>non poſſit.</i>	<u>10, 11</u>
<i>Gracia hoſpitia publica non habet.</i>	<u>241</u>	<i>Ieroſolymitanarum antiquitatum conſer-</i>	
<i>Gregorius PP. XIII. votum Auctoris Ie-</i>		<i>uandarum Turca valde ſtudioſi.</i>	<u>63</u>
<i>roſol. probat.</i>	<u>6</u>	<i>Ieroſolymitana vrbis priſca maiſtaſ.</i>	<u>105</u>
<i>facultatē eundē Ieroſolymam conce-</i>		<i>Ieroſolymis loca ſacra viſitantium conſo-</i>	
<i>dit.</i>	<u>12</u>	<i>latio.</i>	<u>108</u>
<i>Gregorij Kalendarj annus.</i>	<u>9</u>	<i>Ieroſolymitana Baſilica deſcriptio.</i>	<u>113</u>
<i>Gymnaſium Philoſophorum.</i>	<u>256</u>	<i>Ieiunium Turcarum ſolenne.</i>	<u>194</u>

H.

H <i>aceldemach ager intra 24. horas ca-</i>		<i>Imbraimus Baſſa Aegypti. 152. eiſ in</i>	
<i>dauer abſumit.</i>	<u>64</u>	<i>apertione Nili maiſtaſ.</i>	<u>166, 167</u>
<i>Haretiſci nō ſunt Chriſtiani iudicio Orien-</i>		<i>Improprij columna.</i>	<u>51</u>
<i>tialium, quia non habent Sacerdotem</i>		<i>Infirmiſtates corporis cur Deus permittit.</i>	<u>4</u>
<i>nec ſacrificium.</i>	<u>109, 110</u>	<i>Innocentium puerorum ſepultura.</i>	<u>85</u>
<i>Haretiſci Indæis deteriores, & quare.</i>	<u>110</u>	<i>Ioachimi domus.</i>	<u>60</u>
<i>Hebron oppidum.</i>	<u>87</u>	<i>Ioannis Baptiſta deſertum.</i>	<u>89</u>
<i>S. Helena trecentarum Eccleſiarum in Pa-</i>		<i>eiſdem locuſta & mel ſilueſtre.</i>	<u>96</u>
<i>leſtina fundatrix.</i>	<u>51</u>	<i>eiſdem Eccleſia.</i>	<u>97</u>
<i>eiſdem turres.</i>	<u>ibid.</u>	<i>Iobi ſons & domus.</i>	<u>121</u>
<i>Helena rapta locus.</i>	<u>250</u>	<i>Ioppen.</i>	<u>123</u>
<i>Heluctus Ianiffarus.</i>	<u>208</u>	<i>peregriniſ ibidem Indulgentia conceſſa.</i>	
<i>Herodis palatium.</i>	<u>105</u>		<u>125</u>
		<i>Iordanis fluminiſ.</i>	<u>96</u>

I N D E X.

<i>Jordanis bifariam divisus.</i>	41	<i>Magara Moschæ sepulchris Aegyptiorum clara.</i>	161
<i>Jordanis aqua asseruata incorruptibilis.</i>		<i>Magdalena & Martha domus.</i>	73
96, 97		<i>Mahometis propinqui colore viridi distinguuntur à ceteris.</i>	34
<i>ad Iordanem profectio periculosa.</i>	91	<i>Mahometis sepulchrum non pensile.</i>	39
<i>in Iordane Christi baptizati locus.</i>	96	<i>Malamochi Venetiarum portus.</i>	277
<i>Iosaphat vallis.</i>	60	<i>Mamaluci qui, & eorum habitus.</i>	30
<i>Ioseph cisterna in quam à fratribus fuit missus.</i>	42	<i>Mamymir Aegypti pagus.</i>	186
<i>Ioseph palatium.</i>	184	<i>Manna montis Sinai.</i>	213
<i>eiusdem puteus admirandi operis. ibid.</i>		<i>Marci Evangelistæ festum apud Venetos celeberrimum.</i>	16
<i>Iosephi ab Arimathia familia sepulchra.</i>		<i>Marci Evangelistæ martyrij locus.</i>	207
55		<i>Mare Asphalticum.</i>	95
<i>Iouis seu Pici sepultura Creta.</i>	239	<i>Mare rubrum Christianis sulcare prohibitum.</i>	225
<i>Isaac immolatus locus.</i>	53	<i>Marcotis palus.</i>	204
<i>Isaia martyrium.</i>	63	<i>Maria Deipara monumentum.</i>	60
<i>Istria.</i>	14	<i>eiusdē Spasmus. 78. Antrū latibuli.</i>	86
<i>Iuda Regum sepulchra.</i>	104	<i>Ecclesia de Carpigniano.</i>	260
<i>Iudæ Iscariotus suspensi locus.</i>	72	<i>Visio in tempestate oblata.</i>	234
<i>Iudæa.</i>	46	<i>Maris benedictio apud Venetos.</i>	2
<i>Iudæa fertilitas.</i>	46	<i>Maronitæ qui.</i>	114
<i>Iudæa montana.</i>	82	<i>Maronitarum scribendi ratio minus expedita.</i>	110
<i>Iudeorum Cairi multitudo.</i>	153	<i>Maslock potus & cibus Turcarum.</i>	171
<i>Iulia noua.</i>	271	<i>Maurorum mancipia venalia.</i>	257
<i>Inuandi ritus Arabum.</i>	92	<i>Mauza Damascena.</i>	35
L.		<i>Mel siluestre & locusta S. Ioannis Baptistæ.</i>	96
<i>Labyrinthus Thesei in Creta.</i>	18	<i>Mempheos urbis prisca magnitudo.</i>	164
<i>Lambertinus Ancone Gubernator.</i>		<i>Memphytica Pyramides. 161. à Iudæa excitata.</i>	162
274		<i>Mercatores Cairi dinites.</i>	149
<i>Lampades in S. Sepulchro.</i>	111	<i>Mercatoris Aethiopis Cairi vita.</i>	150
<i>Lapis Dominici sepulchri.</i>	59	<i>Meretricum Cairi numerus.</i>	170
<i>Lapis quo sepulchrum Lazari clausum fuit.</i>	72	<i>Messis in Aegypto mense Martio.</i>	159
<i>Lapis dialogi Christi cum Magdalena.</i>	73	<i>Methona Turcarum ciuitas.</i>	253
<i>Latinus Vrsinus.</i>	247	<i>Militia S. Sepulchri.</i>	65
<i>Latronis boni castrum.</i>	122	<i>Militia S. Sepulchri diploma datum Auerori.</i>	66
<i>Lauretanum B. Virginis sanum.</i>	273	<i>Ministri noui Euangelij Ierosolymis nullo.</i>	109
<i>Lazari resuscitati monumentum.</i>	72	<i>Missæ Maronitarum Abyssinorum, Georgianorum.</i>	ibid.
<i>Lecium, & eius Gubernator Caraffa.</i>	260	<i>Monasterium S. Crucis, seu S. Archangelii.</i>	90
<i>Lemissum.</i>	138	<i>Monasterium S. Ioannis de Patyna.</i>	240
<i>Libanus mons, in quo Patriarcha Romani Pontif. obedientiam agnoscit.</i>	26	<i>Montana Iudæa.</i>	82
<i>Libri mortui magistris.</i>	2	<i>Montes Ierosolymis præcipui.</i>	105
<i>Lithuanorum in Linoniam expeditio.</i>	5	<i>Montes ciuitatis Alexandrina.</i>	202
<i>Locusta & mel siluestre S. Ioannis.</i>	96	<i>Morasthen Moschæ Cairi.</i>	181
<i>Longinus latus Christi lancea perforas.</i>	50		
<i>Loth uxoris statua.</i>	95		
<i>Lucensis Christi crucifixi imago.</i>	122		
M.			
<i>Machabæorum sepultura.</i>	122		
<i>Macherontum castrum decollati S. Ioannis Baptistæ.</i>	43		

I N D E X.

<i>Moriath mons.</i>	106	<i>Nolime tangere, locus.</i>	54
<i>Moschea absque tholo.</i>	175	<i>Nundina Tripolitana.</i>	134
<i>Moschea Cairi celebriores.</i>	178		
<i>Moschearum Cairi numerus.</i>	150	O.	
<i>Mula Cairi magni pretij.</i>	179	O Beliscus Porphyreticus Alexandria.	
<i>Mulieribus Ierosolymitana peregrinatio prohibita.</i>	58	201, 202	
<i>Mulchias vel Mechias mensura Nili in Cairo locus.</i>	157	<i>Obsidio Plestouensis.</i>	7
<i>Mumia, & eius extrahenda ratio.</i>	188	<i>Occhialius Praefectus Classis Turcica.</i>	226
<i>Mumia non fortuito sed arte fit.</i>	190	<i>Oculis inimica ciuitas Cairi.</i>	153
<i>Mumia in navi deportata tempestatem ciet.</i>	228	<i>Odontotyranii seu equi marini.</i>	142, 143
<i>Mumiam cur Turca prohibent efferi.</i>	230	<i>Officiorum diuinorum in Basilica Ierosolymitana asiduitas.</i>	54
<i>Mumiam propter tempestatem in mare Auctor proicit.</i>	232	<i>Officiorum diuinorum ad S. Sepulchrum ordo.</i>	111
<i>Mumiarum idola.</i>	188	<i>Olueti mons.</i>	74
		<i>Orationis Dominica à Christo dicta & locus.</i>	76
		<i>Oriza copia in Aegypto.</i>	142

N.

N Atarea villa B. Virginis in Aegypto mansio.	176
<i>Nationum diuersarum sacella in templo Ierosolymitano.</i>	109
<i>Natiuitatis Christi locus.</i>	83, 84
<i>Nanarinum.</i>	253
<i>Naufragium nauis Emo nobilis Veneti.</i>	254
<i>Nauigatio Auctoris in Aegyptum.</i>	156
<i>Nauigatio Antonij Veneti.</i>	225
<i>Nauis Siculorum erratica.</i>	242
<i>Naupactica victoria Christianorum sub Pio V.</i>	255
<i>Nicodemi mansio, & Crucifixus.</i>	122
<i>S. Nicolai portus & Ecclesia.</i>	250
<i>S. Nicolai sepulchrum & manna.</i>	261
<i>Nicolaus de Ponte Dux Venetus.</i>	9
<i>Nili ostia.</i>	141
<i>Nili exundatio. 155. non casu sed arte fit.</i>	155
<i>Nili latitudo.</i>	147
<i>Nili in longum procursus.</i>	ibid.
<i>Nili Delta.</i>	147, 156, 169
<i>ad Nili mensura Pyramidem Christiani non admittuntur.</i>	157
<i>Nili exfrescentis ratio.</i>	159
<i>ex Nili incremento prognosticon abundantiae.</i>	158
<i>Nili apertionis annum Cairi spectaculum.</i>	167
<i>in Nili apertione Sangiacorū pompa.</i>	166
<i>Nilotica aqua salubris.</i>	146

P.

P Alatum Ioseph Patriarcha.	185
<i>Palatium Basse Cairi.</i>	157
<i>Palatium Salomonis in monte Gion.</i>	90
<i>Palatium Helena.</i>	250
<i>Palladis patria.</i>	223
<i>Palme arbor & fructus.</i>	172
<i>Paphus.</i>	20
<i>Parentium Istria oppidum à Paride conditum.</i>	14
<i>Patriarcha Turcarum.</i>	179
<i>Patriarcha Chaldaeorum & Abyssinarum.</i>	182
<i>idem.</i>	182
<i>Patriarcha montis Libani obediētiam Romani Pontificis agnoscit.</i>	26
<i>S. Paula Romana monasterium.</i>	86
<i>eiusdem sepulchrum.</i>	85
<i>Pauli Apostoli baptizati fons.</i>	33
<i>eiusdē locus demissionis in sporta. ibid.</i>	36
<i>eiusdem conuersionis locus.</i>	3
<i>Peccatoris mortem Deus non vult.</i>	3
<i>Peregrinatio Ierosolymitana mulieribus prohibita.</i>	58
<i>Peregrini in ingressu S. Sepulchri tributum pendunt.</i>	48
<i>Peregrinorum ad S. Sepulchrum intromittendorum ratio.</i>	107
<i>Personata defunctorum facies apud Aegyptios.</i>	188
<i>Pestis in Aegypto & Palestina.</i>	7
<i>Pestis in Aegypto septimo quoque anno grassatur.</i>	155
<i>Pestis contagionem Turca nō fugiunt.</i>	154

Petri

INDEX.

<i>Petri Apostoli negationis locus, & eiusdem penitentia.</i>	59	<i>Puteus Ioseph stupendi operis.</i>	184
<i>Petri Bellonij de Casarea Philippi error.</i>	28	<i>Pyramides Memphisita inter sepi mundi miracula à Iudæis in servitute Aegypti excitata.</i>	161
<i>Petrus de Ossuna Vicerex Neapolis.</i>	270	<i>Pyramis Rhodopes.</i>	163
<i>Pharaonis colossi.</i>	164		
<i>Pharaonis glives.</i>	130		
<i>Pharaonis ficus.</i>	177		
<i>S. Philippi fons.</i>	88		
<i>Philosophorum Gymnasium.</i>	156		
<i>Picus, qui & Iupiter mortuus.</i>	239		
<i>Pilati palatium.</i>	77		
<i>Pisanum castrum.</i>	80		
<i>Pisaenum Italia.</i>	276		
<i>Piscaria ciuitas.</i>	263		
<i>Piscatores demersi manu piscantur.</i>	146		
<i>Pisces sanctificati non comestibiles.</i>	130		
<i>Pisces Nilotici saporis, sed insalubres.</i>	146		
<i>Plesconiensis obsidio.</i>	7		
<i>Pluuia in Aegypto nulla.</i>	158		
<i>Podlodowski Iacobus à Turcis captus.</i>	243		
<i>Pompa Sangiacorū in apertione Nili.</i>	166		
<i>Pompey columna Alexandria.</i>	197		
<i>Porta ferrea Ierosolymis.</i>	60		
<i>Porta S. Stephani, & locus lapidationis ibid.</i>			
<i>Porta sterquilinij.</i>	64		
<i>Porta aurea.</i>	75		
<i>Porta Ephraim, quæ S. Stephani.</i>	76		
<i>Porta iudiciaria.</i>	79		
<i>Porta speciosa.</i>	117		
<i>Porta piscium.</i>	80		
<i>Portus Alexandrinus.</i>	207		
<i>mi nus tutus, & quare.</i>	208		
<i>eius arca.</i>	198		
<i>Portus delle Quaglie, seu coturnicū.</i>	251		
<i>Pradones Auctorem cum socijs innadunt & spoliant.</i>	264. & seqq.		
<i>sera conditio.</i>	272		
<i>S. Præsepj in Bethlehem Basilica.</i>	83, 138		
<i>Probatia piscina.</i>	76		
<i>Processio peregrinorum in Ecclesia Saluatoris.</i>	49		
<i>Prodona.</i>	253		
<i>Prognosticon abundantia ex Nili incremento.</i>	158		
<i>Purgatorium esse credunt Turcæ.</i>	29, 30		
<i>Puteus Samaritana.</i>	45		
<i>Puteus Magorum.</i>	82		
<i>Puteus villa Pastorum.</i>	86		
<i>Puteus Ioseph in quem à fratribus fuit missus.</i>	42		
		<i>Q</i>	
		<i>Vadrantana, mons ieiunantis Christi.</i>	99
		<i>R</i>	
		<i>Achelus monumentum.</i>	82
		<i>Rahab meretricis Ierichuntina domus.</i>	98
		<i>Rama.</i>	122
		<i>Rauenna.</i>	277
		<i>Regum Iuda sepulchra.</i>	104
		<i>Regius mons.</i>	105
		<i>Retimū Venetorum.</i>	240
		<i>Rhodj racemi notabilis magnitudinis.</i>	198
		<i>Rhodus insula.</i>	223
		<i>Rhodopes meretricis caput oracula red-dens.</i>	163
		<i>Rosa Ierichuntina partum faciliat.</i>	98
		<i>Rubri maris navigatio Christianis interdita.</i>	225
		<i>S</i>	
		<i>Saba monasterium Anachoritarum.</i>	94
		<i>Saccharum.</i>	172
		<i>Sacerdotes inclusi in Ecclesia S. Sepulchri.</i>	112
		<i>Salin modum glaciei congelatum.</i>	21
		<i>Salis statua vxoris Loth.</i>	95
		<i>Salina fluminiolus.</i>	264
		<i>Salomonis palatium in monte Libano.</i>	29
		<i>aliud in monte Gion.</i>	99
		<i>Salomonis templum.</i>	75
		<i>hoc ingredi Christianis nefas.</i>	117
		<i>Salomonis monumentum.</i>	103
		<i>Samaria.</i>	44
		<i>Samaritana Euangelica puteus.</i>	45
		<i>Samuelis sepulchrum.</i>	120
		<i>Sangiaci seu præfecti militaris habitus.</i>	44
		<i>Sangiacorū in apertione Nili pompa.</i>	166
		<i>Sangiacus quidā mille Anachoritas S. Sabe interfici.</i>	94
		<i>Santonæ Turcici nudi.</i>	34, 173
		<i>Sapientia portus.</i>	252
		<i>Saraffa Moschea Cairi.</i>	180
		<i>Sceleta Aegyptiorum in symposiis.</i>	135
		<i>Selimus I. Cairum occupat.</i>	183
		<i>Re</i>	
		<i>2</i>	
		<i>Sena-</i>	

I N D E X.

Senogallia.	276	Taurus Rex Europæ raptor.	1
Sephet ciuitas, Hester patria.	43	Tempeſtas atrox.	117, 159
Sepulchri Dominici aſſiguratío.	53	Temporalia bonâ umbra aſſimilata.	4
templi eiufdem deſcriptio.	113	Terebinthus beatiſſima Virginis.	81, 82
eiufdem Eccleſia Venetijs.	278	Terebinthi vallus.	120
Sepulchrum Abel.	30	Terramotus.	17
Balduni & Godefridi Regum Ieroſol. 55. Iouis. 239. Ciceronis. 16. Dauidis. 103. S. Euſebij. 85. Innocentium puerorum. 85. Familia Iofephi ab Arimathia. 55. Regum Iuda. 104. Lazari reſuſcitati. 72. Machabaorum. 122. Mahometis non penſile. 39. S. Nicolai. 161. P. Saulæ Romanæ. 85. Rachelis. 82. Salomonis. 103. Samuelis. 120. Zachariæ filij Barachia.	62	Thabor mons.	43
Sichar.	45	Theatrum Hyppodromicum Cairi.	175
Sidus S. Germani.	223	Theſaurus Tripoli effoſus.	2
tempeſtates in mari ſedat.	227, 128	Theſaurus Baſilicæ S. Sepulchri.	65
Sidon & Tyrus.	24, 126	in eo Selymo Turcarum Caſari non reuelando FF. Minorum conſtantia.	66
Siekierzecka, peregrina Polona.	57	Theſei labyrinthus in Creta.	18
Siloe natatoria à Turcis frequentata.	64	S. Titi caput.	20
Simconis Euangelici corpus incorruptum.	16	Tombeius Sultanus ſuſpenſus.	179
Simconis Euangelici domus.	81	Torrens Cedron.	62
Simon Cyrenæus.	79	Tripolis Syriæ ciuitas.	25, 126
Simonis leproſi domus.	72	Tripoliſtana nundina.	134
Simon Albimontanus, Presbyter Polonus.	139. à ſpectris in navi exagitur.	Tur ciuitas ad mare rubrum.	125
eidem B. Virgo in tēpeſtate apparet.	234	Turca purgatorium credunt, auiculas pro animabus deſunctorum liberantes.	29, 30
Sion mons.	105	Turca vino ſe ingurgitant.	44
Sitiorem ſuncbres carimonia.	237	Turca antiquitatem Ieroſolymis conſeruandarum ſtudioſi.	63
Spalati arbor.	98	Turca quas Chriſti memorias venerentur.	74, 102, 103
Spasmi B. Mariæ.	98	Turca Chriſtum crucifixum quare non credant.	74, 75
Spectra duo Simoni Presbytero in tempeſtate apparent.	231	Turca peſilentiam non fugiunt.	154
Stephani Polonia Regis de Authoris peregrinatione datum conſilium.	29	Turca pecunie cupidi.	173
non bene ſucceſſurum.	245	Turca à Chriſtianiſ ſaſcinari ſe credunt.	185
eiufdem bellum Gedanenſe.	5	Turca à Gracis Vaſallis ſibi cauere.	124
in Moſcouiam expeditio.	6	Turca in macello circumciduntur.	129
Stradiotta equites.	235	Turcarum militum licentia.	29
Strophades inſule.	17	Turcarum in Perſia clades.	32
Struthiones.	192	Turcarum ebriorum ſuſtigatio.	193
Sultanus Tombeius ſuſpenſus.	179	Turcarum ieiunium in Septembri.	194
S. Surridi Eccleſia & corpus.	257	196	
Syluani montis arx.	264	Turciſmum amplectentis Chriſtiani pompa.	128
Syria caua, vel Caſeſyria.	27	Turres ſanctæ Helena in promontorijs.	51
		Turris aqua ductus Cairi.	185
		Turris gregis.	86
		Tyrus & Sidon.	24, 126
		V.	
T.		Vallis Iofaphat.	60
Tarba pradonum oppidum.	145	Veſtigalis S. Sepulchri ſumma Caſari Turcarum annuaſim prone-	
Tartarorum Aſiaticorum Regina Mecham peregrinatur.	32	niens.	108

I N D E X.

<i>Veneris templum.</i>	250	<i>Vnctio Christi mortui locus.</i>	53
<i>Veronica domus.</i>	72	<i>Votum Auctoris visendi S. Sepulchrum.</i>	5
<i>Vestigia cadentis Christi in torrente Cedron.</i>	62	<i>Vrsinus Latinus in Candiam à Venetis missus.</i>	247
<i>Vestigium Christicum ascendens.</i>	74	<i>Vua passa Zacynthina.</i>	17
<i>Via dolorosa.</i>	78		
<i>Vicus Cairi abundantia.</i>	154	<i>Z.</i>	
<i>Villarum in tractu Cairi multitudo.</i>	169	Z <i>Achai domus.</i>	98
<i>Vini usus apud Turcas à Basis dependet.</i>	209	<i>Zacharia filij Barachia sepulchrum.</i>	62
<i>Viri Galilai, locus.</i>	75	<i>Zacynthus.</i>	16, 253
<i>Vitam breuem non accepimus, sed ipsi facimus.</i>	4	<i>Zacynthina vua passa.</i>	17
<i>Vituli portus.</i>	252	<i>Zara Dalmatia ciuitas.</i>	15
		<i>Zuele Moschaa Cairi.</i>	172

F I N I S.

A P P R O B A T I O.

HAEC Peregrinatio Ierosolymitana Illustrissimi Principis Nicolai Christophori Radziuili, nihil habet quod Christianam religionem offendant. Poterit igitur imprimi ad multorum ingenia oblectanda, & deuotorum animos pietate imbuedos. Quod testor xx. Iulij, anno M. DC. XIII.

*Egbertus Spitholdius S. T. L. Canonici
& Plebanus Antuerpiensis,
librorum Censor.*

S V M M A P R I V I L E G I I .

ALBERTI & ISABELLÆ CLARÆ EVGENIÆ,
 Archiducum Austriæ, Ducum Burgundiæ, Brabantiaë,
 &c. Serenissimorum Belgicæ Principum Priuilegio
 cautum est, nequis *Ierosolymitanam Peregrinationem Illustris-
 simi Principis Nicolai Christophori Radziuili, Ducis Oli-
 ca & Niesuisij, Palatini Vilmensis, Militis Ierosolymitani, &c.*
 præter Martinæ Plantinæ viduæ & Balthasaris & Ioannis
 filiorum Ioannis Moreti p. m. voluntatem, intra sexen-
 nium imprimat, aut alibi excusam, in Inferioris Germa-
 niæ ditiones importet, venalémve habeat. Qui secùs
 faxit, confiscatione librorum & alia graui pœna multa-
 bitur, vti latius patet in litteris datis Bruxellæ, v. l. Au-
 gusti, M. DC. XIII.

Signat.

Buschere.







